

晚香堂小品




中國文學珍本叢書  
 第一輯 第二十六種  
 中華民國廿五年二月初版

晚香堂小品

普及本實價六角  
 特印本實價九角

著者 陳繼  
 編者 施蠶  
 校者 張靜山  
 發行 上海雜誌公司  
 總發行 上海雜誌公司

上海總店：四馬路三二四號  
 廣州支店：永漢北路二三九號  
 南京支店：太平路二四八號  
 開封支店：中山北街二八四號  
 雲南支店：土主廟街四七號  
 成都支店：華興街中  
 漢口支店：湖北路中



初版本1—2500本

眉公先生晚香堂小品 卷之十二

雲間陳繼儒著

詩序

唐詩集註序

余纂有十異人傳。西陽唐君其一也。君四歲喪明。猶未受師句讀。問之八方五色不復有。若聲音點畫種種文字。懵如也。稍長。堅坐無所事事。輒以耳受書。從旁讀三番。旋卽記憶。久之。貫串經史諸子百家。及稗官言。而最喜作詩。有集行于世。多爲通人所賞。太守繩齋許公。延見賜粟帛。鹽臺修齡楊公。旌其廬曰耳學淹通。又捐俸爲君刻唐詩集註。而陳罔卿張參知諸君。爭資助之。其詩幾百卷。大約昉高棟正聲。及李于鱗選。而稍益之。精汰諸箋。附以己意。典而覈。裁而文。既不摶擊古人。而又鮮遷就附和之弊。譬如古太師審樂。清濁高下。皆從靜深篤摯中來。彼后夔季札。雖精專門。不逮也。世人不解詩。遂不解奇君。卽奇君者。不奇君博而奇君目。嗟乎。此未易與俗人論也。經云。天去地八萬四千里。吾曹仰天而見日月。則目有八萬四千里之分量。若無日月。又無燈光。目雖具。悉與唐君等。第世界人。但能以三光見。而唐君又能以不見見者也。其書無所不流覽。其箋

註無所不採擇。不握管而筆端有眼。千手眼皆備矣。今人六根具足。授以此詩。不解句讀。或以上註下。或以下註上。首尾顛倒。莫知指歸。間有因文解義。略雜音聲者。非熒火借光。則眼中着木。神子相似。試與唐君說詩。吾不知其明睛果安在也。古之異人。廢心而用形。今之異人。廢形而用心。好學如唐君。覺上帝之五官無權。而蒼頡之六書可廢。異哉。有目者得此詩而讀之。將無愧死也夫。

楊少詹甯澹齋詩集序

蘇文忠。仁宗朝有十三榜。數其前三人。凡三十有九。不至公卿者。僅五人而已。萬歷甲辰之榜。岷阜楊公魁兩元。海內想望其枚卜。大展經綸太平之手。而位不登上。衰年不稱上壽。往往致疑于天理。歸責于造化。將無蘇文忠之議論。果未足信歟。抑亦時異勢殊。前無援。後無推歟。頃皇上特敕公舊勞。贈少詹。賜祭葬。縮髮孤孫。齒于胄子。聖天子恩至渥矣。識者追悼公有出門折軸之恨。余曰。是何足以知我楊公也。卽以宋論。由鼎甲。晉公孤者。獨王呂不愧科名。其他或化爲飄風冷烟。或散爲飛蓬敗蘂。兒童故老。愕不能道名位里居者何限。而王龜齡張子韶。文山。人品才華。亘古今烜赫如故。然龜齡子韶以禪爲詩。文山以流離顛沛爲詩。使人憤。使人怖。使人掩卷不忍讀。讀不忍竟。公當神祖壽考作人之時。遼亮黔蜀。靜于安孟。士大夫耽談兵。材官良家子。亦未有舞劍弄槊。介駟馬而馳者。朝廷但妙選宿學巨儒。入侍光考。公等荷橐籥筆于鸞坡虎觀之間。退而賦詩。以咏歌至治。獻酬羣心。金石俱鏗。廉肉相準。藹然仁人之言。粹然盛世之音。公亦不自覺其和雅醇深。一至于此。此皆時爲之。亦公遭際然也。往吾友唐元徵謂余云。皇上深居法宮。數歲不朝參。羣上諸君子。裘馬

休休美食甘臥。惟吾輩講臣。聞雞盥櫛。急趨建章門。供奉東朝。每遇雪虐風饑。凍齒噬擊。暑雨驟漲。馬踏泥潭。中病不敢賜沐。勞不敢乞假。執掌憔悴。視封疆外吏。勞且百焉。余曰。如公云。講官殆無殘隙餘晷。而我讀崑阜楊公詩。字鍛句煉。思路微。紀律整。魚魚雅雅。無一語旁綴輕放者。何以故。元微曰。初楊君帖括之暇。喜攻風騷。駕輕就熟。神調筆暢。非入木天時。始造次學有韻語也。子直染其禁臠肉之一倪耳。元微公座師唐宗伯也。屈指此言。相去不二十年。光考纂服。講求遺簪故劍。思得講幄舊臣而召用之。元微騎箕。公亦遊岱。當時如霆如雷。朝野稱第一等人物。無復在帝左右者。幸詩之一百四十篇。不淪爲泰山碑。廣陵散。則次公局藏繕寫。與門生卓令君捐俸流傳之力也。若夫廷對類董生。典試類歐陽。橫經竭沃心之忠。掌制得代言之體。高文大冊。與旨宏詞。近可獨步一時。遠可垂耀千古。非久將懸國門。不令此詩孤行而已也。公識鑒精明。操履堅正。得王文成良知。及閩洛豫章講學之功居多。生平庭訓。惟清白孝讓爲諄諄。今朝廷世及之典。請之次公。而遜之猶子。其門風雍穆可知矣。官居金馬。養類木雞。科名之外。公別有與天壤俱敝者存。豈必朝脫碧紗籠。暮佩黃金印。人羨黑頭。帝詢黃髮。窮人間蔗境槐宮之樂。始大快然。天下事豈能一手把握之哉。公有道君子也。度必點首于余言。

### 脩園詩稿序

古詩云。因緣苟會合。萬里猶同鄉。此言定交之奇也。天寶間。李康成選玉臺後集。自陳隋而下。凡二百九人。而李杜高岑輩。與康成同時。獨遺選中。何況千秋重譯之遙哉。唐大來。才名噪滇中。以明經入對大廷。遊于

吳楚本寧太史修齡侍御。以及吾鄉董宗伯玄宰。贈炙其文不釋手。萬里論交。遇合亦已奇矣。而大來顧獨深。沉于詩。嘗讀其修園集。靈心道響。麗藻英詞。調激而不叫號。思苦而不呻吟。大雅正始。而不入于鬼詩童謠里。語方言之俳陋。卽長吉玉川復生。能驚四筵。豈能驚大來之獨坐乎。余嘗嘆陸賈南中行記。韋臯西南夷事狀。不經見。爲千古恨端。自趙宋玉斧畫大渡河。棄之異域者三百餘年。賢人絕附驥之榮。王道貽隔化之謬。賴聖祖恢還版圖。用修纂葺文獻。今南夷西隄之長。書積五車。樓名萬卷。或不得祕典與墳。則更相嘲笑以爲愧恥。蓋文明至今已極。而大來適生其時。發皇家學。模範先民。斯亦用修衣鉢之一助也。大來神用清睿。志意貞立。當安奢煽禍。貴竹爲梗。大來匹馬從嶺右間道行。上無飛鳥。下絕人踪。腰箭橫鞭。擊石吹火。凡七晝夜。始得出菁篠莽蕩中。繭足萬里。訪眉道人於空山。余震駭相勞苦不得怡。而大來謂吾友天下士。方自此始。真磊落奇男子也。今出其著作。與中原巨公相上下。得時而駕。則陸賈韋臯之流。豈獨以詩文行於象胥雞林而已哉。

馴鶴樓稿序

吳表東海。推王弇洲。楚表南岳。推李大泌。余不佞常侍兩先生談藝。而大泌竊有憂色。曰。詩文厭剽襲。則流而爲鑿空。喜鑿空。則流而爲杜撰。近且攙入方言里語。俳調俚詞。自詭爲回換一新。而不覺狂魔據其心腑。無文之言。能行遠乎。大有力者。欲出而掃除更新之。莫若以多讀書。少應酬。爲第一義。其在我鄉之錢長玉氏矣。不佞與長玉別數年。已魁壬戌榜。官戶曹郎。識者恨不以木天處之。而長玉獨否否。出權滸墅關。闕政荒政。傳播於四方往來之口。而立祠於五達水陸之衢。蓋古者有德有言之君子也。余涇涇。不願叩關。而長玉則寄

馴鶴樓稿示余。富哉言乎。得無啖綏山桃而豪。食哀家梨而快乎。長玉自少以千秋自命。雖治公車言。每飯不忘鉅鹿。釋褐以來。篤購今古異書。博綜該覽。醞釀欲成一家言。而數以簿領賓客奪之。然猶簡應對。謝獻酬。曷壁篝燈。終宵孤坐。仰而思。俯而讀。出之以橫口。橫心。助之以怒生。怒號。怒飛之筆力。滾滾乎。壹似洞庭雲夢之吐吞也。大招浮湘之吁駭也。椒蘭蘅沅之芬芳也。山鬼雲中君之縹緲恍惚也。明徽伊始。譽業方新。自茲以往。駕長轡。騁修塗。吾安能究其所詣。所謂其官可及。其年正不可及耳。王弇洲嘗語余。昔在爽鳩署中。日與于鱗手抄史記文選各一部。舉觥抽誦。以記否爲賞罰。卽大泌批閱周禮。以及南北史。皆有小識錄。他經傳稱是。二公讀書在弱冠後。未三十。在起家進士後。不自經生時也。積玉成圃。萃珠成淵。藝苑主盟。雷抨霆震于東海南岳之外。前茅後勁。楚實有人。今舍長玉其誰哉。長玉風神條暢。志意貞立。厭薄彫蟲。別有軌正督世之意。然滿腦肥腸。時溢而爲振世奇作。于役黔中。撰使楚記。參錯古跡。始末於雲烟過眼之間。大類山海水經註。視零陵圖志。長沙風土碑。奇麗過之。此記之創體。而王李集中之所無也。則發于讀書至足之餘故也。千秋大業。得長玉大有力者。負之而趨。直取邇來鑿空杜撰之陋習。掃除更新。使人復見左史屈宋之威儀。豈惟張楚競。卽弁洲大泌而後。代興無疑矣。故樂而敘之。

### 渡淮草序

吾師邇江及淮。春秋已七十五矣。不荷陶輿。不攝謝屐。興所至。必遊。遊所至。必贈答題詠。或巨公設醴。或同儕載酒。其他欽風問道。踵相嚙而叩者。幾不能容坐。而吾師悠然應之。曾無倦色。望見者以爲神仙。然四五

月之交。暑氣燔灼。霖雨徹日夜不止。低頭篷底。良爲師苦之。及見渡淮草。天真爛熳。老筆紛披。既可立驅旅懷。兼能坐忘暑雨。雖馳萬里。負五岳。何足難吾師哉。吾聞淮渦有水神曰支無祈。頸伸百尺。力踰九象。禹命庚辰。鎖大索。穿金鈴。置之龜山足下。而水患始平。今自淮以及吳越。水且稽天。將支無祈復出人間。則請何法以鎖之。師笑曰。我過潤州。訪米南宮之海岳。登金山。陟蘇子瞻之妙高。何意覓漂母金。亦何力與水神戰。子姑讀渡淮草。以示我之豪于游。且豪于詩而已。儒退而喜曰。師如是。其壽蓋無量哉。

五言詩序

張平仲使君居澹墅。日在水聲雲氣中。閉關以後。疏巾單複。但擁一編。爇一鼎。吸數升惠泉耳。曰。我飲冰焚玉。不愁權政。愁客至。頗妨清臥。昔關尹喜。僅一青牛翁。今四方貴游。輻輳度關。又無五千言授我。僕僕腰領。奈何哉。余曰。孔明不居成都而好居南陽。彼豈真戀戀隆中。直以南陽當天下之衝。因以延攬四方豪傑。而且得周咨時事。故語孟公威曰。中原鶴士。大丈夫何必故鄉耶。此可以識武侯矣。今權事誠不足煩使君。然賢士大夫道經于此者。皆欲識張使君賢。使君因得以議論物色三五豪傑。以備國家異日緩急之用。則澹墅官舍。故平仲之南陽草廬也。使君曰。余則安敢。且性懶不解酬對。惟除土種蔬。結棚覆松。一望西山朝爽而已。興至間一賦詩。詩亦不甚夥。五言詩。僅得三十餘章。僕讀之。骨蒼而韻俊。神清而調真。其虛和安雅之意。具見乎辭。非特劉長卿五言城不能抗衡。卽老子出關五千言。無煩強授書矣。

芙蓉莊詩序



吾隱市人跡之市。隱山人跡之山。乃轉爲四方名岳之游。如犂獨跳。不顧後羣。如獅獨行。不求伴侶。樂矣。然丹危翠險。梯腐藤焦。每欲飛渡。而空躡之。無乃非老人事乎。計莫若退隱田園。因作田園詩。張嘯翁許爲同志。和以見眎。并出芙蓉莊詩若干卷。屬余讀之。余笑曰。今詩人集滿天下。其投贈寄懷。率輦上君子。凡通顯有位望者。輒字之。幾于無等。至問其交情始末。或彼此不相識。卽識。彼亦不復能省記。而必欲臚次其姓名。以爲行卷。羔雁之贄。大都一仕籍而已。嘯翁憐而唾之。凡與交游唱和者。汰不書。所作皆分梅種竹。移菊藝蘭。時茶采藥。及料理農桑漁樵之事。事真。故爛熳而流便。興率。故簡至而酣暢。心細。故精綜而條理。品潔。故幽微而疎快。調高。故孤直而清迥。讀其詩。想見其胸次。且笑且啼。且傲且狹。且醉且醒。且仙且隱。日混村童莊客之中。而神游于時局苑枯向背之外。古者罷侯種瓜。逃相灌蔬。龐公條桑。雲卿織屨。其意念亦若此耳。四君子密藏邈晦。并文彩不少見。弔古者深以爲恨。而嘯翁尤幸有此集。流落人間。使人名利之心頓忘。烟火之燄盡息。雖逃世而救世之功寓矣。嘯翁數招余頗切。義不忍作鐵心人。終當一叩芙蓉莊。飲李公窪樽。臥皎然桃花石枕。醉呼張志和。汝會見而家嘯翁田園詩否。

### 借竹軒稿敘

元美王先生嘗曰。古之精刻於言者。往往不盡其本壽。楊子雲逃而息于玄。顏延之逃而息于酒。以此差過七袞。而要亦不盡然也。橋李金伯韶。自髫年慕古。喜爲詩。十九領鄉薦。與陳伯符齊名。皆未冠未娶。都人士詫謂一時頓有兩璧人。公車往返。忽遇賢豪。輒爲停驂駐轍。相與纏綿數日夜而後別。別則猶未能遺諸胸中。

往往見之夢寐詠歌。至于登高臨深。自泰山始皇廟。下邳留侯祠。以及齊魯燕趙之墟。蕭寺旗亭。練裙紈扇。無處非伯韶詩所在。淋漓跌宕。獵獵如驟雨怒風。筆落紙飛。強半爲從旁掣去。賀之囊。球之瓢。十而不得一也。余讀其遺稿。漢書評。小史論。淹雅精辨。大類洪容齋沈夢溪詩文典。則溫潤潔淨爾雅。芽甲之以性情。蕭括之以紀律。上窺陶謝。下亦不失錢劉。識者目爲祕書金馬之才。而遽赴上帝玉樓之召。良可哀已。伯韶秀結英飛。絕塵自上。常欲悉出精銳。一當海內文人。使之面縛脚壁。束手於軍鼓之下而後已。然而秉尙清虛。好與老僧共論楞嚴微旨。壹似子雲之逃于女者。六擯南宮。略不以此屑意。三雅而醉。三商而起。客至弄觚。仆斗復如初。高談霞舉。微言風集。壹似延之之逃于酒者。夫逃于玄。逃于酒。而又不及楊顏中壽。弇洲王先生之論。然歟。否歟。公朗九齡亡父。便能讀父書。泣叩慈帷。訪求遺稿。殘璣斷璧。悉從蛛絲蠹腹中得來。其幾不爲廣陵散者。倅矣哉。伯韶無年。尤幸有子。故重公朗之請而敘之。

醉吟草敘

吾友吳鳴球。以山陰名家。隱于婁江。婁江自王司寇奉常遊岱。海內騷人墨卿。不復至。莫適問主盟者。獨鳴球與李伊玉遊從甚數。更相飲。更相賞。更相倡和。而吳醉白。啣杯抵掌其間。睥睨噉名兒。幾不復安之。眉睫上。三君嘗過余論藝。余謂鳴球曰。山陰有王季重。詩文橫絕一世。錦人機錦。玉人攻玉。非王季重不可。鳴球肅衣問道。擊節不容口。因徧贊于座客。倪太史諸公。人人恨得鳴球晚也。鳴球詩清快犀利。闡然有古色。正如寶劍三千。埋闔廬墓下。時時向山椒樹杪間。騰發夜半光怪。豈不甚奇。若進而渡錢塘。試問武肅王射潮之弩。非

以弩勝。以氣勝也。又進而遊會稽之山。禹會玉帛之諸侯者萬國。濟濟鏘鏘。來賓來王。此非以氣勝。以禮樂勝也。鳴球自山陰歸。其詩精猛蹶張。大有氣。法度森嚴。又大有禮樂。合吳越之勁。盡洞入詩中。而生平酒人俠士之剛骨。亦稍稍見焉。豈得醉吟之助乎。卽以此名詩草可矣。

### 竹香齋詩敍

余訪武山葛氏兄弟。得詩壇于桑篠中。蓋伊祖老楊居士。與吳門文徵仲。唐伯虎。嘯歌處。宛轉數十弓。則實甫竹香齋在焉。昔宋南轅諸名公。或扈駕以從。或遁而散處。歸洞庭。閉門課子。暇則種花藝菓。以爲樂。故洞庭極有古風。其子孫賢者。更數十世。往往遵禮導義。好客能文詞。此實甫葛君其一也。君樂從長公震父游。讀書日苦。而詩日益工。玉琢錦洗。填唱箎和。其詩清真幽淡。率以襄陽輞川爲宗。卽近世聲調如王李。流便如袁中郎。海內豔而習之。而實父獨不爾。又屏跡山澤。力追古道。凡少年通脫排率。豪士鉗忌罵訶。俱葛氏兄弟所掩耳而不願聞也。識者欲避世洞庭。惟葛氏可以結隣。卽入山尋伴。相與行吟于峯巔水涯。舍實甫兄弟。莫適爲主。亦鮮有登壇授簡而當詩敵者。實甫詩。本諸性情。興至則吟。客至則和。響之春鳥秋蟬。聲響非昔。而光景常新。此真山林中之鼓吹也。王季重恨兩洞庭峯筍不蠹。壑布不飛。願請之于帝。以巨靈胡膏。詔入台蕩。亂剪數十峯來。仍割其棄餘泉瀑二十通。銀飛雪掛于花山縹緲之上。而游始快。余謂兩洞庭已饒有奇勝。所不足者。豈山水哉。但少詩人如實甫兄弟耳。實甫何如。曰有竹香齋詩艸在。

### 倚劍亭草敍

余纂逸民史二十卷。曰逸民如野燒。草灰而根存。亦復如夜書。燭滅而字在。此史之所由作也。陸州有逸民介如汪公。垂髫學聲偶。見賞通人。縫衣數十年。增燈不第。退而課子授書。諸君皆通籍貴顯。而比部客星君志操尤異。公笑曰。兒能是。翁復何憂。惟有掀髯捫腹。作太平老詩人耳。公詩有倚劍亭草。其味物描寫最巧。其紀遊敝狀最工。贈答纏綿而有情。寄懷感慨而多致。吐納清真。驅使流便。讀之如在喉嚨胸臆間。而不知公之朝組暮織。日煨歲煉。所謂筆隨人老者也。大抵子弟憑藉父兄。流而爲驕。父兄憑藉子弟。流而爲愚。爲俗。公榮利不知。生產不問。飲食惟詩。寢處惟詩。幾忘其老之將至。公常有句云。苟無著作千秋業。何限漁樵七十翁。髮短心長。自負不淺。蓋公以公重。雅不願以子重公也。釣臺千尺之絲。若絕若續。垂唐而有雲英先生。結廬白雲村。垂宋末而有瞻髮先生。無日不遊。無遊不飲。無飲不痛哭。此雖凜凜高風。而至今稱述人口。則大半亦以詩故。今公有詩草流傳。非惟見公精神文采所由寓。卽身享五朝康寧之福。目擊諸子志節之賢。視方干謝翱。遭際幸不幸何如哉。故樂而敘之。且以譜諸逸民之史。

題秋潭詩鈔

余交秋潭師三十年餘矣。非禮不動。卽動亦不可得。時然後言。卽言亦不可得。晚投黃葉庵。修竹百竿。老桂一樹。村深水曲。雞號燐飛。一味閤然塊坐而已。第師名自微而顯。客造請無虛日。然僅見師者膚耳。若其容與出沒。如鷗戲春海。飛動險快。如龍躍天門。卽唐宋以來。詩人之能言者。未之或先也。師究心生死。一切語言文字。直作鸚鵡嬌。秦吉了。無復置輕重胸懷間。而讀其詩。則居恆枯木寒灰之意。隱隱見于筆端。昔人謂詩不

在廊廟不在山林而在方外信非虛語昔于頓守吳興集賢殿御書院有命特徵皎然集頓遂探而編之納于延閣書府此事豈可望今日第詩中有元紫芝僧中有黃叔度而不以招示來檮皆吾黨之故也故熙時屬陳子叙而傳之

### 吳凝父詩序

癸丑結夏洞庭先有私戒此去科頭抱膝非詩人不見既至翠峯山居履綦栩栩有客不通名而唐突特甚麻衫草履余蓋望而知其爲吳凝父氏也凝父故名冢性不喜山中卓鄭之習而顧獨嗜詩詩清遠娟秀本之以情性而擬議之以古人久之自成爲凝父一家言當其研深入微處真堪與王孟入林而其次亦絕無郊瘦島寒之病貌得凝父者或咤其骨見衣表疑以爲深山道士而余每手其詩輒謂數千年西子之黛不在東西洞庭而在凝父詩卷中可一覽得也凝父素心欲髡髮不可得拾松枝酌清泉以獻母退則自詠自歌其跡跡半在笠澤蕭寺間幸而得志爲垂綸捧釣之志和筆床茶灶之龜蒙不幸貧以老則依浮屠氏如陸鴻漸擊木痛哭發之爲長吟短謠以寓其畸人猖者之意而已故自序其詩曰寺稿者以此

### 曹儕孟詩卷序

畫由禹之鑄十二鼎始也後世緣而爲畫畫幽風及鎖諫之類以寓諷焉故雖出于繪人之手而其迹則附經以行自宋立畫院使諸人待詔其中率以粉墨賈寵于是繪賤而高人奇士如黃癡倪迂者僅以酣歌廓落之韻寄之山水率非爲名也夫詩亦然詩始于康衢之謠徵其音足被絲竹然而未嘗有意于詩也豈惟三

代。卽曹孟德簡練軍旅。不帶器以詩擅名。獨時露于橫槊飲酒間。至子建以才著。而意緒大可憐矣。故詩者。英雄男子之唾餘。非千秋物也。詩至曹儕孟神矣。亮節激響。如吐商金而叩哀玉。蓋嫡視晉魏以上。而季孟開元大歷之間。儕孟于此道何所不有。然豈足以盡吾儕孟奇也。生平少有奇略。方將服乘海內之上駟。以立見其穎。曩者制舉一出。往往折其曹耦而屈之。茲特儕孟之餘音剩馥爾。譬之芙蓉紅樹。足以裝綴溪山。第謂能盡秋色。未也。雖然。今人見王癡倪迂畫。千載而下。如想見其磅礴不羈。睥睨一世之意。今手此一編。其亦可以見吾儕孟也夫。

陳無非詩序

古人生同時。習同事。美不能兩勝。則名必有所掩。名爲所掩。則兩相遜避。獨割一席以擅其名。夫水火之不相親也。子午之不相見也。蓋各司其事。而卒之火燥水濕。子進午退。皆有以相化工。而載陰陽之權。以收利于天下。吾鄉陳無非爾有振長三君。皆俊年也。峯泖磨盪。結爲彈丸。乃有三子。分茅而聚國于文壇之上。所治詩秀可飡。翠可滴也。一掌之地。安能勝三子。顧無非竟以偏師擣浙士之窟。而空其羣。以麗祖宗之苗裔。爾有兄弟。燁燁雙壁。掩映崑陽。昔儀秦二子之縱橫也。西秦六國分符而相。張長史與顏魯公同學正書。知不可敵。退而悟舞劍負薪之法。爲草聖以名世。龍德在中國。猶龍公出函關之流沙。所謂日月不並生。兩賢豈相厚也。今無非畫浙水而伯。爾有兄弟。畫泖水而伯。而詩名熾然。皆能樹奇于兩國。而各不相掩。三君子其亦有古人之心也夫。

戴元鎮詩敘

戴元鎮既成進士。天子賜休沐歸。爲謝一切郡國守相。及賓客之羔雁。乃從修竹岡下。發其故所埋詩草。手理之。其門閭寂。如給孤園。而其據梧詠歌之聲。遠與浦上濤相韻也。業成。貽書陳子使爲序。余惟元鎮之道昌矣。顧何取于山澤之言。而強以糠粃前導哉。甚矣元鎮之好奇也。廣南之人。孔雀以爲腊。鸚鵡以爲膾。而獨烹蒲菹藟筍以供客。仙人道士。高冠峨峨。長劍陸離。而不能舍芙蓉之佩。薜荔之裳。甚矣元鎮之好奇也。將無類是歟。元鎮爲諸生時。其志已在千古。象緯以前。鴻寶以後。皆朝暉而暮漁之時。一奏韻語。祕不示人。第形與影。賡和而已。而顧獨曜余甚。以是盡發余以枕中之奇。余讀之。松風度而孤鶴鳴也。酣其破章邯。而靜者入淮蔡也。雍雍肅肅。選伯玉之車音。而孫真人之嘯聲也。疎疎莽莽。灌壇之風雨。而蛾眉秦岱之積雪也。君之技何。以遂至此。元鎮負經世之略。而多遺世之志。其名落風塵馬蹄間。而其夢長在江鷗野鹿之外。卽使啗無一言。故大曆詩格中人也。况悠然矢天籟。而吐清商乎哉。元鎮未遇時。嘗乞崇明一塊土。爲博士弟子師。胸中感慨。舉落之氣。悉付波臣滌之。已復挾其所謂烟雲百變者。盡發于文章。而乘海之筏。遂爲浮漢之槎。今詩特君澗渤之一勺而已。元鎮孝友忠信。不言而躬行。其吏材如鯨擲鵬起。人必有能物色之者。而世顧惜君。不與三尺之藜爲恨。夫青蓮浣花。豈盡老石室間哉。且石室諸公。無不束錦。願一當戴先生。則元鎮自饒有千秋矣。

汪希伯詩草序

吾嘗與山中友人夜談曰。吾輩詩文無別法。但最忌思路太熟耳。昔王元美論藝。止拈易所云日新之謂。

盛德。余進而笑曰。孫興公不云乎。今日之跡復陳矣。故川上之嘆。不曰來者而曰逝者。人能覺逝者爲窠臼。爲糟粕。而肯戀戀于已嚇之腐鼠。不靈之芻狗爲哉。天馬拋棧。神鷹擊鞵。英雄輕故鄉。聖人無死地。彼于向來熟處。步步求離。刻刻不住。此謂眞解脫。此謂眞喜捨。此謂日知其所無。右軍萬字各異。杜少陵千首詩無一雷同。是兩公者。非特他人路不由。卽自己思路。亦一往不再往。嘻。此吾所以重賞于希伯也。汪希伯新安名家。客華亭爲寓公。杜門苦吟。其思路甚異衆人。近者使之遠。夷者使之險。淡者使之雋。蓋詩道之至新也。新則變。變則傳。何疑。若夫穿天心。射月窟。騰玉價。走珠聲。人與骨皆已朽矣。我希伯能之而能不爲者也。

姚叔信詩集敘

余讀青蛾居士詩。旣已敘而傳之。居士姚叔信。先生之玄孫也。已欲訪讀叔信先生集。其孫爾肅出之。襲錦中。爲一奏余。始知姚氏子孫之騷雅。蓋自叔信始。叔信當時倡和者。皇甫子循。豐存禮。周公瑕。文休承。吳少君五六人。此一時詩壇老耆宿也。先生與子循輩皆已物化。其碩果不食者。僅一金華吳少君在。少君曰。病猿驚鶴。不與世相馴。而少年走名之士。喜僻躡朱門。亦遂不復物色之。今支離蕭寺旁。與破瓢短杖相語而已。少君每謂余。秀水有姚叔信者。眞詩人也。今老死。其人不可得。余聞少君語。退而按其詩。清真恬和。溫雋安雅。盡唐人之矩矱哉。三唐姚氏。最以詩名者。惟姚合與鵠而已。以合之閒居二十首。鵠之綿州諸篇。置叔信集中。莫辨也。叔信掩抑藏匿。不肯噪目前區區尺寸之名。至爾肅出。始能名姚氏一家言。人之不可無子孫如此。吳少君無子而鬚髮尙無恙。錢茂穀趙汝師尙能梓其詩以傳。如周公瑕八十而後無聞。度生平著作。非并入筆塚。



便作太山無字碑矣。可嘆哉。余以是益重爾肅之能不亡其祖也。爲敘之以告詩人之有後者。

### 顧仲方詩敘

昔人論詩。最以詠物爲難。非胸富五車。不能驅使。非識超三昧。不能剪裁。非巧手終輪射鵰。非肖形反嚮畫虎。此其解在有意無意之際。若離若合之間。求之藝林。得仲方顧先生焉。先生吾鄉之禮樂名家也。生平嗜文史。癖泉石。其綺歲聲已籍籍。晚益名噪都下。所著有闌玉稿。筆花樓新詞。公卿士大夫得其片言。無不以爲青鳳毛白狐腋也。先生以乙未奉簡書餉邊。出入諸將軍戰壘。及胡沙宿莽中。黃雲凍月。落落馬上。爲一聽蘆篥。醉葡萄而歸。歸買柞媿。順河流南下。途次寂寞。因于叩絃之暇。賦詩以消客况。不一月而得百篇。黃頭奴驚聞篷底五色雲起。則先生之咏物諸什在也。先生嘗以示余。余讀之。綺不傷質。豔不傷骨。巧不傷氣。奇不傷格。可謂斲輪之妙技。拔俗之兼才乎。蓋君家顧氏代有異人。而先生猶能總領大雅。冠冕東南。其結爲名園。饜綺閣古木。及烟雲之勝。則辟疆遜麗。老筆酣勁。前無古人。則虎頭遜奇。四方名賢至者。爲下榻投轄。日相與焚香煎茶。摩挲鼎彝金石以爲快。則阿瑛避俠。今天下雅道寥寥矣。仲方者。豈非一代之魯靈光哉。至于咏物之作。特得先生剩餘。余故攜其生平敘之。使海內士大夫知所以重先生者。不獨讀其詩。而且以定先生之品爲千秋人也。

### 文游草敘

余睡茗帚菴。彭君宣自大梁來。排闥直入。造次如平生。或曰詩豪。或曰節俠。余熟視良久曰。千尺擎天手。

萬丈懸河口。其古之豪雋大人耶。留之小飲。送舟次。握手不忍別。余曰。夜分矣。公無渡河。君宜指臆。獲笑曰。此曹皆鐵小兒。善刀槩。飲矢百步外。取悍賊如取兔雛子。無慮。因長嘯而去。至是遣長鬣。颯風雨歸莊。圖一幅。文游稿寄余。不覺大叫奇絕。奇絕。董宗伯嘗作佘山山居七言律。見者豔其詞之工。畏其韻之險。君宜舟行不數里。茗熟不數刻。和詩遂得二十首。最敏捷。最俊爽。最天然。慰帖。皆吾兩人思路中所不到也。君宜擁侍御藏書。數萬卷。栽名花數千種。往來多豪傑士大夫。傾海內交游之半。凡獻酬登眺。哂笑嘲謔。往往發之翰墨。筆札間。奔逸而爲長江大河。震響而爲飛霆走電。不雕不琢。不僻不澀。不瘦不寒。直嘔其性靈之所欲言。乃大快。以君宣才華雄傑。議論英偉。若置之緩急要津。笑揮白羽。怒裂黃麻。明目張膽。慷慨爲國家擊畫。中外大慮。必能使樸稜手。嚼嚙翁。唯唯悚懾於楯陛之下。敢出片語相送難哉。韓魏公生平未嘗許人以膽。君宣真其人矣。君宣曰。唯唯否否。吾家牡丹。異色如斗大。秤之可得二斤許。開時。遣飛騎送入山中。子先爲作詩。敍寄我。時事如此。除花與詩外。勿復多言。陳子曰。卓哉君宣大有識。以識輔膽。天下事何事不辦。嘗獨詩文。敍其詩。同舒元與牡丹賦寄之。卽以代徵花券。

醉禪草敍

商山吳醉禪。訪余白龍潭。恂恂篤士也。已出其詩草示余。多有今昔人不會拈出者。余咄咄嘆賞。出入懷袖間。而君自署曰醉禪。當其瘦行孤坐。冥索窮搜。雖鬼神莫能窺其思路。至於酒醺之後。伸紙揮毫。不覺溢溢膏餘。英飛秀結。醉乎禪乎。詩乎。其在三昧十地之間乎。昔管公明與子春談。飲清酒三升。然後雄辨縱橫。無敢

對壘王洽之畫。張長史之草書。醉時頭漬墨。藩中而書畫神采百倍。酒之不容已如是夫。余酒量當下下戶。故詩思無所醞釀。頗類枯澗之水。上瀨之船。若吳君人龍復酒龍也。鞭雷斥電。雷雨之動滿盈。復何疑哉。君自今以始。請封麴部尙書。藝林祭酒。而退院老禪和。則以遜之眉道人何如。

### 玉鴛閣詩集敘

橋李故范少伯西子之舊游也。南湖水落。甍臺之明月猶懸。西郭烟銷。綉榻之彩雲不散。遂使當年之紅粉。幻出絕代之青娥。祕枕異書。結禰名士。陽春賡和。鸞鳳鏘鏘。子夜于飛。蝴蝶栩栩。肝腸如雪。能吟柳絮之詞。志節凌霜。直擬木蘭之操。筆床茶竈。不巾櫛閉戶。潛夫寶軸牙籤。少鬚眉下。帷董子。烏銜幽夢。遠只在數尺。臆紗。蛩遞秋聲。悄無言半。竈燈火。手翻貝葉。十指生香。詩嗽蓮花。一塵不染。煨煉成慧心道骨。惟知織素流黃。洗刷盡綺語豔歌。真欲惡朱奪紫。若向公車待詔。必然金馬祕書郎。可憐洞府修文。竟作玉皇香案吏。秦簫頓咽。范叔何堪。痛丹鉛已蝕于烏絲。幸綠字尙縈于蛛網。是用收遺文于琬琰之上。掃人間粉黛三千。庶幾續清韻于騷雅之餘。振古調國風十五。縱饒寶韜妻織錦。焉用文之。卽遣衛夫人吮筆。啜其泣矣。

### 眉公先生晚香堂小品卷之十二終

晚  
香  
堂

眉公先生晚香堂小品 卷之十三

雲間陳繼儒著

時文序

唐道徵文敘

唐道徵性地孤直。面目嚴冷。自讀書掩戶而外。斤斤如也。故其文恬靜貞潔。有吉人之風焉。如其人矣。既舉廷試第一人。海內有欲行道徵文者。于是唐子問序于陳子。陳子曰。唐子志士也。而猶欲以文行者何也。唐子曰。爾不見瓦石之在地乎。小兒羣戲。或削以爲碁。或累以爲塔。老人長者。過而見之。則笑其穉且鄙。然方其爲碁與塔也。小兒其忍遽釋之乎。以小兒之耳目手足。悉縮而聚于瓦石之上。則瓦石尊矣。吾非欲尊吾文也。吾將以吾文爲碁爲塔。相與兒戲焉。何不可也。至于日暮羣散。一笑而已。又至于升冠戴弁。不習兒弄。儼然如老人長者。思之亦不過一笑而已。吾又將以吾文與天下爲碁爲塔。相與兒戲焉。已。公此一笑。何不可也。陳子聞之曰。有是哉。唐子之言也。其言幻矣。其言幻。故其文亦幻。吾乃知唐子之于富貴。必以浮雲相命者也。雖然。天下國家。非瓦石也。異日由狀元作宰相。執虛捧盈。若爲碁爲塔。惴惴然惟傾仆之是懼也。則幾矣。不然。吾懼

小兒之攘袂而笑子之後也。唐子曰善。請以敘我文。以代紳語。

董玄宰制義敘

予與玄宰並游膠庠中。若宮商相生。水月相赴。大兒玄宰。小兒仲醇。世之人靡不左袒兩生。爲齊晉兄弟之國。自予裂青衿。投檄郡長。而玄宰亦遂舍學宮。鼓篋而北游于橋門之下。遂儼然改玉。若取諸寄。天下于是盡知有董生。然而盡董生奇者。十而不得一也。董生精于玄。詣于禪。黃冠緇衣之徒。往往鎖口閉舌。若飛蟲之當黃鵠。而野干之遇玄象。若至其灰燼糟粕。嬉笑怒罵。發而爲詩歌。爲法書。爲繪烟雲樹麓。則奴隸一時。而季孟千古之上。嘻。幾于不可知矣。故自舍舉子而外。海內有能盡董生奇者。十而不得一也。董生之廉重。不敢爲非禮非義。而薰煉淘洗。必欲至清遠而後止。此其意。兩生略相同。但三教之業。予讀書不求甚解。而董生心如墻壁。予薄乎云爾。而董生若勘疑獄。而探虎子。蓋其疎密不相對。深心淺心之不相償。此非獨今日。所謂李廣程不識之兵。得之性成。非可強也。今董生龍舉。陳生鴻冥。雄飛雌伏。火燥水濕。各成其是。而悠悠之徒。或借董以窺陳。有投予以雞肋。而嚇予以腐鼠之肝者。嗟乎。丈夫不再辱。豈有高臥清涼之蔭。而復置公鼎俎。其肯舉裳而就哉。昔東坡欲以仇池石。易王晉叔韓幹二散馬。晉叔難之。錢穆欲兼取二物。蔣穎叔欲焚畫碎石。竟成聚訟。予請以石歸蘇。以畫歸王。今日請以陳生歸陳。董生歸董。

楊彥履稿敘

彥履之文三變矣。其始也。如寒潭清澗。空綠射人。已而讀書金匱。則虬嘯鯨擲。往往挾風雨而上。已而至

長安。則離離肅肅。安重而寬廣。如蓬伯玉之車音。蓋其文三變。而變幻多。則知者愈少。秦越人伯兄之聲不出家。仲兄之聲不出鄉。而伯樂之教子相馬也。不以千里而以百里。曰。今天下盡欲乘百里馬者也。彥履之文神矣。乃時時爲南宮所屈。彥履笑曰。我以神往。而彼以形求。我道是耶非耶。請更進焉。我將進于百尺之竿。三寸之鈎。以遊戲而弄丸焉。于是閉門著書。日供花一瓶。碾茶一餅。出篋中數束文。爇異香讀之。昔張燕公攜文謁友生。時正得宮中媚香。號化樓臺。友生焚以待燕公。燕公出文置香上曰。吾文享是無忝。蓋彥履之文亦如是。

### 鄒公履稿敘

吾松峯九。僕得其三。縛茅種樹。絃歌其中。與一二野衲逸民。共結人外之游。高座授經。非余好也。然又不欲爲矯分抗情。門外屢至。輒便引內。間日流連。如所謂斗酒相娛樂。奇文共欣賞。此語僕誠有之。往歲鄒公履來訪。以文奏余。余灰心此道久矣。讀之不覺橫挑伎倆。蒲團之上。眉舞肉飛。噫。君之文。乃能奪我乎。夫越石却胡。劉根召鬼。此以聲奪也。趙娣入宮。邢夫人望而泣下。此以色奪也。漢徙新豐市。不失尺寸。卽雞犬皆認識其家。此以格奪也。謝玄以八千人。當符堅九十萬之衆。楊行密以三萬人。當朱全忠八州之師。此以氣奪也。高孝珩鳩避畫鷹。黃荃鷹掣畫雉。李伯時寫殺一川花馬。此以精奪也。又其至者。如魯陽揮日。錢鏐射潮。神仙奪陰陽之數。忠臣孝子奪君父之心。變化窮極。不離方寸。而況區區文章之小技乎。公履筆有口。文有膽。江東之才。無出其右。而又沐浴于家學珠玉之淵。其文馨香味色。與夫格調神情。種種奇幻。殆不可以知知識識者。卽不佞灰心道人讀之。且無所不奪。則其能奪主司之鑒。與造物之權可知。僕旁觀人。當自不妄。無已。請質之君家。

學憲先生

楊去奢制義敘

吾友楊去奢。恬淡寡慾。落落穆穆人也。古今文。妙絕一世。北面執經者。傾遠邇。時流投之友則友。不喜走少年場。相國聘之師則師。不喜逐大人游。遇飲則飲。不沉湎。遇弈則弈。不惡戰。遇詩則詩。不苦吟。同舍生及及門弟子。強半爲顯人。華裾駟馬。呵噉巷陌。訪求楊先生。不拒。去亦不報謝。釜憂疊恥。不聞嘆息聲。及怨尤可憐之色。語云。火知三日玉。貧試一生心。去奢之語矣。去奢試每高等。食餼心厭之。又無資以入國學。意將罷去。行游名山。陳子戲之曰。此欲祭酒不得臣。學官不得友也。自古業左而數奇者多矣。公孫弘嘗退歸海上。四十學春秋。鄉人再推爲射策。遂第一。劉向數十上書。每聞報罷。後以穀梁春秋議三十餘事。終爲漢名臣。夫功名寧有定局哉。功名早。父母受其福。功名晚。百姓受其福。而已何與焉。去奢之制義。今之公孫劉向也。其晚合無疑。僕請爲去奢梓之以傳。昔如明珠之光。光還自照。今此珠一出。照乘照千里矣。俟去奢異日名遂身退。然後與陳子逍遙人間。春泥中踏鬥虎跡。孤峯頂聽凍猿啼。余未老。猶能摩洗雙眼待去奢也。

雕蟲草敘

昔李鄴侯勳名已就。度無可談者。則託之好談神仙。而蘇眉山之才高。則好談鬼神。是二公者。意在玩世。故其言可以得已而巳。若制舉義。雖英雄白首。困頓于藏鈎射覆之中。而必欲援之以涉世。則其言又不得已而巳者也。吾友范長倩。袁吉卿。雷元亮。意氣飛揚。落落不能甘雕蟲業。而時一俛首爲之。皆鼎足藝苑。各



秉地靈。吉卿元亮自江右。故其文如潯陽之水九分。而彭蠡爲之匯。廬岳千仞。屹然鎮之。而星渚壽樟之奇出焉。長白自江左。故文多雋勁。有東吳霸王之風。俠魄鼓盪。吞震澤者八九。三君子畫江水而分兄弟。雖操技不同。要之宮商各自爲音。孔墨各自爲治。其于弼拂大雅。以暢所欲言。則皆千里比肩者矣。長白吳鈞也。吉卿元亮豐城之鏢也。東南寶烝。漸耗未盡。今日鳴且躍。而出墓宮三千。與埋獄片鐵。精爽相射。不至嘯風雲而合雙龍不止者。不佞以閒道人。第取兩丸投空中。一觀其騰擲翔舞耳。雖然。三君者挾神物以遊世。而當今關右遼左之上。魍魎翕張。其尙能進而從事於賈長沙之長纓。班仲升之秃管乎。三君奮袂曰。能。能。不者。陳先生其不以是編爲談鬼神神仙者幾希。

### 虎嘯軒稿敘

少年好談俠。俠者。特英雄之殘瀋餘唾也。吾授經於弇洲太原家。兩公推轂顧益卿先生。不去口。客曰。大俠耶。兩公目攝云。是何言。造物千椎萬鑿。始鍊得顧益卿一人。爲國家緩急之用。張中丞肖甫定浙中二變。全賴其力。已鎮遼陽。鼓舞李家父子。節縮金錢數十萬餘。蓋將大創三韓。使東陲數十年無事。而與朝議左。其金錢悉付之後人。徒手南歸。與故交諸父老轟飲。一似貧措大耳。英雄哉益卿也。先生嘗以書招余不得赴。而時時從王崑崙郵筒往來。王崑崙者。先生兄事之。當撫遠。築亭儲酒以待崑崙。崑崙執操堅。不肯單騎度漁陽。作蓮花幕下客。先生分俸。及紫團參貂襜褕爲餉。以成其介介山林之節。海內由此兩高之。先生之子玄岳。以崑崙崙待予。予遜不敢當。今出守南雄。最有聲。玄岳之子元善。頃拜平湖令。卓異踔絕。鄰郡邑有兩造者。皆願搏頰。

質成於顧令君。心乃服。英雄故有種哉。元善寄虎嘯軒稿示余。讀之嘆曰。夫文亦猶虎矣。題有鬥。有糾結。而元善解之。則跋摩異僧之杖也。題勢猛悍。而元善格之。則楊忠之左挾腰右拔舌也。見題神而不見題。如見虎而不見石。則李將軍廣之飲羽沒鏃也。以元善才識膽略。本之英雄。而英雄又得之家授。文章小伎。筆墨偏師。烏能展其八面才之萬一。卽當湖斗大。直談笑一彈指間。方今東省黔蜀。貌若粗安。瘡痕未起。流亡未復。全遼千餘里。淪爲旃酪之侏僂。奴且餌西虜之犬羊。漁朝鮮之螭蚌。視門庭寇綏。視門戶戰急。豈復顧先生左司馬時耶。沈僧照嘗校獵中道而還曰。國家有邊事。須還處分。問何以知之。曰。向聞南山虎嘯耳。俄而使至。元善之有虎嘯軒稿也。獨俠於文也乎哉。英雄之意念深遠矣。

探珠草敘

吾嘗恨范少伯報吳。沉着而不痛快。伍子胥報楚。痛快而不沉着。惟子房兩無憾焉。其他詩文而至韓杜。書畫而至顏魯公吳道玄。皆足以當之。不意垂老。得見孫楚惟探珠草。恨未見其人耳。吾聞楚惟異才博學。嫻古文詞詩歌。業已板行於世。大噪人口。而又驕雄魁岸。工騎射。善食酒。飲數百斗。精明不亂。抵掌古今朝野。天人王霸之辨。皆鑿鑿曉暢。中情實。將相門風。楚惟肩之矣。楚惟嘗省覲榆關。腰弓插矢。平頭單絞衣。控匹馬往來。關吏候人。不知其爲孝廉。且不知爲樞相子。樞相臨戎。楚惟陰爲運籌。大有所補益。推轂正人。夾袋名將。世人不盡知楚惟。楚惟亦不願以此見知於人。其居恆沉着痛快。皆此類。而又何疑於文哉。楚惟苦心於文。正如珠藏於淵。而欲緹數萬丈不測之底。索而求之。雲霧滄生。霹靂怒鬥。其不與珠皆沒者幾希。今得珠如丸如卵。

如大月光明陸離。幾不免爲南宮按劍。吾誠未得其解。雖然。智者不問珠而問龍。不問龍而問人中之龍。楚惟人龍也。方且抱珠熟睡。而又誰探乎。獻孺曰。眉道人何以知之。陳子曰。孫思邈與老人語而驚曰。此必龍無疑。蓋口涎香也。今楚惟字字皆香。非龍而何。世目雖憤憤。寧渠出賈胡老波斯下。必有購君之珠。而重譯獻之者矣。

### 紫玉玄居選敘

王臨川云。吾欲變學究爲秀才。不意變秀才爲學究。嗟乎。今學究且變爲老禪和矣。古經史棄勿學。日取零星貝葉之文。渾入於經生言。至名儒不能句。而翰軒使者不能譯。久而讀之。使作者身讀而前覆之。如探他人書。亦往往咯咯喉齒間矣。夫傀儡優笑。試於王公大人之前。未有不厭且卻者。而鄉人小兒。驟得之以爲驚。再得之而目定神搖。至形於指畫贊嘆。魂夢心語之間。則何者。以其未嘗習也。習之既久。味淡而識定。心精而辭約。其言自有不得而不平者。劉歆之古文。楊雄之奇字。史遷子瞻。夫豈不能之。而顧爲此不爲彼。則善言易者。不言易耳。豈惟兩先生。雖禪家之語。飛烟噴雲。幾不可以知知。以識識。而所爲本分鉗鎚。尋常鑪鑄。故在也。今經生家乃欲乞其獮祭之餘。飾而爲虎皮之質。豈不悲哉。吾友項希憲。清真遠俗之士也。所爲文。能以名理輔藻。續而行。其哀集交游之作。汰洗險歹。鬱然先民。卽臨川所謂大秀才文章。皆在焉。余喜近格之一變也。題數語歸之。

### 王昇之制義敘

往昇之下榻。余者一年。兩人每從眉睫間語。退而閉閣如壁。觀僧終不交一言。余略無介於昇之。彌加歎重。昇之亦久而安。如是別者又九年。兩家前後趾錯。或竟歲罕通一牘。類引避者。老氏有云。至治之世。其民雞犬相聞。不相往來。蓋似之矣。乃余數數謂文宰。開吳。今天下不可得而親。不可得而疎者。昇之其人。兩君每歎余爲知言。庚寅。余方避暑水西園。閉門上剝啄聲。則昇之函所爲制舉義。屬余序之。初奏數章。則清風泱泱乎。從蘋末而來也。已更快甚。匡廬寒泉。峨眉古雪。驟几上矣。昇之嗜古。憲副公所藏書萬卷。翻譯幾盡。寧以蠹游。而必不肯俛首蟲雕於公車之業。故歲弄金石文者十九。本伎什一。今降心操之。遂臻獨致。譬蒲元性鑄刀。利斷鐵珠。應手虛落。又如長康圖。蓮伯玉車。神韻安閒。肅肅雍雍。曲中禮度。大抵伎無大小。皆從深沉湛思得之。故曰藏心於淵。美厥靈根。又曰深心託毫素。昇之門無雜賓。床無雜書。據梧隱几。浩浩焉。落落焉。所謂其息以六月。其游以九萬里者也。天下之士。惟靜而寡慾者。此其人不可量。真人之以隱。見龍之以潛也。孰得而窺之也哉。昇之居恆扁跡。卽家人罕覩其面。今一日盡脫其穎於文章。使人莫不想見其拔俗出羣之韻。然則昇之雖闔戶自祕。名已不胥而走矣。我兩人室邇人遠。亦未嘗不日日面覲。若惠莊目擊而道存者。猶第二義也。

宋讓木稿敍

左手取印。右手取干戈。此嬰兒時事也。上馬殺賊。下馬作露布。此文夫時事也。今遼左閉關。蜀黔戕將吏。齊魯徐沛。有張角孫恩。宋子賢輩。蠢蠢交訐。上方拊髀。而思封疆鼓鼙之臣。區區制舉文。何足以當戎索。而余獨謂不然。于忠肅王文成率皆從制舉中出也。國家倚重在此。則上帝之篤生忠賢豪傑。亦在此。卽有非常之

才不得從他塗捷徑進。舍制舉將焉往哉。第文士桎梏於窠臼之內。挈瓶於訓詁之中。經史詞賦。不解爲何物。况能讀太公司馬孫吳尉繚之書乎。吾友讓木。生長名家。自束髮卽有霄漢虹霓之志。搖筆爲制舉義。騰擲奔放。光明陸離。旁溢而爲古文詩歌。何奇不觀。何怪不備。發竅潛心。豐肉縟采。眞少年中之人龍也。君若苦制舉所束。倘得一當知己。非閉戶著述。隱於仙源鬼谷間。則投筆焚硯。操絲沉金。僕姑掃蕩妖氛。縛取東西叛人頭。爲厮養飲器。而世罕知者。且從而竊笑之。予曰。文武非異人事也。天壤間。惟龍善潛。善躍。又善玄黃之戰。文昌六星。位於斗上。各有所司。而有上將次將二星。麗焉。敦悅詩書。輕裘緩帶。文武爲憲。其則不遠。世無徒以文士相君。而君亦無以一文。字爲自了漢。豈惟進賢冠。卽通侯肘後黃金印。如斗大。吾且幾幾望之矣。

### 附遊叙

#### 臥游清福編敘

俞使君宰華亭之三年。政潔而民蘇。絃歌之暇。手纂臥游清福編。命陳子序之。余聞之。名山洞府。造物不付之冠劍車騎貴人。而私之隱君子。此語似有致而實否否。夫王公大人之游。或侍宸輿。或領使節。屯軍駐驛。間俗褰帷。小有未濟。則兵丁曹伍。腰鎌負鍤而前導之。能使目與足。兩無憾而後止。若蓬翟逸民。不過三尺筇。與一鞞屐耳。歷覽幾何。而辱之曰游。則不得不退尋紙上之陳跡。而指數之曰。是某水。是某丘。若置其身於空青鈍碧之間。以稍自寬云耳。則臥游編者。冠劍車騎貴人可無。而隱君子不可不有也。且山游之難。我知之矣。巨靈五丁洗鑿之地。半出於神鬼護呵。俗子命車。則風雷雨雹隨其後。非夙具靈根者。不能游。揉巖虎窟。蛟穴

蘿宮與夫族冢叢祠之林。狐狸嘯而鶴鷓啼。非有膽智者不能游。棧腐梯殘。葛枯蘿脆。非捷如猿鳥而頑如樵牧者不能游。寒暑載途。變色而進。喘不續吁。胸與膝拄。非精爽壯旺而好奇者不能游。諸游具矣。而糾於俗務。頓於老病。左於非時。甚則興盡者才盡。才盡者山川之秀亦盡。而游不必記。記不必文者多矣。甚矣游之難也。非游之難也。難於上帝之清福也。嗟乎。自古山川幻住。陵谷變遷。海底塵飛。蓬萊水淺。即天地且無所恃以久存。而何況山川。又何況游者。嘗試訪古今游客姓氏於仆碑斷礎中。野艸夕陽。冥冥漠漠。而幸有一二記游尙在。則昔人涵雲嘯月。討松論桂之意。彷彿可求。而穆王八駿之所未巡。秦隋六龍之所未及。臨幸者皆得與巢公一巢。壺公一壺。共縮而游之。儿上。比之王玄仲舉煙爲信。韓昌黎慟哭縋書。詎爲勞逸哉。是編也。無間隱君子與冠劍車騎貴人。但有清福者。然後出此以援之。

王季重游喚敘

名山大川。特水地二大中之一隅耳。其旋轉生滅。多賴風輪。風輪何在。則文人才子之筆是也。王季重筆悍而神清。膽怒而眼俊。其游天台雁宕諸山。時懦時壯。時嘖時喜。時笑時啼。時驚時怖。時呵時罵。時挺險而鬼時蹈虛而仙。其經游處。非特樵人不經。古人不歷。即混沌以來。山靈數千年。未嘗遇此品題知己。大抵山川有眉目。借人而發。又無口。借人而言。若游者非文人才子。正如醉夢人。夢骨以爲丘陵。夢髮以爲草木。夢耳鼻以爲洞門。夢口以爲河。夢舌以爲沙。夢眼以爲日月。夢氣以爲雲霧。困極迷離。游而不得出。則嚙語沸發。輒以一喚爲幸。問其夢何狀。則欠伸呿張。莫能名其所以。俗兒見山迫欲歸。歸則憤憤如故者。何以異此。更有強作解

人漫無可否。每輒言佳。此山水中鄉愿。王季重個強猶昔。不屑也。季重此記。原以喚舊游王謝諸人。豈喚此等輩哉。

### 紀游稿敘

昔游有二品。而今加三焉。賈之裝游也。客之舌游也。而又有操其邊幅之技。左挈賈而右挈客。陽吹其舌于風騷。而陰實其裝于稠褻。施于今而游道辱矣。吳人遊者。始于季札。彼豈其得已哉。稅國之難。而巽迹以逃。當是時。可以高枕而臥。季子之影。老于太湖之濱矣。今游士非獨產吳。然出無津梁。往往藉口于長氏。以爲游祖。馬蹄車轂。凌競道傍。甚者青山白雲。不以稅駕。而就就長安中。如深帷臥榻。青蓮有云。但識金馬門。誰知蓬萊山。游道之賤也。寧獨今日哉。王子辰玉。以許邁之骨。挾宗炳之好。帶五湖。芥五嶽。欲以汗漫之觀。悉收而羅之。雙隄。而緣且小礙。今稍露一兩斑于游記中。讀其言。可謂口爲綉。筆爲綵矣。立長安四虛之衝。身目手足。不爲洛塵所埋。而鴻飛蟬嘯。時軒然于烟霏林靄之間。高情拔韻。何其處躁而彌靜也。余與長孺之嗜游也。與王子同。近者又更其嗜。而爲倦草莽。撫躬落落有深意。意欲遠游。則以床頭老易。及王子游山記。展讀數行。未嘗不置我于雲稍鳥背上矣。候天下他日。游道少清。我當從爾騎決莽之馬。相與窮無窮。而極無極。不然。如黃冠解瓢笠。而乞外護。緇衣謝鉢中之餐。桑下之宿。而託棲齋宮。游人脫跡山中。而錯趾山外。皆余所不能解。而亦余之不敢從者焉。游倦矣。予且解車休馬。手王子紀游一編。瞋睡半生。毋與客賈肩隨而趣。爲青蓮老人所笑。

### 閩游草敘

吾友周公美神骨道雅。望之如巖窟圖畫中人。未四十勅斷家務。有子孝且賢。不遺世事。經懷公美日。與羣從讀書食酒。爲名山游。客歲游閩歸。訪余泖上僧舍。出記與詩奏予。鬚髮之間。尙聚雲氣。第篇中未噉荔枝。登武夷耳。余浮白罰之。公美倔強不肯服。曰。我見入閩者。動以此爲題。然非游以買。則游以舌。獨余則否。不借郵符。不乞騶騎。不仗地主酒錢。此游之清者也。手無鐻。趾無坎。腰膝無絙帛。買勇先驅。置兩足于空外。置七尺于死法外。此游之任者也。猿不易枝。鳥不變聲。樵牧無故識。伴侶無異同。此游之和者也。游具此三德。而時以詩爲政。游無定時。故詩無定體。余讀之。其色香味。雋於荔枝。而聲調警快。惟幔亭天上無憂。人間可憐之曲。庶幾次響焉。公美得於閩者儉。而閩中江山得公美者奢矣。公美大笑劇。余至夜分。霜絨燭跋。猶媿媿談閩游不寔。余目公美曰。寧惟游有三德。卽酒德亦稱是。不亂。清也不辭。任也不爭。和也。公美曰。人知我閩游。而不知我更有醉鄉游。游何從得之。蓋爲我識數語。以告後之問津者。

新安游草敘

書畫有收藏賞鑒兩家。山水亦然。黃山開徑于普門老衲。張勝于景升老髯。卽新安人。鮮有過而問者。此收藏家也。吾鄉多向白岳禮瓣香。而身輕千里之遙。至車殆馬煩。目眩足繭。而一惟以得登黃山爲快者。此賞鑒家也。游則自吾師始。出不憚傾裝。歸不望餉橐。其真游山水者。亦惟自吾師始。當吾師首路時。某方臥病。每嘆曰。吾安得從而後。爲師捧杖負劍。舐筆和墨。凡叫嘯諧謔。高談雋語。皆退而筆之。以暢山水奇麗之觀。已而躍然曰。有長君元翰在。元翰綺歲博學工詩文。鶴鳴子和。當必奏數百部宮商矣。比歸。讀新安游草。覺溫泉飛



瀑紅葉白猿紛來接人。雖球之飄。賀之囊。有如此五采雲氣乎。王逸少云。秋冬之際。尤難爲懷。吾師中秋結伴。仲冬言旋。三月之氣候。以日變。千里之耳目。以步變。七寸筆端之描寫。摹繪。又萬變而不可勝窮。至是新安之山水。收藏家所過而不問者。吾師以眞賞得之。猿鳥則應接不暇。烟霞則到處逢迎。發簫筑之聲。賁松蘿之色。蓋兩山以游重。而游以吾師之品。顯當更重。賤一日三朝。何足以稱重客于臨卽哉。師笑曰。是游也。兒侍之而子敘之。却類陶淵明籃輿。二子在前。門生在後。無爲負五斧。懸五岳圖矣。

### 馮咸甫游記敘

古之修史者。忠義孝行文苑。各爲傳。江東之家。惟吾鄉馮氏。合而爲一。廷尉公劾論權相太宰。幾中法死。京兆公剗血上疏救父。父子忠孝。炳諸史冊。咸甫繼之。刻意好修。與季父學使公爭衡不朽之業。蓋海內望族。無出其右。而咸甫逡巡挹損。放絕世務。咏言屬文而外。下帷扃戶。卽家人罕見其面。間一出游峯。仰間。惟與漁郎樵父。洒雲嘯月而已。曩游兩都吳越。盡紀山川之勝。今春意不得。復爲黃山白岳之游。新安故多大賈。賈噉名。喜從賢豪長者游。游者至。車騎供帳甚都。故客往往舍山而趨市。甚有羈棲經歲。裹橐而歸。問其某山某水。有噤不能吐一字者。而獨咸甫則否。不見官長。不借郵符。不通姓名家世。卽猿鳥且不知爲小馮君。彼噉名者。得而跡之乎。咸甫惟不與俗兒作緣。往來吟眺。皆能使三尺藤。六寸管爲政。今其記具在。流便爾雅。眞有柳河東蘇眉山之風。非近世游客所敢望也。咸甫著作。播文苑中。無待余言。余愛咸甫之游。以品勝。俟異日咸甫挂冠神武。結禽尙五岳盟。不佞請從而後矣。

紀游稿敘

余之遊于方內也。潛若拳龍。俛若拱鼠矣。至于徜徉山水。微露本真。拾松毛。鑿泉脈。甚則跳擲巖澗。飛行樹杪。遊侶嘲爲野猿孤鶴。余不能解。每欲勅斷家事。一了名山之緣。瘦瓢螺鉢。招尋名勝。採秦人之桃花。拭湘娥之修竹。庶幾激觸道機。開豁醉夢。末之吾黨。莫副斯盟。友人姚汝觀。性故豪宕。狀亦修偉。所謂魁然丈夫者也。方十齡。從尊人龍山先生。賦月下梨花。遂能步武。已復從婦翁中岳戚公游。多讀異書。稍長而交謹者半天下士。詩日有名。居恆歎曰。男子挾弧矢而之四方。不能裹足閭闔。作鬚眉婦人也。吾視五嶽。直螺贏之實耳。頃者暮秋。從武林浮錢塘。逡巡山陰道中。歷禹穴。秦望。登招寶蛟門。伏龍諸山。所至舉酒悲嘆。掃苔拂石。墨爲淋漓。余不能從也。歸而讀其詩。品奇分勝。互奏清音。抽昧數章。衆山皆響。可謂籠天地于形內。措萬象于筆端者乎。昔昌黎游華岳之巔。度不可下。乃發狂慟哭。而欲縫遺書爲訣。王玄仲登蓮花諸峯。至約寺僧。以烟舉爲信。古人之艱于游如此。今虛懷觀道。不杖不屨。千巖萬壑。縮地于掌牖之上。使汝觀詩益多。則余之臥游者日益廣。昌黎諸公聞之。未必不嗒然自喪。笑余之坐馳也。

眉公先生晚香堂小品 卷之十四

雲間陳繼儒著

賀序

賀新參機山錢公大拜敍

今皇上好讀史書。事事臨摹古人。焚香告帝。手拈六相于金甌中。吾鄉機山錢公。特膺首簡。歲在戊辰。正屬龍飛紀元之始。聖人在上。時乘六龍以御天。錢公應之矣。往公侍神燾講幄。威儀凝重。晉吐安詳。左右睨而指之曰。此太平宰相也。乃廷推兩格于鄉。褫奪再忤于權。瑞公閉門謝客。噤同寒蟬。幾冷春明之夢矣。上忽遣使者敦召公于田間。公雖謙讓未遑。而雅意亦欲陳子一言之贈。于是親友彈冠者徵以詞。昔王文成告楊邃翁云。君子之致權也有道。示之無不受之。量以容其情。擴之無所競之心。以平其氣。神之不可測之機。以攝其奸。形之必可賴之智。以收其望。此言似矣。而非相臣之大根本也。根本何在。曰清是已。公生平狷潔自好。未嘗先容於許史。厚援于金張。拔自宸衷。起家最稱粹白。甫聞命。即日榜示司闈。四方士大夫遣賀者。納牘反璧。秋毫莫敢溷公。皆及途望廬而返。公根本既清。近能使一鄉藜藿不采。遠能使百僚心神俱肅。而何以權爲

哉。相臣府權。其說始于鮑叔。曰：管仲之爲人也。能不失國柄。而後乃發于王文成。文成恨瑾焜甚張。相非權不能克亂。今上奪威福之柄于婦寺之手。以還之閣中。又奪閣中是非之柄于稱功誦德之口。以還之新執政。救時者不敢權。亦不必權。惟有以公之清恕。助皇上之寬慈。以公之清約。助皇上之節儉。以公之清坦。助皇上之平康。以公之清鑒。助皇上之精明。以公之清謹。助皇上之兢兢業業。舍一清而外。豈別有謬巧卓詭之相謨哉。即目前忠魂未盡。褒卹譚籍未盡。延登警諸天地陽春之候。草木怒生。石可壓乎。魚龍怒飛。水可夾乎。特俟公入朝面陛。密密挽回。調衆憤。釋羣疑。雲霧不待墮而消。日月不待揭而朗。風霆不待轟而疾。得人者昌。順人者祥。人情平而天下磨所不平矣。或曰：剝復初交。談何容易。而余獨謂公之救時無難者。有故。公之清。非脫粟布被。織嗇不近情之謂也。清于家。如晏平仲之三族。萬石君之子弟。司馬君實之僮僕。何待公而始訓勅也。清于朝。如子罕之玉。楊震之金。鍾離意之珠璣。何待公而始謝絕也。無欲自無猜。無黨自無爭。無爭自無事。上嘆曰：爲君難。已得公。何難也。公亦稽首曰：爲臣不易。今得事真堯舜。曷爲其不易也。君臣相遇。心跡雙清。亞相可。上相亦可。鹽梅可。薑桂亦可。行直道之三代可。法成功之四時亦可。而權何與焉。大抵宰天下。原有正局全局。未論任。先論清。清人之所必不能清。然後能任人之所必不能任。塗最夷。術最簡。公已預定于文正秀才之時。武侯初出茅廬之日矣。况上且驅除穢濁。以待公地乎。人種而我穫之。猶曰人所貽也。皇上穫之而公食之。可不謂天授公哉。吾故曰：公之出而救時無難也。

賀福建大中丞南公盪平紅夷序

天王神武。震疊百蠻。凡日所出入之邦。皆納寶獻琛。罔敢有越厥志。自遼黔告警。內外單空。大中丞南公節鎮閩中。深維調募飛輓之苦。絕口不忍言兵。一切與吏氓綏靜。休息爲主。會紅夷抄暴海上。勢難復道。天誅公曰。此夷高準。龜眼赤髮。種落名號。不載職方部中。舌人未嘗譯而問焉者也。邇來借市爲名。剽漁劫旅。城城澎湖者。三載于茲。福興漳泉之咽喉梗矣。前商公遣說士傳諭。旋去旋來。觀井負嶠。桀驁自若。蓋夷所恃者有三。一曰巍艦。其高如山。其驚海道如地。一曰巨銃。長丈有咫。能毒人于二十里外。一曰堅城。城則孤懸島中。艦則環匝城外。以火器爲長技。以酋長高文律爲腹心。以奸民洪燦仔池貴等爲耳目。以倭奴番鬼爲爪牙。橫行四出。莫敢誰何。彼直鸚鵡視我。度不能出沒風濤。擐甲死戰耳。公赫然震怒。誓衆擣巢。夷遣燦貴等賚書至。獻番鏡夷鳥。獻珊瑚明珠。公笑曰。聖王不貴奇貨。不寶遠物。蠢爾小醜。敢挾珍玩。啖我乎。焚賄斬使。無市法。亦無法。夷乃入犯中左。以犯我師。公密授諸將吏方略。鈎致二夷艦。焚其一。燬其半。肉斬六十餘級。生擒高文律以歸。第妖黨雖殄。寇穴尙存。公遴選千三百銳士。募漁師佐之。夜濟中洋。突入鎮海港。煙焰翳天。呼噪震地。前茅後勁。分路夾攻。又張左右翼。直據山椒。壘石爲城。以瞰動靜。而令遊兵尾擊之。犁沉之。忽見十三艦海外揚帆而來。夷可二千餘。倭可百餘。勢復張甚。公檄水陸並進。更番火器以擾其營。銜枚犄角以斷其援。樵汲不通。聲耗不屬。外艦猝不得泊。則孤城力不能支。夷始大怖。請緩師。請墮城。請還信地。請歸所掠商人。公姑許以示羈縻。而高文律未燬之城樓。立遣健兒。揉升而上。且曳且焚。而夷之巢穴一空矣。是夕大小夷船悉鳥驚鼠竄而去。此甲子七月十二日事也。功成以後。公區畫善後事宜。不欲上俘宣捷。識者曰。古戎夷不恭。則必戮之原。

野肆之市朝。卽水西東省毛將軍具有近事。械送闕庭。况夷隣浙有鑛盜。粵有澳夷。相望有日本暹羅琉球諸國。伺釁觀變。恐生戎心。此不當宣示遠近。一張我武之維揚乎。露布馳聞。天子御門告廟。優詔敘勳。各有差初。紅夷發難。或云許市便。或云聽其往來。粵閩間便。公決策進勦。燧之中流。則裴晉公淮蔡之斷也。浮一葉之舟。破萬里之浪。飛渡金門。躬提桴鼓。則祖逖中流之擊楫也。入虎穴。焚鳥巢。兵法所謂以水攻者強。以火攻者明。則王濬樓船之水軍也。兵餉甲仗。蒙衝遊艇。走舸之屬。不請內帑。不耗縣官金錢。纖悉從部署。節省中來。則陶太尉之竹頭木屑也。撤其壁壘。燔其寶貨。則張奐之馬不入廐。金不入懷也。來則拒之。去則勿追。談笑指揮。戎素在手。則武侯之羽扇綸巾也。膚功既奏。公遜之文武將吏。更推本于前中丞商公直。指蔣公。辭封避賞。則大樹將軍之不伐也。公非惟不有其功。并不有其穹名華胄。剛經百煉。氣備四時。遠夷憚其英風。諸執事服其德度。詩云。赫赫南仲。玁狁于囊。其公之謂乎。是役也。行且盟河山。胙茅土。旌儒帥。勸勞臣。而雅非公之志也。故福郡守陸公等徵文琢石。敘公之憂勤機略如此。若夫摩崖天齊。可銘可書。則有當代立言之君子在。

賀青浦其山鄭侯榮封父母序

京山鄭使君宰青谿。凡三月。肅迎兩尊人至。不再月。又迎封典至。白晢朱衣。搢笏馬上。自郊徂邑。麾幢笳鼓。而前導之。使君稽首面闕。謝邑人。懽譟擁觀者以萬餘。曰。鄭使君官可及。年少不可及也。又曰。太公年甫壯。遂邀天子之譽詞。又適在子舍。此二百年曠典異數。尤不可及也。使君少年。能驚憚悍奴。老吏又能悚服。士大夫之習舊而賢者。顧謂余曰。濂洛書。申韓法。似不足以治天下。莫若善推其情而設身處之。蘇長公之文妙在

得情。乃理縣譜也。念青谿貧。凡有兩造。不遣隸勾攝。遣伍伯。如期即止。不株蔓。不耽延。立訊數言。洞見其表裏。毫末。如法即止。贖鍰榜之縣壁。明示無所取。如案具即止。徵賦以新舊熟荒爲差等。如額即止。使者之廚傳供帳。不敢過益。亦不敢過損。如禮即止。其他文學孝秀。以稅奏爲從容談說理解。而暇則篝燈讀書。即嚴寒奇暑。永夜不輟聲。其文自開自闢。自靈自異。不隨世笑啼。其識度淹雅冲夷。絕無恢浮鑿岸。不下人之色。操此治邑。積而至。上上考。以疏榮其親。度何難者。而交口豔羨之。何也。夫國家設封爵鼓舞忠孝內外吏。皆緣人情而推之。然非三載最。不獲請。或挂彈駁。不獲請。或臺剡薦。而中兀之。不獲請。或遷除驟。而格于令甲。不獲請。或不及。與朝廷吉祥善事。不獲請。他人所難。鄭使君得之獨易。又得之未下車。未奏滿之先。此同籍東諸侯所不敢望也。吾嘗嘆白頭上袞。偏儂政事堂。押五道黃昏文書。內恐獲譽于宮府。外恐見譖于少年。此爲親地乎。抑隱忍爲子孫丐蔭地乎。夫子而孫。孫而至于耳孫。謂目不得見。而耳聞之也。與其經營數十年後。不可知之。誰何人。何如鄭使君及身而榮父母。又何如及父母之見在。而以半通之綸。三釜之養。百拜而庭獻之爲快哉。使君曰。子產相鄭。瘞藥不生。鳴臬不至。今我青谿之治。何如儁。吾年雖少。視子奇十九治阿。周公瑾二十四而經略中原。則已老矣。早掇一命以榮親。寧竟僕始願乎。區區之願。懸三無私待民。懸三不朽自待。少而壯。壯而晚。度必大有所建明。以報我君父者。而今遂引美言見市。何賀之早也。陳子聞之曰。鄭使君不恃早達。而期晚成。微庭訓不至此。英雄謹于末路。國手審于收局。松柏撐漢。雲霞竟天。皆以晚故也。而又何疑于使君父子。吾且以晚節晚福卜之矣。

贈內史柱南汪公奉使五方敘

新安柱南汪公。儀顛岸偉。深沉有大度。績文濯行。何太宰聘修銓部志。志成典核精麗。拜文華殿中書。會殿工鼎新。催督綾紗。薛司空心屬公。推轂之。遂有是命。出使吳越閩楚豫章間。公至松。見郡邑長而後。謝絕供帳。觴飲。及一切徵逐之煩。但杜門避暑而已。上下樂其不擾。爭挽行帷。而公以王命不宿。別陳子首途。徵一言爲贈。今天下無地不難。無官不難。公上迫簡書功令之重。下憫民間杼柚之空。心口齟齬。文牒往復。此役良非易易。而余獨私爲公幸之。夫詩詠皇華。咨諏謀度。爲王臣出使而作也。男子始生。懸弧矢于門庭。以明丈夫有事於四方也。今公以才能奉使。而當丈夫之壯游。前有輿。後有騎。所至兵儉曹伍。續食郊迎。既不煩躡屣扶筇。又不煩伐山開道。探奇弔古。見之謳吟詠歌。豈必羨丘壑之謝幼輿。圖壁之宗少文哉。一快也。公負好古之癖。凡遇經畬史藪。以及竹簡韋編。靈文祕檢之屬。生平耳目所不經見者。皆得從容購訪。而抄錄之以腹笥。又兼行祕書。其載籍幾與張司空。李鄴侯等。二快也。吳越閩楚豫章。皆八材文獻所自出。其間多名卿上衮。潛夫大儒。公加意延攬。以展其識荊御李之誠。小者資切磋。大者告之當事。以備朝廷異日緩急用。不勝禱生之懷刺。張敬夫之夾袋乎。三快也。古人有言。人生無他願。願讀盡天下好書。識盡天下好人。遊盡天下好山水。夫盡則安能。但身到處莫放過耳。南柱公此行。庶幾足以當之。無負王命。并無負異人異書。好山好水。視巖先生州有九。遊其八。相去不遠矣。公歸以五方遊記示余。余當敘而行之。以告夫壤蟲而笑黃鶴。尺鷃而笑大鷗者。公其快余言否。



賀郡司寇毛公三載奏績敘

昔者王烈陳實以義行聞太原潁川間。諸有爭訟。曉譬曲直。或望廬而還。或至途而返。甚且愧而請曰。刑戮是甘。勿使彥方伸弓知之。及宋洛陽。而猶有懼司馬端明邵先生知者。夫諸君子第不過獨行處士耳。今郡國長吏之化。其權重于處士。而諸逢掖之遵禮蹈義。行已有恥。豈忍遽出潁川洛陽細民下。然畏彼而不畏此者。何也。則刑設而禮不足也。郡司理毛公三載奏最。先後積臺使。慰薦剡牘以數十計。皆交口誦公有大體。有特操。有沉識。有兼才。遠近讞牒。悉絜平亭。而余獨雅重公。孳孳文學。斷獄引經。非近代名法家所敢望者。夫古者禮與刑相爲表裏。辟雍之設。上賢以崇德。簡不肖以紂惡。士不帥教者。以告于王。王親視之。國之右鄉移之左。國之左鄉移之右。甚且移郊移遂。屏弗與士齒。蓋議禮則刑後之。議民則士先之。子產鑄刑書而不忍毀學校者。正謂刑以繩中人。而禮以圍君子。士君子若有廉恥重畏法之意。父詔其子。兄詔其弟。朋友詔其曹偶。老幼賢愚。更相告語。以足不入公府。終身不見大吏。爲吉祥善事。而刑不足措歟。輒近士不古。古所謂望廬而還。及途而返者。今日履相囓于郡邑之庭。里父老謹畏者。竊竊指之曰。夫夫也。鄉校之雋也。而所爲若是。子與母而在。必且更徙而去之。宓子賤父事兄事者五人。姬公吐握執轡而朝者百人。度一切閉門謝之矣。毛公嘆曰。此非士之過也。有司一有輕士心。稍可緣飾吏治者。輒搖手不復道。而法吏則去士更遠。卽庭謁形神不相親。而余獨否否。公以名經術起家。分校閩棘。海內經生。爭誦式之。如漢推毛公。而公又雅意人才。孳諸髦廩之宮。而時上下其文。家被冤者。澗之。寔不能治家人產者助之。其風習太甚者。條上當路教誡之。又捐俸及贖贖

以新學宮。梓文正集。創烈婦祠。簡奇擢秀之外。輔之以彰教化。俗其意表甚遠。故士民之歌而誦公。不減子產。而其畏公知。更甚于畏彥。方仲弓。邵先生之知也。諸博士曰。善。必子言信而有徵。請以是賀公。并上之司封氏。

贈味澹康公敘

江右味澹康公。由瑞安調劇嘉善邑。赫然著卓異聲。得制詞甚嫩。武林二陸走雲間。徵文陳子以賀公。曰。是中表兄弟。張如斗。如藩所轉屬也。陳子曰。浙中多魁人。巨公不他屬。而徵之山澤之癯者何。二陸曰。吾嘗讀康吳蒙先生導義一編。而異之。其敘則子也。子無辭。初萬歷甲申。康公試童子科。值雲臺張公爲太守。公臨試。繆飲不入口。力疾草二義。納吏人手。太守望見訝曰。第三題尙未下。生豈曳白去耶。追之反。讀至柳下惠少連降志辱身篇。曰。逃天下者與天下絕。逃天下於天下者。又與天下同。太守拍案曰。奇士也。奇士也。更試之。文立奏。則又奇。抵暮還署。袖其文以示二陸。務令讀上口。卽之超之越也。又傳玩其文於逢掖縉紳間。特拔爲冠軍。於是曹耦物色公者滿戶外。初則疑信參半。已而心口無異詞。聲價燁燁矣。丙午。舉于鄉。張公備兵淮陽。聞之。酌酒相賀。梓其文以行。比南宮下第。公歸內愧。逡巡不敢謁。第遺尺書報聞。而張公已預勅閤者。康孝廉至。亟爲通。不得已詣門。張公傾身相接。談飲數日餘。慰勞彌至。及己未。成進士。張公先已游岱矣。四歲藐孤。一棺淺土。登龍無客。庭雀可羅。公千里專使。捧瓣香弔公。些詞淒絕。迨公宰嘉善。謁臺察于武林。過張公家。唏噓饋餼。曰。昨暮曦舟師門。夢師肅衣冠坐郡堂。余青衿長跽。師正色曰。子文字中是非未定。某對曰。如某卷是非已定矣。旋夢覺。兩頰猶有淚痕。因執斗藩兄弟手。俯仰熟視者久之。修世講禮而退。里中環聚擁觀者。空街潤巷。莫

不嘆康公高義。而且服張參知。知入能得士也。公與斗藩握手。不忍別。謀之楊公仲堅。欲攜藩教之官署中。藩難於去。母中止。又爲斗之孫復規進取。至於亟問亟餽。則又僂指難數矣。公嘗言苦心制舉時。火候適到。非遇知己。不能自信。卽意興亦不能自豪。楊仲堅劉抑之兩公。雖嘗拂拭羽毛。至於解馭擊鞞。遠縱霄漢。載我以垂天之雲。盪我以萬里之風。獨張公一人耳。夫大丈夫落落塵埃。苦無根蒂。低頭跼脊。知遇實難。故昔人感知報恩。有如姚泓之省疾。拜於床下者。有如員半千何彥先成服。畢喪者。有如孔璠上書請諡。請旌廬者。而末世不祥。甚則攻座師。彈舉主。逢蒙之矢。加于平生特達之異知。而不顧天下非笑者。是皆康公之罪人也。呂氏曰。說義不稱師。命之曰叛。君子不與交友。賢主弗內之朝。司馬溫公曰。背師賣友之人。爲子必不孝。爲臣必不忠。旨哉言乎。使世而皆康公若也。翟公不必有署門書。劉孝標不必有絕交論。在三之義。揭日月而明中天。其關繫世教。豈細故哉。若公三載奏最。則兩邑之口碑。後先臺察之薦牘。故在不具書。

### 贈御醫何承雲敘

士嘗言不爲相。則爲將。乃醫則二者多兼之。相壽國。醫壽人。心相等也。三軍五旅。舉而委之將。四肢百骸。舉而委之醫。任相等也。相調陰陽。將制中外。醫參虛實。功相等也。相者制治于未亂。將者圖變于預設。醫者知微于腠理。智相等也。夫醫一技耳。今且與將相聚短長。而共低昂。得無重哉。余嘗心慕乎承雲何公之醫也。公克以醫世其家。家有藏書。咸禁方奇經。多祕弗傳。公受而讀之。裁以己意。核以古法。術益精良。而公之名日益顯。于是起爲景藩御醫。聲馳吳楚間。未幾南歸。而鄉之扶疾而賴公以起者。戶滿屨矣。四方請學者。車塞道矣。

公不問貧富遠邇。求卽輒應。投卽輒中。故上自薦紳先生。以及細民之家。每見公。必拱手加敬。稱仁人云。庚辰秋。余抱病三月。幾與鬼隣。而復值母親。內有哀痛迫腸。外有虛熱攻體。時命大謬。謂當已耳。適余恍惚中。若有以公告者。當是時。余未識公也。及公至。按而視之。洞燭如白日。投藥試餌。應手而愈。故自今循頂至踵。得與有生之樂者。夫孰非公所賜耶。然則公非直與將相等也。有將相不及公者三。將與相位尊。驕倨。每倚富貴而羞貧賤。至疾苦不相聞。而公以藥石惠及于匹夫匹婦。其不及公者一也。虛糜爵祿。執空文以網主上。無所稱塞。而公視人若視其身。治病若治其家。德不望報。報不厚責。其不及公者二也。將相不賢。或巧撓善類。陰螫豪傑。以快私意。而公于賢士大夫。保恤調護。畢其技能。有扶植上人之心焉。其不及公者三也。是三者。公得以施于一鄉。而不能施于天下。異日不肖者。倘有進。則請法其意而廣之。公借其術以醫不肖之身。不肖借其術以醫天下人之心。庶幾有以謝公也夫。

送黃學博轉海州學正敘

古稱吏隱者。始于東方生。生以談星游戲人間。僅與諸臣。駢肩執戟。浮沉俳優中。卽日索侏儒飽。亦不可得。雖然。社肉猶堪劍割。肉盡而事神。仙辟穀之術。尙能却長安粟以老。今輦轂下食大官者。無不指金馬門爲吏隱地。乃進賢冠風塵不少矣。舉足觸途。動撓鱗甲。五斗雖貴。不幾挾明月而彈千仞之雀哉。余謂爲吏者。擇隱地。莫若郡縣師儒之臣。所謂潛見半之。處于季孟之間者也。括蒼樓巖先生。禪御史公家教。以國士稱。晚而好古彌銳。益與時調多左。於是縱讀天下異書。交天下異人。凡一切軒冕。及苛細瑣尾。悉舉而擲之六合之外。

曰。長安藕絲孔耳。豈能着我鬚眉丈夫。吾聞博士有青氈。請借作蓮花座。蓋登壇揮麈。稱弟子師者再。而始授席華亭。公之師華亭也。名理則平叔避席。博物則公孫僑膠齒。談經則匡鼎解頤。五鹿折角。不言躬行。則蘇湖閩洛諸君之畏友。使人意消。鄙吝爲豁。則公家叔度所難爲弟者。公之來不再。其進而叩公之學。如飲河。退而醉公之德。若飲醇。此豈可以一日去華亭哉。卽披公以去。百里之地。六館之席。何不虛左以待。乃竟以海州往也。公嘗屏輿人。訪余池上。強余復理故業。余曰。子大夫皆鸚鵡之腊。孔雀之脯也。而余以蔬笋參鮮濃肥甘中。何所不可。公笑而出。公今腊脯乎。蔬笋乎。二者不可得兼。公中處而兩得之。信乎公之善擇術也。公卷其神龍之性。馴而豢一博士之祿。彼且狎諸生爲海鷗。視長安若腐鼠。千秋者名。五斗者酒。吏隱雖貧。猶強于東方生。索飽不得者耳。東方在。且掛冠金馬門。舍社肉。還就公苜蓿盤矣。况海州故仲尼遇劔子處。其俗淳古。又多白鶴。公褰帷橫琴。委蛇而談先王之道。天青月明。有雪衣翩躚。舞而欲下者。又安知非華亭之鶴也耶。公去有新詩如秋水編。峯泐記者。其盛以古錦囊。勅是鶴啣以寄我。

賀光祿虞淵潘公暨配楊孺人七袞雙壽劄

往光祿虞淵潘公。暨配楊孺人七袞。遠近走相告。舉齊眉耦齒之觴。牛酒羔鴈。紛集于其庭。諸伯仲謂無陳子一言以佐觴。雖鐘鼓沸天。鞍馬照地。猶之閭巷之壽其親也。于是過白石山。徵之陳子。陳子曰。江南屈指聞人聞家。推海上潘氏。恭定公解綬歸。日與介弟逍遙綠野間。如二疏九老者流。而方伯學憲。率子姓捧匭。鬩斗于其後。一時稱榮壽無兩。今更三葉。歷六帝。而虞淵公繼之。說者羨潘氏有壽種。而余獨諗公有世德。有世

教故也。公承益州慶陽兩先生後。門列車輪。床堆印笏。顧能醇謹肅括。以孝友教家。以恭儉訓族。凡朱門之鋒氣。翔態黃口之怒馬。鮮衣悉鋤治而淘汰之。恂恂如寒書生。古田峻。又如羲黃以上人物。譽之不喜。激之。不怒。干之不厭。負之不恨。困之以疊役。加之以橫征。不求解有司。不謁禍他氏。而楊孺人又以精心善氣迎之。檢田廬。部錢穀。潔賓祭。締婚姻。程督羣子姓。夙夜不遺餘力。或出佐巖郡。或入典大庖。或以明經超貢于王庭。珠林玉笋。國寶家駒。非其文孫。即其快婿。無論吾松諸名甲閥。莫敢與公雁行。即古來鹿門共隱。鹿車共推。有如公夫婦之壽考顯融。保世滋大者耶。子丑以後。璫焰薰灼。每讀王子濤天上無憂。人間可憐之曲。往往爲之跼蹐而嘆。今新天子乘乾開泰。不動聲色。拔禍本于深根固蒂中。向來無限名公卿。顛倒榮辱。如反覆左右手。而公與楊孺人。以偕老遇昇平。拭目聖主之寵飛。拊掌後人之豹變。冰山不倚。熱焰不趨。皞皞熙熙。幾忘其老之將至。豈非人間大吉祥。大愉快事哉。余七十與公同。遭際聖明。又同。公有意垂訪余山。兩人當轟飲加酌。跨驢向北而笑。不令吾家希夷翁。獨享太平之樂也。楊孺人聞之。亦爲莞然滿舉一觴否。

賀胡玄渚先生姚孺人偕老敘

余嘗纂二十一史之隱逸。并及文苑孝義。方技中之卓行者。合爲逸民史四十卷。始自吳泰伯。斷自勝國倪元鎮而止。因欲續取我明高士。彙爲續史。而國乘不盡書。即郡乘書不盡實。山林之政。蓋寥寥焉。近與沈公路交。知海上有玄渚胡先生。其真逸民之流歟。先生少好古。綜覽該博。精研于六書聲律。二十爲諸生。聲籍甚。五試輒蹶。今且老。謝去逢掖。以笑歌吟咏爲樂。婦姚孺人能安先生貧。苧衣草蔬。泊如也。庚子。先生與姚孺人

皆六十賦詩以見志。雅自負于冀缺耕野。仲子灌園者。士大夫爭傳誦之。並有和章。余未識先生。顧想其風采。義味。要亦去古人何遠。余嘗記父老言。三四十年前。儒者負奇不售。退而閉門投書。訓子整俗。雖白首有可觀者。邇來士不得意。多喜游。游多在燕邸公卿間。蜂還蟻往。塵土擲面。甚有遺簪喪履。顛躓而歸者。其一二游道小康。輒津津誇示里中兒。或輕擲于格博酒食。狎邪鮮怒之費。不頃刻洗手盡矣。以此自悼自咎。自笑自罵。繼之以涕洟怨訕。神情忽忽。不知作何狀。此詎可令胡先生見也。先生竹牀土剗。瀟酒自得。據梧而臥。擊木而歌。歌聲如清球古瑤。姚孺人以機杼韻之。二子以嘜吾和之。無論身不闔城市。卽夢亦何嘗識金馬門哉。宜公之貧而壽。壽而康也。余視公尙壯。未五十。蒜髮蛀齒。衰相已現。反顧生平。精神魂魄。從微細中夾帶流注者不少。往歲築臺小崑山。近復雜草種竹。築室于天馬之陽。凡以爲避喧練俗。收拾本分事也。有如公攜筇負書。一顧余兩山中。相與證長生難老之術。松北一盃。清泉一瓢。當以相供。併虛逸民史數行。留以續先生何如。

眉公先生晚香堂小品卷之十四終

晚  
香  
堂

二五六



眉公先生晚香堂小品 卷之十五

雲間陳繼儒著

壽序

大宗伯陸平翁壽言後序

吾鄉宮保大宗伯陸公。天子凡兩賜存問。其九十恩數視前加等。萬歷戊戌六月。專遣中書舍人。以羊酒采幣。存公於家。一時士女。傾城罷市。至囑食僦屋往觀。公率大行伯達君以下郊迎使者。公輿而出。騎而入。金冠緋衣。白眉黃髮。端笏馬上。顧盼凝遠。從容炎暑中。灼然有童孺之色。可卽也。詔書在門。公虎拜稽首。事竣。則命元孫景元。以笄童趨謝闕庭。上以敬謹嘉公。又以齒德俱尊優答公。朝廷求舊憲老之典。可謂極矣。伯達君手錄玉音。及鄉士大夫之嫻于頌者。彙爲壽言一卷。公謂王言在前。禮不可以序。乃特屬某記一言於末簡。余生晚。猶憶鄉父老言。公辛丑會試時。有太守王公華者。夢入帝庭。庭下數百人羅拜。口舉善人。則公姓名也。覺而召公之婦翁李問之。李對曰。某生平不苟而已。是年遂以春秋魁天下。入館局。會鄉衮同朝。數數引歸。自後新鄭江陵虛揆席以待。而終不得籠公。公九十餘。距今辛丑。又垂一甲子矣。俛仰今昔。凡與公出入諷議。聯鑣

並笏。悉當時號稱一代偉人。名位姓氏。如雷如霆。後先參差。落落與晨星俱盡。而公齒髮不衰。聰明如故。每談前事。短言可以書紳。長言可以補史。使對公者。竟不知其爲四朝以來人物。卽少年晚進。公目擊其苑枯。而歷閱其陵谷滄桑之候。又不知家凡幾人。人凡幾世。轉眼六十年。棋局屢更。國手顛頓。其神閒氣定。不着而常勝者。獨公一人耳。公未嘗典一正考。然海內正人君子。皆知以公爲師。亦未嘗授一世蔭。然舉伯達君最晚。而以進士歸養者十年餘。又最孝且賢。公淡中得濃。老中得嫩。雖蒼蒼者有意於調停輻輳之。亦由公見道明。取數寡。生平不苟之行。通於神明。宜若是之壽且康也。公阿羅相。輔以神仙骨。天神福。約以儒者風。故無貴賤皆幸見公。而不敢望公。無遠近皆祝公。而不能悉公。卽載在壽言者。特渤海之一勺。秦岱之一石而已。雖然。古人有云。人臣上讚令德。則勒於家廟之罇壘。下敘私情。則書於宗塾之碑版。今朝野之頌禱於公者。抑何其洋洋灑灑也。敢弗記諸。若其稍可以報公。則今諸山有繪像。龍潭有專祠。輿有頌。國有史。或公之所以壽而不朽者。與而終亦未能言公之萬一也。俟百歲。當更筆而記之。

壽項孟璜太史四十敘

吾友孟璜項太史。以甲寅四十矣。社兄弟酌大斗壽之堂。孟璜謝曰。蘇學士文章徧天下。而集中壽言不少見。徵文侑觴。非古也。陳子曰。三百篇。頌禱之詩。十居二三。春秋卿大夫聘問諸國。輒賦詩飲酒。以爲壽。豈論小年大年哉。孟璜僅四十。其胸中包絡古今之書。幾萬卷。其目中歷盡苑枯譽誹。向背炎涼之態。幾百變。蓋年雖少。而文行則祭酒也。衡量裁鑒。則老尊宿也。孟璜不慙。則誰當壽者。孟璜亦笑曰。我嘗攬鏡自照。視渭川叟。

則誠少。若以視周郎二十四而經略中原。則太老矣。諸君不我傷。又誰當壽者。雖然。非我志也。江南卑濕。四十早衰。吾嘗心憐梁武之言。而不意身遭之。蓋少而成名。長而荏苒林藪者。且數年矣。陳子曰。寧惟孟瑣。昔君家小司馬少溪公。負經世之略。與江陵牴牾歸。支池公勅兵衛門。脫叛卒數千人於死地。竟未及通顯而止。憐才者如春風拂面。便消。忌才者如嚴霜。一寒透骨。項氏之不遇也。獨孟瑣也歟哉。今孟瑣知命待時。闔門養重。非異人不迎。非異書不讀。舌記而掌錄。朝修而暮纂。豈特木天貴人無此精專。卽蘭臺石室之藏。恐未必見此祕籍耳。悠悠俗目。不盡知孟瑣。而孟瑣亦不屑求知於當世。書癖以破岑寂。酒癖以破牢騷。好古之癖。以破俗韻。其他非爲德於鄉。則節口量腹。以緩急其族之貧者。雖客至疊恥。歲誦秦恥。勿問也。方今中外時局。以爭殿之虎。而角戰野之龍。以雌黃之口。而灑玄黃之血。明哲君子。非學申屠蟠。則徐孺子耳。假令孟瑣而處今日。既不願奪捷走險。以挑時譽。又不能庸庸悶悶。爲無口瓠。不鳴蟬。則何如擁書南面。高臥北牕。之爲快也。子瞻遷謫時。當海舶遇風。如在高山上墜深谷中。長希恩放歸里。得款段一僕。往來瑞草橋。便如極樂國。古人功名仕宦之際。乃如此。今孟瑣家食之樂。不啻過之。而况著書日益多。清名日益著。幸而遇。爲晚年之蘇學士。不則猶勝窮山瘴海。萬里未歸之子瞻。孟瑣安往而不自得哉。美酒速飲而無味。積薪在高而先焚。螻蟻必申。鵬息必飛。孟瑣尙四十。盛衰倚伏。名位未可量也。於是社兄弟。酈酒起爲壽。大笑而別。

### 壽玄宰董太史六十序

甲寅春王之十九日。太史玄宰董公六十矣。遠近東錦蓋壁。謀介壽於公。而公預勅門者無內客。無獻廷

實曰。我將與陳子探梅山中。或放而至於三泖五湖。犢車漁舸。不得而跡也。而華亭侯鄭公。則謂陳子曰。吾師他人辭。而難辭之子。子實習我師。蓋爲我屬一言以佐飭。某與公少有惠莊之契。晚而相期爲楊許碧落之游。而未有以應也。頃公雖六十。神明壯旺。如三四十許人。其名方噪於啓事。而津津於有道賢士大夫之口。中外想望公者。卽東山不出。洛下不相。而班孟堅蘭臺。范蔚宗之詹事。則公舊物也。而公意獨不爾。嘗謂余曰。吾曹無他覲。博得一活勝人足矣。余曰。公有三無。筆下無疑。眼中無翳。胸中無一點殺機。此三者。皆公壽徵也。公大笑。以余爲知言。而自余以外。亦鮮有能盡公之奇者。公科第高。言語妙天下。度無可一世。而寒生晚進。操執謁公。至與之衡禮。順流而談。無所忤。亦無所揀擇。則甚奇。或一餉而接數士。一日而發數十函書。緩急乞覓。多恆順如意以去。則甚奇。端居則神游四海。廣坐雖鐘鼓鏗匏。絲肉雜奏。湛然如不見不聞。則甚奇。自禁近出爲藩憲。落落幾十五年。瀟灑咏歌如平生。而無怨誹不自怡之色。凡邇來路歧而徑捷者。公羞而不忍爲也。則甚奇。不禪而得禪之解脫。不玄而得玄之自然。不講學而得學之正直忠厚。則甚奇。揮毫掃素。簇簇如行蠶。閃閃如迅霆飛電。山僧逸民狎得之。而上相巨卿。豪瑤貴戚。欲乞公尺寸而不可得。則甚奇。書畫出公手無十一。而借名衣食者。其質筆往往播傳於輦轂。流通於外夷。殘棋短楮。購募餅金。當吾世而目見其聲價百倍者。惟公一人而已。則甚奇。泛然受。悠然辭。泊然若無所事事。而品隨物情之向背。與時局之變遷。他人累百言而不足者。而公片語必快心。其事或發於三五年之後。其人或隔數千里而遙。公輒射輒破的。輒斷輒左驗。則甚奇。公之奇。爲文章翰墨所掩。而公休休之量。斷斷之識。又爲才名所掩。有如且晚賜環。延對便殿。其筆下無疑。可以爲

眞史臣。眼中無翳。胸中無殺機。可以爲名宰相。而顧時起時躓。旋推旋阻。天祿之藜。毀而爲名山之副草。膚寸之雲。公施於二三同志。未雨天下而雨一方。則吾華亭鄭侯是也。夫鄭侯爲衆父而公爲衆父。父之壽於鄉。不旣多乎。公已丑榜。最號得人。徂名者名不立。學道者道不效。公乘運委蛇。身名俱泰。天下以公之文章翰墨。比於米襄陽。蘇眉山。雖恩寵知遇不如。而公有元章之悅生。無子瞻嶺海之困頓。則所謂博得一活勝人。公眞饒有之矣。而况更有必不勝朽者在也。鄭侯笑曰。善。昔趙綰爲相。言師申公。帝遣蒲壁。惟恐後。而申公已九十餘矣。師未艾。不敢以此事公。但聞公却避。傷者行且西出關。請學令尹喜望氣而迎。公卽不爲強著書。其姑緩青犢。爲我飲長春一杯酒。

### 壽包瑞溪先生六十敍

先生以癸巳稱六十矣。性簡重。不敢以性醴鐘鼓。勤其鄉之宗人賓客。乃與甌甄子出而游於峯泖之濱。不佞某。先生之小友也。無敢以俗禮溷。遂謀之愚谷子。操空言爲壽。而折梅花與山中之鹿以侑之。夫先生自含香卽爲秉鐸憲大夫。蓋浮沉宦轡者幾十年。吾生晚不能盡知先生。自先生之折節而下。不佞於委巷之廬。及相與就暱。修布衣交。然後退而少盡其奇。先生所謂天下之至人也。夫世之尊官長者。大較可見矣。非高車大纛。歌舞臺榭。爲匹夫匹婦觀。則日捉牙籌。鑿三窟以穴子孫。而久之卒落於游閒之手。散爲飄風冷烟。而不可得。夫尊官長者。誠知其後之必至於此。曷若放而縱轡於寥廓之野。以庶幾哲人之尊生。直爲此芟芟也。先生寧靜澹泊。超然出於天際。俗籠時局。不得而繫之。此何足以奇先生。而先生之奇。世人不能望其萬一者。先

生居家孝友。子姓凜凜。動遵禮法。不失尺寸。而先生未嘗并以檢押人。則甚奇。賢豪借譽。飢寒借色。一諾不渝。千里必赴。則甚奇。平生經國大略。嚴若武庫。深若重淵。而有時嘿然端坐。曾不知其爲大人先生。則甚奇。喜與人同功。而至不惜與人同過。則甚奇。可以廊廟。可以山林。可以方之內。可以方之外。則甚奇。進而莊嚴於鄉老之社。退而婆娑於少年之場。則甚奇。人德之不應。或中之難踴之語。必不忍之語。亦不應。一言渙釋。解衣握手。驩然無忤。則甚奇。起自名家。復起自少年高第。爲鄉祭酒。爲邦典型。而或布衣葛屨。或下車徒步。則甚奇。不逃禪。不佞佛。而能不妄語。不宰殺。不吝信施。不購兼味。則甚奇。孜孜爲善。自子姓而下。兒童賤隸。皆化之。則甚奇。胸中了了。明智若神。而往往絕臧否。含瑕類。則甚奇。人以此相加重。而不忍以此相加欺。則甚奇。六十矣。而不倦游。碧瞳丹輔。行無杖。坐無几。則甚奇。若是者。是真天下之至人也。先生蓋嘗以無咎無譽自處。以不夷不惠處人。以知足知止處造化。故有東方生之吏隱。而斥其滑。有榮啓期之健。而去其貧。有白香山之適。而無蘭消玉殞之悲。有陶元亮之淡。而無攢眉白蓮之苦。有蘇子瞻之達。而無流離放黜。皓首窮海之憂。若先生真可謂壽而康矣。夫先生既壽且康。則縱游五岳之期。當必與不佞野人共之。他日山冠田衣。長鑿短杖。清歌幽嘯。而不入松花芝草之叢。則此鹿且百歲。能負而走矣。使天下望見吾兩人。如甌瓠子之從先生者。曰。此青山白雲東西南北之人也。豈不樂哉。

壽岡卿大咸馮先生六十敘

往戊午。大馮君元颺。小馮君元颺。同舉於鄉。壬戌。颺先登。舉朝額手云。此大咸先生子也。先生劓刑曹郎。

讞獄豫章。豫章無冤民。其于公高門之報耶。余曰。君未聞馮太守襄陽事耳。當稅監陳鳳鎮武昌。韋緹騎坐襄陽。不狐不鼠。飛而食人。蓋負嵎虎也。其間胯衫給事。衣緋拖綠者。非鬚頭養子。則大腹長鬣。馭市魁。鼓作威勢。割剝人物。卽監司臺使者。第相顧太息。莫可誰何而已。先生曰。襄陽動。則全楚動。而天下與之俱動。頃者。滇以火。秦以毒。遼以兵。閩且窺御史中丞而狎侮之。涓涓江河。青青斧柯。此其時矣。乃密授方略。縛韋緹。騎置之法。勅市人家投束薪。燔其廬。烈焰四起。積賄一空。道途歡呼如雷震。先生緩緩乘肩輿還署。課兒讀書不輟聲。鳳慚憤。百計謀蝸先生。不遷者九年所矣。家居孝友。削跡公庭。官至太僕卿。猶貸子母錢爲用。寓書小馮君。僅搜十金寄之。其清絕如此。襄陽父老。修說馮太守稅璫事。至今面有怖色。而先生談笑遜謝曰。此曹畏先皇帝三尺法。非畏馮太守也。大抵彈論寺人者。輒指引漢唐爲證。而余謂不然。吾朝不典兵。不監軍。不參機密。不與撥立定策。不呼翁。不呼將軍。不候不王。卽開採權稅之役。直以老奴下儻畜之。差有不法。小則鯨且逐。大則保且誅。誰敢有越厥志者。虞虞太阿之柄。操之先帝。而授之子孫。故顯宗奉遺詔。急撤天下之稅。使今上御大寶。盡召天下之正人。則大咸先生其一已。昔漢元帝欲用馮奉世馮野王。迄爲石顯所格。廢不用。來瑱在襄陽。程元振請託不從。譖瑒言涉不軌。唐代宗削瑒官。流播州不返。此皆馮氏與襄陽之已事也。先生更三帝神明之朝。又當羣璫見艱雪消之日。雖石顯元振輩。不覺掉尾弭項。以就先生之鉗勒。眞英雄縛虎手哉。夫天下無事。則已。有事則元老壯猷。舍先生其誰與語。大小馮君勅舍人治裝。同籍諸兄弟。置酒春明門內。側耳屬車之音矣。

壽瑯琊王閑仲先生六十敘

瑯琊王長公司寇。次公奉常。文苑代興。學士大夫。擬於眉山兩蘇氏。而閑仲以束髮知名。早九試輒冠軍。海內傳誦。其文不去口。曰。鳳麟衣鉢。定屬此君。甲午。繇明經中北闈榜。司寇奉常已前逝。而獨王文肅公父子奇重之。操木天貴人相待。逡巡三十載。數奇不前。謁選憲幕。竟歸。識者相爲慨然。而余獨笑曰。閑仲此舉大有識。夫以閑仲卓犖命世才。俯首而攻時調。扛鼎弄丸。何所施而不可。第精爽稍稍非昔矣。卽與子彥褰裳匍匐而就計偕。馬背續殘夢。蝸角戰虛名。閑仲其能忍此否。瑯琊司馬以來。連圭疊笏。長戟高幡。門庭世世不乏。而身稱老孝廉。又稱老參軍。謁御史大夫。踴躍折腰。需郎官太守俸。歸飽妻孥。抑何卑也。又何憊也。閑仲其能忍此否。今閑仲置身於不潛不見。若夷若惠之間。先世之萬軸牙籤。付之子彥。法書名畫。金石鼎彝。付之子彥。弄幼兒。耽著述。雄文大篇。長歌細律。皆綜覈故實。描寫情形。不妄襲一字。不泛置一詞。刻成攝月樓稿。悉翻兩先生杼柚。而鬱鬱芊芊之氣。自覺其秀而可傳。恨兩先生未及見之耳。子彥美少年。精嫻經術。通達國體。檢戒舍人兒。每以溷吏庭。旁獵戶外事。爲可恥。閑仲父子相師。更有重於公西華之朋友處者。家風如是。豈必拋晚景之桑榆。而就出山之小草哉。往者瑯琊諸君。或跌宕少年場。或馳逐大人游。或談宗。或談氣節性命。瞠目甚口。噉名者尾而隨之。予獨窺閑仲。口無流涎。兩眉端亦絕無栩栩羨色。卿用卿法。我用我法。卓識玄覽。早已覺於玄黃未血之先。進不倚冰山。退不墮火宅。鄴侯書。仲長園。陶令田。步兵酒。造化悉扁而留之。以待閑仲。卽眉山蘇氏父子。未必享此太平清樂也。自今以始。左手呼淵季。右手挽子顛。晞秋髮之披肩。沐朝霞之擲面。優哉游哉。但解富有日新。以儲攝月樓著作而已。余曩與閑仲頗自負。丙午。卽向白石山前。補百囊納。炊三足鑪。齣



作醺睡漢久矣。閑仲能來一訪我乎。我將斫鱸擷蓴。起爲閑仲壽。嘆舊好之晨星。顧新髭之如雪。三百枯棋。十千美酒。卽信宿流連。猶恨晚也。居然成二老。來往亦風流。杜少陵此詩。得無爲我兩人設耶。世路悠悠。則請付之洗耳。

### 壽查仍素先生六十敘

往余訪馮茂遠於當湖。因識查仍素先生。是時茂遠載酒出北郊。與先生狎坐。披賞晚香堂新帖。漏盡抵茂遠別墅。燃燭登樓。所借有奇客。一夜徒步六百里。有異僧。善飲至數斗。指禍福多中。言語沸發。而先生巖然不動如山。余心知其爲有道君子也。明發。茂遠放馴鶴一雙。往來霄漢田渚間。採芙蓉。摘柑橘。酌酒黃花而別。茂遠種梅幾四十畝。約春時再游梅下。余遂巡未果。而先生以今年庚申稱六十矣。查氏海上右族。纓冕四世。先生扁戶下帷。無錦衣玉食之習。出試童子科。入與公度公權仲魯輩結社。摩壘相攻。數拔幟而出。晚年厭薄舉子業。游心洙泗竺乾之書。俯而讀。仰而思。其稱引指示羣子姓。率王文成以上諸名公嘉言懿行。淺者解頤。深者沃人肺腑。溫如挾纊。醉如飲醇。嚴如畏友導師。有凜然不可犯之色。兩季後先歿。先生撫其遺孤。部署其寸田尺宅。孳子母而息之。拓貲倍曩昔。悉秋毫皆授二孤。遂以名士亢宗。同堂兄有繼產。先生義不受。遜之嗣子。其他飢寒借色。吉凶借力。解調紛難。借晷於柳下。借矢於魯連者。尤不可勝紀。而先生則遂巡三讓而不任德也。所居有龍尾諸名山。時時攜羣從嘯咏其上。涵雲弄月。達旦忘歸。歲時伏臘。過從諸父老子弟。傾尊卜爵。飲不人後。醉不人先。今春秋六十。敏武善噉。猶類三四十許健少年。隱耶。仙耶。其洙泗竺乾氏之徒耶。先生

不欲自名。而人亦無能以一偏名先生。蓋幾於逃六鑿。游四虛。栩栩於華胥之鄉。齟齬於混沌之譜。小年大年。吾不得竟之矣。先生有甥曰茂遠。嚴事如察父。今以十月之朔。率公度公權與仲魯諸君子。雁行壽先生。適當小春。風日晴麗。釀黃花以爲酒。羹芙蓉以爲裳。遙憶人間之樂。度無有踰先生者。恨余爲客所絆。不得從先生拍游其間。而藉手壽言以獻。俟先生百歲時。同遊茂遠別墅。度梅花四十畝。煙幹如鐵。雙鶴骨老。能負我兩人而飛矣。

壽益吾凌孝子六十敘

武林有凌孝子六十矣。王君元建。走書白石山。徵祝詞於陳子曰。凌公闇修士也。前諸文學博士。上狀郡邑長。以及臺察。舉古德行科。賜楔棹旌閭。里聞鼓吹聲。傾街涸巷。掖老襁幼而擁觀之。孝子謝不敢當。而以子山澤之言奏。度必且嘖然而進一觴。凌公益吾者。給諫二洲公之仲子。廣西太守梓崖公之繼子也。精嫻經術。學使紫溪晴原兩先生拔爲冠軍。餽於官。太守公五十艱子。爲曲圖置副。默禱舉雉。調護嫡庶間。最爲心苦。守本生親喪不應試。弱冠妻亡。畢身不再娶。鼎新家廟。推遜分產。捐貲行營高冢。蓋廩廩篤行長者也。孟秋墓本生母。將啓父龕合祔焉。啓壙。水黑樸腐。公一見慘駭。號天慟地者三日。夜。遂至廢明不能療。或云劣地師誤人。於公何尤。公得無過乎。陳子曰。昔梁有中書郎殷不害。魏兵入江陵。尋母所在。雪天行哭。見死人填溝中。卽投身捧視。舉體凍僵。始得母尸。大哭欲氣絕。權葬江陵界中。宋有孫法宗。遇亂。以父尸不測。操刀沿海。見枯骸則刻肉灌血者十餘年。臂脛無完皮。血脈枯竭終不逢。遂衰絰終身。自來奇男子。皆至性過人。殷不害不暇顧寒。

雪凍僵。孫法宗不暇顧臂脛血肉。而凌孝子何暇顧有目無目乎。目今朝野更局。日異月新。不風之波。何刻蔑有。夷狄橫行。猶嚴門戶。饑饉疊見。猶競奢靡。種種魔事。非復公六十年前景象時。公以有道處此。自當閉目不窺。恥爭魑魅之光耳。吾聞張湛云。滅思慮。專內視。老子云。聖人爲腹不爲目。此實養生家要言。而公暗合古法。則篤壽何疑焉。天道不應無知。何故使公無目。天道有知。終不應使公無報。今報以康寧。報以元徵。吉徵兩名。士又報以旌廬表門之典。俾公孝行。與世人千手千眼共見之。天何負於凌公哉。若子夏喪親未有聞。而喪子喪明。韓熙載敝衣芒屨作瞽者。乞食於歌姬院。多見譏名賢。而無補世教。不若公於父子夫婦之倫。孝義皆可風也。故作序一通。次于濟南瑯琊凌大母大節解後。而并以祝公百歲之觴。

### 壽陸仲華先生六十敘

余少好曠聞。考室山澗。覆以茅椒。將以爲灌息寤寐之所。而蹈道不固。強向人間授書。每思梁武有云。賓客簡通。公卿罕預。意嘗誦而愧之。間於瑯琊絃誦之暇。與二三同志。行游郊墟。晚得陸仲華先生。蓋婁東隱君子也。陸氏自薇蕘晉川兩公。以風流文采。照映一時。而仲華繼之。仰藉先閥。風軌穆如。孝友恭儉。信於里黨。蓋嘗隸博士之籍者四十年。而才高數奇。遂此不復與羣從掖裾爭席矣。南郭之陽。有墓田在焉。先生於是灑泥芟艸。穿池引流。地不求方幅。樹不問位置。藥欄竹塢。參差蔚蒼。臨之以草堂。樊之以構垣。紆折之以柏徑蔬圃。紅橋翠幕。綠窗素屏。先生日高枕讀書。甚樂也。余嘗一過訪。盤餐錯進。觴弈間作。奇若異香。不速而至。倚孤亭坐。盤石出視籬落之外。江橋亂飛。田塍如織。主客俱在圖畫中。但憂老耳。先生捧腹笑曰。君非知我者。僕六十

飲噉不少衰。入抱膝上兒。出對座上客。登壇賦詩。如幽燕健將。爲人排解紛難。如關隴十五俠少年。其他掃籜買花。種魚洗鶴。殆不知老之將至。余曰。有是哉。先生者。蓋不官之淵明。不貧之榮啓期。不抱喪之漢陰丈人。而有子之白樂天也。且今甫六十。余齒肩隨。當歲歲過婁東。與先生共尋人外之樂。度手種樹已徑圍。兒亦讀父書。稱知名士矣。

壽康孟修先生六十敘

往余與玄宰從孟修游。時在城闔中。每見具香茗。或小飲微醪。所談非禪則詩。其性如山麋野鶴。未嘗不在長林豐草間也。孟修不奈俗。又不喜治家人產。門風孝友。雍雍無間言。卽終身待人。未嘗有譙讓之聲。與驕詔之色。舉止清疎。神情蕭爽。當時未五十。眉髮鬢鬢如着初雪。望見者疑爲山澤列仙之儒。豈城市可得而狎見者。近二十年。不復遇孟修。卽遇不數數。去郡十里餘。卜居避世。凡故交知識罕見其面。其古者龐德公蘇雲卿之流歟。孟修所居。田皆中下。多空陂大澤。及三四老楓古藤。因築圃結廬其間。繞田皆編槿插籬。塍岸曲折。不見關扉啓扉。花竹蒙茸。不見徑通徑轉。板橋回互。不見樓庫庖廡。脩竹偉木。礙日遙天。翠微蔚曖。惟聞春臼。機杼聲。客至輒留。留輒傾日夜。仰見薔薇紫藤。高懸樹頭者數百尺。秋深紅葉。與芙蓉葦花相映帶。鷗鳧雞犬。見人皆有傲色。則孟修可知矣。孟修一歲常寡出。出必佳山水。所交無雜賓。必當世豪士偉人。嘗舊老衲。餘則倚杖閱耕。閉門釀黍。大兒讀。小兒抱。不知人間莞枯譏稱爲何物。蓋目前真隱真樂。無過我孟修者。余陳書數篋。山裝一具。秋圃春田。去孟修不遠。而聲影未消。悔吝旋起。王景文有云。奇士必龍居深藏。林宗輩不足識也。

余實於孟修有深愧焉。孟修今六十，白髮不加短，赤權丹輔，不改如少年時。手種核成花，竹成林，樹成拱，三十畝之宮，遂成一深山大壑。如桃源、苧村者然。文初成，竊謂孟修居然成一龐德、公蘇雲卿，置之高士傳、逸民史中，無愧色。吾師乎，吾師乎，可以樂而老，老而忘年矣。

### 壽雪泉禪師七十敘

余少慕人外之游，手公車言，攢眉不怡，得竺乾古先生書，輒避人讀之，欣然有會心處。家居近馬習寺，行游寺中，遇雪泉師，如獲夙契。余比時縮髮，不敢與師塵尾相雜，然心知師爲龍象蹴踏中人也。徐文貞解相印歸，同陸文定耦影林下，尋法喜之樂，師以老衲介於其間，如裴休、黃蘗、了元子瞻，皆可入圖畫中。莫廷韓以詩道自雄，客至同集師山房，歌咏叫嘯，城烏林鳥欲驚欲止，與霜月相凌亂。師絕無倦色，燃香淪茗，復如初。余嘗倦而假宿，數見以爲故常，而今不可復得矣。廷韓以後，騷社寥寥，客不復訪師，師亦無所事，客日掃一小閣，六時禪誦，晚年更就閣下下房，精修淨土，髮白齒豁，而束身戒律不少衰。每談壯年五臺游，及向來酒人韻流，跌宕酣呼，如夢中相似。目前惟董太史、唐孝廉、陸大行，吾師何司理，與余追隨舊游。時向枯葉古殿，一再尋師，而師尙能雍容矩步，笑而送客，行不借掖，手不支筇，其百歲故可待也。師之師爲長壽佛，不拘拘世相，第吾曹喜師，耆舊在望，遠近皈仰，辛苦飯僧，而不欲披緇攀鉢，爲居士宰官說法，而不欲談玄說妙，痛棒熱喝，爲窠臼禪。古有本色住山人者，非師而誰，故樂爲文以壽之者如此。

### 壽滬海陳先生七十敘

海上滬海陳公。解中州學政歸。闔門養重者若而年。特召公觀察使。與棠邑繩齋許公同轄晉藩。識者額手曰。此京師不通書之唐介。政府不奏記之劉元城也。主爵何自而知之。非久且擢卿寺。賜節鉞。而公堅臥不欲前。笑謂勸駕老曰。無妄言。吾王子七十矣。姑趣酒進我。於是海上客屬陳子一言以介傷。陳子曰。古者官評鄉行合爲一。今分爲二。上大。大夫居官。外有臺察。內有考功令。史有筆。評臣有簡。禮法家轉睛相屬。耽耽焉。執清議繩其後。孰敢有越厥志。而後爲鄉先生。或不然。鄉先生之行。無若漢陳太丘。有爭論者。輒曰。寧爲刑罰所加。無爲陳君所短。余嘗疑蔚宗氏頗有所描畫矣。今觀於吾鄉陳公。去太丘豈遠也。公司刑刑清。飭兵兵整。察吏吏肅。字民民安。造士士興。敷歷二京。三楚兩河之間。名實加於上下。李本寧太史詳哉言之矣。而予獨雅重公鄉行。自少至老。無間言。公未登賢書。勁挺自好。精神清審。時然後言。旣成進士。絕不與里閭事。亦不與操邑大。夫權。與人交。魚魚雅雅。和氣可搏掬也。雜以非義。卽面赤髮指。雖親厚無所貸。蓋生平未嘗干人以私。而人不敢以私干公。三獻之璧。四知之金。非特望廬而退。及門而返。且鮮有謀公於心口間者。公論事必分別邪正。論人必先分別小人君子。以熱腸憐才。以冷面疾惡。久則郡縣嚴重之。小有所創革。曰。陳公得無不可。里有不潔。與檢格者。動色相戒曰。無令陳公知之。公真吾鄉之陳太丘也。然太丘道廣。未免爲中常侍侯覽張讓屈。而公決不輕假。易地而處之。其百折不回之氣。千仞不下之色。度且雪峻於太丘公。鄉行如此。而宦業可知矣。公去國。朝野之風氣。日變日新。公中立屹然。無所加損。流覽圖史。平章花木。間爲詩若文。以擬於古。所謂公是先生。公非先生者。挑之時局不應。挑之古學不應。甚則投之以雞肋。嚇之以腐鼠。亦不應。蔗境彌甘。薑境彌辣。垂今

日而公七十年之故吾尙在。非獨行君子歟。公與棠邑許公同籍。復同調。其年齒召命又同時。棠邑猶善飯。是帽布襦。人莫得而測識之。而公亦碧瞳丹顴。春秋著書不輟。兩公蓋不出而登朝。使後生晚達。當末世而親見古之真狂真狷。豈不快哉。昔司徒陳耽。太尉楊賜。每拜公。輒嘆。實大位未登。愧於先之。今鸞龍滿朝。何有耆舊如公。而久潛人後者。公無讓。且暮駕蒲壁。迎公於鄉矣。

### 壽元輔少師瑤翁申公七十敘

禮大夫七十致政。吳門申公少師。解相印凡十年餘。而甲辰秋。始稱七十。邦君諸侯登歌者。趾錯堂下。鉛山令顧禮初束幣及門。徵文於布衣陳子。陳子辭者三。禮初曰。僕受知申公。復托太僕孝廉兄弟葭莩之末。誼不可無一言。且文富公不有布衣堯夫乎。請毋讓。儒不佞。少受太原王公聘。讀書婁江間。居恆太原語次。公輒嘆曰。申公天人也。公練達國事。決機應變。捷出人意表。上不時出片紙。勅黃門立索回奏。公從容裁答。溫而且理。其他號令大冊。府檄軍符。及四方如山之牘。駐筆立辦。悉中甘苦。真可使人主解頤。老吏宿將。面談於千萬里之外。公每事務持大體。性不喜伉岸儼薄。挑取時譽。而一切以弘雅博大爲宗。好獎士類。而人負之。客有道其事。非笑則嘆。公相度相才。舉世無兩。而予獨謂公與太原和衷一德。此尤相業策一根本耳。兩公生同郡。同榜。同鼎甲。同詞垣政府。同奉朝請。家居同璽書存問。自卯及辰。後先稱七十又同。此皆巧值天人之奇合。而正人君子之大同。不在是。曩江陵以名法治國。虎負不可下。龍亢不復顧。蓋陰握官府之權幾十年。而公繼之。權者。人臣之所不敢受也。公委蛇巽謝。以歸人主。少年喜事。將回面而嚮太原。太原不爲動。公無猜色。亦無猜心。

凡一哺一握。一笑一顰。無不與王公揭日月而共之。如定壽宮。剪鯨宦。止內操。絕開採。扶言路。翼皇儲。內調衆心。外調衆口。寧使天知有餘。而人知不足。此公與太原之所同也。魏知古始爲姚崇引用。崇反銜之。韓休以蕭嵩薦。嵩更不協。自古鼎席之地。蠶端易生。元和諸君。特其太甚者耳。端溪之貶。門集賀賓。襄陽之朝。口騰僞識。雞方絜鬪。何暇司鳴。釜且沸然。誰能調鼎。古人所以嘆羨於丙魏也。閣臣自肅廟以來。其賢者。卽不盡如唐之牛李。然物情反覆。大約可觀矣。自公與太原並領機務。謀不害同。同不傷政。凡閣中向來膠粘不解之疑城。至二公始破。公歸而朝局已變。今且小聞周公召公之言。轉思十年前兩君子同心輔政。豈可復得哉。頃公與太原里居。相望百里。歲未嘗一再覲。覲則無信宿。遂別。公賓至如歸。而太原公畏客若逃。空虛。公少太原僅一歲。太原性怯寒暑。手料方藥。儼然若不勝。而公灼灼有孺子之色。太原一食三嘆。驩無餘幾。公陶輿謝屐。無所不縱賞。汰寫生趣。以迎吉祥。度其神情。趣舍迥若別調。絕不能事事懸合。而後知兩公之立朝。非苟爲同而已也。昔文富致政歸。悉士大夫壽而賢者。置酒相樂。圖形妙覺僧舍。賓主凡十有二人。而堯夫不與。竊怪堯夫居洛中。當時士大夫識其車音。爭相迎迓。司馬公獨不爲留。耆英一席地耶。豈堯夫以布衣硜硜之節。恥與鄉衮躑躅。士大夫亦有不得而強之者耶。夫引分守道。堯夫且然。而儒則何敢以言壽公。禮初曰。否否。峯巒金碧。幕以白雲。山龍華蟲。火藻粉米。而以荷衣薰帶介於其間。兩相蔚映。無妨異同。且聞公花下小車。相遲久矣。予謝不敏。姑授簡禮初而佐公一觴。

壽孫太公七十敘



余畏客喜出東郊游。柳岸荻渚間。有衡泌在焉。孫太公侍洲。舊隱處也。太公本世家。其祖好讀丹經。與鍊師游。產廢雁洲翁授經里中兒。積糶營一畝宮。破垣敗葑。賦詩鼓琴。甚樂也。雁洲翁多痿疾。臥輒經旬月。或累歲不起。卽起輒尪頓。循墻捫壁而已。太公負抱雁洲。出入與俱者。凡十五年。雁洲翁疾漸瘳。有客策子母驢入門。食庭下蔬。雁洲翁笑曰。我得此驢兒。可馳負抱矣。客如命。留母贈子。雁洲翁得乘驢游市中。每上驢背。太公如掖小兒狀。整鞍引轡。接衣裾置尻下。視安行數十步。始安心而入。聞墻外驢鳴歸。扶掖亦如之。挫草量水。已具棧下矣。雁洲翁多名賢之交。太公肅客。真率中禮。宛轉隨父心。居恆非分蜂釣魚。則種豆藝菊。少絲岐黃書。有異方。病而乞藥者。輒應。貧無取報謝者。畀藥如初。子幼者。馴謹守門戶。長者世聲。妙文翰。出則丞相施床。歸則名公卿士。呵噉坊陌。其所居花竹依然。而草堂加腐而新。湘襲芸裏之書。加床而屋。太公褐加綺。市沽加名釀。折芰烹瓠。加而爲樂肉盈盞。太公每嘆曰。有兒如此。恨不令我父見之。雖然。我以此老無恨矣。余憶髮覆額。吾師雲汀先生。率余謁見雁洲翁。比長。與太公及世聲兄弟游。甚數。目見樹杪藤躡蟠結可醉坐。庭槐交蔭。午不見日。皆太公手植也。太公今七十矣。負隱君子之行。而世無式問問太公者。余故命子墨陳詞。而屬世聲侑觴以進焉。他日郡志。撰逸民孝義一小傳。或有徵余文。

壽冬官見所潘先生七十敘

往太原王文肅公。嘗謂余云。邊吏必鄭經略。河臣必潘司空。兩公皆有子。以明經中甲第。顧司空長公。獨以弘雅樸重勝。黃中丹權。脩滄碩幹。望而知其爲名世偉人。與之談。袞袞如懸河。然不挺險。不走捷。又溫然古

德君子也。不佞退而心識之。已聞令溧陽。再令永清武清。所至檢括豪右。捕治訟魁。披隱田。汰浮額。雪沉寃。哺  
教貧諸生。裁抑稅使之橫飛者。拒謝權要之請托者。邑號神明。薦剡騰上。以中忌。僅召爲刑曹郎。再晉都水。奉  
勅監惠通二河。公募民開濬白河。歲省水衡錢十萬餘計。漕艘便之。孔侍御特疏奏聞於朝云。家傳金簡玉字  
之書。躬遡沙壑水流之勢。真實錄也。會爲細人蜚流言當路。遂挂考功法。聞者皆爲公露讎不平。而公恬不屑  
意。卽貽書同列。猶以河事相規。皆鑿鑿中窾會。洞情實。或先發於數十年前。或立應於數千里外。若使援夏忠  
靖。劉忠宣故事。由冬官郎正卿席。夫亦何愧不然。駕輕就熟。家傳而廷獻之。老司空行河舊緒。公可繼而理也。  
天授國家以河臣。而頓之於蒼水寂寞之濱。若而年。今且七十。髮垂垂且雪矣。余嘗謂河臣與邊吏迥別。今士  
大夫輒髀磊砢。橫刀相揖。高談九大鎮兵事。非書生浮氣。則故老陳言。獨河之血脈微而利害鉅。與天險爭。與  
王氣爭。與中朝之羣喙爭。老司空能授之公。而公不能得之司空。又不能得之面牆豐蔀之輩。公其如何哉。邊  
事可以揣摩。河事必由傳授。面命之躬親之。又歷試以練其膽。久任以老其才。河有世臣。則世無河患矣。自公  
高臥後。治河使者。舟行木末。泛泛然隨鼻上下。刻泥如畫。脂鏤冰。歲費金錢。如漏卮破釜。公父子當任。豈至糜  
耗至此。昔者老司空三罷而三召之。三召而又三褫之。賴公純孝。洒血上書。垂老訟言於朝。獲賜卹典。雖廷議  
大見昌明。而公數年前胸中全河之端末。百不及試。一干霄之木。偃於巖間。濟川之舟。橫於渡口。吾非獨爲公  
老惜。實爲國家之河費惜也。公進不伸於朝。退而祛其枕中之祕。以教二子。長公太學。次公西臺。辨精博辨麗。  
工文章詞翰。異日撰公家河渠書。溝洫志。如司馬談之有遷。班固之有彪。登天府。麗郡牒。其所以壽公者。又不

與人間之大年小年較短長也。公寧無輒然而進一觴否。

### 壽楊太公七十劄

侍御楊公之按吳越也。其率屬以推誠任素爲主。其督鹽策以寬商恤竈爲主。其調朝野之局以渙小羣萃大羣。化異爲同爲主。瀕行之日。松父老堵而告曰。吾儕百日中。若不知有侍御臨郡者。旣行而見繪像者。擁門執香者。導塗而後知有侍御在也。侍御爲誰。曰。楚揚公。所居何地。曰。古武陵桃源。父爲誰。曰。太公七十矣。積學貢於鄉。以子貴封矣。其孫弱冠成進士矣。父老曰。汝何從知之。陳子曰。侍御嘗顧余草堂。徵文爲壽。具言太公恢疎魁岸。嶽崎磊落人也。束髮攻文章。躋蹙場屋以老。性不喜治生產。而好爲人脫急緩禍。不責人報。不使人知其慷慨赴義。徒步躍馬。雖老雨甚風。莫能遮止。侍御公初爲長安令。經營滿咸陽者。至不避鬼矢鼎鑊。太公即而笑曰。兒得我骨。文弱買勇游太華峨眉歸。又笑曰。孫得我膽。蓋少而授書。長而教以忠孝廉潔。廩廩然惟居盈處亢之是懼。今立朝居鄉。一切以嬰兒真性處之。父子祖孫之間。間且傷則觴。奔則歌。宛然牽衣索果。繞膝分甘時也。夫五倫之中。兄弟狎則傲。朋友喋則瀆。婦子嘻則索。唯君臣主泰。而父子主和。公西華父子。所謂朋友處者也。然章甫束帶趨廟立朝之重典。孔子不他與。而與公西華氏。曾子之養親也。如事嚴主烈君。然援木擊之。有頃始蘇。子聞之。愀然不樂曰。參乎來。勿內也。由此觀之。人子豈必拘檢束縮之爲孝也哉。嘗讀文弱之記曰。山水之奇以曲而生。直而散。余謂孩提之樂。以直而生。曲而散。彼其乾啼濕哭。饑嗔飽喜。此真性情也。縛筍以爲輿。執芰以爲蓋。文襖錦襠。呵噉而前導之曰。官且至此。真功名也。老人坐繩床。子孫攀棗。

捧罌擁項而進。口不及受。噴而流涎。僮僮歌舞以爲樂。此真禮樂也。後世出就外傳。而孝始文。入就仕途。而孝始曲。跳上堂。跪斟羹。三時百拜而奏酒食。意非不善。禮非不莊也。然而君子有不貴焉者。謂其非真也。天下真有家庭之樂者。無如武陵楊氏父子祖孫。豈特如朋友。且嬉嬉如真嬰兒矣。太公與龍君御先生善。君御傾天下知名之士。客至。太公亦爲具主禮。近得陳氏廢圃。行且結茆編竹。如<sub>蘇</sub>蒲落村墟。文弱治一舟。奉太公漁釣其中。而侍御公又以使竣。還里門。進無隱忠。退無隱恨。所談非經世則出世。所樂非好山好水。則異人異書。趨操若一心。雍陸類三代。不知疇爲父而疇爲子也。疇爲祖而疇爲孫也。疇爲貴而疇爲賤。疇爲老而疇爲少也。則太和吉祥之至也。此非得之太公也。取漿而仆。弄雛而啼。蓋楚人老萊氏之故態也。亦非得之老萊氏也。黃髮垂髻。怡然自樂。蓋武陵桃源之遺俗也。亦非得之桃源也。孝弟之樂。不知足之蹈之。手之舞之。蓋孔孟<sub>魯</sub>魯之家法也。而又何疑於楊氏之父子祖孫。請以此爲太公壽。

眉公先生晚香堂小品 卷之十六

雲間陳繼儒著

壽敘

壽元輔少師瑤翁申公八十敘

甲寅秋。吳門少師申公壽八十。大學士葉公具題。與歸德沈公並請。上卽俞旨。下璽書。特使馳問公於家。蓋自升儲。及上慈聖徽號。與今而三矣。吳中楊去奢。葛震甫諸君子。屬不佞儒一言。以佐觴。余惟公七十時朝。野薦詞于公者。幾無所容視。儒何能更加於縉紳先生。而竊以救世玩世出世之說。請爲公奏之。當江陵秉軸。操上急。操下嚴。自公稽首歸政。而君始君。相始相。六曹始還爲六曹。九鎮始還爲九鎮。河不主異議。而淮黃之安流如故。邊不主挑釁。而虜王之堅款約如故。金不采。稅不橫。中使不橫出。而山市甯救如故。儒事有累揭。而不顯諍。而官府父子兄弟之間。其吉祥如故。此公之所爲出而救世者也。公二十有八。而爲狀元。四十有四。而拜相。五十有七。而辭中書政事堂。安享林下者。又二十四年所矣。曩時或考滿賜宴如天神。或賜答御書如朋友。或面承召對于毓德宮。出示東宮諸王子。如家人骨肉。而公則避寵若驚。受之而不加盈也。晚年閱世彌久。

感慨彌多。屈指辛卯後之宰相。壬戌後之狀元。且不知誰苑誰枯。誰修誰短。而况區區穴中之格鬪。鬪下之辭言。會何足以辱公之一映哉。卽受之而不加損也。此公之所爲退而玩世者也。大抵江陵之局。一變而爲名法家。故救世者莫若以寬和。近年之局。再變而爲縱橫家。故玩世者莫若以談笑。夫以談笑爲玩世。如大人長者而當嬰兒。則與之爲嬰兒而已。若此者。豈特可至長生。雖謂公得道可也。近有人自洛中來。言歸德大學士沈公。年甚老甚健。而事亦甚奇。家有五鼎公社。曰守株。曰移山。曰刻楮。曰掘苗。并公而五。皆圖書壁間。有門生故吏至。則拉入杏花酒肆中。或與鄉父老賭博餅餌勝負。以爲樂。此尤玩世之雄者。而公特不如此之不恭耳。舍歸德而外。則有雲棲老人。雲棲于世福。自願其日減。申公于世福。人願其日增。及今皆八十。而增減之味。俱已覺矣。則公之轉救世而爲玩世。轉玩世而爲出世。豈肯落裴公休。趙公抃。兩相國後哉。申公曰。善甚矣。子之老而進吾以道也。爲飄然酹酒。三酌康爵而退。

壽滬海陳先生八十敘

往者滬海先生七十時。不佞嘗操文以佐觴。大約謂先生鄉行類陳太丘。不通書京師類唐介。不奏記政府類劉元城。先生笑而頷之。而今壬戌又稱八十矣。禮稱耄耋于君。一坐再至。杖于朝。不俟畢。先生笑曰。老臣久私丘壑。絕春明之夢。廿年所矣。請辭禮。養老月有存。有常珍。先生笑曰。不腆秣田。故在。請辭禮。鄉飲酒五豆。先生笑曰。僕老猶善飯。無以賓筵。嚴我。無以哽咽。祝我。請辭。退而召故人子姪。張燈梅花香雪中。飛絲奏肉。觴詠甚樂也。客脫而駭之曰。先生殆古之至剛人也。寶刀易缺。長劍易折。垂八十而光芒不衰。將無齒剛舌柔之

皆非欺。余曰：先生唯至剛故至此。當其爲諸生孝廉時，慨然以天下名教爲己任，有俠骨而無柔情，有冷面而無脂態，有清議而無綺語。扈詞既入仕版，自尙書郎以及問卿，自兩畿兩河以及三楚，其執法甚堅，砥行甚峻。權要撼之不爲動，名宿招之不爲應，私謁削跡，公啓削名。里有闕于牆，猶于闕，居間于公庭，漁獵于鄉曲者，見先生車輒引去，聞警咳吐涕聲，搖手障面而避之。雖不便者，譽誹參半，而一二貝錦之言，終不勝田庚褐父之口。曰：陳先生至剛人也。假令撤城府，摧壁壘，事不論曲直是非，品不論智愚賢不肖，唯唯諾諾，如不鳴之蟬，無口之瓠，以此博醇謹長者聲，似亦甚易。而先生故羞而不忍爲也。和同不已，必流而爲鄉愿，鄉愿不已，必流而爲鄙夫。大丈夫七尺未捐，三寸舌六寸管尙在，何憂何疑，而輕擲百年之景光，盼世人須臾之顰笑，何慚何懼，而盡更老成之故轍。學少年諧媚之步趨，落落無徒堂，獨露如壯士之不借他力，獅子之不求伴侶，非特大人相，抑亦壽者相也。則先生是已。若老氏齒剛舌柔之說，此可以教中人，而不可以動豪傑。筆柔而敗，硯剛而存，藤蘿柔而善緣，萎于霜雪，松柏剛而似傲，挺于歲寒。夫物則亦有然者矣，而又何疑于陳先生。

### 壽封修撰見峰張先生八十敘

太史君一以辛丑廷擢第一人，是年太子冠婚禮成，上慈聖尊號，覃恩京朝官。太史得封，見峯先生如其官。丁未，先生方八十，太史請于朝，候休沐歸，上觴，遠近束錦，羞璧者錯堂下。太史謝不內，而徵陳子一言爲壽。陳子遜者再，及春花時，始得操筆而祝先生。余惟東海公以名臣震朝野，再傳爲黃門，爲侍御，其後甲第駢起，幾十輪而九戟矣。見峯先生，獨不獲以經術顯。太史一鳴，以先生身親見之。父老云：山川有靈，余謂彈丸峯，泖

何足當君一。要自先生長發其祥耳。先生性軒爽。當家中衰。挺身左右翼。日以孝弟恭儉爲政。自拜封典後。被服樸素。門庭蕭閒。閭史無過書。公府無溷牘。道遙文史山澤間。丹觀碧瞳。疾步健敏。度其規模尺幅。蓋古之有道君子歟。陸文定公嘗謂予。吾歷仕途。見浙孫氏再世爲宗伯。其列卿佐侍從者。踵相接于朝。閩林氏三世四尚書。下亦爲郎署牧守。而常與孫宗伯季泉。林尚書肖泉。對山游。言貌愿朴。視寒賤無以異。詢其人。人則約斂。檢括更過之。天道忌盈。鬼神瞰高。兩家皆無處焉。其子孫貴盛通顯根本。亦確在于此。今太史君身若不勝衣。言若不出口。端靜狷潔。弘雅精嚴。惟恐隕越先世之家聲。是懼而先生素心素風。嘿相扇助。豈惟不愧東海孫。其意亦欲教太史君事事第一也。自古父子世登狀元者。爲安氏梁氏張氏兄弟。繼登者爲陳氏孫氏。一姓二狀元者爲宋氏翁婿皆狀元及第。而年最少者爲汪應辰張孝祥。三試而元者幾人。膺首選而他讓者又幾人。而惟王沂公之博大。呂文穆之寬簡。文信國之忠義。吾朝二羅之風節文章。賢者至今樂道之。君一眞其人。乎。君一汰雜賓。核掌故。隱然以三不朽自任。而當世亦以公輔期之。若後人遡考其所自出。如歐陽司馬公。父則先生姓字。因與之並傳于無窮。其壽又孰與今日多哉。東海公若萌之始芽。侍御黃門若甲之始花。及君一則爛漫矣。栽培護愛。以收碩果之報。是在先生。昔張文孝公爲狀元。性至孝。願以己官祕書郎授父。眞宗許之。父年九十餘。見其子入踐樞府。宋人豔爲美談。垂五百餘年而鮮有繼者。繼之請亦自張氏先生始。

壽敦五孔先生八十敘

乙丑皇太子誕生。太史玉橫孔公奉詔書頌示江南江右。還壽太公於里居。出而仗節。入而介觴。鳴玉佩。



魚鏗然委地。遠近聞而豔之。比時邦君具牛酒。鄉紳具羔鴈。父老子弟。茂除洒掃逆之境。宗長聚族逆之郊。有洞庭孔介孺者。太公族也。走詣陳子。請屬祝詞。往介孺客蕪湖。遇長公泰華。授經曾氏。按譜相質。同出曲阜。端友公裔。端友生三子。長居衢州。次居句容。三居洞庭。自是泰華介孺。敘年爲昆弟行。太公往來京師。數向蕪湖訪介孺。而次公則魚服雀舫。直覓介孺於洞庭山中。遊四日乃歸。其敦族最爲篤摯。每爲余言。太公廩廩有道君子也。孝友博聞有行義。取予不苟。以明經官蜀中。隣水簿。清節著聞。三年拂衣去。去之日。棧車羸馬。裘裝蕭條。邑人嘆贊不容口。曰。丞簿匍伏大吏階下。往往類寒蟬凍蠅。而孔公此行。如青鴻黃鵠。翔於霄漢。豈可羈紲哉。願伐石建祠。俎豆公於永永。而太公則逶蛇謝曰。吾非恥折腰小兒。第我家五男兒。頗出杜少陵陶柴桑上。又何戀區區五斗爲也。未幾長公泰華。次公玉橫。先後讀中祕書。青城靜父皆食餼。才名互相甲乙。武庫經笥。家駒國寶。哀然萃于一門。而太公又以覃恩鉅典。封如次公太史官。得天子制詞甚美。仕兼吏隱。詞有豐碑。清畏人知。家無擔石。眞言言實錄也。太公居恆課子文章。欲其根本六經。德業望其師模三代。蠕言螻動。俱無愧于孔氏之家法。而後卽安。今次公簪筆經幃。衡文場室。啓沃皆第一法言。甄拔皆第一名雋。高山大川之局量。金鼎玉鉉之聲華。業已揭日月而懸人間矣。有如操大柄。決大事。收攝人心。休養物力。以清靜和平之福。還之朝野。以康寧仁壽之福。分之太公。謹四知。提百忍。聚太上之三立。演謙卦之六爻。止涕止囂。去羨去泰。卽春秋八十。猶彭篋之小年也。昔蘇老泉與子瞻子由。同入京師。歐文忠韓魏公。奏其文於朝。僅除著書郎。爲霸州文安縣主簿而止。孔氏二史。不減兩蘇。而太公笑擲雞肋。食報鳳毛。朱黻方來。黃髮未艾。視老泉先生。所得不更

饒乎。老泉蘇氏族譜。雄健俊偉。光輝明白。讀者喜其本本原原。有孔子孝友爲政之遺意。今太公邂逅笑談。忽得洞庭句容二派。合爲南宗。凡與介孺驩曜無間者二十餘年。其猶蘇氏行古之道也。隋唐之朝。譜局隸于翰林宰相。皆帶知譜事。况孔氏以聖裔而居帝鄉。比之舊閥名家。其關繫猶重百倍。自今以始。葛庇根。葵衛足。太公百歲之年。皆介孺一家鳩族之賜也。寧容無片言以獻。故徵陳子文。授之祝史。以侑人日春酒之觴。

壽雲從范先生八十劄

古三代八十者。帝授几杖行。糜粥飲食。巡狩四方。諸侯待于境。帝先見百歲翁。次九十。次八十。東行西行。弗敢過。欲言政。帝就之。三代以下。此典不再舉。僅見於漢之老更。而後則寥寥矣。我朝惟鄉飲禮差近古。然名實不稱。有識恥之。是故甲姓巨閥。當耄耋之年。不敢聞之薦紳長吏。而徵詞山澤之癯。如雲從先生是也。先生范文正忠宣裔也。濯行績文。介儀矩步。里落化之。遠近高才生。多廩廩執北面禮。先生擊蒙發聵。舌佃以事二親。餘廩六姻三黨。父事兄。母事嫂。子視諸從姪。極有恩。孝弟章聞。學使者旌其閭爲風教勸。久之用明經高第。令慶雲。通敏廉潔。著有名譽。會仲子異羽。負冰鏡之望。拜天官郎。先生遂拂衣歸。歸而遇覃恩。受子封。笥衣冠藏之。于郡邑庭不數數也。郡邑虛左大賓。迎先生。一再應。謝不往。日挈諸故人鹿車魚刀。逍遙山壑水涯之旁。三雅而醉。三商而起。有談市朝者。移他語置之。或呼棋榭聲亂之。暇則爲子孫袞袞談說經史。與朝家二百餘年掌故。齒及忠孝節義。捋鬚拊膺。慨然若撫其會。晚窮性命之學。晏坐凝神。聲跡俱闕。俯而讀。仰而思。神明湛如也。人見先生去官早。儼以九十日之淵明。六百石之曼容。而余謂未足盡先生。大約類文正忠宣父子耳。夫

文正捐田贍族。捐宅建學。忠宣捐俸以廣義莊。而先生喪賜禭。飢賜粟。市藥掩骼。垂老無倦容。其利濟同也。文正文章本於六經。忠宣以作者自命。禁林典冊。及當代金石碑版之文。皆出其手。今先生嫺經術。工詩賦。而異羽言語妙天下。藝苑推爲代興。其文學同也。文正與孫明復。張橫渠。胡安定。共論中庸春秋。明堂禮樂。及鄉飲酒禮。先生弟子二百餘。皆知名孝秀。爲引經敘史。幾至嘔心。而又延閩師里老。講讀高皇帝律令於鄉。其整訓邦族同也。文正忠宣。剖斷國是。好銓別邪。正賢不肖。今先生汲引後學。異羽惓惓以搜揚賢士大夫爲己任。其雅意人才同也。文正忤夷簡去。忠宣忤安石章惇去。先生性剛嫉惡。謝慶雲令。異羽抗時自劾。謝吏部郎。其急流勇退又同也。夫家常細小。父子猶有同心。若去官而子謀之父。父謀之子。稍非大賢。必且拂然于鼻息喉嚨之間。柄鑿而不相入。如先生是父是子。解馭擊鞮。不爲功名富貴所籠絡者。能幾人哉。能幾人哉。先生春秋八十。勇噉翔步。其氣不少衰。頃天子詹吉視太學。推擇海內篤行耆宿。惟先生足當三老五更之選。而異羽詔起尙璽丞。將車執杖從焉。有如天子設漿執醕。優而問政。其將理何語置對。忠宣曰。大略與柴車爭逐。明珠與瓦礫相觸。君子與小人鬪力。中國與外夷較勝。非惟不可勝。兼亦不足勝。不惟不足勝。雖勝亦不武也。此語與今日時事頗相類。先生有意乎。請以爲聖朝獻老乞言之助。

### 壽特進元老鳳林杜大將軍八十敍

今國家九大鎮。無若榆林之士馬。號稱精強。其起家世弁。臨壇授鉞。兄弟父子相繼爲元戎。無若杜氏三傑。而杜氏之功名壽考。又無若今特進鳳林公。公以天啓改元之歲。稱八十元老矣。時當壽辰。羔雁牛酒。輻輳

戰鬥之外。自朱被青衿。黃童白叟。以及兜牟介士。解辦胡兒。左執綬。右執綬。前祝噎。後祝纒。笳鼓沸天。歌舞動地。大將軍日章率兒弘域。序立拜跪。進百年之觴。猗與盛哉。公十七從軍。以旅帥分屯城。募勇選銳。數與虜格。數有功。功狀載在幕府。初賜節。延綬。鎮將書告急。公斬明安。走莊禿賴。得虜首四百五十。甲仗無算。再鎮甯夏。松山酋賓兔。台吉糾宰着等。蹂躪甘肅。公授策諸將。斬級百二十有奇。賓兔歿。妻比吉伏賀。蘭山後。公遣子日章爲先鋒。至黃草灘百餘里。三戰三捷。比吉迎戰敗走。又斬級九百七十。駝馬千馱。已宰着聚兵武塞外。公先發直薄虜營。轉戰數十里。斬其酋三人。虜一百二十餘。諸虜自是叩關乞款。不敢渝香火盟。亦不敢輟一矢窺西鎮。望見麾蓋。輒咋指相戒曰。杜家軍來。宵遁矣。公前後賜朱提累千。重錦累百。進階一級。誥封三代。子日章。十三拜指揮使。稍長。經百戰。神武赫然。拒吉能之請封。降猛可什力之部落。其威名潔操。幾與公兄弟鼎足。公告老于七十前。而日章解印于四十後。自古大將功成名遂。身退如杜家父子者。蓋千萬人而不一遷也。昔馬援六十二。請征五谿。披甲上馬。據鞍顧盼。雄則雄矣。及進壺頭。則穿岸以避暑。曳足以觀賊勢。左右哀之。莫不爲之流涕。沈慶之自五校登三事。讓還官舍。日與子孫中表校獵田園中。樂則樂矣。竟以盡言仰藥而吻。此兩人最爲千古恨端。何如公以忠孝爲前茅。以神仙爲退步。飲噉如飄風。叱咤如轟雷。轉盼如巖下電。披鎧躡躡。舞劍鬪槊。矯矯如十五鐵小兒。今螻蟻不欲出身。有如邊陲蠢動。冲主下尺一。求宿將于臥彪。蹲虎間。日章如曹瑋之代曹彬。講邊備。蒐人材。決不出父下。公如趙充國。賜安車駟馬就第。朝廷有四夷大議。常與參兵謀。問籌策。是父是子。自應王侯。寤詎紆紫橫玉而已哉。公聞之嘆曰。吾嘗念松弟忠魂。泔泔涕不休。旣而沃酒酌。

之大丈夫當如此矣。今父子歸隱我家華山。非爾家希夷先生熟睡避詔之所乎。陳子駢驟西來。吾勅兒迎于蓮花峯下。共爲長生不老事。若斗大通侯印。則請付之弘域等。老翁炊黍之夢。栩栩覺矣。日章曰善。請進康爵者三。而後遣百隊紫綃。奏太霞真人之曲。

### 壽顧恭人五十劄

往己未仲春廿五日。余嘗修祝者。詞于閭卿申公。公當杖鄉之年。神審甚旺。南臯鄒先生薦公。起補故衡。今歲癸亥。始轉南太常。顧恭人稱五十矣。公迎之南來。意欲謝里中羔鴈牛酒。而楊季蘅則謀之陳子。請以清言代筐篚可乎。子盍爲我操文以佐觴。今吳中稱高門大閥。無若相國申。舉江表衣冠之族。莫敢鴈行。玄渚公擇繼。獨推梁谿顧先生。名德方正。其女夙有令聞。納璧于歸。屏去一切時世妝。持以嚴重。上下宜焉。雞鳴候相公黃夫人于寢門。問安上食。如故嫺習者。黃夫人奇愛之。曰。吾娶婦得女。司理徐孺人莊事之。曰。吾得女兒。姬媵而下。解繡推哺。心德不去口。曰。我得母。又得女尊師。當文定拜相時。太常公避事權。收物望。夾袋羣賢。推轂衆正。外不告朋友。內不謀之恭人。恭人第謹操內秉。客至具饌醴。歲饑發庾廩。遠近以緩急告。施金錢。太常爲文定襄大事。建特祠。徵文于四方。上袞巨儒。恭人拮据佐之。罄囊掃橐。無所惜。撫前夫人一女。甚有恩。程督六丈夫子。才名赫然。略不假以辭色。嘗曰。男有志。女無態。此皆吉祥善事。福亦隨之。約束童婢。不翔視。不比肩。絮言不及于帷牆。惡聲不加之犬馬。閨門之內。肅肅雍雍。非積習兩家名教。曷臻此乎。余嘗讀家人卦。而有感也。曰。閑有家。曰。嗃嗃。曰。有孚威如。夫世家婦無事他奇。惟一重足以御百輕。近世明妝炫服。好爲豔。流盼嫺語。好

爲佻。寶馬畫船。好爲名山大堤之冶遊。始則識者嘆。繼則笑。又甚則里婦習爲故常。慕而效之。而勢不可復返矣。有如得顧恭人者。閑以嗃嗃。孚以威如。豈惟颺相公丹青之譽。贊太常清白之風。卽使女子有行。聞之且愧且悚。惟恐顧恭人知。三吳風尚。豈不凜凜朝典哉。國有重臣而國是定。家有重婦而家範端。余之有感而爲顧恭人壽也。旣爲吳中慶。更爲季蘅姻婭慶。故授言于祝史。奏之以俟。劉中壘者採而傳焉。

壽李母袁孺人六十敘

吾郡浦上世家。無若竹岡李氏。其兄弟以進士起家者。則自大參約齋公。與今司寇郎易齋公始。檢齋公操家乘。居季孟之間。兩公得不廢讀。而袁孺人實左右之。夫易之論。專起于家人。然不過二女同居耳。若夫聚族而處。其食指漸繁。而精心懽色。日益起。非有明識女子。調而制之。則牧兒竈婦。皆得易面反舌。而操離合之權。闕牆狎帷。猝起頃刻。分而爲塗人。戰而爲胡越者。不可勝道。易之所以反覆于家人卦也。袁孺人本出名家。雅著令聞。當大參司寇。倚辦于檢齋公。檢齋公心計手書。無所不精。詞大要以愼靜成。兩公之廉而已。而一切妯娌間。米鹽細瑣。顰笑取與。悉聽之孺人。孺人聞雞鳴。朝于舅姑之寢門。夔夔如也。享廟獻客。新樽析俎。井井如也。大參司寇之恭人。冕而垂珞。左執照綺。右執照紈。孺人衣褐中處。介介如也。則又油油如也。晨必先田。僮起。夕必後織。婢息。日門未闔乎。雞鷺逸乎。牛未飯乎。禾雜秣乎。燼火不息乎。釜不滌。衣不浣乎。則又呼諸子而質之曰。讀誦益乎。食噉進乎。師匪怒伊教乎。鄰嫗至。則曰。漚麻乎。而配鹽幽菽乎。而乞醯茗乎。檢括臧獲。則曰。無鬪乎。無羣飲。徒手博乎。無闌戶外玷。主人翁乎。無雌懦不事。飽臥爨下乎。大參兄弟聞而喜曰。吾不復反。

顧矣。其出則有清白治辦聲。入則不聞有闕于市。號于門。譁於同室者。豈盡檢齋公力哉。則袁孺人所嚙相多矣。古今兄弟同居者。遠推公藝。近推浦江鄭氏。其他非漢嫂憂羹。則繆妻析產。司牝一鳴。雁行中斷。若孺人之恭儉莊智識大體者。能一二見哉。天必且錫之大年。爲女宗。爲母師。以風示閭閻于永永。百歲觴未可量矣。士訓昆季。飄然曰。善。請書之屏。進母夫人帷而觀焉。

### 壽武塘錢母陸太君七十敘

武塘錢母陸太君。庚申登七袞。次公康侯守大名。不獲御母歸府舍。盼盼瞻雲陟岵間。長公抑之。持節擁傳。過家休澣。奉卮酒上壽。邦君列羔雁。父老具牛酒。賓相望于其廬。太君搖手曰。吾家眞素。不得使里閭怪人。薰灼抑之。謹受教。而通家如不佞輩。誼不能無一言。往抑之。與諸兄弟。讀書橋李南湖包園中。湖去城遠。不復聞城頭搗鼓。率候雞鳴。及膏盡爲節。甚或過之。文成奏予。予謬爲滄乙。間談經史。以及掌故稗官家言。彼此反覆送難。無諱無猜。似猶有古道存焉者。余過抑之。忠所翁率康侯。出肅堂中。太君飴以上客之食。已康侯先得雋。抑之踏躓公車。每訪余。臨饋而嘆曰。我母出靜池陸氏。陸氏門壻官給諫吏部。獨先君困諸生。未通顯。先君已矣。如吾母乎。意蓋欲博一第以報太君也。乙卯舉賢書。丙辰賜狀元及第。太君聞之。且喜且怖。勅門者無入賀。無問便利田宅。無張質庫。無收聚舍人兒。無炫時世妝。晨起部署諸力作。晚視爨下薪。戶下牝。而後卽安居。恆食算器。衣大布衣而已。客歲抑之歸。閉門百餘日。始入郡報謁郡縣。及先生長者。不納餼牽。不置酒高會。不通門人北面刺。焚香堅坐。日討先朝之故實而讀之。自宮府以及諸曹。自三韓以西。六詔以北。歷歷往來于胸。

中而挑之講學談兵與夫朝野向背之局皆嘿然不應金馬乎木雞乎吾不得而倪之矣古來不愧科名者代不數人皆執玉捧盈自重檢點而人亦以重臣期之相與愛惜成就以待其緩急之用後世歲入輕交游輕筆舌輕于是羣喙叟叟衆目睽睽矣抑之以一淡蕩濼百鞭以一靜彈壓百動而康侯又能醇謹潔廉以濟之諸孫襁抱者解盼笑縮髮者解呬吾勝冠者爛文章而不關戶外十步事門庭簡肅清風穆如太君雖以二子貴猶然七十前寒書生母耳昔陶母截髮判薦使侃享客以交勝己者秦仲瑛白母請客既至無勝友母怒責之是二母余尙以爲多事蓋此可行于聲名未立之小兒而不必行于科名並盛之兄弟澹泊寧靜諸葛武侯相業之所繇出也舍成都八百桑而外甯有餘粟餘帛舍司馬德操龐德公而外寧有異人君子多乎哉不多也太羹玄酒惟淡故不厭天地惟靜故不朽錢氏子母其知道乎卽巨儒經世列仙佳世不出此矣吾聞其宗明吾先生者得道君子也太君試以不佞之言質之

壽宋母沈太夫人七十敘

吾鄉屈指閩閩則蕭塘宋氏稱名家其家以科第顯者若絕若續而獨其子孫皆讀書務理道孝弟力田循循然有法度無一切鮮怒務外之色蓋庶幾先民之程哉余與賓之明之遊因得習于謙之坦之兩兄弟每相對未嘗不商略騷雅土室藜藿竹牕夜雨怡怡如也太夫人徙而鄉則謙之坦之爲政太夫人徙而城則賓之明之爲政諸兄弟遞相過從視七箸候寢興以爲常而又時時歸而謝無狀太夫人則撫慰之曰兒不憶我與汝言避倭時乎曰故知之又不憶我與汝言汝父不幸時乎曰故知之又不憶汝觀汝益方十歲汝晉汝履



啼襁中時乎。曰：故知之。嗟乎！吾曩時謁視錦、藿視肉、刻視日、日視歲也。今吾有婦且有孫，衣重襲而食重蠶，貴不人前，行不人後，吾真有吾子矣。無所事視矣。余嘗笑俗學之陋者，往往欲博一第以爲親榮，夫必鳴玉曳綺而稱人子，則曾閔不稱孝，而茅容尹焞非人耶！且世之科第尊顯者衆矣，啣命千里，山霧江湍，親老不獲從，而甚則倚廬陟屺，目窺心折，終不敢少露之于賓客笑語，郵筒筆楮之間，而子或浮沉宦轍，垂五載十載，出而裾絕，入而空虛者，豈少哉！以此視賓之太夫人，果孰得而孰失也！余與賓之諸兄弟，食貧同，兩家之老而安貧亦同。家大人七十時，諸君爲卮酒上壽，而余留滯鴛湖之濱，無能爲太夫人役，而敬獻其一言如此，非特寬太夫人，且以自寬也。宋氏名家多有道者，請以是言質之。

### 壽董宗伯元配龔夫人七十敘

往者董宗伯杖國之年，凡里俗羔雁牛酒，逆屏不敢前，卽家居集冠蓋，懸鐘鼓，僇僇歌舞，以上百歲。矧之寂如也。夫人少於公兩歲，今丙寅小春朔七十矣。謝祝復如前。太守曰：古長吏崇重風化，表女宗，號母師，又如漢中太守，執子禮于杜泰姬，皆載在史冊。今率諸大夫詣門而祝董夫人，抑猶行古之道也。夫人出海，上龔氏，其族有臺省兩兄弟，稜稜以風節著聞。夫人旣歸公，手續以供兩尊人，中饋肅給，客至具茗串而已，不聞庖廚聲。公試蹶則下機慰勞，亦不聞有幾微愁嘆聲。一盞漿，三浣衣，若將終身焉而已。其後神考拔公中祕，光廟擢公講帷。今皇帝追念甘盤，歷登禁近，夫人邀綸告之譽，非一累茵列鼎，象服魚軒，而居恆素風素德，一似諸生婦時，不誨妬，不治游，不通門外環之問，撫視諸娣媵如女，教誡諸子孫，如察吏嚴師，稍長婚娶成名後，亦

不復數數也。初公在北時，廷議欲推少宰，公堅辭。擬北大宗伯，又堅辭。未幾請南，遂上引年之疏。溫旨敦留，賜傳還里。夫人笑曰：公少無宦情，老無媚骨，鳴犢見殞，倦鳥先還，知幾其神乎？客以枚卜挑公者，公曰：無多言，恐夫人聞之，笑而齒冷。昔楚莊王聘北郭先生爲相，先生曰：臣有箕箒婦，請入謀之。其婦曰：君以容膝之安，一肉之味，而殉楚國之憂，其可乎？山濤謂婦韓曰：忍饑寒，當作三公。夫曰殉，微有怖心焉；曰忍，微有市心焉。今夫人尋常蔬練，習而安之，但願公却熱地，避爭門，急以得歸爲幸，不以得宰相爲憂。其賢于古人遠矣。倘夫人凝滯不化，鼻息拂然，或對案不食，或蒙被竊嘆，公能急流勇退如此快人意否？自公出都門以來，未及兩匝歲，揆席之地，露鬣戟手，幾闕爲戰場。譴者譴，歸者歸，黃金相印，顛倒予奪，如反覆手。達人大觀，直不得邯鄲枕上一笑。公未老而引年先之，槐宮之夢先覺，蔗鄉之味方甘，極人間全福晚福，悉萃於夫人一門。視宰相果孰多也。即使公坐政事堂，衣袞圍玉，押數道黃昏文書，豈若著作翰墨，流傳於六宮四裔，象譯雞林，皆知有董宗伯哉？宗伯之筆，頰令枯者榮，短者修，士大夫每有家慶，數千里輿金輦璧，恨不能乞其片言隻字，以爲家世光，以爲子孫重。余則烏能壽夫人，夫人附宗伯而傳，眞壽矣，眞壽矣。

壽范母馮宜人七十敘

往吾鄉有二偉人，曰大范小范。大范方額豐頰，目織瞳炯，議論多準繩，確然若不可拔。小范剛勁孤硬，少緣飾，口吻袞袞，有面暈而無腹藏。兩先生就有司試，其名遞相甲乙，出行衢市上，里中兒及貴人長者，皆引車避之。曰：此華亭二蘇也。而兩先生亦落落意不可一世，瞠目掀髯，如鸞鶴摩騰，龍象蹴踏。至今父老見少年負

氣者曰爾才亦大小范耶。小范者爲叔子先生。大范者爲訥齋先生。叔子老著書自豪。訥齋先生以鄉進士刺萬安。捐賓客久矣。其子若孫皆斌斌有文行。則先生配馮宜人教之也。先生少貧。雄于才。度可唾拾一第。不喜齷齪治生產。而性又好客。客至不聽出。談笑達牆壁間。而宜人斂氣應之。未嘗以釜憂壘恥告也。先生屢上公車。罷免歸。宜人爲緩拂纓上塵。慰勉數四。未嘗不下機迎也。既登賢書。賀者傾妯娒。未嘗以泰色見也。從先生于官。渡嶺截海。亦未嘗以怖色見也。經紀萬安之後事。口血幾盡。匍匐萬里。以素車歸。未嘗以名香珠琲點廉吏裝也。歸而卜宅卜坎。有子杜門。有孫遠膝。且爛于文章。行就婚矣。宜人日從大士龕。布衣蔬食。優游以恬其天年。其歲月豈可量哉。江東之俗。家汰人侈。而三吳尤甚。高髻纖絳。明妝炫服。此不起于寒賤。而起于世家。世家轉相競效。又不起于有檢之縉紳。而起于一二無識之女子。司世道者。心竊憂之。有如宜人之慈儉莊敬。老而不衰。凜然自成范氏家法。其堤坊陰教不淺。度必有善人君子。以食宜人。不盡之報者。其在伯听父子耶。是文苑中世世有大小范也。宜人請爲覲然而進一觴何如。

壽夏母金太君八十劄

余嘗嘆世俗之壽其親者。歌鐘沸天。鞍馬照地。王公大人之文。高懸座隅。繡纈滿眼。讀之非倩筆。則借銜。於女史何當哉。新安夏氏有丈夫子六人。乞言壽母。不他屬而屬當代知名長者。以佐觴。六十徵之弱侯焦公。本簪李公。七十徵之嘉賓湯公。其文精核皆可傳。至是。則以八十文屬陳子。而陳子愧非其人也。孺人出金氏。光祿翁長女。少有德音。十六歸慕筠夏公。公父曰筠莊。母曰蘇。王母曰程。皆篤老有壽種。孺人婉婉事之。儲甘

糴上食。雅得其驩心。筠莊翁客燕齊病歸。夫婦揣聲察色。未嘗頃刻離藥裏間。既疾革。二姑執手相向啼。孺人率諸兒嬰戲其旁。或伴取古今事更相質難。得解而後已。小不懌。孺人倚戶闢。負霜雪。非命去不去也。扶掖病姑。躬爲哺糜。不委左右手。巫醫紛若。寢食廢者經旬。筠莊翁有女弟未嬪。孺人出嫁時奩厚遺之。已孀居。藐孤在抱。爲護持其母子。以節孝聞。程姑弟瞽且貧。孺人衣食之三十載。并葬其不舉之喪。生死皆無憾。其他爲某子娶婦。爲某女贖兒。皆出孺人裝。而且逡巡遜讓曰。此行吾先公與兩姑意也。初慕筠公少孤。宗人留其貲無餘息。客有挑釁者。孺人勸曰。尊卑分也。盈縮命也。請以勤儉補之可乎。于是掃私橐付公。而身則早晚臥。澆衣蔬食。爲童婢先。操機杼。課樹畜。其積遂與素封等。孺人乃詔六子而教之。半受鄒魯書。半受卓鄭書。吾老矣。請受竺乾古先生之書。邑大夫以學宮委者。從與慕筠公樂趨之。不難議金相助也。孺人年已八旬。敏步健啜。猶彷彿六七十時。子孫相習爲肅雍醇謹。世守百忍之訓。家傳萬石之風。和致祥。仁者壽。吾于孺人決之矣。夫婦好法。則明妝炫服。近於無章。好織。則數米櫛薪。近於無禮。無禮無章。何暇好行其德。粹有叩門求者。搖手瞪目而謝之。至使人含赧。噤不敢發聲而去。孺人豐富中程。施與中緩急。懿親疎屬。倚之外府者。若而年。孺人雖不作佛。故自佛地位人也。今且久坐小樓。經聲徹晝夜。馴至百歲。度六子雪髯半垂。曾玄五十餘。亭亭如珠林玉笋。孺人悉攝之白毫大光明中。此與老瞿曇十大弟子五百人俱何異。豈必引南陔白華之詠。西池黃竹之歌。乃稱壽哉。請以奏孺人并質之本寧嘉賓兩長者。

眉公先生晚香堂小品卷之十六終

眉公先生晚香堂小品

卷之十七

雲間陳繼儒著

傳

忠烈張大司馬傳

張銓字宇衡號見平山西沁水人父五典卽海虹先生按蘇松風稜嶽嶽稱名御史歷官太僕卿公生十月李夫人挈之歸寧夜半火發臥下李燼烟焰中公無恙二十一中鄉試甲辰成進士授保定推官讞獄廉明擢浙江道御史出巡察馬丁內艱服闋又巡江西戊午建酋襲撫順總兵張承胤戰歿詔贈少保左都督公奏曰綱目書死之例有三曰死之曰戰死曰敗沒死之者節之也戰死者功罪半也敗沒則直敗之耳今承胤輕進取敗尸積丘山不合卹典請繩以喪師辱國之罪時論譴之又上方略言經臣鎬大將軍柏楨不可用兵不可募餉不可派狡夷不可挑戰以封疆博一擲未幾三路覆師公言言左驗天啓元年特命公按遼監其軍客曰公資十年矣俸六年矣兩差之期報竣矣又嘗上章請告矣公不往誰能驅公迫公者公嘆曰遼左失陷朝野震驚士大夫不能爲主上分憂而乃私畜駿馬預遣妻孥先去以爲民望何怪邊關將士望風鼠竄哉其孤

憤勃勃填胸。請脂車兼道而前矣。既抵關。袁經略先納降夷三千人。雜屯瀋陽。三月賊犯瀋被陷。川浙兵戰死。胡騎充斥。居民空無人。公請撫臣帶河西之兵。移駐海州。督臣帶山海之兵。移駐廣甯。以救呼吸之危。以張應援之勢。疏墨未乾。而賊已薄遼陽城下矣。勸公者曰。公監軍與經略異。巡方與守土異。跳而出圍。以圖後舉。可乎。公曰。我一腔熱血。欲洒此地久矣。賊至。我兵出戰。廣寧標兵二千。直犯賊鋒。賊少却。明日復圍城。公與諸大夫畫地爲堅守計。公守西門。登埤環塹者三晝夜。親以火箭焚賊車。薄暮內應。城隅火燭天。公衣繡衷甲下城。從者擁出小南門。請易服。弗許。入署。叛賊李永芳。曉來伏謁。搏頰謝無狀。公曰。汝爲我言。我對誰言。嗟何及矣。賊取公去。永芳扶公並轡行。且說降。公自投於地。面傷焉。公見賊。挺立於庭。左右抑之拜。公曰。我多繡憲臣。豈肯爲犬羊屈膝。戟手瞋目。大詬罵。且有力。擊人輒披靡。賊怒。摔公出。復呼回。爲撫慰者再三。又擬刀脅公。公引頸以待。賊誘曰。縱汝歸。公曰。我以死爲歸耳。奴知不能奪。送之輿。却輿。送之騎。却騎。仍令錮之。公署中。父老諸生泣而隨之。告永芳曰。幸護張使君。公厲聲曰。汝等好百姓。乃爲好漢子。索命賊手乎。衣冠向闕拜者八。向家拜者四。遙謝君父畢。遂自經。賊走視嘆曰。忠臣忠臣。遣永芳斂而瘞之。建祠於北門外之演武場。流人鄭良弼。祖天弼。杜時隆。自遼歸。目擊其狀如此。撫按核確奏聞。上悼憫卹錄。賜諡忠烈。賜廟額曰昭忠祠。省城。又合祠於都城。賜祭三壇。賜衣冠葬三百金。廕長子道濬。世襲錦衣衛指揮僉事。初贈公大理卿。再進兵部尙書。加三代如其官。從御史張慎言。李日宣。給事中尹同皋之請也。公狀貌魁梧。豐頤廣額。面頰美髯。兩目燿燿如閃電。初李夫人孕時。夢神人裹黃金甲。被髮仗劍入內。及期誕公。公官司理時。又夢入兩是亭。楊中丞繼宗。許忠

節公遼。揖公而前曰。虛席以待久矣。至是。遂符前讖云。往者遼報頗棘。海虬先生速公啓行。星言夙駕。不三月。遂及于難。得報。先生曰。吾知兒預有今日久矣。子道潛以諸生。長號徒跣。將赴遼陽。訪求公之遺骸。而海虬先生泣止之曰。徒死無益。潛詣闕上陳。請兵一旅。自效行間。如漢羽林孤兒故事。願從諸將出關。雪國憤。復父讎。斯亦忠臣孝子効死畢命之秋也。兵曹但覆補錦衣實缺。以需後用。潛壯志不遂。製銳矛千枝。送部滅賊。又請仗節渡海。往勸李暉。李悛廢立之情形。并窺毛帥牽制奴酋之虛實。其忠憤驕雄。所謂非是父不生是兒矣。若使潛領勇士數百千人。獨當一隊。仗以聖主之威靈。助以厲鬼之血戰。必能手縛賊奴賊芳。活者置之檻車。獻俘。死者剗其舌。霍其目。齧之磔之。支解之。祭忠烈公之墓。而後輿其喪以歸。豈不快哉。昔袁履謙與顏杲卿同坎。猶有死時一足也。張湊得杲卿之髮。妻疑之。髮動。猶有髮在也。今忠烈埋骨何方。返櫬何日。世路悠悠。如顏氏張湊之客。又何在。徒使九旬祖母。七尺孤兒。招魂望祭於數千里黃沙白草。淒風凍月之間。嗟乎。慘矣。慘矣。雖然。公能令叛賊修治民之禮。異類營忠臣之墓。又能令降者。逃者。盜餉者。中途觀望者。悔死慚死。恨不從公同難以死。則公之英風峻節。真可激發未死之英雄。恢復垂殘之遼局。豈直與何公廷魁。高公邦佐。鼎足稱山右之三忠哉。故陳子諾潛之請而爲之傳。

### 陸文定公傳

公諱樹聲。字與吉。華亭人。學者尊之爲平泉先生。家世習農。公稍長。獨嗜書。族人毀其書。驅就田。跣而耕。蘆刺入足趺中。歸則挾書避人讀之。忽從杵臼間習爲文。拾殘紙錄文以呈族兄。驚以爲奇。勉就學。公父未之

許也。公灑涕聽請，乃遣就里師授經。同舍生望見山衣田冠，姍笑之久，乃懼服。出試補諸生高等。嘉靖庚子，舉春秋應天第五。辛丑會試第一，以庶吉士授編修。久之，晉司業。右諭德、太常卿、署祭酒，再進吏部右侍郎。公筮仕至老，頻告歸，頻召起家。王申今上嗣統，首召公禮部尚書。凡一歲，五疏懇辭，得俞允。賜乘傳抵家。歸後，臺省交推無虛歲。上優異，賜與廩，加太子少保。遣官詣里第存問者三。冢孫景元，伏闕陳謝，特賜入監讀書。乙巳，九十七，無疾薨。手書遺命，無請卹。兩臺以訃聞，詔所司治葬，賜祭三壇，贈太子太保，賜諡文定。公前後立朝，徐文貞以鄉袞秉軸，推挽天下知名士，獨不得引公自近，其他分宜、江陵、繼視士大夫如鞢、鷹、棧、驥、繩、索、寄手中，公麟鳳不可馴擾，所在冥引，挺正不少下。然以名德高，無所中公退，亦未嘗不心服也。公居長安時，閉門養重，日與海內正人砥礪名檢，一切車騎詩酒徵逐之會，悉謝絕之。掌國子，屏去苛碎，以弘雅博大爲宗，著汲古叢語，及訓條十二篇，以式士。在禮部守法嚴勁，請托格不行。大司馬議增俺答歲幣，公力主罷之。瀕行，上十事報謝。公官業鄉行，始終以敦大體，重清議，堅晚節爲第一義。其教子無趨捷徑，無暱權門，不通輦下書，不問戶外事。知足寡欲，卽臧獲皆廩廩，稟公尺度。公貧時，邑令朱公賙以鍍金，堅謝之。生徒從公游，不竟業者，却其贄不受。旣貴，尤慎取與，不喜問生產，又不喜故爲敝衣糲食以市名。且性好捐捨，迄白首不倦。所餘山田數頃，居廬僅庇子孫而已。公豐頰，肩長七尺有咫，目靜深，含光內藏。當日中，抗對不瞬眦。每入闕，昂立朝行中，姿表特異。穆廟登極，久趣公不赴。趙文肅公寄聲云：我輩豈敢以機務煩公。第欲主上一見丰采，知先朝培養得如此偉人耳。嘗奉旨宴朝鮮陪臣，使者望見公，拱手改容曰：此陸公也耶。垂老家居，臺臣郡邑長首謁公，度且艱於酬。



對及見公衣冠甚偉。龐眉皓首。精神注射入。更端伸引。惟吏治士風。問師鄉三老之事。語不及私。當存問。端笏跨馬。郊迎朝使。拜趨翼如。事竣。跬步無失禮。皆詫歎以爲天人不可及。公少年善病。後益神旺。踰大耋。髮白加黃。兩輔如渥丹。能作蠅頭字。月下視夾注書。髻鬢間復生黑毫。數莖。鼻息閉不出入者。可兩時許。且晚臥起。飲噉步履皆有常。終身不見袒袪。竟日危坐。亦絕無疾遽。陂倚之色。御子弟和而莊。客至更衣肅入。初見未聽。客拜。凝視良久乃揖。揖坐。復凝視如初。稍就溫洽。始相與纒纒道故。或旁論他事。隱若中客膏肓。無不意消而去。文章元本理學。尤邃於易。談笑題咏。必關於世教。或時以二氏微瀾助之。其稱說古人成敗得失。及本朝掌故。卽二百年官爵里居。歲月姓氏。滾滾不爽毫髮。使人聽者慨然踴躍。若撫其會。余每恨國史郡志不及成公手。假公三朝見聞。裁以獨斷。其是非豈謬古人也。公雅志恬澹。精力克壯。堅意求退。甚於人之嗜進。弟中丞公解節歸。尙未老。追隨杖履。人擬之二疏。公艱嗣。五十八始舉丈夫子彥章。及見成進士。官行人。乞終養歸。又及見曾玄孫者兩代。攜子孫出游。卽老雨蒞風。俄頃開霽。每聞公至。聚觀者如堵牆。凡田童野老。以及緇黃者流。莫不愛慕而樂就之。公下車。閱耕問俗。咨便宜疾苦。間遇水旱。必移書議捐賑。民藉稍甦。生辰之日。攜香楮爲公禱於塔廟者甚衆。繪畫公像。徧遠近名山。薄俗好訾議。或少年矯捷。喜凌侮。責備先達。至語公。皆斂衽嘆息。無間言。歿之日。悲惋交屬。會葬者萬餘人。里中幾於罷市。卜牒當路。建特祠於龍潭。置祭田郡縣。春秋報享不絕。公生正德。歷肅穆二廟。及今上。以身繫國家重輕者幾百年。身名俱完。父子兄弟。皆以遠聲利。樂恬退爲家法。大行君當強仕。爲文誓墓以見志。孫五人。恂恂恭謹有雋聲。

陳子曰。余聞之溫公云。人之情。孰不畏天子與執政。最愛者父子。其次祿位。人或老前。無可冀。猶戀戀不忍舍。非勇者誰能割之。肅皇帝端居西齋宮。大僚競撰玄文。以希上旨。公遜謝不預。是不畏天子也。分宜壽。賀者皆衣緋。公獨否。庚戌廷試。分宜謀實私人上第。公掌卷。故混之。分宜粹無所得。聲色厲。不爲動。入都。江陵首謁公。公接對殊簡。還報謁。引席正南。不少假尺寸。江陵餞公。公倨牀見之。抗手而別。其後怙勢奪情。不弔江陵者。亦終公一人而已。是不畏執政也。公宗伯求去。江陵以微言妮之。公曰。一史官二十年始出山。豈爲收門生。覲宰輔耶。公弟中丞公。則又挽公曰。兄卽倦游。宜爲孺子恩澤地。公目大行曰。吾得首丘。卽此兒行歌負薪。亦任之矣。是又非父子祿位所能動也。公眞可謂大勇矣。余生晚。公以小友遇之。每相見。命几置座隅。援筆講易。圖寫爻象。錯綜反覆。皆古人所未道。常手書示余。願諦歲寒之交。遺贖至今。爛然笥中也。及是大行君。又奉公命。屬之傳。余惟公立朝大節。炳若三光。其生平勤小物。護細行。世未必盡知之。余故識其小者。以備公四時之氣而已。然無如吾友周子紹節之善狀公也。周子嘗謂公。高風漸遠。似陶元亮。而無餅粟之窮。耆年宿德。似高伯恭。而無夷主之危。祿位名壽。似郭汾陽。而無朝恩之譖。游戲禪宗。似白香山。而無伯道之悲。潛神羲畫。似邵堯夫。而無冬夏之苦。忠信篤敬。似文潞公。而無子方之辱。守正不阿。似司馬君實。而無介甫之爭。遂爲古今完人。知言哉。

孫漢陽傳

公諱克弘。字允執。號雪居。先世汴之杞縣人。有靖庵先生者。隨蹕南渡。居武林。仁宗延祐初。伯英舉鄉試。

後辟行省爲迪功郎。上饒縣錄事。歸築映雪齋於西湖之上。元末浙東大亂。因遷於松子昂夫習春秋。洪武初。官武昌同知。凡數傳而至延平守雪岑公。雪岑生大宗伯。謚文簡。毅齋公。文簡三典文衡。新鄭高相國拱。婁江王司寇世貞。新安汪司馬道昆。皆出其門。宗伯得公最晚。恣愛之。自少有器量。以門廕。援應天治中。署上元邑篆。號稱清謹。擢漢陽太守。吏畏民懷。當衡王之國。水陸旁午。凡供帳廚傳。皆公部署。甚整而暇。路無驛騷。寧察倚重之。擬咨斬黃兵使者。會公遣書高新鄭。道逢徐太常僕。遂與俱入都。而新鄭方修華亭故郛。捕徐僕。省臣韓楫劾太常。波及公。而公免歸。公自此無復仕進意。遂於東郊故居。修築精舍。輦奇石。寘庭除。環列鼎彝。金石法書名畫。摩挲其中。滌除洒掃。屏榻如鑿。客至命張具。鼓吹遞作。童子按院本新聲。間舞狻猊。及角觝之戲。人以爲安陵食。輞川莊。不是過也。公旣以豪聞江東。而又坦直無他腸。四方客輻輳進。稍挾片藝者。公居停之。推轂之。甚則解衣授餐。使得所而後去。故人疎族。一遇之以誠。款洽餽遺。老而不倦。嘗笑曰。坐上客常滿。尊中酒不空。僕於魯男子。差無愧色。公性巧慧。喜摹古。卽一椽一桷。一木一石。生曲折多位置。所居聽雨軒。東皋雪室。敦復堂。赤霞閣。期仙磴。老圃。茆齋。夜雪。其四壁皆寫畫。蒼松老柏。崩浪流泉。使人凜然不寒。而寒有澄泓蕭瑟之意。客退。就月牕。柴几間。或臨古畫。或抄異書。有挑以俗事。及家人生產者。掩耳睜目。若將挽焉。公正書做宋仲溫。隸篆八分。追踪秦漢。初寫徐熙。趙昌花鳥。晚年畫馬。遠水。米南宮父子雲山。遠近干請無虛日。人有贗貌公筆。以衣食者無數。當路懸購。十不得一。眞率采聲而已。公聲音洪暢。狀貌疎野。居恆好着民間平頭帽。旁綴小金瓶。又好寫笠屐小像。彷彿皆晉唐遺風。非近代以下人物也。漢陽蕭象林爲平湖令。與公無生平交。而

契慕特至。公感其高義。往候之。蕭虛左如執弟子禮。及其歿也。匍匐風雨中。拜之于墓。楊修齡來按吳。表公墓曰。噴激九泉。其爲人仰止如此。公無疾而逝。年七十有九。得一子早殤。擇族之文而賢者爲之後。曰世簫。華亭邑諸生。拮据葬公於細林山之陽。

陳子曰。文簡公官大。宗伯三典試。門生半天下。其所遺僅負郭一區。確田七百畝耳。公自少逮老。賓客聲酒之費。垂八十猶未衰止。而能保有文簡公遺業。不失尺寸。何也。蓋亦有德矩寓焉。今世家子喜狎非類。不知何者爲名士。蟲飲大嚼。不知何者爲名畫法書。彈指流盼之間。潤若驟雨。崩若潰牆。而身名與草木俱腐耳。風流儒雅是吾師。舍漢陽公吾誰與歸。

玉峰道人傳

錢塘有玉峯道人者。世居吳山里。結茅山下。環侍木石。客至彈棋賦詩。燒茗葉。間稱引往事。袞袞不去口。風日清妍。勅童子負壺。往來湖山中。經旬忘歸。歸則坐臥一小閣。讀三氏九流之書。性好菊。多名種。當午夜臥起。不憚風露。手灌籬落間。及秋。羅菊閣上。傾家釀。邀賞無所惜。父母篤老歿。道人白髮倚杖而號。喪葬畢。得心疾。當死者數矣。編席爲龕。日夕坐不出。踵息成病。良已。垂耄耋。顏如渥丹。黑毫生。行游市中。兩肘如風舉。與之坐。氣韻沉古。凝膠松怪石。靈巖古洞。而若有遇焉。天性恢達。恥機事。多與少取。面數人。人不爲忤。事母極孝。母嗾于側室李。命逐之。道人憐其賢。肩李一室中。穴壁授粢三年。母大悔。召李歡如初。其仁孝多此類。道人四十六。長子之翰。殤無嗣。葦月。夢登高山。可萬餘丈。下視奇峯臚列。上有紫芝碧草。珍禽鳥無數。入朱門。歷階上。瓊

宮玉几有帝憑焉。授道人圭，拜而出。視壁門榜之翰名，已更抹去。易之惠，遂覺呼郎母而語之曰：帝錫圭，且錫嘉名，殆舉子乎？俄舉子，駭而名之。即天下所稱大儒鄭之惠者也。道人曾爲粵參軍，再倅太倉，會大征，縛劇賊梁仕興于新寧山中，賑饑活十餘萬人，埋俘莩骨，稱是築三水南海堤，捕煮鹽豪少年，却暮夜千金者二，所至檄署壯邑，使者上書景治狀。比去官，父老持牛酒勞送，擁馬首不得行，皆故事寮幕所無也。道人諱炳，字文輝，于新會祀陳白沙，又從甘泉湛先生遊。婁東與王汝中，最曠，故晚年著書類有道者。年八十有九，匿跡家居，不自名官人，而好山澤游，自稱玉峯道人如故。

樵史曰：昔南陽馮良，三十爲尉，迎督郵，慨然裂衣冠，壞車殺馬，遁十年不歸，妻子至發喪制服，何其詭也。獨醜勝爲功曹，三舉孝廉，再爲尉，一爲丞，哀帝徵諫議大夫，多建白，其後不食，以謝新莽，忠節甚著。道人逢時，能爲勝，不逢時，亦不爲良，其古之吉人哉。之惠撰述，有測莊莊，矻老子解，及他書甚衆，踴進道人，道人笑而領之。蓋父子相師友云。

### 趙瞻雲傳

瞻雲子者，姓趙，名淮，字源長，太倉人。七齡而喪父，又七齡而喪母，遂自號曰瞻雲子，志思也。三娶三失偶，性不喜孤坐，好苦吟，顧獨爲瑯琊兄弟，及太原父子所知。瑯琊歿，王文肅公解相，印歸，與公日益曠，所居去文肅南園不數武，文肅巾車過園，輒物色趙翁在否，在則相與把臂入林，分蘭藝菊，舉觴鬥碁，率抵暮以爲常。翁又精小兒醫，自文肅以及諸縉紳家，多迎公爲上客，決死生如神，而他若單赤孤貧，委巷庫屋，必側身趨視之。

去亦不復問報謝。詩壇酒社及浮屠老子之宮。每有勝游。公不以事辭。亦不以筋骨爲解。或風雨載途。霜月掛樹。而公赴必人先。歸必人後。酒酣耳熱。曼爲長謳。四座辟易。即羣少年。竹肉滿堂。噤無敢發聲者。性慷慨。重然諾。人以緩急告。雖酣極燕笑時。輒愀然舍去。凡爲人經營勸導。宛轉詞色間。不啻身當之。貧者炊。暴者葬。具得公力居多。公父事兄。母事嫂。待孀姊存歿。皆有恩禮。與人交。坦直無他腸。所談皆道義風雅節俠。未嘗以俗務經懷。獨不耐齷齪。人態甚。則內嘔。至義形于色。雖富貴人。富家翁。折行就之。而心不服也。當文肅鼎盛時。坐無公不懽。公抗言無忌諱。退亦罕所干請。文肅每嘆曰。吾閱人多矣。若口無佞舌。腰無媚骨者。其鄰叟瞻雲子乎。及文肅父子相繼捐賓客。物情炎冷。遭幾百變。而公以一布衣交。始終慰存。太原家如故。文肅存不加腴。亡不加瘠。衡門吟詠。老而不衰。其感恩報知。勃勃鬚髮胸抱間。則又古高漸離侯生之流亞也。惜里中知公者鮮。故于七十有五時。爲作瞻雲子傳。

江陰貢太公傳

太公諱賦。字明善。別號暨陽。其先大名浦城人。宋南渡徙宣城。始祖師元。又徙江陰。三傳而以科第起家。曰斌。爲戶部員外郎。生子曰學靜。爲南臺御史。劾瑾璫。廷杖削籍。再召山東按察司僉事。學靜之季子。爲龍陽翁。龍陽之季子。爲暨陽公。少開敏。落筆有雋聲。屢試童子科。被放。因太息廢書。代翁支大役。腹算口占。不屑屑爲織蓄機利。周彜人櫛束舍人兒。又甚整而賢。家以此漸饒。龍陽翁道遙寡營。但召酒人爲轟飲。飲且盡一石。旁指公笑曰。老人臨食不嘆。甘寢不甞。此伊誰力也。公與伯兄曜。所居距數里。餉遺書訊不絕。兄中危法。公傾

贊挺救始無恙。退亦無自功之色。遠近有緩急告者。立應之。應而負者。置不較。契券盈筭。視若故紙。并不知其爲誰何氏矣。性伉直。闊爽。遇可恨人。及可恨事。輒颺去。不則痛詆之。卽名流貴介。凌折無所憚。酒後耳熱。面摘人宿垢。隱癢。聞者口噤。手顫。幾欲穴地入。而公刺刺不少休。諸子跪諫之。公咤曰。汝欲我爲無口瓠耶。第善。詈旋亦善忘。舌有肝腸。胸無柴棘。雖置公刀俎上。公飲噉狂笑自若。不能難也。公恨不竟儒。而癖書甚于儒者。每讀司馬氏資治通鑑。手錄忠孝烜赫者。粘之座右。以代義方。又念南渡後。宣城陽阡晉陵之族。散佚不收。纂成貢氏譜。良史嘆謂爲弗如。二山君癸卯舉于鄉。公志意益發舒。與周孺人陰爲德甚力。撫嫡兄之孤。如己出。迎王氏孀姑。養之終其身。不修故郛。不闔戶外事。從廢圃故園。芟刈疏治之。藥名花。灌修行。傾尊仆斗。奏肉飛絲。燭跋雞號。未聽客去。呂令肅公爲賓。飲公笑曰。田庚野老。不能與子大夫相周旋。請辭。公酒杯流行。諧笑錯出。似狂。爲人畫策。解紛。不顧毫髮利害。似俠。清議格物。嘗持是非名教。以誦其座上人。似懲。陳子一言以蔽之曰。貢太公古之遺直也。公歿後。二山君成進士。宰東陽。推卓異第一。其諸子皆以文行。有聞于時。陳子曰。世人談笑有鑛邪。故秀鐵面以嗔作佛事。世人對面有九疑。故灰袋道士張口如箕。五臟畢露。古之得道者如此。而又何疑于太公乎。太剛則折。公不以剛損。太直若曲。公不以曲免。孤行一意。得全其天。爲布衣則公。爲綉衣。則抗疏瑾璋之名御史。家風剛直。易地皆然。信貢氏祖孫之有種也。故諸東陽君之請。而樂爲傳之。

### 太學吳伯羹傳

吳伯羹。諱守和。自號斗岳處士。諸吳衍於新安。獨吳田著。繇吳田徙隆阜。又隆阜著。隆阜之吳。三傳而下。

皆卓鄴起家。其易買而儒。以經明行修聞於時。則自伯夔始。伯夔奇穎。自少展卷。一覽數行。弱冠補諸生。再試高等。郡大夫遴爲紫陽書院長。與名流結社。比時太常邵中丞羅柱史黃皆虛左推伯夔。人人厭其意。爭自濯磨。以質大業相繼先登。而公才高見格。游梁谿。訪顧涇陽兄弟。把臂甚驩。已遊成均。兩司成有國士之目。入棘罷免。伯夔嘆曰。海中三仙山。舟近不踰尺。爲風引去。豈技不及吾儕乎。命也。歸休乎哉。太公春秋高。繼母下急。伯夔夔夔孝謹。能令霽色解頤。親亡。悉委家秉於諸昆弟。季子蚤夭。無後。命其子爲之後。性不近馴。儉。手不親握算。橐不私尺。帛寸縵。第擇其大者。部署擘畫。首勸宗祠。次營冢墓。徧乞四方巨儒上袞之文。伐石琢辭。以志不朽而已。江陵丈田之令下。遠近驛騷。伯夔慷慨條便宜。肩劇剗煩。父老倚之如左右手。卒以報命。里中有違言。質成伯夔。爲從容劑解。甚則損金錢無所怙。屢饑民。埋道殮。以至橋梁道路縉素之告急者。未嘗以他辭爲解。居恆下帷。凡六籍百家之書。訂頑抽祕。擷秀咀華。日進五屬子。姓于文昌祠。身爲都講。絃誦之聲相聞。博士弟子員纍纍矣。舊有杏村書舍。伯夔茂興草。蒔花竹。日與故人嘯詠以爲常。志意高邁。議論豁達。雖公車不售。而士大夫莊事之。如通德里。如畏壘鄉。抑亦古先生長者之矩矱矣。狀貌偉岸。廣頰豐眉。踰七十神明不衰。端坐而化。子八人。孫十八人。曾孫四人。婚娶皆名族。詳志狀。不具書。陳子曰。涇陽兄弟。講道東南。官雖不甚顯。而身後贈卹之典赫然。斯亦儒者經明行修之報也。吳伯夔與之同時同志。涇陽百一稿。伯夔敍而傳之。而獨以韋布終。烏在其重儒哉。古之儒者。天子或遣高才郎從講。或勅大官具筆札。就家受書錄而奏之。今伯夔不遇于時。而能以平生之所學。課子孫。教後進。隆阜之吳。比于鄒魯。視卓鄴所得孰多矣。涇陽嘗徵余文以表其



父母之墓。今復爲伯羹傳。皆不愧有道碑者。故不辭而敘之。

### 馮甄甫傳

馮甄甫。明州人。初名若臯。已更臯爲陶。甄甫其字。號遂昌。方伯修吾公季子也。家世多名臣。纓綬相望。而君獨通脫自喜。好輕俠。追之就帖括家言。笑曰。諸葛武侯略觀大意。淵明不求甚解。此古人讀書法也。烏用是小兒號嘍爲。吾聞至人多好醉鄉游。近無復問津者。請撫髀雀躍往矣。性食酒。洪飲無章程。方伯肅括之嚴。君醉歸。調方伯起居。急鹽櫛。問寢上食。周恭人臥病。却藥餌不嘗。君手調以進。輒領而受之。方伯試之家政。君任心獨詣。而能行方伯意中事。往往爲君解頤。君後篤疾。猶強起故作健步武。以寬兩尊人憂。其密行多過人者。與人交。有面規而無腹背。有坦中直腸。而無軟言夔語。有立談卽合。暴發卽解。而無終身不釋之憾。有叩必應。有應必如其所欲。未嘗又手硬坐。轉睛不相屬。置人緩急於度外也。性好古。喜集法書名畫。延勝士焚香品題之。遇佳山水。爲橫琴作雅操一弄。味其雋韻。似將折節改絃。不終以酒人自雄矣。然每當志做意得。鼓三搗。雞三號。猶嚴扃門戶。倉卒不聽客歸。客亦不忍遽言去。觥籌交飛。排調錯出。強沃之家釀。不沉醉不休。竟以酒得病。下痢十日死。享年僅二十有一耳。君狀貌魁岸。廣頰高準。豐下目光。燿燿注射人。羈卯時。能控惡劣生駒馬。上下山坂。見者無不辟易。而君執轡如組。馳驟若飛。假令君今日尙在。目擊奴酋不逞。君必且散金。結海內劍客。椎牛擊酒。突行而前。博遼東一殊死戰。以報累朝厚恩。漆奴頭。飲奴血。豈作偃蹇寒書生。枕酒徒膝上老耶。馮元仲才子也。痛父酒亡。而母孺人陳氏。又以節殞。極引古人酒戒。便欲毀尊罍。仆觚斗。殫儀狄于羽山。放杜

康于三危。焚醉日于秦坑。囚酒星于天獄。盡大地秣田。悉化爲斥鹵荒蕪。而後始無憾。余曰不然。自來酒豪如李太白死。如狂旭顛素死。嬰兒不解酒。解乳死。張蒼百餘歲。噉兒乳亦死。盧仝陸羽飲茶死。屈大夫不鋪糟。不啜醪亦死。則酒豈必能盡死人也。唐鄱陽王素節得罪被逮。路聞哭喪聲。嘆曰。人求病死何可得。而尙須哭耶。今君不死于病。而卽死于酒。勝唐王孫遠矣。奚其悲。奚其悲。陳子滿浮大白。酌君牛山之暮。呼而問之曰。甄甫復能飲乎。試讀我身後數行傳。何如君生前一杯酒。

安硯亭先生傳

安茂卿諱紹芳。居無錫之膠山。山有滌硯亭。因自號硯亭居士。安氏自勝國及明。多豪傑鄉長者。嘉靖間有如山公。登己丑進士。選庶常。守裕州。歷雲南僉憲。生少峯公。希堯。希堯生二子。長光祿。署丞。硯泉。次卽公也。公自少眉目娟秀。顧盼迎人。舉體無凡。雅有貴表。僉憲授以詩句。心開意明。十歲工詞翰矣。稍長。讀先世藏書。動以寸計。當廣坐拈一題。下筆滾滾。氣吞多流。而獨好有韻語。不輟。少峯公呵禁之。局一室。顯精公車言。遂與伯兄同裹青衿。稱安氏雙玉笋。是時甫十七。娶吳孺人。孺人屏謝時世妝。德業相勗。公不復展轉內顧。刻苦下帷。視一第如解衣相似。會貴人子爲狡獪所穿。波及公。廢書。曼聲聊蕭不自得。跳身者久之。聞少峯公。墨家難。曰。白門紅板。桃葉竹枝。豈吾事哉。疾趨歸。內外之闕立解。而僉憲公與王安人。後先捐館舍。公匍匐治喪。墨瘠不能起。見者傷之。服闋。散囊裝。結海內墨卿劍客。入京都。上書白冤狀。投刺巨公。卽陸平原。謁張壯武。王仲宣。謁蔡中郎。無以過也。奏下南法曹。首鼠者居半。公嘆燕邸不可以久留。遠里門。得視少峯公含檢。奉母命析

產肥瘠聽兄毫髮不以屑意。家有西林一片石，多偉木壽葆。公疏清泉，累層臺，構傑閣，結幽亭。時竹種松，分闌  
藝菊。時時命魚舫鹿車，往來其中。樂肉飛絲，傾尊仆石，雞號燭跋，不聽客歸。客擬之安陵食，輞川莊。詣門者  
烏相嚙矣。稍挾片長，公居停之，推轂之。甚則解衣授餐，使得所願而去。公雖豪舉，聞江東酒後，身熱，勃勃若有  
礙膺者在。再上書走闕下，賴劉侍御挺身直其冤。公乃更名泰來，字未央。拮据葬父畢，裹篋北雍。己酉戊子罷  
歸。辛卯幾入格，會房考爭甲乙名，兩報罷。公自此半耗雄心。又苦艱子，建白榆閣以祝多男。連舉丈夫子五人，  
稍稍喜見大宅，形諸詠歌。命子珩嗣其亡兄，告廟行禮。未幾喪母，又喪婦，笑不勝啼，喉嚨間咯咯失音，形容憔悴，  
竟不起。春秋僅五十有一耳。公彌留之頃，絕無涼戀，撫瓊頂，目瓚者再已而嘆曰：吾生平器高局遠，不屑屑  
齷齪問生產，然歷盡苑枯炎涼之感，瀕死者數矣。丁卯歲，幾落奸人猾胥筭中，可以怖死。詣闕三上書，纏綿十  
二年，莫適爲援者，可以憤死。七入棘闈，不一售，可以慚死。哭父哭母，哭伯兄哭婦，又哭孺兒，可以痛死。嗟乎，造  
物以六親刀俎我，七情爐炭我，徭役鼎鑪我，又以虛懸不實之功名爲目，吞且吐之雞肋，以掉戲我，其幸而不  
死者，外則登眺有名山大川，交游有文人才子，內則司封公肝胆相孚，膝下雛眉目如畫，而又幸有醉鄉詩社，  
金石鼎彝，破愁懷，結塵想，故得延歲月至此。然吾豈沉酒酒人，風流教主哉。公豐頤廣額，雙耳垂珠，然諾不輕，  
諧笑錯出，親知以緩急告者，未嘗以冷面相拒。司封公創義田，公佐產以贖貧族，處閭閻無囊容，交貴游無詬  
骨，暇卽枕漱百家六籍中，過自成誦，畢身不忍忘。字臨曹娥碑，畫摹大癡懶瓚，旁寫蘭竹，別具一種清芬。里中  
兒童購不易得，姑以自寄其瀟灑標韻而已。郡大夫嘗以修志敦幣聘公，志成，嘆賞有良史之法。詩名青萍集。

二京集芳草編。西村纂行于世。皇甫子循序其詩。王元美爲西林記。其他四方名公。往復報贈者。不勝書。子五長。次玉瓚。次珩。次瑤。皆孝謹。爛文章。卓然有父風。

陳子白。余屏山澤。不獲交茂卿。然時時聞之。吾友徐長孺曰。安公動無缺。言無判德。凜凜篤行君子哉。獨以沉寃未洗。榮名未立。寄跡交游詩酒間。以夷其胸中五岳而已。假令早遇顧叔時諸君子。雍雍弦誦。必且虛席爲東林首座。豈至偃蹇西林一片石也。故有感而爲之傳。

有道鳴鶴李公傳

鳴鶴李公。諱可教。字受甫。上海人。卽聘辟不應。仲昌之后也。仲昌生守中。守中生原芳。原芳生珙。珙生伯瓊。宣德元年。舉于鄉。官淮府長史。生十子。長曰澄。天順元年。進士。官福建參議。次曰清。景泰五年。進士。官湖廣左布政。八曰深。淮府儀賓。四曰澁。卽公會祖。蒞生貢士傑。傑生煥。煥爲晚峯翁。翁得公最暮。十二善綴文。貞齋趙翁試一題。援毫立奏。遂遜爲贅壻。子視之。十八補金山衛庠生。才名爲奕。弟子北面者。屢滿戶。趙翁連舉二雄。公謝曰。某可以歸矣。歸則舌舁以供兩尊人。具甘羶甚腆。晚峯翁爲捋鬚捧腹。幾忘其貧。翁亡。諸子鶩遠游。獨公拮据治喪。造次纖悉。准禮家言。無憾。行營善地。不惜罄產。贖坏土于祖墓旁。費且鉅。匿不令母氏知也。四子迎養母。母過從公頗數。曰。老人非私少兒。但覺兒夫婦。酷知我痛癢。冷熱耳。公授經他所。母疾。輒怛怛心動。過歸。欠身榻旁。爲揣色聽聲。疾良已。飲食衍衍者十餘年。已寒杯棬。公墨瘠焦枯。幾類死。卽春秋饋餼。猶作孺子啼。目爲之青。而篤愛典墳。有皇甫士安之癖。每念先世。儲書積至萬餘軸。嘉靖間。倭奴闖東郊。舊居委膏。

泥淖中填踏而過。自後不復更能收合。則多方訪購之。自六籍百家。以及山劒冢刻之屬。皆抄纂標序。細加丹鉛。揮汗呵冰。眠食減損。猝叩之某事。云出某書某卷某行。且指數以對。鉤引貫串。應聲如響。卽容軒公集。與武經註疏。其手跡歷歷猶存。蟻蠶蠅頭可念也。龍郡丞念公久困學宮。將無爲風氣所鋼。移文更之。不允。公笑曰。雄飛雌伏。宰物自有權輿。老蠹乾螢。此儒者事也。遑問其他。于是下帷益淬勵。課趙氏二子。皆補諸生。以報貞齋翁。而程督逢原逢申不假貸。小拂意。爲攢眉愁嘆。二子見之。凜凜甚於鞭笞。董中行貧而才。垂三十猶試童子科。公器賞其文。妻以女。次年遂登賢書。宗人敬庵君。素封艱嗣。雅屬逢原。公曰。非望之福。道家所忌。暴得萬金不祥。兒何德以堪之。請辭。已而聚族爭立。立者之產。悉殉於仇家。而訟終不解。公潛爲營救得免。而身則泌水衡門。朝絃暮誦。父子熙熙如也。事伯兄女兄謹。兄之女適倪而嫠。公不絕餉遺。旣歿。祭食皆成禮。與配趙白首相莊。六十年如一日。絮語不加于童僕。惡聲不及于犬馬。介行矩步。鈍口眸容。惓惓以惜福。擇交爲第一義。不喜見羶熱貴游。亦不喜赴讀法鄉飲禮。曰。山衣田冠。未嫻罄折。所羨惟闔然篤行長者而已。丙午逢申捷音至。公笑曰。差慰寂寞。已罷免歸。亦不色慍。曰。兒豈薄孝廉乎。吾家養庵公。何如人也。逢申結草堂於笏谿之南。公過而樂之。賦詩云。此堂未易言卜築。寒士三年搆一屋。砌石栽花見遠情。板橋曲沼成幽谷。從古豪門鬥麗華。只今何事傳蓮軸。愛我郊西半畝宮。歲歲春風醉醺醺。其他登臨傷詠。率本之性情。而無郊寒島瘦之病。晚年目疾。詩亦屏去。強半茹素。奉竺乾戒甚虔。笱稿不留。今逢申僅刻十之一。曰碧梧軒詩系。與容軒希獻兩公並傳。鼎足不朽矣。享年八十。墓在小崑山。三子長逢時。次逢原。郡諸生。又次逢申。以萬歷己未舉南宮。拜慈谿

令聲績著聞。甫擬奏滿。而以今皇帝御極覃恩。贈公文林郎。如其官。

陳子曰。李氏自洪永宣景天順以來。纓黻蟬連。門業比于王謝。及公已貧甚。而孜孜好善好書。老而不倦。豈非真清白吏子孫乎。古者賢良文學。坐持國是之平。御史大夫。跪受濟南之簡。晚至宋儒。經行可觀。天子用宰相奏。選書吏。給筆札。錄其書。藏之祕閣中。今公經明行修。豈出古儒者下。而綸不挂半通。養不待五鼎。識者相爲惜之。猶幸身沒以後。慈谿君捧譽命。告於泉臺。鐫詩系傳之藝苑。積德于子孫者必貴。積書于子孫者必文。誰云天道無券契乎。易曰。鶴鳴在陰。其子和之。公父之謂矣。故諸其請而爲之傳。

松陵爛溪周孝廉傳

周公謹諱應愿。松陵爛溪人也。其祖恭肅公。爲肅皇帝名臣。四傳而生公謹。五六歲能受書。動及千萬言。其父命屬文。即以文奏。命屬詞賦。即以詞賦奏。授筆應聲。如出宿撰。父摩頂曰。恭肅再生矣。十五補秀才。十九領于官。試必冠曹耦。邑大夫擢實第二。公謹憤懣不能寢。盜兩入其舟。驚撼而去。已試督學不得志。遂入太學。三試京兆。兩備本房乙卷。時有郝侍御。素有國士之契。慰勞羈旅中。公謹據掩袂。憔悴泣。郝公曰。昔公孫管退歸。鄉人再推射策。遂第一。劉向書數十上。每間報罷。而終爲名臣。才如公謹。豈無泣血以相晤者。何度之不廣也。公謹拭淚謝曰。某亦志士。不屑俗儒。豈以功名未就。志意挫衄。第堂上老親。冉冉日昃耳。戊子就試。中順天榜。一時名噪都下。車騎填門。冠蓋盈坐。顰笑吐涕。奉爲指南。已而南宮罷免。名士送者如雲。贈別之章。不可勝紀。父當六十。先期介觴。束錦羞璧。傾動遠近。俄遭至痛。公謹哭不成聲。形容枯瘠。襄事以後。輒已放絕塵內。無

論生產。卽至親罕得遺其面矣。公謹生平意勃勃。自謂唾功名于掌上。健鷹孤鶴。旦暮掣摩霄而去。志意不遂。退而深沈著書。每恨宋史成于胡兒。漉漫穢弱。幾同酒肆簿籍。于是辨定名稱。隨條甄舉。收拾亡遺。綴補前事。冀成一家之書。而精神尪頓。痲疾遂作。僅可得十之六七。服闋計偕。進舟京口。忽憶慈母。廢然而返。自此臥疾。凡八載餘。憤憤中猶能酬答箋啓。間作飛白。口不絕詠。識者擬之杜預傳癖。皇甫書淫。不是過也。公謹自登賢書。絕不爲官府請託。里黨之中。間有踏不能振。枉不能直者。輒爲申理。否則卽子弟堅謝之。囊百金詣門。立斥之。祝使君王少府。雅重公謹。祈爲道地。不可得。得公謹片言隻刺。如魯連矢。柳下鼎云。性孝友淳。至居家雍睦。而御僕妾如朝典。內外有求于公謹者。未嘗辭以故。往往售產以貸人。人負之亦不復責。所居五畝之宮。花竹回互。鼎彝奇石。法書名畫。具體而微。左右縹囊。縱橫架上。自經史子集。旁及二氏九家。以至兵法禽遁博算之流。無不該覽。而于六書尤得三昧。先著印說二卷行于世。文章好說龍門扶風。詩擬黃初。間及大曆。江左集四卷。海內尙以未見爲恨。公謹兄弟三人。應憲。應懿。獨于懿根蒂千古。漁射時流。延演精深。未本其止。每當燕集。羣從輻輳。觥籌觴詠。次第間作。頗有竹林王謝之風。而篤摯故舊。非法不言。恬靜寡營。不妄臧否。實與公美若出一人。故當疾亡。公美哭兄如哭父母。綱紀後事。摩撼斯文。斯亦見生平友于之所嚮也。年三十有九。無子。子公美之子邦鼎爲後。

陳子曰。昔唐元微狀元。嘗謂余。從友人得論策一卷。讀之博洽奇麗。至口噤手顫。而莫知所措。蓋周君應。慮所撰也。然此特公車言耳。若使置公謹東觀中。專掌昭代國書。推究總括。如李延壽政典。姚思廉時政記。未

必不能辦此也。乃爲造物攄寤。所修宋史。僅得強半。未有指歸。文士無年。運丁百六。環回手澤。一字一嘆矣。周氏曹大家。其在公美哉。其在公美哉。

參字何公傳

公諱三才。字士中。別號參字居士。其先世爲汴人。始祖有爲將仕郎者。南渡家海上。數傳而獻公爲饒州府轄。鍊公爲藩府典膳。公大父蘆江公。又爲蜀都司椽。生訥齋公。授留都司城。配唐孺人。有賢聲。舉丈夫子二。公其長也。公少稟至性。雅不好弄。髮未燥。莊若成人。閩師鄉三老目屬之。稍長。值倭奴躪境上。避兵構李。時暑月病熱。公浴城濠中。多崇浴無脫者。公沒久之。憑一木而起。獨無恙。親黨益異之。年十三。從石城李翰峯儀部受書。屢就郡邑試。輒高等。而獨不利督學使者。公下韓揣摩。磨間寒暑。年二十二。從訥齋公宦游金陵。而翰峯李公亦起家戊午賢書。爲少宰海虞。瞿文懿公所器重。諸郎君皆北面受學。公以舊時立雪。得分半席焉。一時名士若太史焦漪園。余幼峯。皆與公爲筆硯交。每設一難。豎一義。未嘗不反覆辯詰。若勁敵然。學成而歸。屬楚侗耿公。校士至松。卽拔補博士弟子。徐文貞公奇公卷。召見之曰。此真古文。亦真古人也。公素不好咏歌。或強屬之。則笑曰。丈夫旣已屈首經生制義。當破除萬卷。異日木天青署。自有大用。何至刻畫宮商。如歌兒啼鳥。供人調笑爲哉。于是益肆力于文章。其所譔著。于性命多所發明。而更佐以主氣之說。每人棘闈。日未哺而試草已削。洞心破的。語語出人意表。然竟以數奇罷免。丙戌秋。訥齋公捐館。公絕而復甦。哀毀骨立。鬻產以襄大事。退而與仲弟析箸。不問多寡。不計肥瘠。不告宗黨。不設盟言。內外皆稱其孝友。未五十。卽謝去青衿。放浪棋酒。



與人處。廓落無他腸。有以機事挑。或語及時政者。公卽引袖起曰。吾輩周身。自分與草木同腐。幸不卽殞溝壑。惟宜逐鹿豕。課花鳥。一斟一酌。以點綴太平而已。何乃與人家國事。言者慚慙而止。性淳厚溫克。湛然如玉之在壺。故不肖者。遇之自愧形穢。而賢智者。就之更覺神清。名宿重人。忘其爲寒士。農師野老。忘其爲名儒。至比之周元公。王徵君云。居恆好種植。蕃蘚盈庭。而最喜客。至治酒。酒酣談笑。雜以詼諧。月白霜清。不聽客去。是以產日挫。無何。而母夫人唐去世。公哀號一如初齋公。每憑棺而先曰。不肖子無狀。生不獲爲親捧檄。沾升斗祿。歿不能至千里客。封墓上碑。九原有知。何以覲顏人世。乃拮据經營。喪甫畢。而疾亦作矣。生半嗜古成癖。與仲弟士衡。情若友朋。至疾篤時。枕畔猶攤書。仲每過候。公必強起對弈。長君跪請不爲止。臨沒。翛然而逝。子二。皆俊爽豪士。而長君尤見重于大人先生。孫二。婚娶皆名族。人以公孝友傳家之報云。

### 張聖清傳

張聖清。諱積源。上海龍華人。按察使。七澤公之仲子也。君生秀慧。弱不勝衣。十齡誦詩騷。十二嫻經術。神阿熊令君。洪園楊侍御。試而器之。補諸生高等。舉體無凡。寄情不近。望見者如鷗拳秋水。鶴唳寥天。莫得喻其意也。七澤公以秋官出守姑蔑。尋憲粵西。王子入賀。挈君北行。俾游國學。以便往來省覲。母徐淑人。患中滿。君稱藥量水。揣色聽聲。惟恐蛙步離左右。禱醫得虎頭人語。躬延顧叟。三劑而瘳。禮諸伯叔如父。撫季弟孤姪。嗻如良友。巧如導師。見緇素負隱匿。不急爲譙讓。涕泣引諫。密祈改絃。七澤公廉于官。君鮮餘鏹。客有以緩急告者。以法書名書售者。強半質貸。應之。否則。惘常累日。性度淹雅。能與物無忤。而德矩湛然。絕不見縱情誕節。亦

不聞以唾黃堅白鳴。至于謁長吏。游大人。華裾細馬。追無逐走于少年之場。君非特堅塞耳輪。且不欲安之眉  
睫上矣。嘗借余手批南北史。爲丹鉛塗乙。不輕放一字。其他摘錄異書。不勝紀。構竹安齋。又構兩隱軒。因詠雨  
中三友。詠間中好。其詩清真娟秀。做陶白。詞亦不減柳七娘。規造一舟。名自在天。凡釣竿詩卷。薰篋隱囊。以至  
盥洗管絃之屬畢具。客至。命酌清酒一觴。枯碁一局。醉則命侍兒迦陵弄新聲。君按牙以紫簫和之。渺渺度煙  
際而去。七澤公有小舟。曰載石。父子常相尾出游。而君獨時時入東。余訪余。揚檢典墳。討論桂木。申且徹夜。彼  
我忘疲。辛酉適越。次皂林。遇舟子爭道。篙穿君頰。旁墮二齒。君嘆曰。此宿業。勿創之。投謁雲棲塔。受殺戒。過十  
八澗。買瘦藤。磊砢多奇。敷之。正得十八節。遂名杖爲十八澗。挾此復游草蕩中央。夾山漾而歸。時七澤公移家  
龍華故里。君築室三楹。嚴事旃檀古先生像。一似浮圖法。俄匝歲。困肺疾。嗽嗑嗑。喘不續吁。迦陵宛轉。抱掖者  
百端。請代請殉君。不起。歿于樂無知齋。中有遺令曰。肯休錄錄云。擇壻勿太急。立後勿太早。經營兩親壽藏。勿  
太遲。家產半贍宗人。半作善事。生平玩好。分贈親知。而筇杖杯筯。則以遺眉道人爲訣。眉道人捧次。哭失聲。兒  
曹驚怪。數年來不彈此泪久矣。嗚呼。痛哉。君事七澤公。有至行。又有苦心。橐恥而不使見。寤容神儼而不使見  
病態。情深而不使見。悼亡詩。一痛也。踈跋名場。三戰三北。雖瓦注功名。而微抱牛衣貂裘之感。二痛也。詩文吾  
兒其進。未見其止。不噉名。不市交。推重于吾曹。而遺賞于通都大邑。三痛也。中郎有女。伯道無兒。四痛也。聞廣  
寧破岸。幘絞衣。彎弧學射於山下。氣吞并州健俠兒。而不意命脆蛛絲。蛻同蝸甲。五痛也。君嘗戲謂我洞麿聲  
律。類戴顓。若遇宋文。當給聲伎一部。好鼓柷垂綸。類張志和。若遇唐玄宗。當賜樵青釣童。今釣童無恙。而樵青

化爲彩雲。隨風颺去。吾豈復有意人世哉。君蓋指白下姬。幽妍也。幽妍予別有傳。傳成書一通。并焚香君柩前。諾。乃載拜三爵酒。洒泣而後行。

附

書陳稗登交情始末

無錫陳稗登之亡也。栢潭孫公涇陽顧公。狀而志之。而唐元徵董玄宰王辰玉皆各爲之傳。其子藝之。又以稗登遺書訣余。余更白練衣。爲位而拜啓其書。淚浹于睫。而不能讀也。嗚呼。痛哉。初稗登入南雍。新都許相國爲祭酒。新建張相國爲司業。一時所賞識。傾天下知名之士。而獨愛重稗登。與吾亡友徐長孺長孺歸而謂余。南中有大儒。及奇男子各一人。則武進徐儻。涇上陳稗登也。徐公名宿。顧心降稗登。蓋其人豪似元龍。俠似孟公。推倒一世。似同父。余退而私志之。甲申。稗登走華亭。訪余。余方與辰玉讀書婁水。而稗登亦欲謁文於弇洲太原兩王家。至是始相遇。甚得別去。己丑。余與徐長孺會葬於顧墓。因訪稗登。稗登出子弟見余。流連日夜。錠門不得歸。迫余賦詩。又屬余撰祠堂記。因導入祠中。掃除靚潔。肅如官府。曰。不肖歲時饋奠。吾婦手澆。盞而進之。一夕婦不戒於鼠。而不肖禮必以味爽上食。婦倉卒不能辦。爲餽尙未衰。余見人退縮。而稗登賓至如歸。以稗登之年與才。心儻志得。與當世將相。及四方文章豪士。酣嬉淋漓。何所不樹立。而落落卒不遇以死。其死又僅四十有九。是可惜也。稗登忠直孝友。能信于里族。里族無大小。不之官府。而之稗登。一言以爲解。生平視交情最真。其待王崑崙先生。始終執世講。子姪禮最謹。顧司馬嘗折柬崑崙。招爲薊門游。崑崙行別。稗登

置酒送之。已復念其老。不任遠道。爲掩抑泣下。崑崙卽時慷慨擺裝。顧司馬以不能致崑崙也。乃馳百金爲王先生壽。天下聞而咸高之。今春崑崙以稗登病告。余以爲卽病不必死。未幾哭稗登訃矣。又未幾且哭王先生矣。張新建已解相印去。顧司馬與涇陽兄弟。皆歸臥矣。李大將軍戰沒矣。曩與君南雍同游者。如倣絃長孺皆先亡。卽許相國墓頭之草。黃且隕者。又不知凡幾歲矣。大抵人生如弈棋。遞生遞死。遞合遞離。此無足怪。然必局終而後國手乃見。今下子方酣。半道而撤。非獨弈者負恨。卽旁觀亦爲之嘆息不已。嗟乎稗登。豈特余一人區區知己之痛而已哉。幸而可以不朽。吾稗登者。有諸君子之志狀表傳在。余特記其交道之始末。以示吾兩家子孫。各有考焉。

眉公先生晚香堂小品 卷之十八

雲間陳繼儒著

傳

貞懿吳母傳

吳伯霖治經稱社祭酒。別十年餘。而余與之遇。索笑軒。班坐堤上。日暮風起。白楊蕭蕭。伯霖不語。而意自慷慨。余心知其非經生也。今年乙未。余經所見爲壽吳母詩者衆。問之。皆曰。伯霖有母。母之六十也。子女洗酌甚懼。而母忽嗚嗚咽者三。亟命懸中州公像。具觴豆。先薦而後嘗之。賓客聞且見者。以爲知禮。獨伯霖心動。不敢言。未幾。慶者舍而唁者途矣。孺人孫氏。錢塘江滸古塘公之長女。中州吳公之配也。孺人幼工書算。喜讀史。間出臆語。課成敗多中。治家恭儉明慧。上下以諧。六年遭內外之喪。產漸訕。遂與中州公如華亭。消息數年。飽其橐而歸。歸有中州公之寡嫂。公故母視者也。迎養之。其三歲孤。故子視者也。擇同生姊之子妻之。至是夫婦始相顧。退息爲菟裘計老矣。而中州公視前。亦日閒以止。客以壽公。公笑曰。余之病而從方外游也。孺人爲治山中裝。歷三載。始克復有生。生而閒闕拮据。又歷十五載。轉徙吳越之間。始克復有家。若是者。正惟吾婦。

之賢。孺人聞而委蛇謝曰。嘻。婦職耳。此何足以侈君。君不見堦前十歲兒乎。能讀史記漢書左氏傳矣。丈人行過而禮之。且有問吳氏子引爲小友者矣。伯霖既有聞于當世。車騎填戶。孺人輒從屏幃間密闚之。咨滾滾覺豪雋言可聽者。未嘗不剪燈市酒。盡其議論而去。伯霖數上公車報罷。還伏牀下。謝無所逃責。孺人第緩拂縷上塵。慰勞數四。色加怡。伯霖出。多長者游。入則反面以盡釋其峭岸不平之氣。則孺人以也。孺人事繼母如父。中州公嘗三拾遺金。三返亡者。孺人往往輔以贊嘆。喜動眉睫。是皆人情所難。沒之日。其子之友及門人賢而思之。謚曰貞懿。嗚呼。婦人不稱謚。謚孺人者。以其能爲人母也。雖然。伯霖非經生也。子伯霖足母矣。奚其謚。陳子曰。吾聞諸人。驅車至越。而不識伯霖。不名游也。游伯霖而不拜其母。不名伯霖客也。余交伯霖十五年矣。母六十不果觴。今及墓。而始以伯霖之請。許之傳。夫傳弗可已也。則謚弗可已也。于是合而傳之曰。貞懿吳母云。

李母楊節婦傳

節婦楊氏。青浦縣學生員李光初之配也。其父爲中丞明石公。祖細林公。稱名族。少嫻于女憲。甚有德管。十八歸李君。性剛介。言笑不苟。妯娌莊憚之。囑李君曰。新婦不曉事。盍置副。李君不爲動。讀書山中。風雨齧鹽。晏如也。戊戌。應督學使試。感寒歸。楊氏初舉兒。投兒李君懷。而身則力疾藥裏間。揣色聽聲。露禱請代。李君竟不起。楊氏號踊治喪。陰挾利刃欲自殺。遮止之不得。忽斷一指投棺中。哭仆地。是時孤兒才二十六日。熟睡老媪衣衽間。媼驚怖。頓足長號。兒墜地。賴寡姑急抱之。得活。食頃。楊氏始甦。已亥。葬李君于青浦故隴。奇寒裂

膚指斷處。猶痛不可忍。無何。子女病痘。楊氏裹血挫針。佐醫禱費。居恆屏跡一室。隣童村媪。汲漿索火。未嘗望見顏面。惟爲孤兒求智慧。禮觀音文。爲求延生。禮諸經懺。其它巫覡見鬼人等。不收闖入門。限一步地。孤兒五歲喪祖。懼勉喪禮。已爲宗長漁其產垂盡。楊氏負孤兒對簿。哭而過市。謁訟庭。縣大夫憐之。事得解。而貧愈甚。勅孤兒出就塾。余見之。李先生坐隅。賞其奇穎。遂以女字之。稍長。從游于泖濱海畔。楊氏憂虞萬端。淚從腹中落。戊申歲惡。孤兒臥篤疾。楊氏營護始得瘥。與幼女刺繡買米飯兒。嘗絕粒。檢得敝枕中菘豆升許。煮糜旋不忍下咽而止。己酉嫁女。丙辰。孤兒娶余女。而楊氏逝久矣。初己酉除夕。楊氏色慘然。嘆曰。未省明年此夕在何地。庚戌歲朝。受孤兒拜訖。出素履一輛授之。曰。未亡人將赴十二年前舊盟矣。孤兒心恻不自持。亟奔告寡姑。邀女兄弟競相勸慰。楊氏執孤兒手曰。誓不食明年新。我志已決。至八月。孤兒生月也。絕粒死。嗚呼奇哉。孤兒名大節。績學能文章。郡侯陶公。邑侯章公。鮑公。學師熊公。嘗拔置第一。士論傳寫其文。以爲楊氏植孤之報。目前雖未遇。其志意卓犖。望而知爲鐵石奇男子也。夫臣殉君。婦殉夫。等節身。然爲忠臣。托孤易。爲節婦。保孤難。彼其仗威靈。揭名號。收拾四方英雋豪傑。以爲忠義倡。而楊氏以孱婦抱孤兒。寒幙殘燈之與俱。畸形單影之與侶。斷指于十三年前。絕粒于十三年後。蓋女中之龍逢比干。伯夷叔齊也。若其保孤而孤立。則又加于忠臣一等矣。李之先。有鍵齋翁。割心救母。操刀小廟中。血濺佛座下。世稱爲李孝子。惜不載青浦志。而楊氏之奇節。復使之泯泯無聞。非惟得罪于名教。且得罪于鬼神。余故作傳一通。藏之山中。采風者表墓旌廬。或亦有徵于斯焉。

錢母陸淑人傳

陸淑人者。誥贈中大夫山東右參政忠所錢公之配。宮允抑之。方伯康侯之母也。錢氏出表忠裔。元有修職郎國馮者。自臨安領嘉興侯。因家焉。尋析爲嘉善人。四傳爲邑廩生世華。其子萼。精于醫。纂醫海二百卷。萼生昞。昞生貞。母曰柏峯公。中嘉靖丁酉鄉試。令尤溪。歷揚州汝寧二守。以廉吏稱。柏峯生心亭公。吾仁。入太學。贈參政。娶曹。贈淑人。舉二丈夫子。長卽贈公。贈公自少醇謹。卓然以儀軌自居。及長。議婚。得長汀丞陸公女。十五來歸。保母趙媪。睨而嘆曰。新婦神明意審。矯矯道。異日。綵幃榆翟中人也。旣廟見。出朝尊章。調御上下。逡巡皆有方局。宗人不敢以年少目之矣。初裝遣廉蓮。已叔姒盛孺人入門。紈綺相照。環珮之聲。粲然。淑人處之。晏如。盛產兒。外家具文。襍錦棚。犀錢玉菓相屬。而淑人舉子。但率女奴治。泉以供湯餅客而已。然淑人待盛無間言。每事推掖之使前。調護甚力。贈公當析筭。探策得西第。輪奐方新。堅以遜其仲。而自處故居。稍稍漸理堂。構經營部署。悉出淑人手中。卽心亭翁嘗許葺治費。不忍索也。旣居別宅。去曹太君僅百武。淑人起居不離側。老嫗小奚遺餉。趾相錯。數偵其所。餐加損爲憂喜。太君常謬爲勇。噉以慰之。心亭翁病。膈。贈公與淑人承嚮床第間。侍疾不解帶。治喪不勝衣。諱日生辰。饋奠飲泣。卽推及王舅姑。率子姓。跪拜如禮。潔齋謹恪。說者謂其有詩禮薦浼采蘋之風。贈公性弘恕。不喜苛察。園丁有竊瓜者。家人有乘火攫金去而娶婦者。悉貴勿問。反好語囑之曰。無爲主母所知。而淑人則治家嗃嗃。男女不比肩。寢興不失度。賞罰不僭約。卽夜半猶秉燭省視曰。雞鷺逸乎。犬飯乎。門牝闔乎。竈突爐火不息乎。則又呼其子而質之曰。而渴欲若乎。而餒欲餅餌乎。而寒欲加給。



乎如是數四乃即安。贈公遇荒施賑。遇疾施藥。衣食無告之人。瘞埋無主之骨。峻却祖姑比隣之產。贈史生醫兒。撫任氏一門疫癘。沒而經紀其喪。入以告之。淑人贊嘆從臾。惟力是視。不忍以拮据纖膏謝也。贈公嘗笑曰。家乘有健婦。書種有佳兒。豈復裏縫掖。埋沒枯瑩老蠹中哉。遂謝去公車。日以課子爲事。手錄古人格言警語。榜之屏障間。諄諄以忠孝廉節相勸勉。淑人更以方嚴佐之。未辨色。蹴使興。燭垂跋。趣再讀。鏗落浮華。却葑混沌。凡一切大人游。少年場。以及詩壇酒政之豪舉。非唯不使近。且不習也。文社有會。贈公拈題危坐。淑人走爨下。張具。繼以燃膏。未嘗敢告飭。賢師友過從。爲咄嗟立辦。皆豐腴。而約束二子。不過數鬻肉。三浣衣。稍請更易。瞪目怒不許曰。孺子輩。乃敢快意耶。康侯癸丑成進士。抑之登丙辰殿試第一。賀者傾城。澗巷來觀。淑人痛贈公不及見也。謝客拒筐篚。間有趨躡附熱者。禁勅勿與通。曰。先君子嚴義利。謹取予。處後守雌。素風如昔。若導之關說長吏。漁獵細民。吾家兒羞而不忍爲也。嘗語仲子曰。汝司寇。無以三尺法穿人于丹書。語伯子曰。汝史氏。無以七寸管蟻人于青史。二子退而識之。康侯欽恤三輔。多所平反。抑之修神廟實錄。不輕置褒貶一字。翳惟淑人有紳訓焉。贈公玉立白晢。方頤豐下。與人交。溫洽詳緩。觸之不怒。挑之不爭。不乘急減值。不小惠市名。客有負債者。歸其券。有負心者。則俛而笑曰。此宿世事也。笑而貸之。邑大夫謝公。嚴以老更之禮。一往輒不赴。栽梧種菊。顏其堂曰清鑒。更自號閒棲居士。日與仲弟衛幕公出入。飲食必與俱。怡怡如也。淑人待外家。無私假私與。待兩婦。無左袒右袒。質明而起。操作如壯時。勸之盍少休。嘆曰。惟懷與安實敗名。季文子之母。樂羊子之妻。何人哉。晚年戒殺。好竺乾先生之言。彌留時。命眷屬環念大悲觀音者數千聲。氣體香潔。柔和如生。

雖不學佛。故是學佛作家。然巫覡師尼。及見鬼人等。則門庭削跡矣。抑之名士升。康侯名士晉。海內號稱兩錢。比于眉山二蘇。金華二陸云。

陳子曰。贈公戊申前逝。淑人優游祿養。幾十五年。抑之康侯。似可少釋終天之憾。而語次輒泣不自勝。曰。吾子兩親有至痛。先公手抄六籍百家言。授以句讀。若望以名世。而不聞兩兒南宮報。一痛也。臚傳首選。遠近識一面者。皆爲額手。而淑人追念先公。反爲之喜極而悲。歔噓罷飲。一痛也。兄弟晝遊京輦。擬以板輿迎母來。重去家不可強。一痛也。士升艱子。淑人禱讓以祈多男。今舉兩雄。長者娶婦。裹青襟。次者讀書。已上口矣。而母與先公。曾否對笑地下乎。一痛也。弟代北門守。兄乞南陔養。而晉有疆場之役。母大憂。已觸璫餒幾巨測。母聞之又大怖。一痛也。今主聖清時。禍本頓拔。兩兄弟方將式歌且舞。以薦膝前太平之觴。而母不我待。一痛也。六痛填膺。九原誰告。所恃以不朽吾親者。在志表傳。朱少師錢宗伯。業已憐而許之矣。兩公衰而史。子布衣而史。敢稽首載拜以請。是故陳子不辭爲之傳。

劉母錢淑人傳

淑人海鹽錢永州芹之女。按察使劉公烱之元配也。錢氏自臨江公以來。疊葉簪紱。多清人賢胄。永州公與劉太公。朮同舉于鄉。嫗甚。相約爲婚姻。劉太公爲威縣令七年。裝不滿四十金。旣捐館。益中衰。按察公從永州公受書。永州公貴時。羣從兄弟。後先成進士。諸姻婭綺紉駢坐。按察公獨否否。永州公出繒綵授之。謝不內。而衣布衣。躡躡如故。左右多向背有輕心。臨江公聞而歎曰。劉郎貧而才。又廉吏兒。少年不成名。吾不復相天。

下士矣。淑人十七歸按察公。晨朝鄭太君。太君目逆之。儀軌自如。以次委蛇起居。諸姊妹人人解頤贊賀。得婦賢。鄭太君性嚴重。造次必依禮法。少忤輒加笞罰。每病熾。昏聩于嘔。頭眩不得怡。淑人率袒衣膚裏相屬。掖臥起。跣步不離側。且晚上食。無敢平面視。中裙以下。手自澣之。鄭太君心動爲解嚴。曰。新婦善事我。按察公官金谿。官留都。官臨川。皆與淑人俱。官閩粵。官黔。更官豫章。淑人奉太君子家。當龍頭塞。諸盜起。福甯。曾一本起。廣中公在事。轉餉督兵甚棘。太君憂之。食不甘。淑人曰。吾嗣其生平。塞進而好退。多讓而寡營。蓋恭儉吉德人也。卽置虎穴中。無死法。况其才足辦賊者。未幾果奏捷。捷書首推毅公。公遜績不居。卒如淑人所料云。按察公居官廉。淑人肩牙署。日課童婢種蔬績麻。尺寸不外索。司帑吏唱公羨金八千餘。公籍錄爲公家經費。嶺南之役。明珠異香。不點歸橐。曰。少染指。恐爲吾婦錢。淑人所笑。家居門風醇淡。賓祭以外罕聞庖聲。淑人每與公對案下食。醢肉漿酒。取給輒止。餘則分甘旁媵。亦不復少有異同。寢室中木榻絺帷。卽按察公亦十年布被而已。此淑人贊之也。太君春秋高。淑人亦肩差稱老。及奉諱。悵悼痛哭不勝喪。每細事動稱先姑。縷引遺令以勅諸子。子五人。其爲淑人出者。進士世埏。太學世坊。孝廉世教。而埏坊皆前天。淑人哺其孤雛。成佳士。當淑人在堂。子孫無敢衣錦見者。及歿。各受室。始稍稍更故時衣。子孫每相見。輒頽首曰。吾甚愧淑人。吾甚愧淑人。淑人從官歸。嘗舟次沈氏里。其妹沈宜人除舍迎之。女從皆更裝。候闕屏幕間。有頃。綦縞入門。單率如窶婦。問之。卽劉家錢淑人也。僕御熟視。揜口笑。怪其疎質。而沈宜人憮然歎息。以爲不如。故傳者盡稱劉氏家法。爲遠近鄉里之冠。淑人初以按察公南京工部主事。封安人。晚以伯子埏。南京刑部主事。覃恩。復從公階進。今封。

陳子曰。吾讀孝廉之狀。按察公也。其庾信鮑照之流乎。若淑人狀。則龍門史也。江東之家。修褻輕桂。薰香洗濯。此不起單族。而起于豪門。又不起有檢之縉紳。而起于一二無識之女子。司世道者。心竊憂之。有如淑人恭儉而有禮。豈非劉氏之女。宗母師哉。劉向范曄傳列女。凡闔行皆得書。而後世非刑耳。斷髮之流。不編名于史氏。則黔婁柳下惠之妻何人哉。此余所以有感而爲錢淑人傳也。

### 附外傳

#### 唐李公子傳（并序）

余下第歸。抱幽憂之疾。以道書淘汰之。心猛氣深。強抑不下。乃搜讀稗官家得李公子傳。唐書言鄴侯之子繁。不甚賢。今公子頗有奇韻。想繁之兄弟行也。但不知爲鄴侯第幾子耳。錄之左方。

李公子者。父泌爲唐鄴侯。侯既老。謝事辟穀。公子官襲侯封。不願侯。願詞賦科。時肅宗新復兩京。以兩京賦試進士。御泰清殿親臨之。公子立就萬言。未嘗加點。賦上。上方午餽。太常作樂。命輟樂讀之。愛其美也。袖入宮中。擢第一人。勒石刻兩京賦于殿前。公子方十九。眉目清曠。紫衣白馬。宛如神仙。上一見大喜。謂侍臣曰。鄴侯宜勞。再造邦家。會不肯剖粒自飽。今其子雖不願侯。授官宜與侯等。以集賢學士授之。公子謝曰。臣實不敢當此。但乞告身一通。便宜山水間。縣伯不得追呼足矣。上嘉其志。御寫勅札。并賜宮嬪兩人。曰。一以掌書。一以煖酒。郭汾陽有女曰清明者。有殊色。喜讀離騷古陶謝詩。嘗刪詩去其鄭衛者。手錄一卷。日日批註。閨房中以小室廟祀。舜二妃。配饗以魯共伯之母。黔婁之妻。春秋祭之以文。其高閒如此。汾陽王難其配。以李兩京賦

視之。清明君慨然嘆息曰：可矣。既歸李。李年少譁浪。醉時微以謔語侵清明君。不悅。見其謝過。乃笑曰：妾之天性。栖栖藝文。固其所長。若欲濡首酒杯。從公嘖笑。間乞煖熱。所謂籩豆之事。則有司存。無已。願以黃金千斤。爲公子置妾數百。以任恣討。汾陽王聞之也。遣人分馳四方。四方有奇女子。以詩名顯者。搜訪殆盡。而其中曰織。曰白娟。曰鶯翻。曰春莢。曰紅草。曰暈兒。曰綠絲。曰碎桃。皆骨柔氣清。熟於古文奇字。而織善箏。白娟善歌。春莢善鑿古器。善笙。紅草善彈鳥。善鼓琴。暈兒善嘯。綠絲碎桃善種花。花經二人手無不活。又善騎馬。鶯翻善丹青。善舞。公子樂之以酒。酒必以詩。詩成。諸美人起而唱歌。歌無雜聲。其地修竹清泉。細簾嘉樹。月出之時。鳥啼絃亂。相與牽衣抱袖。紅白低迷。起視草頭蕉葉之上。大都墨漬酒痕而已。清明君無閒晴雨。每候山果新熟。則遣美人捧進公子。或書史有奇事可讀者。以綵線識之。則遣捧進公子。或成新篇。或偶得一二佳句。不忍獨賞。則遣捧進公子。故美人人人得親公子也。而清明君當其酒半。嘗乘紫帷小車臨焉。公子率織織以下。短謳長飲。彈箏鼓瑟。次第上壽。酒已。則各以平日所賦詩獻清明君。焚香緩坐。細加品題。稍不安者。爲改點數字。每點一字。輒以一觴罰公子。曰：君老於詩者也。不爲美人更之。乃含糊作影子過耶。是必容香火情。美人皆笑曰：善。誠如夫人言。是宜罰。如此者連罰數觴。公子竟醉矣。公子嘗游于蘇州。時有新進士選名妓百人。浮於荷花蕩中。衆進士本措大骨相。驟得此。足高志揚。畢露醜態。公子更布衣坐小舟。往來觀之。有進士呼曰：是小船中秀才何爲者。汝能飲酒乎。曰：能。能賦詩乎。曰：能。曰：若是。汝且過我。公子岸然據其上座。執酒卮。睽視雲霄。不爲禮。衆進士以爲狂生也。俟其酒乾。欲以詩困之。及分韻。公子謝不能。曰：頃固爲謾語。誑君一杯酒耳。實不曉詩。

爲何物。衆進士顧諸妓大笑曰。吾故料狂奴未必諳此。吾輩且自作詩。詩許久。沉吟不成一語。語出。又村鄙可笑者。乃手舞足蹈。互相傳示。嘆賞不已。已而悉出金玉寶器。以陳富貴。身語諸妓曰。是秀才曾見此否。傍有一黃衣妓者。秀質楚楚。愁態萬端。公子叩之曰。吾觀汝。一似有憂者。汝有心事可訴我。我爲汝料理不難。一進士掀髯大言曰。汝欲了此君心事。但恐酸秀才正自不堪。是嘗負我千金。分毫無所償。今見我。不覺斂容耳。公子笑曰。此細事。何足憂。於是衆進士又大笑。轉以爲狂生也。頃之。公子之樓。缸適至。鼓吹大作。公子呼進士與各妓過船。羅列食器。酒壘皆以五色寶玉。明珠翡翠。雕鏤裝綴之。奇麗特甚。公子見之。斥曰。何乃陳此俗物。亟撤去。悉付黃衣娘子。今日一段心事。爲汝結證了也。已命更席。則陶觴瓦鼎。無非三代物。最近者亦秦漢銅器。隔簾女伴。隱隱作樂。曲譜俱內調。及公子新詩。人間無聞者。進士目視不敢問。使各妓拜而請詩。欲因詩尾得公子姓名。已知其爲公子也。皆紛紛向前奪詩。公子令曰。汝輩且置酒于此。若酒冷而詩不成者。罰我。詩成而酒熱者。罰汝。往往酒未及溫。已搖筆滿紙矣。紙盡。無可奈何。乃裂帛絹。絹盡。則裂帷幕屏褥之類。又盡。則各剪裙葉。或絕長袖以進。所得片言隻字。如獲奇寶。貼身藏之。衆進士誘之以酒。酪酏多半竊去。妓有啼者。公子以爲可憐也。公子起立。作樂女伴。乘間說之曰。汝輩盡肯落籍從公子游乎。有別院在湖山之上。門前朱樓一帶。覆以垂楊。松篁中。粉廊紅榭。高臺短橋。宜雪宜月。四面遠以梅花五六十里。深秋之際。則林楓萬株。擁若霞氣。楓樹間有高樓。翼以堂廡。其正中以奉藏經。其兩旁以貯古今異書。左有酒庫。凡天下之酒無不藏。右有泉庫。凡天下名泉無不具。若此者。可以休汝矣。諸妓唯唯。乃盡從公子歸。公子悉召酒人劍客。高僧道士。曉夜酣歌。沉

浮此中。賦詩之暇。非細談釋部。則酬論兵符。燭盡酒空。醉而後已。賓客既散。時與綠絲碎桃。高裝駿馬。踏入深山中。過平原易地。着鞭奪路。拋閃如飛。樹叢邊聽山鳥聲。則命紅草彈鳥。偶不中。皆拍手笑。浮以半觴。轉入幽險處。美人車不得度。攀蘿挽石。欲上欲下。笑哭雜出。忽到荒岡崇嶺之上。天風四來。暈兒清嘯一聲。水葉亂舞。裙裾飄脫。步立不定。公子懼其傷也。乃徐返焉。天下聞公子名。飢寒之士。輻輳來集。候其將歸。皆匍伏道左。叩頭大呼曰。非公子無以活我。公子轉盼間。賞勞都徧。日費千金。無幾微顏色。一日。就中忽有執公子衣者。曰。願辟人。臣有所言。公子不憶於陵時乎。汝所謂於陵仲子者也。上帝憐汝貞苦。故今日置汝李家。涉獵世味。清明君卽向時辟纁夫人耳。夫日之光有短長。月之魄有死生。人之福有往還。公子宜早決。且汝父鄴侯。及婦翁汾陽王。皆爲清微天帝君。待汝夫婦來久矣。言訖不見。公子大悟。以家產萬億計悉散之。與清明君入洞庭石公山修道。不知所終。後陸贄之華亭。常見公子往來三泖中。

### 范牧之外傳

余宅隣牧之。少聞牧之以情死。不敢問父老。比十年奉化人之教。略已定情。乃始許牧之子必宣。作牧之傳。范生牧之名允謙。伯父太僕。父光祿。爲文正忠宣公後。牧之復以庚午舉鄉進士。生而頤廣額。頤頰而下小削。目腫清熒。骨爽氣俊。不甘處俗。華亭世家子。出必鮮怒。錦衣狐裘。舞于車上。童子駢肩而隨。簪玉膏沐。如婦女之麗。牧之見之。往往內媿肉動。毛孔蜩張。輒障而去。牧之居恆單衫白紵。着平頭弁。與諸少年誦頰而游。遇豪貴人。牧之欠抑唯諾。陽曠不敢言。衆以爲是生也。寒酸不上人眼。意輕之。牧之乃快。或坐客小覺。則拂衣

疾趨出。急遣追呼者。問牧之。牧之飄風逝矣。性嗜書。無所不讀。能跳梁于翰墨間。有才子之志。客非韻。斥門者不納。納必以名香清酒爲供。或晏語夜史。喜不嗜寐。童子更燭割炙。復張具如客初至時。屋下雞鳴。猶聞鼓琴落子聲。及醉而嘯者。至是四方之客日益集。牧之恢張心胸。厚往薄來。故雜賓亦稍稍得進。而未幾杜生之事起。杜生者。妓女也。以風態擅名。慷慨言笑。自題女俠。與牧之一遇于闔門。目成久之。退而執手嘆曰。吾兩人得死所矣。君勝情拔俗。余亦俠氣籠霄。他日枕骨而葬太湖之濱。誓令墓中紫炁射爲長虹。羞作灑淖女兒。下指鴛鴦。上陳雙鵲。言罷大泣。衆驚其不祥。嗣後淹繫旬月。無復顧禮。毀頓精神。廢輟家政。客乃有爲文告神以絕牧之者。牧之答曰。僕聞虧名爲辱。虧形次之。諸君子俱當世賢者。僕雖不才。忝惠莊之遇舊矣。諸君子一旦攝齊束帶。矢之神前。擊鐘伐鼓。以絕鄙人。一時觀者莫不駭遽狂走。謂僕當得夷族之禍。以至于此。甚而造作端末。飛流短章。筆之隄。付之尸祝。無煩檢考。遠定爰書。不須左驗。遂成文案。是忠告之義。同于擿。拮據之過。近于文致。使僕不能含生于覆載。強息于人世。辱云甚矣。僕亦何人。其能甘之。唯有蹈東海而死耳。牧之既深情膠粘不解。而復爲諸客所激。若圓石遇坂。轉觸轉下。勢不得不與俱盡。會太守宰杜生出。辱之庭。牧之忍愧。以身左右翼。多悲辭。太守徘徊。不令下鞭。然終不許牧之以一妓女燼。黜竇杜爲賈婦。牧之伴諾。陰使人贖爲山西賈。得之以藏于別第。俄轉而與俱長安。居長安邸。不三月。牧之病肺死。牧之既死。杜生勸家人裝治其喪歸。而以身從。杜入舟。忽忽微嘆。問雜吟笑。如無意。償范者。至江心。命浴。浴罷更衣。左手提牧之宣和硯。右手提菴楸。一躍入水。左右驚視不能救。初見淺二三尺許。沉浮旋瀾中。已復颺起紫衣裾半摺。復轉睫間。而生杳然。



沒矣。余聞牧之事光祿公。秦淑人。及遇弟允臨。斤斤孝友名教人也。因緣爲祟。卒耗俊姬。何哉。漢高項羽。英雄絕世。劍鋒淬人。眼不爲眨。乃心銷神枯。終不能斷虞戚之愛。夫二公賴有此舉。小足破俗。不然。項乃倔強老卒。龍準公一村亭翁。故態耳。語云。天下有心人。盡解相思死。世無真英雄。則不特不及情。亦不敢情也。牧之者。得無老氏所謂勇于敢則殺者歟。定盟且誓。永焉勿諼。沉恨幽疑。泮然渙釋。兩人可謂誠得死所矣。使杜遲回。獨生。或不欲生而無幸以不汗病死。寥寥千古。含怨何期。今而後知杜生之有以謝牧之也。或曰。君家蠹。首倡風流。而唐杜牧之。奇宕佻達。半臥粉黛中。以老。君子牧之。則諱姓于蠹。則諱名。垂二千年。而合爲范牧之也。嗚呼。然歟。否歟。

贊曰。余與牧之子必宣遊。生駒俊鸞。抑何其似牧之也。必宣入國。而遇平康里。則疾回其車。市有倚門而挑者。恥若面黥。惟恐唾沫形影之及。必宣少孤。心不能記牧之短長肥瘠。而能不失尺度如是。父豈必身爲教哉。夫會子子父之相反。而趙括之讀父書也。爲人後者。其奚擇也。

### 楊幽妍別傳

幽妍小字勝兒。生母劉。行一。在南院。負豔聲。早歲落籍去。嗣陳氏。陳之姨。董四娘。挈往金闔。習吳語。遂善吳歛。董笑曰。是兒甫八歲。如小燕新鶯。不知誰家郎有福。死此雛手。陳歿。撫于楊媪。媪奇嚴。課書課綉。課彈碁。妙有夙解。不督而能。女兄弟多方狡獪。嘲弄詒侮。終不能勾其一粲也。庚申。楊媪避難吳越。載幽妍與俱。年已破瓜矣。薄倖難嫁。有心未逢。俯首叩膺。形于咏嘆。一日遇張聖清于秀林山之屯雲館。葦碎滿前。席糾無主。獨

幽妍兀坐匡床。旁無轉矚。掠鬢舐袖。笑而不言。私禱云。儂得耦此生。死可矣。張聖清者。才高筆雋。骨采神恬。造次將迎。綢繆慰帖。人莫覺其爲廉察使子也。舟中載圖史絃索。悉付小青衣排當。小青衣能射主人意中事。兼工竹肉。聖清曰。此西方迦陵鳥。以迦陵呼之。每攜入竹嶼花溪。遞作新弄。而最不喜平康狹邪之游。謂此輩正堪與鬻頭奴。大腹長鬣賈。相徵逐。豈容邪魔入我心腑。至是與幽妍目成者久之。明日遂合鏡于舟次焉。于時溽暑。晝則布席長林。暮則移櫂別渚。疎簾清簟。縈繞茶烟。翠管朱絃。淋漓酒氣。幽妍自謂十五歲以前。未嘗經此韻人韻事。卽聖清亦曰。世豈有閨中秀。林下風。具足如勝兒者乎。昵熱漸久。絕不角勁語。媠詞。兩人交相憐。亦復交相重。曰。吾曩過秀州草庵外。聞老尼經聲。躍然抱出世之想。自慚絆縛。不能掣鞵奮飛。今昵君串珠纏臂。持戒精嚴。同心如蘭。願言倚玉。十年不死。請事空王。宿羽流螢。實聞斯語。聖清飲涕而謝之。七月應試白下。幽妍送別青溪。注盼捷音。屈指歸信。並爾杳然。及重九言旋。而幽妍先驅渡江去矣。自此低迷憔悴。瘵疾轉深。腰減帶圍。骨見衣表。王修微謂余曰。吾生平不解相思病。何許狀。亦不識張郎何許人。今見楊家兒。大可憐。始知張郎能使人病。病者又能願爲張郎死。郎不顧。立枯爲人腊矣。聖清聞之。遣急足往視。幽妍開絨捧藥。涕泗汎瀾。嫗兇忍。閉絕魚雁。消息不通。幽妍典簪珥。賂侍兒。屬桃葉渡閨老。作字以達意焉。扁鑪斗室。不見一人。卽王孫貴游。剝啄者。指刀繩自矢而已。嫗下怒並甚。搗詈無人理。取死數四。救而復甦。不得已復載之東來。聖清偵狀。義不負心。有俠客徐內史。就中爲調人。彈壓悍嫗。無得故懸高價。殺此鐵石兒。嫗唯唯。聖清乃納聘迎爲少婦。稽首廉察公。遂遂如女士。且覲宜男。勿詰責也。比入室。病甚。猶強起薰香澣衣。勞篋滌硯。聖清手書唐人

百絕句授之讀皆上口。又雅能領略大義。每環回離腸斷魂之句。掩抑不自勝。真解語花也。病中解脫了無怖容。佛號喃喃。手口頗相續。忽索鏡自照。不覺拍几慟哭曰。勝兒薄命。遂止于斯。又好言謂聖清曰。君自愛。切勿過爲情癡。旁招訶笑。妾如有知。當轉男子身。以報君耳。又曰。妾命在呼吸。偃大人新宅不祥。蓋移就郡醫療之。歲偈除夕。聖清歸侍椒觴別去。幽妍懨懨喘益促。侍兒問有何語。傳寄郎君。但瞪目捶胸。不復成聲矣。蓋壬戌臘月二十七日也。聖清奔入城。且號且含。檄延僧修懺。撤葷血者兼旬。雕刻紫檀主置座隅。或懷之出入衣袖。衾裯間。食寢必祝。祝必啼。啼曰。吾欲採不死藥。乞返魂香。起幽妍于地下而不可得。又欲金鑄之。絲綉之。倩畫師寫照百回而未必肖也。何如徵傳眉道人。爲逝者重開生面乎。余曰。傳且就。恐挑哀端。俟君病良已。乃敢出。而詎料君之終不及見也。幽妍墓在龍華里。聖清選地結茆龕祀文佛如來。償其始願。修竹老梅。環暎左右。清芬涼影。颯如有人。畫眉郎散花女。其將比肩捉臂。踏歌而嬉于此乎。古有廬江吏華山畿。歐陽魯秦少游之義。媚糾結夙緣。一慟而卒。初疑出于誕妄。今乃信爲果然。如幽妍聖清者。少判在鳳窠羣。鴛鴦牒中。豈死于情哉。死于數也。余不忍以介靜辭。爲作別傳。付子墨墨娥。相與流通之。死乎不死矣。

眉公先生晚香堂小品卷之十八終

晚  
香  
堂

三  
三  
三

眉公先生晚香堂小品 卷之十九

雲間陳繼儒著

記

求忠書院記

松府治之西。有求忠書院者。何爲特祀遜志方先生而創也。先生生于天台。死節于金陵。於松何居。曰。松有先生後在焉。後何居。曰。葉公琰。謝公鐸。張公汝弼。王公世貞。詳哉言之矣。且方氏手跡支譜。甚覈而詳。先生血胤在松。則血食亦宜在松。此特祠之所由建云。當先生抗命時。魏澤以刑部尙書。譴寧海尉。受詔捕方氏。幼子德宗垂九歲。澤匿之。有台人秀才余學夔者。乞食翔于市。口喃喃唱歌。以諷澤。澤心動。叱曰。扶顛子去。越兩日。途遇歌如前。澤知其爲義士也。乃密託德宗于余。入松江島嶼中。歷青村諸鎮。以織網買米得活。余又潛入郡。屬祠部郎俞允護翼焉。時任勉爲參政。家居聞之。就見德宗。德宗初引却。怖而欲逃。勉出癸酉錄示之。知允與勉皆門生。乃始安。自此各爲異人。陰相往來。允妻以養女冒俞氏。恐同姓賈禍。旋改余。轉遷白沙鄉。而學夔亦遠遷。不得跡矣。德宗三子。娶俞者。友直。友諒。繼許生者。友竹。子孫繁衍。具居華亭。本末詳載譜。萬歷己酉。督

學侍御楊公廷筠訪其事于松司理毛公一鷺。毛公訪之陳子繼儒得實。楊公捐俸三百金。馳檄立祠復其姓。衣冠其大宗之孫顯節。而祠尙有待也。太守張公九德適至。挺身許曰。九德先生之鄉人也。德而不任。誰當任者。天以方先生六尺之孤。委之雲間。昔日方氏之存滅。在魏在余。今日方氏之存滅。在我。有如聽以自續自絕。自明自晦。豈惟塗視方先生。實與屠剪銅禁何異。異日天子詔求先生後。其安所置對。將遂爲子虛亡是公而已乎。古者愛羊及烏。存大體也。子弟爲尸。迎生氣也。况以先生之血胤。薦先生之血食。盼饗相屬。夫嘗不歎于。是謀之華亭令。聶公紹昌。錫吉鳩工。莊嚴廟貌。崇祀先生。而魏公澤。余公學夔。俞公允。任公勉。徐公善安。配焉。構以重堂。繪以峻峴。翼以兩廡。門敞而墀。漚。祭埽而田備。秋毫皆太守張公力也。祠成之日。太守以庚戌冬至。率僚屬迎主入祠。謁奠成禮。士民樂觀者萬餘人。及辛亥端午。命陳子儒爲之記。陳子再拜稽首而謝。公曰。異哉此舉。昔者高皇帝以夏變夷。文皇帝以叔代姪。此古今一大鼎革也。先生纒麻入闕。哭聲震殿。刀環築口。批及兩耳。收妻女。赤十族。市先生肉者。賜之金。發先生之祖骸而投之井。此古今一大慘也。天子與孤臣爲難。豈趙朔李固比哉。予遺所在。前有賞。後有誅。踴天踏地。晝伏夜行。千鈞引絲。所餘有幾。此古今一大險也。遺蛻不敢收。遺札不敢藏。子孫不敢自名其祖。春秋家祭。嘿對飲泣。卽有好義弔古之士。嚙敢向先生禮一瓣香者。此古今一大鬱也。今皇帝登極。首詔表章諸君子。復天台之故墟。修金陵之舊冢。請補賜諡。而未及子孫。特不知一塊忠義血。正在松耳。今二百餘丁。悉復故姓。退而耕鑿。進而絃誦。躋躋踰踰。歌斯哭斯。九重無必伸之感。而十族無必餒之鬼。此古今一大快也。忠義激而爲憤。哀湘詛楚之詞。非後史之所必及者。與。而先生俎豆儼然。

箕裘無恙。以此調人鬼之不平。而關百世之橫口。此古今一大繼述也。廟貌既新。講學院中。瞻仰先生。則夷齊尙在。同難者八百七十三人。則田橫五百義士尙在。若魏若余。若徐若任。則趙朔之杵臼程嬰。李固之王成尙在。此古今一大榜樣也。先生爲浙中第一名儒。爲國朝第一忠臣。而發潛闡幽。訪求先生之後者。則督學楊公自武林。司理毛公自陸州。太守張公自甬東。又皆先生之鄉後進也。意者當年仗義共事諸公。分身應現。或抱孤子覆巢完卵之時。或報命于禁網闊疎。二百四十餘年之後。此古今一大因緣也。嘻。此又古今一大奇也。是故陳子繼儒。拜命額首而爲之記。

### 重修忠肅于公墓記

萬曆甲寅。武陵楊公。以御史奉命理兩浙鹽筴。下車武林。首謁于忠肅公墓下。嘆曰。浙中伍大夫。岳武穆。與公鼎立而三。而公祠宇如陋巷矮屋。無論謁者僂僂几筵。有如公肅儀擁從。出入廟中。詎此一丸土。能容數百萬風車雲馬乎。於是捐俸。命仁和令喬君。鳩聚工料。式增廓之。而此祠巋然。遂成湖上偉觀。公屬陳子碑而記之。大抵忠臣爲國不惜死。亦不惜名。不惜死。然後有豪傑之敢。不惜名。然後有聖賢之悶。黃河之排山倒海。是其敢也。既能伏流地中萬三千里。又能千里一曲。是其悶也。昔者土木之變。裕陵北狩。公痛哭抗疏。止南遷之議。召勤王之師。虜擁帝至大同。至宣府。至京城下。皆登城謝曰。賴天地宗社之靈。國有君矣。此一見左傳。楚人仗兵車。執宋公以伐宋。公子目夷令宋人應之曰。賴社稷之神靈。吾國已有君矣。楚人知雖執宋公。猶不得宋國。於是釋宋公。又一見廉頗傳。秦王逼趙王會滹池。廉頗送至境曰。王行度道里會遇之禮畢。還。不過三十

日不還。則請立太子爲王。以絕秦望。又再覓王且傳。契丹犯邊。帝幸澶州。且曰。十日之內。未有捷報。當如何。帝嘿然良久曰。立皇太子。三者公讀書得力處也。由前言之。公爲宋之目夷。由後言之。公不爲廉頗王且。何也。嗚呼。茂林之立而復廢。廢而復當立。誰不知之。公之識。豈出王直李侁朱英下。又豈出鍾同章綸下。蓋公相時度勢。有不當言。有不必言者。當裕陵在虜。茂陵在儲。拒父則衛輒。迎父則宋高。戰不可和。不可無一而可爲制虜地也。此不當言也。裕陵既返。見濟薨。郟王病。天人攸歸。非裕陵而誰。又非茂陵而誰。明率百官朝請復辟。直以遵晦待耳。此不必言也。若徐有貞曹石奪門之舉。乃變局。非正局。乃劫局。非遲局。乃縱橫家局。非社稷大臣局也。或曰。蓋去諸嗚呼。公何可去也。公在則裕陵安。而茂陵亦安。若公諍之而公去之。則南宮之綱。後不將燭影斧聲乎。東宮之廢。後不將宋之德昭乎。公雖欲調郟王之兄弟。而實密護吾君之父子。乃知回鑾公功也。其他日得以復辟。公功也。復儲。亦公功也。人能見所見。而不能見所不見。能見者。豪傑之敢。不見者。聖賢之悶。敢於任死。而悶於暴名。公真古大臣之用心也哉。竊嘗謂裕陵之返國。高皇帝不殺元順帝之報也。天生于忠肅以衛社稷。高皇帝廟祀余闕之報也。然忠肅以讒死。報何居。夫使公功成身退。老死故鄉。亦郭汾陽李西平等耳。獨鏤之劍。賜而胥濤泣。風汲之獄。搆而岳廟尊。迎立外藩之冤酷。而于墓慘。公至是一腔熱血。始真有灑處矣。迄今湖山之上。古塚疊疊。身死名滅。不可勝計。而東西往來于公之廟門者。登故壘。掃枯松。禁樵牧。哭英雄。又非獨侍御楊公一人而已。特侍御倡俸修墓。憲勅楹宇。垂百年餘。而表章忠賢之典始備。是不可以無記。



萬曆甲辰。御史馬公奉命按吳中。興賢軌俗。率先風化。乃首謁范文正公先生于故祠。仰視棟棟。旁周門廡。咸摧圯不治。迺喟然懷嘆。與郡守李侯謀。所以新公祠者。於是陶甃度材。不半碁而告成。公十七代孫主奉太學生允觀。十八代孫諸生必溶。率族之子姓再拜。徵予文爲記。用副御史公表章先賢鉅典。予惟公事蹟載在宋史。若歐陽神道碑。考亭名臣錄。不啻詳矣。予則烏能記公。獨念公少而孤貧。塊處一室。饘粥不贍。進士解褐。鬻馬徒步歸。及爲執政。焚黃姑蘇。僅搜庫緡以散親戚閭里知舊。小有俸餘。捐置義田。南園數畝地。又推之以建郡學。度公平生殆未嘗享有一日士大夫之奉者。夫同一吳耳。當時士大夫良田美宅。與其人轉盼俱盡。卽其人亡。其姓名存。誰復爲之禮一瓣香。薦一杯水者。而公之祠至今獨存。百世而後。御史又相與撤而更新之。則士大夫不當以此易彼明矣。公爲將相時。邠慶二州之民與屬羌。皆畫像生祠祀公。及卒。羌酋數百哭如父。齋三日而去。祠滿海內。一祠又何足爲公重輕。特以吳故鄉父老丘隴所在。子孫旅食於義田者。歌哭祠下。公其實然而來思乎。未可知也。吳中祀典最著者。太伯子游。暨公而三。公遜田贍旅。舍宅建學。有太伯之心。以春秋授孫明復。以中庸授張橫渠。又延胡安定入太學。爲諸生師。潛發道脈於濂洛關陝之前。其功又與子游學道相表裏。豈若鄉先生沒而祭於社者等乎。御史特新公祠。蓋推本公爲宋儒理學淵源之祖。使吳人以公重。吳俗亦以公厚。凡士大夫有意收恤其族人。而加禮於學校者。遇公之祠。或尙有興起焉。是不可以無記。

### 用拙堂記

吾友杜玄度所居有用拙堂。屬陳子記之。陳子咨其義。曰。吾少而讀天下書。善忘。登朝不十年。解綬歸。善

倦。藥裏不去。善病。治家人產。善撻。與人游。未知其眉睫喉嚨胸臆間事。善憤憤。蓋世莫余拙也。雖然。吾道是也。昔者杜子美之句。若爲余設者。陳子曰。吾游于世。而覺論語之爲異書也。參之魯。回之愚。蓋三致意焉。何者。以其拙故也。拙者以良止。以巽入。以隨動。以遜藏。以謙始。以泰終。知此謂之至人。而儼捷狡獪之徒。顧反竊竊然笑之。庸詎知愚公之徙山。不如臥游之適也。陶長沙運甕。不如抱甕之安也。何晏之談塵。不如括囊之無咎也。石季倫之金谷。不如一瓢之屢空也。謝康樂之挈榼捉席。不如籃輿之眞率也。夫巧者以爲得。而拙者亦未必失也。拙者以爲失。而巧者亦未必得也。皆天也。鵲之巢而鳩奪之。蜂之饈而人甘之。然則巧勝乎。拙勝乎。善乎。玄度之用拙也。嗟夫。蝸升而枯。鵲噪而敗。雀掉而驚。鼠譎而獄。猿捷而射。人巧而禍。才賈忌。富賈怨。辯賈辱。宦賈讒。使人人而玄度若也。天下可以無事矣。故曰太冲若盈。大明若昧。大巧若拙。吾願與玄度共勉之。玄度交知。傾海內名士。不索之記。而索之陳子。其眞有用拙之意也夫。

占星堂記

唐元徵以萬曆丙戌。擢鼎甲第一。以己丑奉上命秉桐圭。竣事鄧藩。旋車華亭里。里父老扶攜子弟。婆娑關門曰。是錦衣朱幡。廣皙而白者。非昔唐氏澹窩先生之子也耶。先生故長者。有子矣。聞嘗憶往事。嘉靖間先生之堂落成。其從弟鵬谷公。安寢而夢。有星岸然盤跚而走。獨垂一印大如斗。厥文則奇。曰。敕子魁。碧睛瞳隴。朱髮葳蕤。鵬谷公心動。起告先生。召占者卜之。得鼎之五六。鼎黃耳金鉉。占者曰。金鉉。印壘壘也。夫敕也。爲先生名。敕子而魁。先生其有後。後其居鼎之首。天官記曰。魁去海岱以東北也。魁且建則指離。其在丙乎。時未舉。

元徵及元徵弱冠。雖時名噪起。而家中落。此堂寄他人手者幾二十年。而今始克還舊物。一如占者言。於是繪以金書。雕以藻文。題曰占星堂。而屬記於不佞。嘗觀古今冊書。以高科獲雋者。往往歸之讖符。使匹夫匹婦震駭嘆羨。以爲鬼神造化之所爲。人不得而實力焉。然元徵之獲占於天。占而適與吉祥合也。易也。□□□天下之占元徵。與元徵之自爲占者。益重且巨乎。當其爲諸生時。肝腸清虛。面目嚴冷。以文章節義自任。今出入中祕。讀人間未見之書。必將益大其所學。以立副中外之望。非苟而已也。夫校讎則太乙星見。繪字則十八星見。此特清華之氣上與精通。又不見魁下六星。兩兩相比。曰三台星者耶。分陰陽。建四時。均五行。移節度。定諸紀。皆繫於斗。斗爲帝車。運於中央。三台明。天下昌。三台昏。天下極。斯固轉移於元徵心上之斗杓。而星翁曆師之所不能占者也。元徵慎之哉。昔于公之門焉。而高王氏之槐焉。而三。以此方澹窩先生。可謂善食其報矣。顧所言鄙。非吾黨所望元徵者。元徵曰。有官居鼎鼐。無地起樓臺。敢謝不敏。安得大廈千萬間。蔭天下飢寒人。謂因長孺之言勉之。余喜而爲作占星堂記。

### 聚書樓記

聚書樓者。廬陵郭筆峯先生誦讀處也。先生有子章叟公。以邑令奏最第一。贈先生文林郎。又奉覃恩。贈南京吏科給事中。而學者祀之。警宗。稱筆峯先生如故。先生嘗年。補逢掖食餼。十困棘圍。三置副榜。晚以明經試大廷。例得郡邑博士。竟謝歸。初居荷溪。再居新洲。及慶嶺。博綜古今典墳。而尤好坐虎皮談易。四方負笈者爭北面焉。得弟子糴。卽以購書。不能購。則且借且錄。且綴且補。久之。几案戶牖間。皆箴銘簡冊也。結樓三楹。題

曰聚書樓。俯而讀。仰而思。遇有所得。輒吹燭書之。南面百城。殆無以易此樂矣。嘗考古今圖籍之富。隋嘉則殿。三十七萬卷。唐麗正殿。二十萬餘卷。宋崇文書院。八萬卷。凡一切竹簡韋編。靈文祕檢。或掌于宮人。或繕寫于五品之子弟。或精校於上。或懸官爵金帛。廣募於四方。四方有應。有不應。而兵燹復出。而兀之。不如民間之故家野老。猶有存十一于千百者。如廬陵郭氏是也。筆峯先生重然諾。謹取與。範俗類大丘。而不願市。獨行名。好吟類元亮堯夫。而不願市詩人名。獨其天性嗜古。鳩集異書。至不惜損衣縮食而聚之。玄泓在左。丹鉛在右。危坐孤樓。聲出金石。庭訓章叟公。卓然巨儒循吏。大要從讀書得力中來。然莫敢取一縑一錢以獻。懼逢先生之怒也。先生家無長物。唯書在。亦無美宅脂田。惟聚書樓在。子孫有賢而文者。追維手澤。不忍付之碩鼠蠹魚。饑腹中。會萃增補。當學鄭漁仲求書法。出入嚴。可以保存。曝涼時。可以持久。當如黃魯直珍書法。銓次精審。當學宋宣獻校讎法。老年窮經。當學劉貢甫夾袋法。快讀。當學蘇子美下酒法。至于舉子獵其辭。吾獨覈其意。舉子志科名。吾獨志道德。又當學筆峯先生課子法。審若是。郭氏之書種。簞歲月算數。可既乎。雖然。書不厭多。亦不厭少。若欲誇籤軸之浩繁。裝裹之華煥。雖嘉則麗正崇文所藏。亦復何益。畢竟消歸自己。括爲王佐儒宗之助。則恕之一字。謙之六文。論語之半部。已覺其終身用之而有餘。此又筆峯先生聚書之本意。而郭氏子孫。能且暮誦讀於此樓。書過半矣。故諾章叟公之請。而爲之記。

貞靜菴記

古者聖賢。惟有經世法。女事內。男事外。虔修剛柔以佐兩儀之軌。自竺乾流沙二氏之教興。於是擲儒冠。

而冠黃冠。裂儒衣而裹緇衣。沿流導源。甚則閨媛鬪秀。相與結伴而談無生不死之理。施釵金以布地。剪纏錦以製幡。貝葉蓮花。蓋半屬夷女道矣。是庵所棲。爲諸女真焚禮禪誦之所。二六貝梵。韻于樹端。燈光熒熒。丙夜不息。可謂旃檀之香林。琉璃之寶地也。陸宮保先生以三教龍象。爲大總持。爲大護法。遂以貞靜命庵。夫堅固清淨。天地之體也。惟貞故獨立萬物之先而不彫。惟靜故獨當諸塵之后而不擾。既貞且靜。可以定覺海之瀾。登道岸之筏。撒無明之網。探罔象之珠。何者。生死二緣。本無定體。而妄者以識風鼓之。慾飭吹之。勝劣頓然。忻厭交起。故空中粘縛。夢裏山河。遞滅遞生。終無了際。此不貞不靜之所致也。諸女真苟能思惟此義。則一彈指間。金粟玉宸。宛然接影。蓋珠之官。兜率之院。安知非是庵也耶。昔散花天女。欲轉女身。尋覓其身。了不可得。而三山五岳之巔。如金母魏夫人。踏白雲而策青鸞者。孰非昔日閨閣之淑女哉。余故記之于此。以俟他日庵中人道成。梵笈金書。與諸上真共載其姓氏云。

### 觀濠堂記

昔摩詰圖畫輞川香山命篇池上。皆以討天機於逝者。非止託心賞於冷然。有美吾師。實弘斯理。偶剪蓬蒿之徑。漸成桃李之蹊。止水一泓。爲山半霄。鷗磯清淺。花枝笑於鏡中。雉堞參差。人影行於樹杪。璧月暎柳。鶯鷺在汀。停雲淡而無言。芳草淒兮不斷。四圍秀色。翠籠薛荔之牆。一道晴霞。霜暈芙蓉之浦。枯蘭吐蕙。檜木蒸芝。神仙於此樓居。大夫從之賦作。醉來刻竹。清歌散渭畝之陰。倦以據梧。幽夢仗鸞林之石。夕陽殿角。蕉葉扇而鹿眠。點雪罽頭。茶烟橫而鶴避。紅亭客散。碧芝風生。門設不關。簾鈎半上。凭軒踞狻猊之鼎。隱几披龍馬之

文身侍羲皇。地隣濠濮。登斯堂也。蓋往觀乎魚鳥親人。鬚眉可鑑。謙而善下。含哲士之虛心。淨以納瑕。得碩人之雅量。淡成君子。信薦王公。進退近乎中庸。安流類乎無競。澄懷觀道。何如世上之風波。抱膝鼓琴。聊爾胸中之丘壑。

曲周縣趙大夫開渠記

開渠古法也。農天下之本。農重則水田重。水田重則泉流灌浸以育五穀。而渠更重。古有堰渠使。有都水備使者。則其官也。置碓置碣。置斗門。則其規製也。史渠白渠。鄭國渠。浚儀渠之類。則治水者之成蹟也。王介甫好興水利。自熙寧三年至九年。穿渠凡一萬七百有餘。諸路鑿空應之。多詭而少實。吾朝重河不重渠。行河使者歲糜水衡錢無算。而渠則委之郡邑長。曰。有司者治之耳。有司秦越視民。強半掩耳掉臂去。即遣掾相視。畜泄啓閉興復之宜。曾有幾人哉。獨曲周邑大夫趙公則異是。曲周者。滏河繞城而曲周之。故邑以得名。其水去邑十二里。自西北東漸近關之東隅。稍北置閘。導滏灌漑。俄有漳水闌入之。漳性剽疾而多濁。石水常五斗泥。非特淤閘。行且城患。故甯涸渥。無敢通滏水者。垂二十年。滏水不通。則鹽井苦澁之味無以解。纒而食之。往往得病。趙大夫流覽愴嘆。此水泉上腴。而溼爲惡田。汙池可乎。乃乘築堤之役。緣堤爲溝。建二閘于漳所不到之處。一截河。一倚堤。而滏水從此滿渥矣。有青鳥家過而相之曰。此城外河內渠。水望巽入。文運其昌乎。利一。清流匝城。魚鳥下。蒹葭采采。荷葉田田。利二。有土可耕。可稻。有畦可灌。可蔬。利三。避鹽井。飲甘泉。如去壅而疾蘇。如出否而鼎潔。利四。上不關領詔書。下不科配丁夫錢穀。勸誘子來。畚鍤雲集。利五。此數利者。皆大夫閔閔

皇皇朝不朝夕。夕不夕。經營擘畫以底于成。厥績偉矣。大夫父中丞。叔太宰。稟承家法。不察察爲明。而有大臣風骨。在邑五年。修學城。城新壇墼。覩社學。兼置田以助其歲餼。而開渠特其善政之一耳。陳子曰。嘻。無輕視渠也。吾讀書喜搜僻事。漢韻彙侯信。嘗置一門三堰於舒城。河渠書不載。劉貢父爲廬州從事。見此始表而出之。魏築千金碣。五龍渠立一石人。若腹若東西脅。皆有記。其略曰。後當興工。宜就西碣。故書之於石。以遺後賢。古人不忍輕毀故渠。并不欲掩作者之姓名。蓋如此。今曲周渠成。雖趙大夫不伐功。不市名。而畜泄啓閉興復之。故不可不以盡告後之人。後之人約束而擁護之。以無忘大夫之艱難。雖世世名趙公渠。可也。故諾銓部劉公箋纂其始末。而屬陳子爲之記。鑿於代言之石。大夫姓趙。名胤昌。號芝庭。萬曆丙辰進士。山東掖縣人。

### 許公治青浦河工告成記

往東南三載旱潦。天子宵旰。而思所以紓萬姓之急。部臣上書。無若興水利便。而恪恭不二。明習於水利之政者。度無踰按察許公賢。於是天子顧太宰爲勅璽書賜公。顧大司農爲辦水衡錢二十萬待公。顧大中丞直指使者。毋有所梗制。而務協濟。公至之日。卽召諸司及鄉父老計之曰。河有幹有支。幹者導江河之水而注之海。以通漕便商。支者麗于田。而令溝澮洩且蓄焉。使旱不至於龜坼。而潦不至於臆脛之沒。幹母也。支子也。子母灌輸而水道得矣。公之功肇於戊子之歲。而迄於庚寅。踐冰霜。沐風雨。凡課督於三年。而經營於四郡之內者。卽毫髮無遺力。故百姓踴躍以聽。纛鼓其費半而功亦倍之。某聞嘗詢諸青浦鄧君。君爲余言公治河狀。公所濬艾祁。橫歷諸浦水。爲幹者凡九。其附庸於幹以爲支者。凡七十有八。橫縱爲丈者三。深如之。加尺者

五。金散者三千八百有奇。餘以付邑吏。筭庫之鑰者百有九。公挾四千之帑藏。務爲節縮。上食其功。民食其力。彈指而成百世尸祝之業。舉青溪而他邑。與郡可知也。蓋公往嘗奉上帝命。持節佐司空。治漕。漕成。上爲賜黃金。遷僕卿矣。今徙而治吳。此何異一鬻之灸。而烹之函牛之鼎哉。雖然。余則嘆公之於是役也。有五難。漕雖鉅。上有司空。次有御司大夫。可以借鑿於諸賢。而仰成於主者。今一切拮据。公欲以身悉肩之。難一。上重國本。睨焉南顧。悉國家之力。以與漕敵。而不敢愛內府之畜。及數世之賞。以事功臣。今許公水衡錢二十萬。業請其半。半則部使者局不與矣。難二。調漕事日上。天子心動。謗者抱樂羊之書。而不敢讞。今吳遠在千里外。未悉其勞苦。而羣咻隨之。難三。歲稔則可。歲薦饑而舉大役。議者謂疲民不可以重勞。災地不可以處衆。寬之玩生。急之釁起。難四。漕河無中制。而公自監司而上。有所咨啓。其可否。必冊報留臺。以奏徵於朝。難五。夫公負天下之五難。日夜惴惴。惟簡書之不力是懼。而不知公之深者。亦妄擬以中之。或有所梗。而未必卒竟其成。乃公以孤忠結主上。以朴誠結諸臺。而一念之勤苦。涓潔結士大夫百姓之心。從容委蛇。上不疑。下不譴。廣於收功。而約於較費。及臻厥成。天下晏如也。夫上之於河。急在北。則借公於北。急在南。則徙公於南。公之身如轆軸。而其談笑。以奏功名。亦如形影之必赴。公今者。豈特獻最。而被玄圭之錫。卽往日佐漕小中。蜚語而不得暴者。今竟白矣。夫東南衣履天下。爲朝廷外庫。漕其喉領。四郡之支幹。譬尾閭也。尾閭淤鬱。雖有喉領。將焉用之。然則公之績在天下。豈特世世以襟帶吳之人也哉。鄧君屬余記之。余雖鄙。不容無言。稍做太史遷河渠之遺。以勒之石。



許祕書園記

士大夫志在五岳。非絆於婚嫁。則寤於勝具勝情。於是葺園城市。以代臥游。然通人排闥。酒人罵坐。喧笑  
嗷訾。莫可誰何。門不得堅扃。主人翁不得高枕臥。欲舍而避之。寂寞之濱。莫若鄉居爲甚適。吾友祕書許玄祐  
所居。爲唐人陸龜蒙角里。其地多農舍漁村。而饒於水。水又最勝。太公嘗選地百畝。菟裘其前。而後則樊瀦水  
種魚。玄祐請登石園之。太公笑曰。土狹則水寬。相去幾何。久之。手植柳皆婀娜縱橫。竹箭秀擢。菱牙蒲戟。與清  
霜白露相采采。大有秋思。玄祐乃始築梅花墅。寶墅而西。輦石爲島。峯巒巖岫。攢立水中。過杞菊齋。盤磴上躋  
映閣。君家許玉斧邁。小字映也。磴腋分道。水脣露敷石骨。如沉如浮。如續如斷。躡足蹇渡。深不及踝。淺可漸裳。  
而浣香洞門見焉。崕呀岩窈。窳暗疏明。水風射人。有霜電虬龍潛伏之氣。時飄花板。冉冉從石隙流出。衣裾皆  
天香矣。洞窈宛轉得石梁。梁跨小池。又穿小酉洞。洞枕招爽亭。憩坐久之。徑漸夷。湖光漸劈。苔石疊疊。嚙波吞  
浪。曰錦淙灘。指顧隔水外。修廊曲折。宛然紫蜺素虹。渴而下飲。逶迤北行。有亭三角。曰在澗。所謂秋斂半簾月。  
春餘一面花是也。由在澗緣堦而登。濃陰密篠。葱蘢模糊中。巧嵌轉翠亭。下亭投暎閣下。東達雙扉。向隔水望  
見修廊曲折。方自此始。余榜曰流影廊。窈窕朱闌。步步多異趣。碧落亭踞廊面西。西山烟樹。撲墮檐瓦几上。子  
瞻與元章欲結楊許碧落之遊。楊爲楊羲。許爲許邁。亭義取此。碧落亭南曲數十武。雪一龕。以祀維摩居士。由  
維摩庵。又四五十武。有渡月梁。梁有亭亭可候月。空明瀲灩。縠紋輪漪。若數百斛碎珠。流走冰壺水晶盤。飛躍  
不定。渡梁入得閑堂。閎爽弘敞。檻外石臺廣可一畝餘。虛白不受纖塵。清涼不受暑氣。每有四方名勝客來集。

此堂歌舞遞進。觴詠間作。酒香墨綵。淋漓跌宕。紅綃於錦瑟之傍。鼓五搗鷄三號。主不聽客出。客亦不忍拂袖歸也。堂之西北結竟觀居。前楹奉天竺古先生。循觀臨水浮紅渡。渡北樓閣以藏祕書。更入爲鶴蘂蝶寢。遊客不得跡矣。得閑堂之東流。小亭踞其側。曰滌硯亭。亭逶迤而東。則湛華閣。摩干羣木之表。下瞰蓮沼。沼匝長堤。而垂楊修竹。菱蒲菱芡芙蓉之屬。至此益紛披輻輳。堤之東南陰森處。小縛圍蕉。鷗鷺鳧鷖若作寓公於此中。旅坐不肯去。此中桃霞蓮露。繡繡綺錯。而一片澄泓蕭瑟之景。獨此寫出。江南秋。故曰滴秋庵者。王太史遊香山。欲與二三子作妄想。若斬荻蘆陂隄。盡田荷花。使十五小兒。錦衣畫舸。唱采蓮詞。出沒於青蘋碧浪之間。可以終老。今玄祐不妄想而坐得之。又且登閣四眺。遠望吳門。水如練。山如黛。風帆如飛鳥。市聲簇簇如蜂屯蟻聚。而主人安然不出里門。部署山水。朝絲暮竹。有侍兒歌吹聲。左絃右誦。有諸子讀書聲。飲一杯。拈一詩。舞一棹。沿洄而巡之。上留雲借月之章。批給月支花之券。袍笏以拜石丈。絃索以謝花神。此有子之白樂天。無譎貶之李贊皇。而不寫生綃。不立粉本之郭恕先。趙伯駒之圖畫也。祕書未老。園日涉。石日跣。魚鳥日聚。花木日爛。爛。篇章詞翰日異。而歲不同。余且做角里先生。藤轎豹席。筆床茶灶。叩君之園而訪焉。相與唱和如皮陸故事。玄祐能采杞菊以飽我否。

游桃花記

南城獨當陽。城下多栽桃花。花得陽氣及水色。大是穠華。居民以細榆軟柳。編籬緝墻。花間菜畦。綰結相錯如綉。余以花朝後一日。呼陳山人父子。煖酒提小榼。同胡安甫宋賓之孟直夫渡河梁。踏至城以東。有桃花

翫然推戶闖入。見一老翁具雞黍餉客。余輩衝筵前索酒。請移酒花下。老翁愕視。恭謹如命。余亦不通姓字。便從花板酒杯。老饕一番。復攀桃枝坐花叢中。以藏鈞輪贏爲上下。五六人從紅雨中作活轆轤。又如孤猿狂鳥。探葉窺果。惟愁枝脆耳。日暮乃散。是日也。老翁以花朝爲生辰。余於酒後作歌贈之。謂老翁明日請坐卮跗爲壽。十四日。余與希周直夫叔意。挈酒榼甫出關。路途得伯靈子猶拉同往。又遇袁長史披鶴氅入城中。長史得我輩看花消息。遂相與反至桃花溪。至則田先生方握鋤理草根。見余輩便更冠出肅客。客方散踞石上。而安父賓之箕仲父子。俱挈酒榼佐之。董徐何三君。從城上窺見。色爲動。復踉蹌下城。又以酒及鮮筍蛤蜊佐之。是時不速而會。凡十八人。田先生之子歸。駢爲十九。榼十一。酒七八。壺觴。酒屈興信。花醉客醒。方苦甌曇相恥。忽城頭以長綆縋酒一尊。送城下客。則文卿直卿兄弟是也。余輩大喜。賞爲韻士。時人各爲隊。隊各爲戲。長史伯靈角智局上。紛紛諸子飽毒空拳。主人髮短耳長。龍鍾言笑。時酒瀝尙餘。乃從花籬外要路客。不問生熟妍醜。以一杯酒澆入口中。以一枝花簪入髻角。人人得歡喜吉祥而去。日暮鳥倦。余亦言旋。皆以月影中抱持而顧。視紗巾縵袖。大都酒花花瓣而已。昔陶徵君以避秦數語。輸寫心事。借桃源爲寓言。非有真桃源也。今桃花近在城齒。無一人爲花作津梁。傳之好事者。自余問津后。花下數日間。便爾成蹊。第賞花護花者。舍吾黨后能復幾人。幾人摧折如怒風。甚雨。至使一片赤霞。闌珊狼籍。則小人于桃花一公案。可謂功罪半之矣。

### 梅花樓記

王元美嘗謂余。市居之迹於喧也。山居之迹於寂也。惟園居在季孟間耳。然王氏之弇山枕城中。朝嗽暎

門遊屐麀集。卽主人亦往往支門謝客。欲放而之於曠閒無人之鄉。而不可得。余然後知園之與衆也。嘗獨與其謀於市也。嘗謀於野。吾友范象先有園在橫澇野塘之南。去城十里而近。喧寂半之。四面榆柳陰翳。小池上梅花兩樹。婆娑相對。蒼枝老骨。縱橫屈曲。排簷而上。其幹可抱。其葉可陰一畝餘。其子可得五石。范子謂吾見梅多矣。未有如此君之老而奇者。乃結高樓以臨之。獨與一二老衲。攤虎皮。燕貍鼎。倚樓而歌之。曰。雪滿山中高士臥。月明林下美人來。已復笑曰。如李迪詩。不過得花之幽韻閒淡而已。吾家老梅。政如碧眼胡僧。修眉露額。又若毒龍怒虬。紛拏擘門於廣漠之野。攫爪迸鱗。鬼怪萬狀。度他梅詎足與此君爭勝。庶幾鍾賈山之嘉樹。四賢祠之紫藤。差鼎足耳。范子樓旣成。於是廣蒔霞桃芙蓉來禽之屬。以暎帶之。池加闊。竹加徙。梅之爲觀。日閑以敞。而陳子適來。陳子曰。吾嘗聞往年探梅者。過壽安寺中。寺僧爲遊客所困。至斫而爲薪。而其次惟光福女墓之傍。薄雪輕雲。漠漠數里。一快生平。然村人率以種梅爲業。不復有品題護持。與梅花兩相韻者。古今梅花之知己。僅得林逋君復。迨三百年而有范子。范子於此中塊焉野處。白板赤欄。朱簾碧幄。依微獨立於暗香疎影之外。何異處士孤山所少者。童子開籠放鶴耳。他日抱鶴上扁舟。送之花下。烟沙星渚。短笛悠悠。有巍然破輕浪而出者。則陳先生至也。子其報梅花吐一枝以候我。

虎丘三泉亭記

吳人不善附麗。山亦如之。虎丘是也。凡地勢相牽相聯。若斷若續。突爲崇山峻嶺。綿爲蔓壑枝峯。散爲飛泉噴瀑。多使人心胆震眩。耳目旋轉而不得停。大抵附麗者必高大。高大者必險絕。其勢然也。虎丘前無援。後

無推。孤行獨峙于平疇衍漾之中。而不見有因緣攀附。巉聳刻露之跡。其秀至今甲天下。石平如砥。泉瑩如雪。陸羽張又新品泉而甘之。圻居第三。與中冷惠山鼎足矣。申文定自少喜登此山。解相印歸。數與故人父老。暢詠其上。料泉淪茗。欣然忘歸。曰。百歲後。吾魂魄猶應依此。文定薨。郡中業有專祠。至是。士大夫釀金考室。復祠公于劍池之南。鶴澗之西。曰。公平康正直。一生相業。無所附麗而起。此水此丘。神所樂也。祠北恰枕三泉。寺僧久屋其上。湫隘塵垢。日月之光不射。雲霞之彩不生。罔卿司理。捐金錢施僧。撤屋剝土。土去而石根露。石露而泉脈疏。穹壁高廣。截若刀削。凡數百年。鐫題字跡。隱隱出嶙峋隙縫間。禪窟懸崖。經聲曳于樹杪。石梁浮澗。苔紋繡於水中。間之以曲廊。扞之以闌楯。游者逡巡玩流。憑三泉亭而小憩焉。夫自古有此虎丘。卽有此清泉石壁。歲不絕歌舞。太平日不絕品題名勝。鮮有發覆疏明。爲泉石一洗塵土面目者。有之則文定之罔卿司理始搜剔經營。則客周伯讓始。文定有靈。將無釋冠劍。屏侍衛。夷猶於堂之上。下乎人靜山清。花疏月淡。公左挽顏魯公。右拍蘇學士。呼取鬪閭健兒。盡發魚腸三千。試舞於鐵花巖畔。生公說法。何胤講經。遠道士放鶴。陸桑苧點茶。王家短主簿。但令展衣掃石。綆汲第三泉。數斗作供。樂哉斯丘。公舍此焉適哉。罔卿笑曰。眉道人。是語快不可言。卽文定當爲解頤。請筆而記之。

### 飽菜軒記

吳長卿官灤州刺史。僅六月。當遼左軍興。悉索敝賦。莫能支。以彊直節省得罪去。移倅楚德安郡。郡圃蕭然。構新齋三五楹。讀書其中。餘地種菜。鮮魚甘廬。一似野叟田庚之挈挈灌畦者。陳子聞而高之。曰。吳子貧矣。

憊矣。長卿曰：人生衣食裁足已厚幸，又薄有官俸，以供俯仰，不謂貧。新齋適成，客贈花贈鶴，贈數種書，門生問字，剪霜莖烟甲共享之，不謂憊。昔韓晉公一吏，冥司勅主人間食料，三品以上，日支五品以上，而有權位，旬支六品至九品，季支料幾何？此鬼神所不甚吝，飛而食肉者，所不暇爭也。舜糲草，孔飯蔬，閔含齋，范斷齋，周顛之早韭晚菘，蔡樽之紫茄白苧，卽聖賢豪傑皆然。况吾儕何人，而敢望五侯鯖，郎官鮪乎？吾嘗笑何曾不食大官，所設滋味過于王者。李贊皇丹砂寶玉，雜投蔽羹，此復何樂，亦復何味？遂至罨入五欲甕中，幾老死不得出。二公有知，悔不作飽菜軒主人耳。長卿才甚奇，書甚博，胸中甲兵甚富，而能性安藿食，若將終身，頗得遷吏吏隱之樂。玄德謂張桓侯云：吾豈種菜者耶？長卿笑而不答。

微道人生壙記

修微姓王，廣陵人。自幼有潔癖，書癖，山水癖，自傷七歲父見背，致飄落無所依，眉嫵間常有恨色。已奉竺乾古先生之教，刺血寫小品經，間讀班馬孫吳書，人莫得而狎視也。嘗行靈隱寺門，見白猿坐樹端，迫之展翅疾飛去。包圍夜半，有兩炬炷射窗縫上，諦視之，虎也。修微挑燈吟自若，其詩詞娟秀幽妍，與李清照朱淑真相上下。至於排調品題，頗能壓倒一座容。慕翰墨者輻輳案前，如農訴水旱，修微攢眉應之，擲筆出避西子湖，避鄧尉山，避廣陵，尋獲兄，指其父埋骨處，仆地哭失聲，延僧作水陸道場，凡十五日，以薦父靈，笥中綺繡環瑱，隨手立盡矣。修微飯蔬衣布，綽約類藐姑仙，筆床茶竈，短棹逍遙，類天隨子，謁玉樞于太和，參慈公于廬阜，登高臨深，飄忽數千里，智能衛足，膽可包身，獨往獨來，布帆無恙，既歸，出楚游稿示余，冰雪淨其聰明，雲霞汰其粉

澤。抑名山大川之助乎。脩微曰。自今伊始。請讖從前綺語障。買山湖上。穿容棺之墟。茆屋藤牀。長伴老母。豈復問王孫草。劉郎桃。蘇小小同心松柏哉。予曰。今君才貌兩歸。人間所難。出世之盟。將無太早。修微曰。嘻。是何言。孔雀金翠。始春而生。四月而凋。與花萼相衰榮。每欲山栖。必先擇置尾之地。然後止焉。然禁中綴之以爲帶。蠻中采之以爲鬢。甚有烹而爲脯。爲腊者。色可常保乎。鸚鵡馴擾慧利。洞曉言詞。官家奇愛之。或教詩文。或授佛號。而未免閉于金籠。搏于鷲鳥。則韻語又可常恃乎。予嘆曰。常情仕諱歸。年諱老。而修微少不諱死。死不諱墓。昔者淵明自祭。樂天自銘。司空圖引平時故交。痛飲生壙中。三君子以後。鮮有嗣續高風者。修微達視死生。如晝夜寒暑之序。女史乎。女俠乎。一變至道矣。生壙成。諸名士爲彈孔雀經一卷。供鸚鵡舍利十餘粒。并穴置其詩稿百餘言。眉道人爲之記。

## 附碑記

### 浙督學孫子長先生去思碑記

孫子長先生督學浙中。皆推爲人天師。微中蜚語。旋請歸。臺使者駭嘆。堅留之。將疏聞於朝。而先生接浙行矣。行之日。士民挽轍攀帷。尾送渡江。不忍別。旣別。猶戀戀不忍釋。諸懷乃謀俎豆先生於專祠。以志永永。王子陽云。民者弱而不可勝。愚而不可欺也。余則曰。士者悍而不可勝。慧而不可欺也。孫先生何以得此於士民哉。先生嘗爲吳興掌故。又以戶曹郎推擇出守杭。愷弟廉明。強半與越人習。習公者。聞督學命下。喜見鬚眉。已又搖手相戒曰。孫公天下正人也。勿私謁。勿以非禮干干之。如捫數千尋鐵壁耳。先生下車後。其詞察加詳。而

言笑顧盼亦加峻。諸生有五人連名入溷郡邑長吏者黜。有赤烏華裾。格五博六。浮浪少年。場畔睨狹邪徑者。黜。有自詭名豪健俠。談孫吳鬼谷。妄引非聖之書者黜。有挾權要之關說。倚書史之掉弄者黜。其他挺辭權貴。痛絕郵筒。大索神姦。窺搜弊竇。自先生以及郡邑之長。不唯同心。而且苦心。不唯無遺術。而且無遺力。夏鼎燭妖。秦圖照膽。無加於先生矣。彼言者何爲哉。先生權稅濟墅。會節五千金助餉。上疏委宛不例。後人以此思清。清可知也。太守謝客有署門之詞云。齋頭脫粟。詎可留賓。嶺上白雲。豈堪持贈。簿書鞅掌。不能代湖山。而稱主人。闌關蕭條。不敢脫膏脂以供顏面。客趨之多及門叱馭而返。以此思嚴。嚴可知也。先生惟清嚴。故無欲。無欲故無情。無情故聞謗能無辯。去留等於閃電。譽詈付之飄風。迄今含沙鬼矢。不能秋毫有加於先生。而俎豆尸祝於行後者。則士民如出一口。越君子之言曰。吾聞學者通利則思師。說義則稱師。說不稱師。命之曰叛。賢主弗內之於朝。君子不與交友。昔季償等二百七十餘人。有詣朝乞留陽城者。漢諸生千餘人。有陳元上書追訟歐陽歙。平原禮震年十七。願乞殺身自代者。古弟子不忍叛背其師。乃如此。今孫先生文章典麗。局度宏雅。衡鑒精微。清如水。執法如山。而突然牴牾於無端風影之口。吾等豎儒。上愧禦侮之子路。下慚城歙之門人。所恃藉手以報師者。惟有捧土築宮。生祠先生於西湖耳。初先生艱嗣。士民走羣望祝之多男。尋舉雄。先生笑曰。吾子生武林。武林人亦吾赤子矣。第守郡臝臝如慈父。視學則教戒肅括。凜凜如嚴師。既稱得士心。又稱得大體。悅斯服。服斯感。感斯憤。憤則不平之氣。與不忍別之情。心口約結而不得宜。其在代言之石乎。故建祠淨慈寺西。特揭貞珉。以志先生去思。而徵陳子爲之記。



戶部長玉錢公澚墅關生祠碑記

陳子耕白石山中有客稽首以碑請。余釋耒而問曰：何碑？曰：以碑錢公。余曰：錢公權澚墅有廉名，尸而祝之固宜。三校之士，五方之民，而釀金捧土，琢碑無異詞，何也？答曰：昔之關使者，通商惠民，公爲關使者，通商救荒，雖司權實司命也。禮能禦大菑，捍大患，則祀之，請專祀公，以志去思，可乎？甲子，公以司徒郎入澚墅，時方仲夏，霖雨徹旬，月不休，米粟翔踊，當事下遠糴，閉糴平糶之令，富人局廩以規數倍息，飢者僵於途，悍者掠於市，聲聞遠近，豪商大賈，壅上流之粟，莫敢前。吳越且蠢蠢思動，公曰：吳越腹也，澚墅咽喉也，喉一梗，雖有粟，腹得而食，諸於是刻木張諭，懸於蕪湖京口之間，遠商有販粟入境者，免料一尺，以招徠之。土商有販粟出疆者，給郵符以護持之。吳撫牒至者，全蠲之。浙撫牒至者，半蠲之。他郡縣牒則衷之所蠲，不知幾何緡矣。去無譏訶，來無盤驗，粟舟不待召而集，粟價不待壓而平，而公猶未已也。飛章以控朝貴，酒涕以勸兩臺，請賑請蠲，請改折，請設粥糜，又請宦遊度關者，速下湘楚豫章之粟，而公猶未已也。捐七白金以賑饑民，又捐三百金以賑寒士，而公猶未已也。減市價之三，平糶千五百石粟，分給常熟太倉長吳諸邑，復核本關上下凡三十里窳而無告者，按月計口，全活不勝計。且欲與守土諸賢，盡截關稅，共濟時艱，而籲天無從，惟有仰屋嘆耳。至於征商免量料，免耗羨，免農莊，免醫蔬販豕，免市民貿易之貨，免回空之檢詰，免牙儉之供應，免冗役之詐冒，免訟牒之勾攝，免時值之抑勒，嚼藥飲冰，加意節縮，修潰塘，修奎星文昌閣，修周濂溪尹和靖諸祠，嘉與諸文學，立社授漁，談說經術，北面皈依者，津津矣。一切善政，視前使則加密，視穰歲則加寬，關政荒政，遞相灌輸於其間，公之言

曰救荒非權責也。然司徒事也。在周禮荒政十有二。聚萬民。首散財。次薄征。舍禁去譏。遂居其二。今日擊非常之重災。而忍以局外委之。膜外置之乎。與其耨苗櫛髮。剝商以自肥。毋寧通商以起溝中之瘠。與其筐篚餽牽。媚貴人游客。毋寧以此活餓殍而杜亂萌。公識甚卓。公心甚慈。而亦甚苦。行且驅車往矣。今年自春徂夏。雨霑霖復不休。榮麥驟爛。士民牽衣而啼。如兒索乳。如母顧兒。公一朝挈付後人懷抱中。度飢飽何如哉。公少年高第。脂膏不染。能早透義利關。米粟流行。又能度億萬姓於人鬼關。關吏如此。事事皆可楷模。雖司權實司命。雖司命實導師。故德公者。不忍釋然于公之去已。遠近走相告。特築專祠於五達之衢。塑繪公像。薦之清泉。且徵陳子碑其文。以告繼公而來者。

松董漕方旦心遺愛碑記

郡丞且心方公。由壺關令。移劇洪洞。其異績載在百政錄。庚戌業已下尺一徵公。需次爲臺諫。會有沮公于當路者。出丞吾松。洪洞百餘人。走京師。上疏攀留。訴太宰輿前。不報。明年公董漕入都。洪洞人猶尙在。當除夕。釀錢刑羊豕。獻公。公麾之。曉諭數四。乃散去。其爲人思慕若此。已下車松郡。旋領漕事。漕竣。拜南司農郎。而松之思慕公。不啻洪洞也。則相與奏牒臺楊公。公特命樹碑鍾買山之道左。是地也。軍民漕艦之所必經。華青送迎之所必駐。里道均。耳目集。斯民之畏壘鄉乎。諸紳裾父老。屬記于陳子。陳子嘆曰。江南之俗。凡司理邑大夫。被徵者。道有碑。像有祠。蓋感與矜俱焉。若方公而繫去後思。其三代直道之遺哉。公治行最高。而處公郡丞。則最屈。非有輕去其官之心。則將更絃而鼓善刀而藏。櫜櫜焉。以刻日待遷而已。何知漕事。卽漕事簡者。賦

其煩。文者厭其俗。弛肩掉臂而去之。已大幸。又誰肯爲百姓必然之畫者乎。而公獨否否。蓋國家之漕有二。軍漕以儲九大鎮也。民漕以儲六宮百執事也。等王土也。獨江南五郡之民。走三千里外。轉二十一萬四千八百石之粟。此于役最煩。等郡丞也。獨公轄五十八艦。粟四萬餘石。此于江南丞最苦。何也。有丞名而無丞實。有漕害而無漕利。故也。公每論及此。輒慷慨任曰。孔子敍政。曰食。曰兵。曰信。而食先之。唐關中時。斗米千錢。韓滉運百萬斛入朝。德宗與太子動色相賀。則漕豈細事哉。漕弊久爲民困。惟弊端清。自君子。弊孔塞。諸小人。而轉漕始稱便耳。故事。漕額水脚之費。每艦八百餘金。邑上之漕大夫。漕大夫以次分之。鄉賦長。公曰。此邑事也。檄使盡散之。毫髮不以染指。度所却恆例。不下二千餘金。此便于在家者一。故事。民漕苦軍橫。苦暴關。公力請之。當事軍不敢虐民。關不敢苛稅。不查驗。不車運。而吾松超爲首幣矣。此便于在途者二。故事。內官監與局庫倉場。誅求無厭。而公挺身先之。或轉相居間。耗贈比他艦獨輕。交納比他郡獨易。其便于在京者三。而公不止是也。公堂有禁。公費有禁。交際雜儀有禁。胥隸橫索有禁。卽筆楮薪蔬之屬。絕不煩之。鄉賦長。民使公。因便漕。漕法一變。卽漕大夫之故習。亦爲之一變矣。公非爲是。噉噉也。蓋北運之難。獨五郡知之。海內不知也。獨漕民知之。卽五郡士大夫不知也。獨漕運承知之。卽他丞不知也。以不可知之役。而加之以不可期之程。風濤不可測之險。與公私不可贊之費。非公設身處地。推心置腹于諸苦中。漕其能濟乎。公頓途既久。往往不給。或轉貸故人。甚則典衣鎔帶。童僕不堪其憂。而公略無感慨不自怡之色。且曰。人情不尠遠。諸役人家豈盡腴。卽父母妻子之慮。豈盡愀然。其勞苦當百倍我耶。衆聞之。皆感動泣下。而公又著爲感動要略。凡苦不能盡言。言不能盡竟。

者。燦然筆之于書。謂卽此是真學問。卽此是真利濟。卽此是真忠愛。雖舍清華而就冷署。舍冷署而就水濱。甘之矣。噫。公眞聖賢豪傑之用心也。誠廉吏也。歟哉。公文章高古。酷類荀管。所著有心問。皆先賢所不經道。暇則與文學子弟揚確古今。人甚懷之。治郡攝青邑篆。聽訟徵賦。皆有惠政。而漕爲大。故書其大者。張之道左。自公漕後。邑侯與漕大夫。皆相約却恆例。不取一錢。公創之也。則碑去思宜自公始。

青浦賀令君景瞻公去思碑記

青浦創邑以來。賢大夫可指數。而無若獲鹿賀公。品最眞。聲實最著。主計者。僅拜刑曹郎。老稚走相告。詫謂無天。公率諸生拜祭海忠介祠。而別攀帷繫車者。追送及數百里外。公何以得此于青人哉。青之始邑也。華亭上海。割其厥壤之最下下者。叢爲邑。其本原業已瘠弱。他復從而漁獵之。貌雖類中邑。而元氣索然槁矣。吾鄉宜于朝者。特推擇賀公來。公下車甫病瘡。又迫於朝天之期。不輕見短長。已覩畢還邑。精采百倍曩時。且倍於東諸侯之最有聲者。老稚喜可知也。公早起坐堂皇。左右却立案側。屏息墜下。鮮有抱不急之贖。溷公押署者。訟牒卽屬本訟人。刻日追呼。不遣悍隸。聽其束身自詣卽止。徵比錢穀。不煩鞭箠。能如期如額卽止。編審十年里排。不設公正。主戶役。客戶貼。銷其貧無衣食者。使無困卽止。監司臺使者至。不浚民膏血以飾廚傳。供帳第不失禮。不得罪卽止。士大夫往來獻酬。不令喜。不令怒卽止。文學孝秀。季有試。月有會。爲程其秩。文高下。使虛往實歸卽止。漕粟官民屯。悉貯於倉。粟糶雜。實在民耗。抑勒實在軍。不分左右袒。軍與民兩平則止。其他縣尉而下。肅括惟謹。無敢輕用非刑者。輕繫囹圄者。輕出白票市物。及勾攝人者。而上下晏如矣。會見公兩年以

來。有片紙隻艇。下村落乎。有胥隸徵索。豚蹄斗酒乎。有累日積旬。匍匐訟庭乎。有破碎大家乎。有械縛單戶乎。有宵人奸顰笑乎。有博徒囂飲。惡少年舞于市乎。有子襟私請恩澤乎。有兵將訴餉非時乎。上官以峻檄下。公勿怖。顯要以甘言嘗。公勿受。吾愛我鼎。吾用我法。操真實心。行真實事。而青邑號稱治平。且以其暇修樓櫓。葺橋梁。以及海忠介祠。又以其暇撰史論。搜剔古人之心腸。以洗開士子之眼目。公精神何其整暇。而青邑之元氣。何其休養而生息也。以青邑醴泉治狀。合爲卓異。誰不以銓曹臺省望公。而公竟擢刑曹去。公論爲憤懣不平。而公功名甚淡。意色甚夷。顧瞻邑士民號啼攀戀之情。獨有不忍遽釋然于懷者。而青士民豈能頃刻遂釋公哉。公溯行之日。不取青緡一錢一練。至貧不能治裝。老稚嘖嘖奇之。及聞其尊人爲繕郎。董兩宮之役。所省金錢一百五十三萬餘。特與執政中貴挺左其官。而乃知公之宦不求捷徑。廉不市清名。蓋本之鳳山先生家教然也。故樂而記諸能言之石。以志去思。并以爲後之司土者告焉。

晚香堂

三五八

眉公先生晚香堂小品卷之十九終

眉公先生晚香堂小品 卷之二十

雲間陳繼儒著

祭文

祭荆石王相公文

古云千人諾諾。一士謬謬。自余事公。而始味此語之無忤。憶當乙酉。公批余文。疑有仙骨。恨羽毛之尙薄。時與辰玉同應南舉。同罷公車。辰玉有志于再戰。而余則決意乎蓬蒿。丙戌。辰玉別予入都。予裂青衿而招之。云。盍歸乎來。相與逍遙。從楊許于碧落。公聞而笑。是子也不鳴不舞。無乃類羊公之鶴。戊子。領解。辰玉向亨。余遁自若。既而辰玉且譽且誅。且戰且却。乃寄書戲余爲李文靖。而公亦嘆余之不爲名縛。辛丑。辰玉上第。馳詔故鄉。金羈玉絡。公也笑迎。幸衣鉢之有托。何期冢孫云亡。辰玉病劇。種種衰相。如青天之忽散爲冰霰。而春花之竟隕爲秋籜。晚而司馬再相。召命入洛。人以爲慶。予以爲愕。未幾不祥之事。與不解之詬。遂彌天而大作。昔者登龍。今者羅雀。余再詣門。慰公寂寞。餘波及之。幾不免就就之饑噉。然而心本無他。豪傑所覺。積霧浮陰。漸解漸駁。而公已騎箕尾。而游冥漠。嗚呼痛哉。公忠孝簡于帝心。羽翼定于儲幄。社稷大計。非山澤之所能圖度。

獨其門。甚。知。之。金。室。無。姬。貳。之。樂。不。市。恩。不。修。鄰。不。人。才。牢。籠。不。名。譽。雕。琢。殘。花。數。畦。枯。棊。數。着。公。自。諒。機。心。機。事。之。盡。忘。人。亦。訝。世。情。世。法。之。太。略。而。不。知。者。猶。猜。其。退。而。營。進。坦。而。藏。鏗。老。而。強。飯。病。而。不。藥。及。今。蓋。棺。而。果。信。公。邯。鄲。之。夢。絕。不。及。于。平。津。之。閣。嗚。呼。冤。哉。嗚。呼。痛。哉。夫。老。臣。心。迹。不。明。猶。望。有。朝。議。之。是。非。如。昨。是。非。不。明。猶。望。有。常。情。之。恩。怨。如。昨。恩。怨。不。明。猶。望。有。天。道。之。善。惡。報。應。如。昨。今。天。以。摧。殘。人。以。詭。譎。門。祚。凋。謝。子。孫。單。弱。三。者。一。無。憑。焉。豈。月。盈。必。虧。果。碩。必。剝。咄。不。共。笑。齒。不。並。角。即。公。且。不。能。逃。盛。衰。之。數。而。幽。明。古。今。原。如。此。之。混。沌。而。舛。錯。者。耶。帝。閭。茫。茫。坐。視。爲。虐。鬼。神。憤。憤。似。復。相。謔。物。情。三。變。劫。運。五。濁。夫。何。言。哉。不。如。夜。壑。尙。饜。

### 祭三高士文

辛丑歲三月十六日。橋李人宋旭。支杖來自天馬山之東麓。同里人宋茂觀。陳繼儒。衲子蓮如慧解。摘溪毛。沽村醪。并陳所藏廉夫鐵冠。拜奠于三高先生之墓。曰。嗚呼。衆慕纍纍。壘山塞谷。先生之宮。尙衛樵牧。來奠一觴。春草空綠。異代知己。慰而幽獨。

### 祭馮烈婦文

余拜橋李丁烈婦墓。歸甫小憩。讀易而客復有以新豐馮烈婦事報者。余曰。此一部咸恆易也。夫易之咸。而必繼之以恆者。何也。咸爲艮兌。少男少女。夫婦之卦也。故恆之六二。恆其德貞。婦人吉。夫子凶。象曰。婦人吉。一而終也。夫夫婦偕老。最爲吉祥善事。若馮烈婦二十二而自縊殉夫。忍言吉哉。余曰。此正易之所謂恆也。忠



孝節義。乃人道中之風雷。何地蔑有。烈婦不幸而得恆之正耳。烈婦嫁裔道貧且病。且就殉。非夫子凶乎。夫死於萬曆丁未五月壬申。而張氏就義於六月辛丑。從一而終。非恆其德貞乎。烈婦一死。而郡人奔走告駭。以爲奇。非震雷象乎。邑大夫與鄉衮孝秀。爭爲文若詩誄之。而遠近賢媛。聞之咸感心動矣。非巽風象乎。雷則震動一時。而風則巽入百世。雷風變而恆道成矣。非吉乎。嗚呼。此馮氏一部咸恆卦也。吾曹終日講易。而不知有心易。易乃在婦人女子。可愧也。夫。可愧也。夫。尙饗。

### 祭餓死張烈婦文

維萬曆歲次丁未。朔日癸亥。謹以首陽之薇。娥江之水。致祭於明故張烈婦陳氏之靈曰。吾聞古之節婦。或尅面引鏡。或撻耳握刀。或割髮表心。或截鼻見旨。非外迫豪強。則內迫父母耳。張茂才彌留之際。烈婦以節許之。父母不忍傷烈婦心。愍然以白頭守節許烈婦矣。豈不能須臾忍。而竟死耶。夫程嬰未死。以趙氏有朔在。張世傑陸秀夫未死。以宋氏有帝昺在。今烈婦誰倚乎。有孤則保孤爲重。孤無可立。則殉夫爲重。等死耳。溺死畏死排牆死。盜賊毒蛇猛獸死。五日不汗死。七日不穀死。詎若烈婦今日之死爲快哉。村嫗灶婢。以緩死勸節婦。此若以蘇屬國。洪忠宣勸人。夫屬國十九年而歸漢。忠宣十八年而歸宋。要自有天幸。不當與人臣道也。藉令數年之內。不幸以他故死。即不忍爲逆劉豫所留。亦將爲降李陵所笑。文信國被執。就義稍緩。太學生王炎午作生祭文以速之。謄寫百篇。榜之水陸通衢曰。丞相欠一死耳。今烈婦飲毒飲金。糲之絕粒。必從張生地下。而後已。既不覲蘇屬國。洪忠宣之生還。又不待王炎午之生祭。則烈婦之死。加忠臣一等矣。一死而後不辱張。

氏婦一死而後不辱陳氏女一死而九峯若首陽三御若娥江使見者心膽皆慄談者齒舌俱香感激義烈椒  
羹一觴非止爲閨閻勸蓋將廉頑起懦告諸男子慎無負七尺之鬚眉而蔑百代之綱常也嗚呼哀哉尙饗

再祭張烈婦文

嗚呼伯夷薇仲子李蘇武雪豈不矯矯絕粒哉然而夷也猶寄命于薇也仲也猶寄命于李也武也猶寄  
命于雪也且武則胡婦爲之左右仲有辟疆夷有叔齊夫婦兄弟一鼓一舞烈婦然獨身而已有勸生無勸  
死則烈婦之不食殉夫又非伯夷以下諸君子可以同日論也嗚呼奇哉嗚呼痛哉尙饗

祭橋李丁烈婦文

余讀嘉興柳志志節婦僅兩人耳蓋嘆而悲之夫禮義之鄉度必有奇節而委巷窶人婦或閭史不記國  
史不書武廬表墓闕如也人固有幸不幸哉丁烈婦端平巷中窶人婦也夫亡葬火烈婦年十七投燭者三父  
母掖之堅不死數日翁與姑將強嫁之烈婦伏刀自剄不死傅以藥手擊之不死皮肉綴附一絲許號哭震裂  
喉斷竟死矣嗚呼異哉方烈婦之死也翁姑駭而走有小姑來視屍鄰里父母築其髮屍上椎訾之不聽出業  
訟之官天暑烈婦不得斂吾友賀伯闇聞而義焉身詣巷中問其事核爲解諭呼翁姑來釋小姑去凡紀綱  
櫛櫛幕旒悉無憾郡邑長與士大夫爭爲文以祭且釀金卜壤葬之烈婦非特身名不辱且不朽矣夫橋李自  
二百年來節婦湮滅不勝數丁烈婦年甚少家甚貧一時老稚奔走告語郡邑士大夫哀輓而表章之者獨甚  
著人真有幸有不幸哉語云無言不讎無德不報烈婦其何以報鄉之人大抵愚夫愚婦之死生如飄風游塵

何關聚散。惟節義之精靈英爽。非歿爲神明。則轉爲男子。將無驅厲鬼。吞妖魅。以清此一方民。不可知。將無再卅更生爲孝子忠臣。湯火唯命。不可知。將無生他方。吏于故鄉。爲監司郡邑長。整齊綱常。捍恤災患。如同室之救。不可知。嗚呼。是皆爾丁烈婦死後之實也。雖然。西子沼吳。隨范大夫。買臣妻去。更嫁閭吏。構李至今。羞稱之。有丁烈婦慷慨殺身以張越勁。則烈婦之報構李多矣。且以丁烈婦之故里中聚談。或旁引某婦某女。或嫁或未嫁。或死或尙未死。或不及旌。或待旌。或貧賤格不得旌者。縷縷追述其年歲日月里居。并及其父母夫之姓名。宛如昨日事。一丁烈婦死。而衆貞女烈婦皆生。則烈婦之報構李又多矣。豈必微靈于烈婦之身后哉。嗚呼。深閨寡婦。拭淚而施簪珥。立朝大臣。易姓而拖青紫。下玷丹書。上汗青史。彼何人哉。死而死矣。嗚呼尙饗。

### 祭陸君羽文

既托戒僧。虔作佛事。以資冥福。復設素祭清酌。爲位而哭。告于明故文素先生君羽陸兄之靈曰。嗚呼。君勿其遂已耶。當君羽病時。則賴長公飲哺護將。執手殷勤。當其歿時。則賴長公紀綱後事。含斂構衾。當其藁葬。則賴長公鼓吹旛旌。辭別國門。傷哉。吾曹病不藥。死不臨。除夕之辰。又不能素車白馬。爲君執紼而前行。嗚呼痛哉。君相岸偉。修髯便腹。貴宜過族。而報不餽讀。君度遲緩。落落穆穆。老宜後富。而壽不登六。三戰三北。家無脫粟。一字一絹。沒無尺幅。人孰無死。奪君太酷。人孰無死。出君太速。骨雖薦出。血猶附肉。族不及送。友不及哭。嗚呼痛哉。傷心慘目。君病瞑眩。兒死勿知。君若有知。當覓見兒。夜臺寂寞。或哭或悲。其今存者。君可勿思。君羽孝友。吾曹所師。惟伯氏在。衣之食之。惟伯氏在。教之訓之。吾曹友生。愛何能爲。生死訣絕。盡此一卮。

祭潘司空文

具區天目。孕爲巨公。吳興甲閱。唯潘司空。司空治河。萬派朝宗。水走獐龍。堤亘長虹。文圭不錫。赤舌相攻。凡三十載。埋沒膚功。孫曰容靜。年少英雄。爲祖暴寃。公論合從。原官全典。錫自九重。胼胝之勞。勒于鼎鐘。是容靜者。實推功首。伊誰哺之。產自吳母。吳裔冢卿。爲潘室婦。見素大人。則惟德耦。刀尺莛莛。齏鹽井臼。尊章上食。賓祭縮酒。檢括諸姬。部署家口。衆云母師。衆云畏友。大人倚之。如左右手。國香入夢。容靜代昌。服官鞶帶。世目麟鳳。伯非已出。愛等珪璋。且撫且教。無少低昂。兩雄玉立。肯構肯堂。大夫雖病。神氣殊強。書千萬卷。家八百桑。山圍別墅。花滿新莊。出則陶輿。入則稽槍。顧謂孺人。晚樂未央。何期青鳥。迎歸帝鄉。某也聞訃。驚悼傍徨。欲操誄詞。稽首靈傍。二豎爲虐。伏枕支床。頃聞訛語。沸于探湯。吳興之市。不可以航。乃遣一介。薦此名香。寒雲凍月。淚滴爲霜。尙饗。

祭震野楊公文(代)

吳俗滔滔。江河斯決。中砥流波。仗我先哲。巍然二老。公與安節。袁公星隕。公若曉月。皤皤黃髮。是咨是疇。遜髦于荒。執政之羞。束帛干旌。我徂維求。三事夙夜。竚公莊猷。公亦幡然。爲余強起。司馬人龍。旋還故里。屢詔不赴。眉壽燕喜。古吳得歲。歲曰庚子。公躋大耋。上賜杖几。使者在門。酌酒及醴。獻老乞言。三祝而起。德薰鄙吝。身繫安危。衣冠劍佩。照耀里衢。香山洛社。舍公誰歸。粉榆相望。余擬肩隨。方春壽公。曾致厥辭。酌以大斗。化而爲箕。人生實難。慶弔須臾。嗚呼哀哉。居鄉畏壘。居官去思。慎履無咎。清德可師。興言及此。能不傷悲。朝樂輟奏。

市杵罷飲。國論私情。老淚如絲。度耶緝耶。宜配公祠。尙饗。

### 祭黃葵陽少宗伯文（代）

歲在戊子。北闈掄秀。命公典考。英雄入彀。先子見材。忝在舉首。衆喜得人。籍籍額手。識者謂公。諸葛之稱。無重輕。太尉之祖。無左右。而彈者謂宰相有兒。將無澹臺善徑。子羔善竇。遂以激不測之天威。而雷霆轟擊之太驟。先文肅日辯且救。請試請覆。維時郎官之巡徼森嚴。臺省之身目輻輳。先子臨文。搖筆而就。銳若新硎。捷如宿構。鏘金不成。完璧依舊。至是都人士始服主司之至公。而公亦頓洗向來之浮詬。抗疏歸來。自安枕漱。久奪鳳凰之池。懶學魚龍之鬪。荏苒十年。乃屆辛丑。先子叨大廷之一鳴。未審公亦與聞乎九原否。頃者黃門次公。慷慨陳奏。溫旨諭公。所舉非謬。位進秩宗。贈卹孔厚。發天子之賜金。肅有司之籩豆。涸巷傾城。攜老扶幼。肩摩聚觀。快未曾有。龍章者穹碑。馬鬣者故阜。冥冥夜臺。煌煌畫繡。此雖仗孝子之上書。實則逢聖明之在宥。山峙水流。天高地厚。追昔感今。淚滴石透。嗚呼。公也騎箕而上天。先子亦排空而化斗。痛矣夫。伯牙與子期俱亡。已矣夫。伯樂與騏驥皆朽。獨有身後百年之定評。差可開眼前一時之笑口。靈爽如生。歆此杯酒。

### 祭范象先文

嗚呼。文正忠宣之裔。凡五百年而發于光祿公兄弟。光祿之後。惟學憲長白公與兄耳。兄少孤。依母于陸中丞外家。長白敬事丘嫂。每見兄秀外慧中。奇愛之。奇憐之。恩斯勤斯。日望其長成。以慰母心。以報父兄于地下。已長白公就贅吳門徐氏。轉隨而北。余附書老蒼頭名秀者。視之燕邸。頗聊蕭不得意。余與兄語狀。兄尚少。

默然傷懷。俛而泣下。已開策名賢能書。則喜見眉睫。舞蹈不自支。又得乙未南宮之報。則典質書畫。買舟載牲。醴告墓。醉數日而歸。曰。某笈笈孺子。叔氏實父我。實師我。自今以後。脫有不給。與意外不虞。決不忍又手坐視。置范家一塊肉也。然兄自此愈恬和。愈檢括。進未嘗造請有司。而退亦未嘗得罪于閭師三老。鄉先達尊。慈母性嚴下。呵冒交集。摘之蹠則蹠。賜之杖則杖。兄涕泣受之。不敢出挺語辯也。卽有田廬橐裝。獨私諸愛女。兄談笑應之。不敢苛碎窮詰也。猝遇緩急。兄問之質庫。又轉而問之債家。黽勉有無。不秋毫怨對也。已尊慈棄杯棬。則拮据治喪。上狀請旌母節。當事者疏聞于朝。表厥宅里。又行求善地。徙笏林墓而合葬之。其所費雜沓不貲。而兄亦蕭然四壁矣。賴長白公憫其孝且賢。授之廩。授之田。授之歲餼。舉爲義莊主奉。而兄不以此自潤。且不欲屑屑苟且負叔氏恩。修忠烈祠。修石湖文穆公祠。以長白公增助義田五百畝。建學憲祠。又會托余請之孺初毛公。刻文正集。刻忠宣集。毛公之去郡也。則徵余去思文。勒之穹碑。以酬表張之德。又刻文正公手書伯夷頌。爲玉暎堂帖。以永其傳。其種種行事。急先務。知大體。可謂范氏之功臣。而不意兄之遂病不起也。兄移居吳門。某嘗勸之曰。願兄以忠厚培祖德。以寬大調人心。兄唯唯謝教。而長白公亦愛兄憐兄更甚。瓜葛相依。肺腑相附。今中道舍之而去。有杯酒誰與驩。有心曲誰與謀。有啼笑痛癢誰與語。有巨細應酬誰與任。有桑榆晚景誰與娛。兄瞑乎。不瞑乎。兄欲修范氏譜。刻石湖集。未就。長君未冠婚。未成立。學憲藍田之胎八月矣。行且得雄。而兄未及與湯餅之會。兄瞑乎。不瞑乎。若夫視錢財如糞土。視屋廬如傳舍。少無覬于尊慈。長無覬于叔氏。赤然一身。拍手一笑。卽有後事。後人學憲首肯之心志之矣。兄何必悒悒于九泉哉。某故遣某兒再拜而告之。吾

兄行將爲兄作傳。以不寢死生彌留之託。尙其歆承。引我卮酒。

### 祭汪侍峰文

語曰。言無不酬。德無不報。此言人不相負也。又曰。天道無親。常與善人。此言天不相負也。公客居吾松三十餘年。人有以緩急告者。告無不諾。諾無不應。應無不滿。願而去。如叩鐘必鳴。呼谷必應。不責券。不紀姓名。歲月久。則并其子母錢。俱化爲子虛矣。公不得索之。故所貸者。貸者唯唯。詣門則闈人辭。遇諸塗。則障扇避。甚有當面若不相識。明知公之蕭條旅食。出不能具舟車。歸不能見妻子。而無意還楚弓。完趙璧。如故也。吾嘗聞一二縉紳。負公至千金。以宦貧不能償。身死不得償。其不貧不死者。似宜無辭以謝公。而無意還楚弓。完趙璧。如故也。公以此身家懸磬。進退觸藩。隱憂煎其中。窘迫攻其外。交游笑其旁。而病且歿矣。歿之日。一棺戢身。六親無倚。徒寄空櫬于郊墟曠野。榛莽破寺之傍。嗚呼。人負公耶。公負人耶。公負天耶。天負公耶。公雖不言。諸君寧能無愧于胸中。公雖不起。諸君何以他日相見于地下。此余所以感慨唏噓。具壺漿率子弟而哭之。匪獨爲公哀。且哀吾松之交情太薄。而取與之太不分明也。嗚呼痛哉。尙饗。

晚香堂

三六八

眉公先生晚香堂小品卷之二十終



# 眉公先生晚香堂小品

卷之二十一

雲間陳繼儒著

疏

## 天馬山修塔疏

天馬山塔現一現于辛亥之四月一現于乙卯年之六月九日或現三四塔或現兩塔或旁翼小塔。樞斗欄楯光明色相種種映發于烟霄中遠近道俗見者幾千萬指奔走駭嘆以爲奇瑞。父老曰此古塔重修之兆也。由天馬至張黃門墓不二里閣中有金山師六時諷誦法華經不輟。余指曰塔之現得無爲是乎。多寶佛誓願十方國土有說法華經者我之塔廟爲聽是經故現其前。今天馬塔已作證明矣。師云老僧不敢當。但願端坐塔下專諷法華衆檀施舍一切不問塔成乃下山耳。圓智寺大寧海淨踴躍請曰若是二某請助之。因乞疏。眉公居士問曰塔有功德乎。居士曰阿育王造塔八萬四千今有十九塔在震旦國中。明州其一也。治故塔者生白身天其身鮮白入珊瑚林。掃塔者生意燥天其身淨潔猶如明鏡。去塔中草木者生光晉天衆寶宮殿光明晃昱不可計量。以花香供塔者生兜率天。諸毛孔有旃檀香具三明六通及八解脫道。嚴供養塔廟壽一百

五歲道卓建塔。三龍護之。拾得龍毛。長三尺許。修空慧寺塔。有金襴相對。修檀臺山古塔。有古窰熟甑三十餘所。臨黃塔。有水底蓮花。彌滿三日。長于塔。有石匣中爪髮。髮引旋拳如螺。雍州塔。有夜雨寶屑天花。芭蕉樓欄。皆滿。魏州塔。有降金銀花。小者如火精。大者如榆莢。靈鷲寺塔。有羣燕共啣綉像。智門寺塔。有神龜黑蜂。連理木。甘露降。閑居寺塔。有白雲如大蝶。色似青琉璃。翱翔而下。栖巖寺塔。有火照二百里。遠望者皆言燒山。鳳泉寺塔。有基石漸變。盡如水晶。其他病者能起。癩也能行。瞽者能視。鼻不聞香者得聞香氣。諸凡功德。載在佛藏中。具難爲諸君悉之。特以衆生心量狹。聞見窄。未能透入不可思議中。故疑信各半。施與慳亦各半耳。若不信者。請展法華多寶品。一熟讀之。更不信者。請更問天馬山。前後老稚。曾見辛亥乙卯年間。虛空現塔否。

### 小崑山重建浮屠疏

九峯自天目發源。而小崑山爲第一峯處。蓋天目之脈始露。由此起一伏。自千將遞及于北固而首尾盡矣。堪輿家請九峯固龍也。其龍南窟海。而北宅泖。而龍首故不可無角。蓋一郡之文明皆係焉。小崑山自唐宋皆有浮屠。至隆慶時始廢。今寺僧寂光。欲重建以復舊勝。山在郡治乾隅。乾峯立而天門開。豈獨建赤霞之標。橫白霓之氣哉。余以僧是舉甚鉅。頗艱之。而僧謂童子聚沙成塔。談笑兒戲。皆有勝因。阿育浮屠未立。其下遂聞鐘磬音。今崑山固其時也。于是因其請倡之。以作天人觀。

### 修李塔匯鐘樓疏

松郡方塔。瑞光發現。多與李塔匯寶塔。空中交映。如青白兩虹。父老兒童皆見之。今歲庚戌。郡邑大夫以

方塔居巽方。命僧重修。而李塔之寶塔。亦復更新。此一奇也。李塔舊名延壽禪寺。里錢氏捨地。蓋始於宋嘉定六年。易額。則同知新昌州錢大信有記。蓋始於元至大中。凡四百餘載。而漸庵錢公。與子太史機山。倡修塔寺。又皆錢姓。此二奇也。傳明二禪師師弟。師建超果。弟子建延壽。今超果王伯符爲政。而青蓮居士助之。延壽錢太史父子爲政。而裕湖郡守佐之。皆煥然一新。頓復舊觀。隱若兄弟名刹矣。此三奇也。三奇符合。天人協贊。獨李塔匯鐘樓。且垂剝矣。寺僧界虛。發大誓願。願支此樓。并鑄法鐘。度于閣上。夫天有號。震以雷霆。佛有號。震以鑄鐘。非特宜警警惰。且于西方金位。有虛空傳響。金白水清之吉祥寓焉。此堪輿家之微旨。而寺僧之力請于檀那者。其以是夫。往歲饑。郡邑設粥局于樓下。雲來朱君實司之。克殫厥心。所活以萬計。有紫芝二十餘本。羅生階除。說者謂此寺當興。雲來旣已成進士。願祖佛地。而錢公又前爲之倡。諸善信起而應之。不日有朱薨碧瓦。聲出雲烟林樾間者。必左偏之鐘樓也。樓成當做金輪僧故事。吟嘯此間。得有佳句。喜極撞鐘。界虛上人。其容我否。

### 朱鍊師募請道藏疏

余從弇洲諸孫授經。勅園丁日進道藏一函讀之。凡三年稍竟。其中符籙科儀烹煉居半。而兵法醫方老莊易。僅得十之三。若天文星緯皆稱是。語錄稍稍而已。大都佛藏五千四十八卷。多而汰之者也。道藏五千四十八卷。少而附之者也。其爲幽祕巨麗等也。余每欲山中結樓。分爲三楹。中庑儒書。旁列二藏。恨家貧不能具。而鍊師朱玉陽。亦將縛茆溪上。募請道家言。諷讀展禮。吾友周公美實贊輔之。昔王右軍謝靈運。許旌陽楊

義共締碧落之游。所書黃庭陰符。爲歷代所寶。若淵明之於陸修靜。子瞻之於葆光。倪元鎮之於張伯雨。麈尾杖頭。皆山澤逍遙之游。長生難老之事。今世爲浮屠禍福所劫。不復向玉宸案前。禮一瓣香。至問其絳簡綠字。都付之亡是公。卽有舊藏。非餽老蠹。則轉授酒家。唐告身僅博一醉而已。余以爲釋道宜並扶。不當有左右袒。若使各募法寶。焚香披玩。雖不敢希冲舉飛拔之術。然清虛靖深。以無欲治心。以無事治國。抑亦有識度者之所不能廢也。公美今之王謝楊許也。試以齒牙間片語作刀圭。雲霄笙鶴。去人不遠矣。

遷三茅真君文疏

余嘗厭世俗喧沓。每欲黃冠白璧。相與蜉蝣于沙青水碧之間。招柳絲之丈人。呼桃花之漁父。爛醉寒霜。踏歌明月。豈不甚快。願言斯盟。同志者寡。每思古人如茅仲初兄弟。舉家修煉。共入名山。句曲青松。華陽瑤草。至今有丹壚泉井。及遺像存焉。四方士女。願匍匐而從于茅峯之鬢者。至今如鴈行蟻附也。道里頗遙。水陸跋涉。貧士或困于餼糧。老人至艱于杖屨。往往臥對白雲。空占紫氣而已。今城中舊有真君法堂。在廟中之東廡。金銀黃碧。宛然茅峯之像。雖天池一隅。不足當地肺之諸勝。四方長者若欲瞻謁祈禱。則不必擊漿牽車。從事數百里之外。而此固可一褰衣相就也。但像居樓下。所處卑曩。而四方賢豪。扶短筇。著高屐。以登斯樓者。每爲悚顏禁足而返。故道士龔君。欲徙而上之。仰簪星辰。俯瞰城闕。浮埃不到。聖馭可招。庶几所謂神仙好樓居者耶。不然。溷處上尊。罪垢不小。旣非龔君奉傳香火之意。亦非諸長者永壽祈福之初心也。况龔君修髯玉骨。有山猿野鶴之致。又余之所雅信。而許與之爲雲朋霞友者。是以喜助其事。而願樂爲之疏。

### 重修馬耆寺疏

經有六波羅密。而布施居其一。經云。施一椽一棟。皆能長養功德。滋培福慧。吾松珠林寶刹。相錯如綉。然皆蹲峙闌闌。枕臥田野。不便游覽。馬耆倚城東之勝。自古衲老宿。往往挂錫于此。四方白衣居士。亦無不攜瓢捉笠。負琴挾杖。以從事焉。寺門清幽。溪樹層映。而殿廡廊屋之下。暮鴉灌木。秋幘燈火。非空非色。與水田城草。低回上下。蓋闌闌田野之勝。合併四出。若爲茲寺左提而右挈之者。今瓦落石圯。鼠號鳥啼。世尊菩薩。俱爲墮甕。吾黨幸生閻浮。若能喜捨一絲一粟。無論他生廣種福田。卽今日所以護持棲葺之意。亦可謂載錫之光矣。

### 馬耆寺募化月米疏

馬耆爲古刹。佛事極盛。兩年歲儉。僧貧。雖鼓鐘香火。未嘗斷絕。然綉幡寶座之間。往往鳥啼鼠立矣。茲者悟空上人。愍然悲涕。思欲一振祖家之式微。而以主持自領。曰。願得居士長者。歲給米一石。月支米一斗。其不能者。歲給五斗。月支五升矣。月支一斗。則一日所施捨者。不過三合三勺耳。月支五升。則一日所施捨者。不過一合六勺半耳。歲總之。月分之。出之不驟。納之不驚。與之不吝。取之不貪。庶乎其可以久長也。今人修福禳災。日屠牛羊。猶狗之毛血。以佞淫祀之饑鬼。雖床頭甕盎中。一二殘粟。亦傾盡無餘者。孰若轉而禮佛禮僧。香花燈燭常饒。三寶冥福往來。定然不可思議矣。且城市赴應僧。多茹葷飲酒。而馬耆自尊宿。以至小沙彌。皆清淨齋素。衆皆見之。然則長者今日之舉。亦非唐捐功德也。語曰。請自隗始。

### 題泊如上人疏

洞庭諸峯在震澤中。微烟空水。如在世外。故真人隱士。往往息躬于此。自泊如上衲。爲東湖住持。勤修爲衆。面墅種花。洗石延客。四方名僧。聞而游焉。每每結夏過臘。至有老不出山者。顧山中課橙橘。辦櫻笋爲稅。不能聚穫儲粟。作客僧供。不得不仰藉四方長者。余貧亦撥斗盎鼠餘之糧。應之。但恐他日扁舟出胥口。訪之鷗背鷺頂之間。却又分諸僧數日供矣。如何如何。

婁江報本寺塑西方景疏

余聞雲棲老人淨土之說。曰。人生有識神。因有識業。有識業。因有行業。有行業。因有因果。欲臻三淨。先除六塵。欲種八德。先消五惡。欲消五凶。先懺地獄。欲懺地獄。先修西方。此理確然。無可疑者。報本寺僧永齡。夙有戒行。緇俗皈依。今于本寺西南舊址。重建大殿。塑西方景。使善者頓生信心。塑十王像。使惡者頓改舊習。卽此一念。非目連地獄不空。不顯成佛者耶。高皇帝云。佛說因果。所以助帝王刑賞之不及。此殿是已。遠近檀那。幸相與助成之。

募寫華嚴尊經疏

南禪了因上人。發大弘願。願沐心手。親書華嚴八十一卷。以三載竣業。昔人以佛寶難遇。剝皮爲紙。折骨爲筆。不恤身命。願畢此念。今上人以龍藏之文。欲募寫以鎮山門。以希開悟。則諸長者爲之左右。使紙墨應手。如水映月。如鏡應象。可知也。因地下種。累劫不差。世世生生。同轉法輪。游華嚴海矣。第居士尙有一問。禿管未握。文彩未彰處。從何下手。速道。速道。

眉公先生晚香堂小品卷之二十二

雲間陳繼儒著

題跋

牡丹亭題詞

吾朝楊用修長於論詞而不嫻於造曲。徐天池四聲猿能排突元人。長於北而又不長于南。獨湯臨川最稱當行本色。以花間幽囀之餘彩。翬爲牡丹亭。則翻空轉換極矣。一經王山陰批評。撥動齷齪之根塵。提出傀儡之啼笑。關漢卿高則誠。曾遇如此知音否。張新建相國嘗語湯臨川云。以君之辨才。握麈而登臬比。何渠出濂洛關閩下。而逗漏於碧簫紅牙隊間。將無爲青青子衿所笑。臨川曰。某與吾師終日共講學。而人不解也。師講性。某講情。張公無以應。夫乾坤首載乎易。鄭衛不刪於詩。非情也乎哉。不若臨川老人。括男女之思。而托之於夢。夢覺索夢。夢不可得。則至人與愚人同矣。情覺索情。情不可得。則太上與吾輩同矣。化夢還覺。化情歸性。雖善談名理者。其孰能與于斯。張長公次公曰。善不作此觀。大丈夫七尺腰領。畢竟褫殺五慾囊中。臨川有靈。未免叫屈。

花史題詞

吾家田舍。在十字水中。數重花外。設土剗竹床。及三教書。除見道人外。皆無益也。獨生負花癖。每當二分前後。日遣平頭長鬚。移花種之。犯風露。廢櫛沐。客笑曰。眉道人命帶桃花。余笑曰。乃花帶駟馬星耳。幽居無事。欲輯花史。傳示子孫。而不意吾友王仲遜先之。其所撰花史二十四卷。皆古人韻事。當與農書種樹書竝傳。讀此史者。老于花中。可以長世。披荆春礫。灌溉培植。皆有法度。可以經世。謝卿相灌園。又可以避世。可以玩世也。但飛而食肉者。不略譜此味耳。

情種題詞

甬東王先生有言。文莫妙於天。其靈在空。其韻在雪。其變幻不可測。在雲。余謂青城之巔。雪可萬年者。凝而作絳。黃海之雲。可籠而贈客。則人所狎而習視者。未始不至神也。師宜官謂能作文字者。方可縮而書蠻。觸之榜。是故古有應真。擲一瓢渡海。特游戲神通耳。余小友秋士。素有雋才。醉歌黃鶴。笑指青霞。風氣日上。足散人懷矣。騷屑諸吟。霏霏如珠玉屑。架學區中。飛才旬外。自當不受俗眼相白耳。願高樓懷怨。結眉表色。長門下泣。破粉成痕。秋士有情。亦何以消此恨也。情種一編。一語人情。萬劫不死。快讀臨風。碧雲明月。侵入人矣。暇則當以薛濤浣花紙。李廷珪鹿角喻礫。司空圖松枝筆。從石骨水湍。枯藤細草間。每書一則。應勝神仙。赤文綠字多也。秋士家海上。與三神山相近。他日臥百尺樓頭。挂瓢於樹。仰視飛雲。吹玉尺八。爲白雪之歌。墨光射斗。然後合掌向維摩居士。請爲秋士下一轉語。



### 素位編題詞

昔孟蜀李司馬。以牡丹數枝贈人。卽以興平酥同贈。曰。俟花殘。則以酥煎食之。無棄濃豔。予嘗笑此。乃閨中兒女子事。李君者。何至攀緣花神。越尸祝而代之耶。及讀今日素位編。所謂情之所鍾。正在我輩。二三子不忍棄其手澤。而相與阿私其所好。以公諸同調者。不得謂大夫越境。亦李司馬及春贈花之意耳。不然。以嘔心之語。委而付之于烏有先生。則十分春色。狼籍幾盡。惜哉。棄爾濃豔多矣。予不韻附庸。而與之游。二三子忘其醜也。而思以吾言爲冠。此何異翡翠之巢。其先甚高也。愛其羽毛。而巢數徙。毛更佳。則巢更下。諸君之羽毛美矣。余之文其徙而下乎。

### 題顧仲方詞

顧仲方先生。以雕龍綉虎之才。入爲鳳閣侍從。長安諸薦紳。咸束錦交先生。片言片楮。往往爲寶。時因杯酒間。忽動鄉國之想。乃請作江南春樂府。使一片燕塵頓豁。而身游于小桃弱柳隊中。至于詠物閨情。各抒才韻。繪擬所至。生氣湊合。可以奪化工之權。結思人之涕。蓋出其餘膏剩馥。伊能鼓吹詞場。遞傳千古。譜風流者。舍仲方吾誰與歸。吾謂此曲。當以司空圖松枝筆。李廷珪豹囊墨。及薛濤五色雲錦箋。各書數通。以佐花月。而又令綠珠雪兒。從步絲幃後。醉拍紫玉板唱之。則一字一絹可也。

### 題永康十景畫冊

余嘗欲紙衣鐵杖。訪包羽明於永康。羽明寄書止余曰。僕吏隱此中。三十年心腸面目如故。且與陳使君

有函蓋之合。道人安穩無恙。無煩渡江。使君明如鏡。介如石。清如水。穀登而訟稀。士馴而民靖。古人有詩云。縣官無一事。蝴蝶飛上堦。使君近之矣。生平鮮他嗜。偶逗空青翠。微中獨往。獨來獨歌。獨嘯。似欲遐鶩。鶩蹕而夫者。無奈爲職業所束。則掉頭轉睫。無一日不在塵。背鳥毳上也。羽明乃徵名手。摹繪永康十景。以贈使君。使君試一展玩之。不杖不屐。入桃花壁。不舟不車。入青松廬。不瓢不碗。飛瀑濺巢。不絲不肉。啼鳥滿屋。蓋寸管方幅間。全領烟霞。平分風月。勝於坐馳。臥遊遠矣。昔子瞻謂斬黃之閒多異人。其最所心折者。無若方山子陳季常。每相見岐亭時。多和汗字詩。季常遂爲戒殺。里人化之。至有不食肉者。今羽明夙具素心。而使君復歌惠政。今之永康。其卽昔日之岐亭耶。羽明曰。余何敢望坡仙。若陳使君。當是季常復生。真所謂斬黃異人也。置之佳山水中。不愧矣。

題高保山詩畫冊

黃大夫佐松郡三載餘。將吏士民畏而懷之。躡蹠卓異聲爲諸侯冠。而公時時笑曰。吾飽此中尊鱸。輒思故鄉薇蕨不置。蓋吾與太史兄。非特昆弟。實兩道伴也。倘得反初服。相與飲泉於亭中。習靜於軒上。或召故時父老。于水雲深處。榕可蔭。荔可食。芙蓉藕花。可紉而佩。其他一切譽誹苑枯。笑啼嗔喜。悉付之塞翁之馬。漆園之蝶而已。兄負聖賢豪傑之略。度不堅臥此中。而吾且代兄灌園。姑私一壑以自祕。如否否者。青松白石且閔而嘲我。至是仲冬。始慨然挂冠歸矣。當路慰留數四。士紳攀輓者。相屬於道。清風高尚。當于傳賀監中求之。而公又得異人。祕傳長生之術。從此不爐不扇。吐納數年。則高保山又如崆峒箕穎。並傳於後世。其爲騷人墨客

所傳詠。尙不止此也。故題其後以送之。

### 題瑤池春永帖

鄉賢翁新宇先生。以循吏封配楊氏爲安人。蓋都水郎南濱公之女。魏國公之女甥。名士孝直之母也。治家課子。極有德音。癸亥七旬。遠近牛酒羔鴈填戶外。堅謝不納。而紳裾以詩歌庀觴者。則命小史錄而藏焉。是帖所以刻也。吾郡未有創者。創自薛更生始。余謂是帖宜屬衛夫人書。捉美人金錯刀。劒織女支機石。麻姑煖酒。董雙成炙玉笙而歌之。乃大快。孝直曰。某姆氏何敢望此。諸公詩擲地皆有金石聲。奏之安人。傳之子姓。足稱翁氏天球河圖矣。敢不稽首以拜不交之賜。

### 岐陽志跋

唐之家法。掃地盡矣。若岐陽公主。豈非一枝獨秀者乎。昔高祖有十九女。太宗二十女。高宗三女。中宗八女。睿宗十女。玄宗二十八女。肅宗七女。德宗十女。順宗十一女。憲宗十九女。穆宗八女。敬宗三女。文宗四女。武宗宣宗皆七女。懿宗一女。其間下降再降者。凡二十七。三降者三。宜城公主。降武崇訓。後降武延秀。三降裴巽。興信公主。降裴垵。後降裴穎。三降楊敷。寧國公主。降鄭巽。後降回紇可汗。三降薛康衡。其可笑一也。杜荷誅。城陽公主。改配薛瓘。太宗使卜之。卜人曰。南火俱食。始則同榮。末亦雙瘁。晝日合昏。禮則終吉。馬周諫曰。臣聞朝謁以朝。思相戒也。講習以晝。思相成也。燕飲以昃。思相歡也。婚合以夜。思相親也。是以上下有成。內外有規。動息有時。吉凶有儀。今陛下欲謀其始。而亂其紀。不可爲也。太宗從其言。瓘後日死於房州。與公主雙柩齊引而

還。夫馬周不爭以主之更嫁。而區區爭晝夜之間以爲禮。其可笑二也。太平公主。武氏所生也。儀鳳中。吐蕃請主下嫁。主乃築真宮。如方士薰戒。以拒和親。久之。主衣紫袍玉帶。折上巾。具粉礪。歌舞帝前。帝及后大笑曰。兒不爲武官。何遽爾。主曰。以賜駙馬可乎。帝識其意。擇薛紹尙之。紹死。更嫁武承嗣。會承嗣小疾。罷婚。后乃殺武攸暨。妻以配主。其可笑三也。安樂公主。嘗自作詔。箝其前。請帝署可。又請爲皇太女。與太平等七公主。竝開府。而主府官屬尤甚。皆降墨勅。斜封授官。其可笑四也。公主入道者。如華陽。如尋陽。如平恩。如邵陽。如永嘉。如永安。如義興。如義昌。如金仙。如玉真。如壽春。如萬安。皆出爲女道士。其可笑五也。公主和蕃。置府官屬。准親王例。仍鑄司印一面。賜之。又徹御仗之半。送之。甚則於章敬寺前立班。儀衛甚盛。仍令京兆府。權置公主幕次。暫住受百僚謁。士女傾城觀焉。當是時。如金城公主。出降吐蕃。特改始平縣爲金城縣。又改地爲鳳臺鄉。悵別里。情意悽惋。道路飲泣。天子何樂而公卿賦詩。以寵其行。其可笑六也。大長公主。自蕃京。以迴紇背叛。恩德侵軼。邊陲。於光順門內。脫去簪珥。變服請罪。然後對見。廷臣無識。詫爲盛事。忭賀踴躍。宣付史館。其可笑七也。公主下嫁舅姑。反拜。而婦不答。縣主壻出。受外官。縣主不得偕行。永和以後。奉爲常例。其可笑八也。公主薨。駙馬執三年喪。京兆尹請建公主祠堂。其可笑九也。公主上表稱妾李。其可笑十也。嗚呼。唐之亡也。晚矣哉。武墨猖狂。蓋公主家風釀成之耳。余故書岐陽志後。使讀者一併按焉。

## 花史跋

有野趣而不知樂者。樵牧是也。有果嶽而不及嘗者。菜傭牙販是也。有花木而不能享者。口口貴人是也。

古之名賢。獨淵明寄興。往往在桑麻松口田野籬落之間。東坡好種植。能手接花果。此得之性生。不可得而強也。強之雖授以花史。將艷然擲而去之。若果性近而復好焉。請相與偃曝林間。諦看花開花落。便與千萬年興亡盛衰之轍何異。雖謂二十一史。盡在左編一史中可也。

### 跋鄧文潔錄華嚴記語

全信自心自佛。不於心外別求。是爲真修。以此度衆生。各信自心自佛。不於心外別修。是爲真度。請問真者何佛。修者何人。求者何物。度者何人。試向父母未生前。胞胎未立。姓氏未安時。比向何處修。何處求。却說甚真不真也。陳眉公曰。請以生從何來。死從何去。日夜疑作一團。橫天塞地。如子胥報仇。如仲尼聞韶。專心一路。食息無暇。覺此心與境。永不相離。如鳥投林。如魚緣水。試觀生時有夢。定知死後輪迴。此理無憑。全憑了念。如此人天眼目。榜樣分明。規繩具在。放杖入門。又增一段光彩也。

### 題玄宰書養生論卷

玄宰書養生論。多帶楮河南。楊凝式筆意。與東坡別一門庭。東坡數寫數本。今不盡傳。人間所見。乃贈羅浮導師者。意其人亦山澤列仙之流也。延伯磊落奇男子。近聞結廬廬山。所談皆不死無生之學。卽石髓石室書。神明且當授之。何況此卷。稽叔夜謂神仙稟之自然。非積學所得。似於此道。猶有望崖之嘆。余每云。英雄退步卽神仙。似此不過吾曹等閑事。延伯真其人也。

### 題周僕射像

太常寅陽徐公。既爲名卿。旋念親老。上書還里中。晏坐焚香。絕不問戶外事。客有見嬖者。夷然不以屑意。曰。伯仁有言。此中空洞無物。足容卿輩數百人。因繪伯仁像。懸之齋中。而公意更有廣于顛者。曰。天下大矣。自古賢愚貴賤。其一時相去若甚。退而轉睫彈指之間。往往皆化爲飄風游塵。而不可得。夫至於不可得。而後知曩者經營較量。恩仇嗔喜。孰非夢中分別影事哉。此適足以資達人之喙。矇耳。且天下亦何所許分別也。造化之理。有桃李則必有莢莢。有鳳麟則必有梟獍。有五色卿雲。則必有十日黃霧。有君子則必有小人。如欲人擲而事汰之。無論支離窘束。勢且至于困而不可繼。而于雅量母乃傷乎。故子輿氏之三自反。真不如顏子之一不較。若顛之僅容數百人。抑又狹矣。太常爲語余者如此。公性質淡泊。與物無競。操不繫之舟。策獨後之馬。終日與人交。見者不知其爲太常。且不知其爲盛德有道長者也。公爲文貞冢孫。文貞歷事兩朝。前分宜而容其濁。後新鄭而容其橫。皆休休以度勝者。而公薰習祖德爲最深。故生平未嘗設谿谷町畦之行。以加人。而人亦不忍以機智欺公。凡世之一切賢愚順逆。飄焉野馬之觸于前。海鷗蘋葉之適相浮游。而莫之涉也。夫容人者。有機心。則爲範圍。有傲心。則爲不恭。惟處之以無我。而應之以無所事。斯非太常之容德歟。太常清譽滿朝。天下莫不拭公一出。以拓文貞未竟之緒。則東坡所謂此中空洞原無物。何止容卿數百人。太常公足當矣。于是題數語于僕射像以歸之。而述公之志如此。

跋乞松詩

西生上人乞松詩。自法相至玉岑山門。補松二三里耳。吾嘗訪西生於法相小軒。修竹萬个。青入簡編。今

又栽松夾道。使人曳筇行歌。入門看竹。出門看松。此一段蕭洒風光。皆從西生筆頭上乞來。吾嘗聞之。無松種松。有松護松。松如新嬰兒。我如醉盤湯餅客。詩則錦棚繡褱。吉祥賀章也。誓令此松稗且長。長且壯。壯且作垂髫翁。共作歲寒老友。當自今日始。西生試以吾言求之。必有爲十八公作大喜捨。大護法者。請鋤破白雲以待之。

### 汪次公傳跋

今海內好言任俠。而新安爲甚。捐金赴然諾。自其風氣然也。余謂俠客如雷霆。惟善人君子如和風甘雨。其次公之謂哉。次公冥行紀于上帝。後福種于後人。夫豈沾沾市德市名者。有俠客。可以醫鄉愿之媚態。有善人君子。又可以醫俠客之雄心。此玄宰喜爲次公作傳。非獨爲汪氏。其救世之意深矣。

### 題五會圖跋

癸丑四月。讀書東洞庭之翠峯山居。得良友二。則王參父明高兄弟。松影泉聲間。以香茗消之。一日出此五會圖相眎。余檢得元美可寢。吳中往哲像贊。辱蓮儒書之。以補五圖之後。夫同官之忌。往往出于同鄉。其生也與魍魎爭光。其沒也與草木同腐。何如五先生以勳德名位。全始全終。則平日道義切磋之助也。參父兄弟每訪余。所談皆先世家。垂百年餘。而文恪題名記若新。若他素封子弟袖中之簡。能辦此一蠹楮否。若參甫兄弟。真可謂王謝舊家。家雖貧。出入必借。其篤尙友于。可想見文恪之門風耳。

### 題董宗伯手書家告跋

宋制告與勅多兼給。高宗詔文武官自大夫正任觀察以上始命辭給告。餘則令吏具抄降勅而已。唐最重告命。開元二十三年加皇子榮王以下官。詔張九齡蕭嵩等十三人就集賢院。人書一通以進。三相各賜絹三百疋。餘官二百疋。其愛重如此。顏魯公太子少師。依前充禮儀使勅牒。及父惟貞賸告。皆公自書。不他屬也。太宗伯文宰董公。德首四科。學綜六藝。神考拔之中祕。光廟擢之講帷。今皇帝追念甘盤。累登禁近。八座正席。三代疏榮。雅知譽命之方新。猶歎遁思之甚久。歷按差次。遷除告勅。其升沉歲月。大約可觀矣。公七十一時。手書數通。用以發皇祖德。對揚王麻。而冢孫貢士庭則請礪石而傳之。此公碑版中第一烜赫之書也。昔包宗禮藏熙陵告詞。則孝肅公十五代孫。歐陽齊藏慶歷知諫院官告。則文忠公十四代孫。今庭能流通見在之祖跡。不待數世。而家謨國寶。煥然揭日月而行。聲價幾與顏魯公自書告等。豈必商伯乙鼎。周淮父鹵。乃足以傳之無窮哉。賢者必有後。庭之謂矣。

題談箋

成化間。上海有彝庵談公。晚年號壑翁。官至少司空。有子曰東石公。與陸子淵齊名。同文衡山。辭以疾不仕。居家著作甚富。耽翰墨。自造側理。海內名爲談箋。其孫華峯。尙能守其祕傳。變化數種。研光膩膚。學士大夫購之。卽澄心堂無以過也。華峯自幼戒殺。誦太上篇。夢神人摩頂曰。汝事親孝。立心忠正。加壽二紀。與余交。愿恪有古格。近刻海漚堂。乃公手摹成帖。吾友玄宰。數與談道云。

跋姚平仲小傳



人不得道。生老病死。四字關。誰能透過。獨美人名將。老病之狀。尤爲可憐。夫紅顏化爲白髮。虎頭健兒。化爲雞皮老翁。亦復何樂。西子入五湖。姚平仲入青城山。他年未必不死。直是不見末后一段醜境耳。故曰。神龍使人見首而不見尾。

### 跋節傳後

忠孝節義。人道之大綱。半李有斷指投棺之節母。比泛常家兒不同。臥薪嘗膽。斷齏書粥。一日是兩日。顯親揚名。乃半李事也。

### 題卷

溫飛卿本名岐。宰相彥博裔。好爲側豔。弦吹之音。湖陰曲。已刻金荃集中。此卷是其手筆。有字學。又有字性。直與顏平原抗行。當時溫李齊名。法書苑載山義不載飛卿。幸不幸如此。善卷汪先生攜此見示。始知老米晚年一變宿習。蓋發脈于溫飛卿也。

### 附引

### 快雪堂歲寒盟引

沈司馬純父先生。檢衛人綱。代興藝苑。文章節義。朝野震之。解印歸田。性耽蕭閒。樂愷墳素。以刷心魂。居貞晚節。等護頭目。德矩彌峻。風日自娛。式閭者有行庭之疑。披帷者多望崖之嘆。僅所綴接。則二三文人逸民而已。丙午窮冬。款余密坐。寢弛兵衛。心清妙香。先生酌以醴酒。佐之永言。非軌正警督之世。則死生蹇譽之故。

回環感愴。主客泫然。既而一變成驩。三爵復又。先集維霰。月不留行。亦忘其冬之夜也。先生笑曰。昔人論詩如玉盒。甬蓋須勻。五言律詩。如四十賢人。着一屠沽不得。此會庶幾近之。蓋記姓氏。以矢勿諼。爾時司馬倡韻。屬和則方叔殷子。叔祥姚子。子逸王子。孟璜項子。而陳子繼儒。以浪士來自華亭。

重慶堂詩冊小引代

蓋聞高堂九仞。曾參北向而悲。積粟萬鍾。季路南游永嘆。人間之三樂罕遇。故子姓之重慶難遭。有美德門。適臻純嘏。其唯舒公乎。在中丞鐵豸觸邪。秋霜飛于白簡。在太史金馬待詔。宵火借以青藜。丹轂朱輪。鳳陛兩代。華簪素髮。燕喜一堂。紫霧飛來。五福已備。青芝至止。萬壽無疆。惟子及孫。披宮衣而綵戲。還童反老。漉內酒以傳觴。山有不周。獨陟壽山之峻嶺。世多缺陷。早逢住世之完人。鑄藥千年。將與猿鶴竝算。享親五鼎。豈曰鷄豚逮存者耶。是舉也。子公爲家祥。于帝爲國瑞。于太平爲盛事。于後世爲美談。諸兄弟欲頌畫錦之榮。子大夫宜借夜光之重。某欣逢異數。叨遇通家。剪葉分珪。未及挹漿于北斗。夢花無筆。恐難賡韻于南山。故敢邀珠玉于大方。載歌載咏。不揣置糝糝于首簡。播之揚之。

詩集小引

癸丑春王十日。看梅玄基。回楫虎丘。讀諸君子聯舟泛月之詠。使人眉舞肉飛。聲斯氣奪。俊矣快矣。險矣奇矣。當其靜也。閒門古寺。甘冷淡于折脚鐺中。及其動也。豔舞清歌。逞豪華于點頭山下。天涯兄弟。偶墜有情之癡。執苑風流。不讓無遮之會。昔人云。名士堵立。紅粧成輪。置筆投杯。殆欲仙去。其諸君子之會乎。眉道人豔

而傳之載詩如左。

眉公先生晚香堂小品卷之二十二終

晚  
香  
堂

晚  
香  
堂

# 眉公先生晚香堂小品

卷之二十三

雲間陳繼儒著

書

## 答錢抑之太史

自吾兄天蜚。輒有索書求見者。弟堅謝之。山澤老人不當通輦下之信。非分當爾。卽懶性亦爾爾也。賴兄眼中。有照膽鏡。手中有降魔杵。然多一事。不如少一事。多一客。不如少一客耳。承諭讀書無暇。此時豈能終日終夜。鑽破故紙堆中。嘗記得少謁徐文貞云。學而時習之。何義。對以不敢。文貞云。如國家有荒事。卽就荒時查考荒事。如有兵事。卽就兵時查考兵事。如有大禮大獄亦然。此真所謂時習也。至今佩服此言。受用不盡。又有因文見送者。如送贈河南撫按。何事是急。如送陝西撫按。何事是急。卽此類推。自然研究得切。考據得真。正如夏買葛。冬買裘。畢竟比平時買裘買葛不同。若國軸之變幻。家鄉之紛拏。且端坐冷眼觀之。俠客之不如英雄。英雄之不如聖賢者。英雄險而聖賢穩也。若置身靜穩中。卽鬼神造化奈何不得。况目前餘子哉。

與唐抑所太史

故鄉旱潦如循環然弟有幸得脫于玄武朱雀之腹異哉陳郎可謂入水不濡人火不焦矣但往歲禾頭短于鼻頸今年田壤斥如龜文東郭半頃不復如曩時以足下且有東方之飢而僕安得索侏儒之飽也息躬荒園隱居教授自是小河汾第以此身宅于貞人烈女之地未免按轡徐行不能恣縱耳老父明年七十矣欲徵兄之文爲壽弟涼德無他長顧我翁之婆娑鄉社晚年所甘含肉而饗是人所難今人浮慕足下之清華而笑吾黨之隱操請兄一言掃之足下文高獲選弟不心空及第乎足下歌朱鴈僕不盟白鷗乎足下擁天鹿著書弟不據虎皮談易乎足下侍玉皇案僕不禮綉佛齋乎足下披五色宮錦弟不掛四時霓衲乎足下高車僕不高枕乎足下千鍾五鼎春秋饋享僕不有緇豚之速親存乎與兄比權量力較雌對雄此足以壽我翁矣兄讀之得無擊卓噴飯笑我爲不知漢大也海孺君乃足下之故師伯子以三寸舌爲弟子師凜凜有志節今來矣仰視足下爲古人幸勿令此君炊玉餐桂因鬼見帝

上王相公救荒書

近來天變異常淫雨累月自五月端午前以今六月既望大浸稽天矣詢知父老言水潦之苦有甚于旱而今歲之水有甚于嘉靖四十年辛酉之時何者蘇松偏處東南地勢卑下號爲澤國旱尙可醫水則難療姑無論田事卽如旱魃之年屋廬不至塌毀圩岸不必增修雜作經營可以易米而食雜草伐木可以代薪而炊今則通市如何出門卽雨鄰里不相往來水火若或斷絕披箕戴笠備添衣食奔走之勞忍濕受飢漸釀疾病

死亡之禍。此水之害。所以甚于旱也。辛酉以前。催科尙緩。風俗尙儉。民戶尙實。水勢尙殺。今則朝廷之會計無年不增。閭閻之侈靡。無處不盛。百姓之財力。無日不消。風雨之惡聲。無刻不聞。此今日之水。有加于嘉靖四十年之時也。且此雨在七八月間。則稻穀漸實。可以擊舟楫而拾殘禾。此雨在三四月間。則秧苗未時。可以留工本而救餘喘。今不先不後。適值其時。即使天色漸晴。而苗根已腐矣。即欲播穀復政。而時氣又非矣。所恃者東鄉之花荳。花荳化爲朽枝矣。所恃者諸鄉之瓜菜。瓜菜沒于草莽矣。獨有提岸一事。男女老幼。以其日夜合併之力。或可恃爲僥倖數日之謀。而淫雨不休。泥土易敗。築于此。潰于彼矣。成于尺。敗于丈矣。况西北大風。不時起發。太湖蒼雪之水。滔滔東下。頃刻之間。頓至沒腫。則尙安有毫髮之望哉。京師財賦。仰給東南。蘇松小民。全仗耕織。如使旱潦節調。風雨時適。則百姓猶得偷其耒耜桔槔之暇。以從事于絲枲杼軸之間。今水變如此。舉家之中。非出厚田水。則守築河堤。赤足圻體。惟恐不及。尙有餘暇及紡績乎。紡績無暇。尙安從易薪米乎。薪米無所能出。坐而待死乎。死期將至。弱者不爲丐。強者不爲盜乎。盜賊四散。有司不三尺乎。三尺相約。進退皆死地耳。又安所他願乎。此言之可懼。可驚者也。爲今之計。聖君賢相。以蠲租爲第二義。而以賑貸爲第一策。則嗷嗷枵腹之徒。哀哀露處之衆。或可少恃以無恐。而勉強支吾。以俟朝廷破格之恩例耳。今先生手握調燮之權。耳熟桑梓之變。必至臥不貼席。食不知味。豈有以天下爲一家。而不以蘇松爲同室者哉。今兩臺具疏請題。其恩賜在聖君。而其調停委曲。則在閣下。若少緩時日。聖誕長封在邇。地方災異。疎不得上。如待聖誕開屆。而後發旨。則會計已定。民心愈急。恐非百萬生靈。所以千里而號于父母者也。某近投影鄉村。目擊斯苦。故無忘

忌諱爲先生陳之。幸急圖所以上挽天變而下救民窮者。幸甚。

上徐中丞救荒書

讀書山中。守分不敢輕謁。經月積雨。水沒秧苗。不獨爲生靈苦。而先爲司農苦。不暇爲司農苦。而先爲師臺苦。師臺當上下交迫之時。在飢民不能使之枵腹而飽。在主計又不能與之空口而爭。千難萬難。何可言喻。但水災實狀。已核見聞。而道路喧傳。又滿朝聽報災之疏。非止百姓望之。卽京師士大夫亦望之矣。不審師臺有荒疏見示否。向年吳中不熟。全恃湖廣江西。今一聞吳下水報。彼處先已遏糴。此販商之所以空返。而米價之所以日踴也。米踊則富者閉廩。只待價昂。貧者望門無從借貸。田主不肯出資本。以急救佃戶。佃戶亦不肯出死力。以車救田水。目前有民窮盜起之禍。患冬間又有以荒作熟之錢糧。將來更不知費老師幾斗心血耳。懇乞師臺行文江西湖廣及淮楊撫按。遏糴之禁一也。則吳越之米自賤。此通融救飢目前至急。第一先手也。師臺既有荒疏。又有隣省通糴文書。鬼神執簿而奏上帝。非太師母福壽之一助哉。但疾痛困苦之詞。描寫得十分着忙。僅博得廟堂五分動聽。况今視三十六年八九矣。師臺限田所以救未然。報荒所以救已然。想今日台慈必先有籲天之請。決不使昔人專美于前也。

復陶太守救荒書

伏承分賜冰俸。出自特典。感切莫知。願報目前百物踊貴。而米尤甚。大約禁搶第一。平價次之。蓋此曹胆不可使大手不可使滑。若始則搶店家。繼則及典戶。又繼則及縉紳。末流之漸。必至于此。此起于榜帖街衢。克



期聚衆。衆之所聚。勢難禁遏。遠近效尤。遂指以爲輿情。爲公憤。而實二三橫民。爲之首倡耳。往年董事。良可寒心。仗乞大張告示。專禁搶奪。則人情不至張皇。此近憂。亦遠慮也。又竊計松郡之人。鄉人耕種者居其七。經營生理者居其三。游手無賴者不及一分之半。若有田之家。照管佃戶。佃戶種田一畝者。借與工米五升。及冬同租還納。此皆舊例。原非創設。特以近日米貴。并工本亦不肯借。而緩急無可告。臺示曉諭。則佃戶可以藉口詣門。而田主可以委曲應付。是十分中之鄉人。已救七分。其餘經營生理者。不難生活也。又有各報積米大戶者。徒增刁民索詐之端。無益于事。吾松錢糧有官甲。爲貴者而設。有園戶爲富者而設。其田畝載在書冊。籍一可查。按冊有田千畝者。糶米一伯石。有田五百畝者。糶米五十石。平糶及于富貴大家。而不及零星碎戶。似亦法之可行。示之必從者也。又五月爲豐月。爲廬月。古人有洒掃園圃。洗滌枷扭者。伏乞行文三縣。清理獄囚。迭冊繳報。既可生全民命。又可挽回天和。亮台臺仁同覆載。必切如傷。謹此稽首以請。且復明問之及。

### 答嘉定胡中尊

頌歷知春。分俸知飽。蓋歲受明德者。兩度矣。引分山糶。不敢造謝。以溷庭鶴。乃蒙明府百冗中。猶記存布衣故人。此何等高誼也。貴治花租已荒。米價又踴。幸留朝天子轍。活此窮民。但彼處好訟好逋。古人有卽押告狀之人。先查錢糧完欠。然後准狀。此于催科之中。寓息訟之意。不知可行否。若吳淞者。蘇州諸邑之下流。松江諸邑之上流也。北曰婁江。南曰東江。卽黃浦。中曰吳淞江。三江敞口。以受西來太湖之水。使之入海。其形如乾卦三爻相似。今吳淞久涸。如乾少中爻。故蘇<sub>+</sub>上下二流。皆噴咽奔潰。而水患不可救矣。獨嘉定借流吳淞。不

惟病澇而且病旱。地方凋弊。實坐于此。今雖有開濬之議。而頗類無米之炊。仁人在上。何以策之。

答嘉善康中尊

不肖某諸生時爲公車詞賦所窺。今老矣。身心性命之根蒂。儻如也。獨利濟一念。似有微竅。每勸諸大家。置田贍族。積穀救荒。當戊申大浸。稽天嘗奉當事檄。分督煮糜。方四十里。頗覺沾洽。縣大夫至。老稚合掌謝。每人各散糧二斗。某曰。此糧雖到家。而未能到口。大夫曰。何故。某曰。尙欲負米贖取犁鋤農具耳。大夫不覺泫然淚下。郡縣儲畜以救飢民。縉紳儲族以救貧族。此利濟第一義。若蒙吳先生蕭結寒士耳。捐魚沼。縮口食。不得已而又出募穀之疏。此豈分毫有市義市民之心哉。無爲而爲。此心可以告祖宗。格上帝。而昌子孫矣。明公委題數言。喜躍不忍辭。非久呈稿請教。嘉善窪下。經旬霖雨。便成水災。防禦水災。無如修築低鄉圩岸。今農工未興。上乘天時。下乘地利。而明公時駕輕舟。往來督率。少借賞罰以示勸懲。而人和其備矣。圩岸爲本。積穀爲標。邑無流亡。官無逋賦。此又明公推廣蒙吳先生之意。自家而國者也。若芻蕘可採。亟賜舉行。第付之衙官衙役。則生事矣。請質于魏錢兩公。何如。

答朱平涵

明公澹泊寧靜。豈有意爲黑頭公。而中途被命。恩數非常。雖有兄弟手足之喪。宜效君臣腹心之報。例辭不允。迫斯可矣。國事如下碁。原無預策勝負之理。首揆正如當局。亞相正類旁觀。多言不可。坐觀成敗亦不可。惟擇其吃緊一着。最有關係者。略點示之。非特大服當局者之心。而碁有轉危爲安之處。此明公入相事也。明

公清如水。能洗刷世界。直如矢。能剖判世界。鄉愿求媚。不能媚難悅之君子。小人好動。不能動不爲己甚之仲尼。清到底。直到底。將來書帕之陋規。調停之故套。盡盡烈烈。洗刷剖判一番。以此報君父。報朋友。原還數十年前窮翰林本來面目。異日作史。與伯夷楊綰同傳。明公眞其人哉。某一聞台鉉之報。喜躍異常。自分布衣懸絕。不敢通稱賀書。乃明公先施札。勸勤下問于故人。此豈忍以世俗常情報者。故因明公之清風直道。而略申數語奉復。知不以山澤擯也。吳興妖言煽亂。精明搜討。不可無杜公。寬大收拾。不可無方公。水火相濟。甘苦一也。思老彈冠。不啻身承之。皈依甚切。想有別啓專謝。茲不敢贅。

### 答某經略

某屏跡空山。每讀經略疏牘。字字批點。行行尋繹。如秀才讀舉業相似。因嘆曰。天地千鑄百鍊。生得如此忠孝奇男子。有識者當仰承祖宗皇上德意。愛惜調護。以竟社稷之功。而摧殘不遺餘力。非特遼人哭。京師人哭。卽不肖老愚無知。爲飲泣不寐不食者數矣。古今負屈。無如岳少保。于少保。同時同志之友。誰肯慷慨論列。剖心瀝血以明之。直待鋒鏃平。議論定。恩典加。在國家會無分毫之益。而兩公已先受萬分之苦矣。天乎。豈獨一台臺困網羅哉。不死卽是君恩。人心卽是天意。伏願平氣慎言。靜需緩急宣召。更有進者。以素患難之學問。參了生死之工夫。四大非眞。寸陰可惜。福堂之內。恐不當作尋常擲過也。迂叟報知。不喜以兒女語進。別有手書清明曲一卷。附呈博笑。臨楮曷勝神馳之至。

### 與郁季雅

往別時。以爲復有竟歲之盟。忽得信。爲陳大夫掖之而去。丈夫鬚眉落地時。便以此身同長矢往矣。豈若鹿豕終日相聚。足下萬里之翻。而爲六月之息。長卿四壁。足下四壁都盡。便須尋一變更。雀之化蛤也。劍之化飛龍也。英雄雌伏。而化爲九天九地也。大都醢雞秋蟲。則終止饗灶間耳。足下之腹笥五經。乃竟老于蒯緱。不問陳大夫一吐氣。寧何之乎。且廣中雖古炎州。乃皇岡芙蓉。及九成臺。皆供足下落日長嘯。昔坡仙謫居彼中。身負瓦石。築居墅中。而足下讀書官署。卷灑隱几。不廢臥游。方之東坡。又得殊勝。且時以筆花。而吐池塘春草之句。卽瘴烟蠻霧。亦當爲足下一開滌耳。弟以野鷗之性。暫居人間。如寒蟬潛蟻相似。每思足下曠俗之歌。恨不能縮地徙山。與足下焚柏子。擎竹葉消之。適捧遠札。斐然復面。古詩憫美。具見記存。以足下一飄香。迎清風讀之。不覺煩暑之頓澆也。敬謝。承別論謹刺心腑。當爲足下圖之。使者督報良迫。未能賡和來美。愧與汗俱。

東項東齋

臺下暫返東山。朝常如沸。乃知評臣論。金人箴。當參而用之。中涓方取精于螭蚌。而言路猶角勝于蠻觸。非得臺下真君子者。以正直輔忠厚。以中立當雷同。滔滔東逝之波。孰挽之哉。某伏螻寒蟬。與世耗轉遯。且昔年佩服闈然之訓。輒欲山冠田衣。自放于松檉蘋鷗之末。以是感恩負知如臺下。未遑通尺。尺書。乃辱以千里而勤以翰言。可謂黼黻烟霞。丹青泉石。某何人斯。辱此非分。倘得藉邀寵靈。蠶鹽麥飯。不至作無父男子。便可酬報萬一鞭策之私。至于拂芸簡。登蘭臺。非特拙劣所不敢聞。抑亦北山猿鶴之所嘲也。新葺竹窗。試香啜墨。宛如對冰壺。使者倉皇。敬報空函。祇有慚絕。外偶錄鄙言一卷。敬呈台覽。伏惟進而教之。庶幾海內知王公大

人之于布衣。原有道義一脈耳。臨楮馳戀。

### 東頂楚東

初堅客戒。如棘藤護筍。正與韻士相隔絕。柳花如霰。鴛鴦倦飛。小閣褰帷。殘爐尙燼。此時恨不與吾丈太碧共之。二詩正如小兒塗鴉。不堪一笑。差有米家雲山。少能懺垢耳。詩懷奉將。比季雅作老僧見紅綃馬上俊少年也。并望轉致。

### 東米子華

前以一束生芻拜太夫人。前愧登堂之晚。后慚命駕之遲。乃四顧蕭然。苔花綉壁。落葉滿門。人爲酸鼻。顧弟且爲足下頓足加敬。古所謂蓬蒿三徑。居然名士風者。正爲足下發身。足下詩本性情。絕不作當今塗神畫鬼面目。乃就李不知有米先生何也。且無論足下。卽秋潭一沙彌。彥平方叔兩縫掖。俱寂寂如木鐘石鼓。大雅凋傷。烟霞冷落。一至于此。僕爲老親浮沈人間。既似在縲之鷹。復如鬪穴之鼠。思得清涼閒散如兄者。相與以一鉢米。一盃茗破之。亦了不可得。况海氛雜沓。吾輩泄泄與蜉蝣燕雀爭尺寸之安。何以堪之。

### 答楊侍御

計部文弱公入山見訪。言笑風度。宛然明公也。明發支字與幼度自上海至。相與袒坐老藤濃陰中。涼風豁達。快不可言。但恨團圍無多日耳。頃讀壙記哀詞。又悔小傳書寫未盡。然孤忠孤憤。現于筆端矣。文弱奉差南來。計欲少清一二以佐目前之急。第催督舊逋。理勢所不能辦也。手板折腰。體面所不肯徇也。駐劄地主。供

應所不樂留也。一味以虛套迎。以空冊送。大要內而戶兵。以頑鈍應經略。外而當事。以頑鈍應部差。如此情形。光景。使先太公有知。非大笑。則大哭。天下事莫可措手矣。奈何哉。奈何哉。

答錢仲舉

承寄麗隴集。友人索之如玉如穀。幸劉孟肩見貽二部。急者先應。而無奈其不給也。嘉貺忽至。大副所請。波斯胡已上珍珠船矣。尊集骨騰肉飽。采申英飛。出之以堂堂正正。運之以恠恠奇奇。無論智愚賢不肖。稽首龍門。皈依牛耳。其無思不服宜也。自來東事。改郡縣爲衛鎮。而遼始強。改海運爲折色。而遼始弱。今事難復。故實同創始。台臺披髮纓冠。以救鄉鄰之鬪。其愚不可及也。其功亦不可及也。且由此撤兵還洋。則沿海不至患空虛。停寢召募。則臨岐不生他變。大江南北。實陰庇之。豈特遼左一方。同免于噬臍燃眉而已哉。嘆服嘆服。若淮上總鎮。竊意仍宜添設。汰老弱。宿以重兵。革勳臣。練以名將。協董漕儲。彈壓首尾。此正與海運相爲表裏者。昔孫權渡遼伐敵。度視數千里地勢。直如一線。然今畫地而爲戰守。豈不爲英雄所笑。惟明公亟圖之。

答蕭戶部

堂上有二老。酌水戲花。膝下有兩雄。擊梨分棗。台臺得此三公不易矣。遼氣以後。羣少年游談無根。如淮南王言漢治則怒。言漢亂則喜。卽此風氣。其憂當更甚于建奴者。僕屏跡空山。彼一時也。不與聖賢講學。此一時也。不致豪傑談兵。寒灰無燄。凍鶴無聲。一味杜口杜門而已。玄宰近賞此言。盤礴如故。絕不以劫灰之事。着毫許胸中。餘無可爲明公道者。

答吳司理

台臺清真簡靜。事事古人。諸縫掖不敢輕投一趾。輕贄一文。蓋士風之正。實從明公指南始。某蟄藏螻伏。當引分守理。自屏于山澤草野之間。忽飛台札。折節下交。捧讀環回。愧汗浹下。嘗念古之隱者。非避跡夷門。則寄居梁廡。今不猖不狂。有澗面目。故扁舟裏納。投太湖山中者百日矣。復嶺千尋。怒濤百變。松深竹冷。聞寂無人。粗以澡雪悔尤。退臧浮氣。台臺比之徐南州。則俛首不敢置對矣。

與胡大參

往年避跡泖寺。青雀忽來。白鷗欲舞。竹林解帶。祇爲何人。旣清且和。先生眞振古之人豪也。比時冒風暑。不能追陪信宿。上談王伯。下商釣弋。匆匆挂帆。渺如河漢。每讀環山記。先生撫柯擊石。洗盞濯纓。不知誰惠誰魚。誰莊誰蝶。功名蟻戰。毀譽蜩鳴。博不得眞人北窗一夢矣。頃避暑東洞庭者二月餘。長松限日。飛瀑如雷。盧橘楊梅。餽輒數斗。恨不與先生共之。得教餉。極知垂念。雲賓霞友。不戒而孚。異日曳杖。卽不敢爲五可軒上客。亦許作吾家灌園老人否。

答孫子長先生

某遁荒以來。如桃蟲處桃。壤蟲處壤。不知天地日月。忽蒙明公。瑤札冰俸。自天而下。卽蒲團間。不覺心挑耳熱。願得一當神交。知已。第又恐涉于詞人游客。爲忍情而止。頃聞開原已陷。卽熊芝老便難下手。蓋北關之不併。賴開原爲擁護。開原之不破。賴鐵嶺李氏家丁爲之犄角。今李氏被疑。開原失守。將北關折入于奴。而東

西之虜合矣。如何如何。初清河撫順。特小堡耳。殘壞之後。本宜即時修築。多宿重兵。以示必不可再犯之勢。乃一味越境搗巢。不知貼防堅守。數萬之師。驅羊就虎。自古豈有如此廟謨。如此邊略也。即今奴貽朝鮮書。其計甚猾甚巧。聲言入犯。彼將自顧不暇。何暇顧我。我欲救之。則分中國之力。不救則分朝鮮之心。一紙書頗具無限痛痒。而我特泄泄然隨手而應。其何以濟。且大江以北。四月不雨。麥穗焦枯。漕船擁于滿寧上下。大兵之後。豈堪大荒。祖宗設立淮上總兵。居重御輕。控制南北。正如車中之輪。而不解事者。奏撤之。及今遵制添設。猶可爲中原他日緩急策應。浙中募兵。目前關係頗大。而招徠何法。安頓何地。督領何人。安家行糧何措。就中萬分調停。使此輩不聚不譁。使地方不驚不擾。非明公江左夷吾。又誰望哉。野老杞憂。臨楮不覺迂闊。

答聶巡漕

向來論人才。則分門別戶。論遼事。則掃穴犁庭。何意末流之弊。遂至于斯。明公非但飲醇酒。眞所謂憂心如醉也。僕妄意揣摩。天地好生。奴酋好殺。遼人附建州。則無命。入山海關。則無門。有不得不死守之勢。彼處山多田少。所掠金帛多而米鹽少。有不得不困之勢。若激遼人以護遼。款他虜以制虜。卽此便是省兵。卽此便是省餉。而豈必紛紛召募爲哉。近見浙兵五千。亦不過浙江百姓耳。安家有費。道路有費。若移此費加之遼東之土著。痛痒相關。呼吸相應。用親手護頭目。與借他手護頭目。孰便。孰不便乎。旣守遼陽。奴酋必且犯朝鮮。截海運以分我力。客兵千重而趨。宜置之天津。休其足力。不宜驅之出關。迫之血戰也。長公筆扛九鼎。目營九州。恨不相對雄談。以快彼我。



### 答王修微

空山中自修道人飛至。便成洞府。何必處處鸞鶴。山山蕙蘭。乃稱世外也。別時黯慘。使人不能返視。黃蘆白蒂。孤鴈巖霜。峭帆之下。幸爾無恙。昨夢秋月如規。游氛散盡。曉謂侍兒曰。此夢可祥。已得手書。追呼二三韻士視之。驚嘆其奇絕。天女散花。昔聞其語。今見其人矣。梅花爛熳。度在二月初旬。能舞棹諧此清諾否。先期一報。煮雪相待。衡門之下也。

### 與王東里

吳門遣使京口郵書。明公之于某。真切極矣。某非有胸無心者。實不勝知己之感。項開拂衣南歸。大爲嘆服。出則調朝廷父子兄弟之事。歸則調家庭父子兄弟之事。磊磊落落。忠孝兩全。真人間偉丈夫也。前讀尊疏。尊牘。袞袞數千言。此正論。此確論。此快論。此又至平至易之論。卽董狐吳兢。可以藉手執筆矣。明公欲以遼用遼爲正兵。以夷攻夷爲奇兵。反之則釀疆場敗亡之禍。外寢大兵。內寢大獄。邈之則養國家和平之福。夫言豈必多。仁人之言難耳。人豈必衆。仁者之勇難耳。某欲同思老來會。適遭次兒變。目疾又發。策之不前。謹將不腆以獻積忱。咫尺千里。會面何期。言之於悒。

### 答吳學道

頃沈錢塘以武舉錄見寄。讀台臺後序。反覆陰陽文武離合之間。英辨沸發。新藻羣飛。二百年來無此痛快大文字。此天人師語也。正與門生輩環回玩味。喜見鬚眉。而使者忽賚札。既叩門至。奇矣奇矣。十年知己。相

望三百里內。未通一書。乃蒙明公分俸于人。所不知之人。又推轂于人。所不知之地。誣飾蜚蜺。冀招神龍。非感死則慚死耳。往輩下有以實錄見挑者。謹謝之。云某不願與鄉袞叙爵。而願與鄉袞叙齒。不能修史。而喜勸諸君讀史。今通鑑多東高閣。故士子全無忠孝之根。水滸亂行肆中。故衣冠竊有猖狂之念。若使先試論策。而後試經。以此爲殿。最登陟。則彼將染指濡首于棘水紫陽。以漸及于二十一史。反杜撰爲體認。補空疎爲精實。撥邪蕩爲檢括。經正則庶民興。史透則名臣出。非仗大有力者。負之而趨哉。時事玄黃。殊駭觀聽。夫小人不與作緣。君子不爲已甚。何至掀翻震動。乃爾。要亦不讀黨綱傳。及元豐熙寧史書故也。明公以爲何如。拙稿荒政請裁。仇十州漢宮春曉一卷。奉展清玩。林梅已落。蘇柳未眠。函蓋之談。卜在何日。

答朱先生

雨歇欲放洞庭之棹。適接長箋。如快風走雲。先生胸次。何其浩浩落落也。知天之說。一時狂談。不意與知命尊旨正合。然知天之說。士大夫有安身立命者。皆能之。獨以知天爲知人作用。較是目前要着身。弟嘗謂臨事而懼。好謀而成。此成字正指行藏而言。行不成其行。藏不成其藏。爲不謀故也。不懼故也。堯舜之兢兢業業而謀者。有十六相。孔子之恂恂而謀者。有七十子。則行藏之局成矣。先生高臥風塵。正是此意。世間胆大脚忙之流。豈能測眞人之萬一哉。時方龍戰。非特飛見難。卽潛亦不易。徐文貞相公云。雨時便住晴時出。難道人謀不勝天。請以爲先生謀懼知命之助。文肅答顧涇老書。一味使氣。而辰玉大可笑。此坐不謀不懼故也。有戲代答書。望一示之。四字如命。忍媿塗抹。有試過奇文附上。偶藏丁南玄先生布袋佛。玄宰書老坡贊。適在行笥。奉

寄供養。一醜明月峯。對憨和尚大笑。尙覺世界猶寬也。

### 答李本甯

曩老先生杖國之年。欲擬一言奉祝。而繪天圖海。安所措思。以此逡巡。不敢作六合賦耳。若不肖螻蛄春。秋。何足當當世第一大人先生。置至六言。修至十二首。字字皆神龍領下珠。亦字字不肖賴上說也。不惟傳誦不已。貽示子孫。卽辛而掛名尊集中。千秋以下。羨慕不肖爲何如人。可謂真不朽矣。先此遡風。遙望百頓以謝。

### 答楊學臺

遼左之局大。約虜合則強。離則弱。合則守。離則戰。使之離。不使之合。則機括全乎在款他箇。以置建箇。楊經略曾爲遼道。萬歷二十二年間。李霖寔定武之役。斬獲頗多。楊亦與賞。大都戰非所長。款則素習。借關箇牽制此奴。未爲失策。如往年洮河事棘。議戰者譁然而起。鄭範溪經略西事。亦用此法。惟有羈縻虜王。以離火箇耳。今遼左撻伐。非出將帥。而出屬夷。在主帥不宜全掩爲己功。在廟堂亦宜徐責其後効。則兩得之矣。

### 答馮大參

得報後。日與友人遲候歸信。因伏几嘆曰。清風百世。直道三黜。固也。憐才如春風。拂面便消。忌才如嚴霜。一寒透骨信哉。玄宰度馮先生。脂車峭帆。行必接浙。某獨曰。先生嶽崎磊落人也。且以一官爲桑下宿。以一路佳山水爲籬下物。緊絆芒鞋。未知所至。度必不遂返里門。今果然矣。

### 答許無錫

梁武云。江南卑濕。四十早凋。當梅信更思入定耳。昨惠扇頭。詩畫雙絕。雙絕在深造。無一非古人。使君隱德甚多。此其一也。拙作數篇。請正。惠泉屢以口腹累人。幸在君子之交。不煩水懺。笑笑。

答李少參

某。蠖伏林澤間。惟孫登草衣。袁闕土室。差了半生。卽明公爲千秋循吏。苑中第一流人物。不敢逡巡求見。交遠游大。某實恥之。古人恥之。友人張博士歸。忽承雲天之翰。何從得此國士遇也。年已知命。無復世懷。台下乃以經世許之。正如土龍致雨。木鷲御風。祇增具眼人破顏微笑耳。以明公建節括蒼。問津名山。完厓山龍湫公案。亦是快事。第居恆陶輿不百里。管榻不十年。緊絆芒鞋。橫拖拄杖。未審勝緣。當在何日。

與沈懷槎

自武塘別後。無敢以尋常寒暄語奉候。正如野蔬山笋。不宜入長安天廚禁臠。非敢忘之也。雲間掌署。暫借鸞棲。乃檢押招攝。能使颯笑必愛。履屐相宜。古有清不律人。慎不傷體。勤不露才者。昔聞其語。今見其人。若懸銓曹一席地。以待賢者。天人交與。心口俱服。舍仁兄誰歸哉。弟五十矣。築壙九峯。世懷多絕。每當花香月白之時。策蹇刺舟。往來空青頑碧間。便可畢世。茲且大浸格天。無復着我嘯歌處。日杜門束肚。手一編從蠹魚乞殘飽耳。遼左之建夷陸梁。江南之財賦陸沉。轉旋隻手。全仰聖賢豪傑。未審邇來道體得如意否。小物克勤。小事糊塗。參而用之。非獨康濟一身。亦醫國祕方也。一笑。

上王相公

歲暮捧讀手翰。累累百言。計先生方在病牖中。何以得此。又辱訂以來歲之盟。若寬其罪過。而不忍絕之。門墻之外者。思之惑哉。以某之不肖。叨侍盛德之傍。兩年以來。教之誨之。飲之食之。亦已至矣。茲者惓惓相勉。又將使之左右朝夕焉。令郎名教中人也。高明直亮。竊嘗藉之以爲旃檀。而令郎亦集不肖以竹頭木屑之用。心相靡。氣相合也。辭之一字。亦何忍出口。顧不肖敢于方命者。亦自有說。念家貧不能養親。勢必藉館穀。然無事而食人之食。不無少慚。偶欲闕家塾。聚里中三四生徒爲黜口計。倘舉業之暇。若以禮義廉恥。互相堤撕。庶幾少存人道之一二。不肖生平恆心恆產。盡在此舉動。宛然村學究面目。老相公想噴飯滿案也。用此力辭。令郎長兄。并謝閣下之命。伏惟台慈。炤原。不勝惶恐。

### 與王岡伯

別後。不意雙履留滯吳江間。至今寺中琉璃光耿耿在目。秋來旱鬼相虐。泖河如盎甕之口。田禾半焦。活者皆鬻髮。頭陀髮鬚耳。王先生高臥不干人。只得仰餐明霞。苦食翠柏。若弟侏儒不能索飽。奈何。高什三篇。清風穆如。乃辱使者匍匐涸轍上來。啣感夙誼。皆歲寒霜色也。長公嘻嘻。顧自鷗鳥。次公婆娑。宛爾兜率。何時得嘯歌。傾我家釀。望之。

### 上楊學臺

某極蒙明公國士之遇。知己感恩。屈指無兩。自安山澤。不敢通京洛之書。唐突雲霄上袞。前者推轂海內名賢。即葑菲亦塵啓事。讀之感愧交集。不知老候生一腔熱血。何日酒報明公也。不肖買山穿礦。業十六年餘。

寧復有他念者。若鼓作聲價。借隱爲通。天曰忌盈。必罰之以奇禍。人情責備。必中之以奇讖。惟置之無咎無譽之地。處之不衫不履之間。則除受大人君子之洪恩多矣。

答趙同知

王公不下士久。不意于旄之重。紆訪委巷中。始知一線布衣。交尙在天壤。但無報知地。追憶老侯生。使人愧死。前偶登龍門。可羅雀。今征車前邁。行李蕭然。誰謂近世無范萊蕪。但無當路道眼人。格外物色之耳。承委四箴。四箋。遵命。塞白。某守硜硜匹夫之介。不敢通輦下書。見東里公。煩致相憶。餘容躬送。罄倒。

答某公

吳興新政。殊快人耳。眞所謂清不律人。慎不傷體。勤不露才。此得之士大夫往來之口甚眞。非阿也。忽承遠札。重以厚貺。詎意王公布衣。尙在天壤。可勝感切。貴治孤處一隅。目前當路之線素。新參之舉動。未必朝夕相聞。若以省城郡縣爲腹心。以健足偵探爲耳目。其間不至遲速異同。較是兩便。若要人有交際。不親不疎。巨室有疑獄。不動不變。賴神明照膽鏡中耳。

與某刑部

熱審有例。而寒審無例。饑寒交煎。斃者更速。若兄臺指寫獄囚之苦。特題一疎。遍行天下郡縣。爲朝廷助好生。爲子孫培福德。可乎。屠康僖刑恤一疏。至今布之令甲。在職言職。誰謂目前無好事。今人無古人也。

答沈雨若

吾兄公車之文。沉雄痛快。秀爽神奇。自是百發百中之文。願堅固此願。勿以多病疎。勿以多病厭。勿以詩歌詩人夾雜之。究竟脫此鐵担。可以揚眉千秋。若不肖瘦馬戀棧。饑鳥戀巢。終非大丈夫事。弟時調時局中交游。種種不一。惟有杜門杜口。就吉避凶。此味當與兄共之。

### 與莊五修

二十年不入京口。此行有二快事。一得米南宮自寫像。一得五修先生。先生微言蠕動。皆有德矩。弟之師。非弟之友也。前後兩度。夢中飲松葉酒。覺而忘之。不省何語。大都坐先生墜尾傍耳。家山多客多文。連履烏相嚙不放。小有勝情。天賜閒而不得真閒。吾曹求清而不得清。何日追隨先生支筇鶴林招隱間。飽吟細嚼。疲行硬坐。作個無事道人也。

### 答張高士

先郡丞以洞庭爲桐鄉。真千秋美談。三吳曠事。山中父老。宜建草堂以爲酌水薦蘋之所。今俎頭缺然。賴有高賢爲兩山祭酒。召公甘棠。孔明廟柏。不意一枝尙在人間。欽重。昨承早顧。適睡甘未起。不免帶吾家希夷餘習。長者不督過之。又以長歌見贈。獎許過情。汗且浹踵。遡風奏之。卽松濤瀑雪。亦當避此金石聲也。夕陽曳杖。來聽黃鸝。請手斟悟道泉。酌茗以謝。

### 答王季重

台臺麟鳳騶虞。自不必梟鳥豺豹相形。今而後知使君神明真父母也。義田一事。全賴四至刻圖。今士民

信服。而當路亦得藉此以杜好事之口。獨青谿一望亘浸。視三十六年。僅留尺許。米價未昂。而薪價真如桂矣。每爲台臺籌算出處。宜請養而遲補官。得雄以後。相時而飛。今蠅聲鳩眼。尙未寧帖。卽太公健飯。催督上車。可以長脆請也。不肖結夏太湖中洞庭。暑可避。而客不能避。卽客可避。而僧不能避。卽僧可避。而詩僧不能避。頃子桑上人遠顧。云與台下外形內心之交。其詩亦清快適爽。生平淡面鈍口。不解向人乞緣。茲以王使君如西竺。適軍多鳥。不惜定僧乞一羽一毛。然亦不敢望財施。惟以舌施耳。不肖五十外人。日求減塑。而四方以增塑求之。如何如何。幸有以教我。

與王季重

某循分守拙。時與樵童漁叟。混跡于山巔水涯。雖蒙明公士賜顧城居。僅一謁謝。逡巡而返。尙未登元禮之堂。識荊州之面也。歲時伏臆。屢蒙賜餼。而不肖落落如故者。猶謂父母孔邇。所以酬知報恩者有日。而今已矣。寸心未死。秃管尙在。雪讒理枉。豈後古人。自來螻屈而伸。鵬息而飛。非特造物之成就有機。卽聖賢之處困亦必有道。願明公勿介介胸中。則十五城九萬里故在也。

答丹陽王公

春雨連綿。弟言果驗。台臺加意于郵徒獄囚。衣糧種種。今肉食者。何嘗毫許念及此耶。明公眞所謂借官修行冥德矣。非特虛懷聽言。係一人知己之感也。臘雪盈尺。遣蝗無種。但恐春潦秋旱。尙煩杞憂耳。台從過敝郡。幸先期以報。移舟古松流水間。作片時圖畫中人何如。



### 答張太守

自婁江歸。知台臺勘災。登山不能。率先父老。一致壺漿。爲之悵然。秋風漸勁。饑寒相迫。未省部議何如。獨念報荒之時。不得不以熟作荒。派荒之時。又不得不以熟補荒。以華亭縣慨縣論之。宜以東南之熟。補西北之荒。以松江概府論之。宜以上海之熟。補青浦之荒。此全仰仁人公論。以先聲倡之耳。臺下捐羨金。祠烈女。又捐羨金救饑民。表風勸俗。捍患恤災。不獨倡義。更以訓廉。士民無不踴躍。

### 與福建南中丞

國朝社稷。臣推靖遠新建。皆由經略蠻夷起。紅夷跳梁。明公談笑迅掃之。全閩始有寧字。實與兩公鼎峙。而三監府程書。焉可誣也。某藉手一斂。以報神交。知己。視碑記。差覺加詳。野史之筆。卽國史。或有取徵焉。匪佞匪佞。近來人才偏枯于門戶。非名相不能善用衆。兵餉浪費于軍興。非名將不能善用寡。屈當代指。舍明公其誰。特山澤末敢深言耳。時事日異。月新。聞之可怖。若使去君子已甚之行。化小人未形之惡。何至披猖至此。向來當路諸公。不得不任其責也。

### 與徐朗倩

山嵐釀濕。賤目作苦。承良醫兩度見醫。何其垂念山澤癯。一至此也。老雨經旬。弟且不啻憂。而憂歲。吳淞不開。太湖之水。東下不洩。非止目前發杞之慮也。

### 答山陰王季重

明公孝友之性。通于神明。文武之才。可備緩急。曾與夏許二公言之。而今已矣。京中惟思老一入。幾類碩果。枚卜將近。指摘必多。弟願其對。不願其留矣。太公縮朒遲回。更番數四。始得報命。中間或有感慨時事之意。不知明公以爲何如。從來士大夫有螭蚌之形。則中官必收漁人之利。今手辣才滑。漸不可支。其根莖皆從庇護。汪文言而縉紳受禍至此。比之匪人。不亦傷乎。不有君子。其能國乎。可嘆可嘆。此時申屠蟠傳。不可不讀。想明公笑而領之矣。別論云云。大非本懷。弟答思老云。山澤之癯。與鄉衮敍齒。不與鄉衮敍爵。無以嚙鼠嚇也。繡佛一幅。白布衲二端。伴函。呵凍草草。

答張公

聽馬巡方。山岳搖動。而明公式。廬下榻。皆出意表。度外。今復遺賜別儀。綢繆宛轉。恩知實難。未審何日復作延津之合也。目今邊事。外呼而內不應。下呼而上不應。衆呼而獨不應。部事內呼而外不應。上呼而下不應。獨呼而衆不應。猶望官府調和。雨暘時若。庶幾可倖斯須之安。而加之以門戶堅牢。水災暴作。明公救滔天之橫流易。教無天之橫言難。燦金不靈。完壁如故。入水入火。入羣入行。操降魔杵。照胆鏡。以觀物情之變。明公眞神人也。

與楊淇園

某揣山澤不通輦下。王思老有手啓。則言明公與韓朱兩相公推轂不置。此某之大怖也。自古士大夫一歲九遷。七徵八辟。皆非盛世事。惟爲朝廷惜名器。爲言路慎考選。爲邊關節兵餉。此謀國之大者。而以不急之

事加于至不才之鄙人。人實有口。誰能扞之。願明公截斷衆流。速賜停寢。異日郡志中。留數行隱逸傳。以報明公。勝于纓綬多矣。上海某父母。慳慊廉明。百姓實受其福。通籍以後。未嘗呈身鄉裏。卓品可知。而某則謂宜一登楊夫子之龍門。有如物色鄉後進者。曰不識其人。猶可。曰不知其人。則疑矣。惟明公推愛而噓拂之。以爲衆正之倡。幸甚。

### 答吳道尊

遼東發難。貂參斷絕。何敢德問之京輦故人。忽承遠寄紫貂。適在山居賞雪。驚喜不自支。有客笑云。此更勝于豹席鹿裘。何以爲報。某啣而心識之。感切感切。茲讀素旻新集。才中宮商。奔應節數。精微豐辦。未見其倫。傳何疑矣。傳何疑矣。相不用衆而用強。將不用寡而用弱。至人之語。切中膏肓。今內操禍遠。內批禍速。若當事者。拚官拚命。以去就執正一番。此國家最上要着。第恐無此鐵漢耳。疾雷崩潰。時局可駭。革卦之後。繼以震。震卦之後。繼以艮。今不當艮而止乎。越中諸君。寧靜無動。寧憂無喜。可也。台臺以爲何如。知已實難。願言會晤。第明公門庭高峻。少所延納。若寘之塵尾之旁。但談風月。不及公事。硜硜亦或能之。無奈老馬何哉。容卜期以請。佳歷領訖。薄有報芹。慳托錢塘君奉致。惶恐惶恐。

### 答許惺老

舊淮撫蘇公。奏請回空倉。免守凍。淮兌雖出一時權宜。將恐爲永例。兩臺喻意。素公呈。不索公書。以公書不便入疏也。收兌之設。向來移軍以就倉。豈能裝米以就軍。但能管倉以內。豈能管倉以外。今收于倉而運之。

于淮是免役而兼北運之半矣。民弱軍強。有何法度可以彈壓。米多舡少。有何錢糧可以僱募。客船相戒不入。有何巧妙可以招徠。風波何以搭救。損壞何以抵償。守候何以脫卸。盤纏何以借貸。偷竊何以稽查。爭鬪何以排解。舟薄何以重載。重載何以過關。非惟糧長無此千手千眼。卽縣大夫亦不能人人遙制。有此千百億化身也。欲通反成擠軋。欲快反致羈遲。其大不便于漕者如此。惟有查回空。趕回空。不得隨處耽延。政作守凍。此撫遣官遣牌之事也。公中之公也。撥回空。不撥守凍。儘數先下。松江船到卽免。此朱雲老尅期尅限之事也。雖私亦公也。目今糧長之公呈上兩臺。士夫之公書致雲老。則事體直捷而委當矣。惟老先生裁之。

眉公先生晚香堂小品

卷之二十四

雲間陳繼儒著

志林

老子之徒

黃石公龐德公。老子之徒也。子房人傑也。黃石公以進履折之。曰。孺子可教。孔明臥龍也。每見龐德公拜于牀下。初不令止。仲尼聖人也。老子曰。子去子之驕氣。與子淫態。黃石公降一子房。而隱穀城。龐德公降一孔明。而隱鹿門。老子降一仲尼。而隱流沙。蓋名遂則身退矣。是射馬擒王之法也。故曰二公者。老子之徒也。

始皇收放

博浪一槌。張子房不必論。卽始皇大索十日卽止。亦自有英雄收放處。若使日日捕賊。終始不出。則秦天子與縣伯州尉何異。豈足稱聖人之威哉。茅山婁道人云。盧仝茶歌。飲到七椀。自然當有箇結局。不然。此詩無了期矣。始皇極兇悍人。却得此意。故其威不斃。

三事沒處法

唐元徵狀元云。今天下有三事沒處法。燕都中士大夫得病無良醫。秦晉人種田無時雨。三吳縉紳子弟讀書無家教。一味但靠天身。余因思無醫則保養。無雨則穿渠。無家教則慎擇交游。此便是沒處法中處法也。

### 立命之易

易之譖爻。安排一定而不可易。非易也。數也。觀其占之吉凶。而以時消息焉。此真易也。其理則在我者也。故善易者。求易之理于我。而不求易于數。理變而數亦與之俱變矣。此以義立命。而以人勝天之說也。

### 顏子身諷

顏子居陋巷。一簞食。一瓢飲。孔子賢之。非賢其安貧樂道也。安貧樂道。獨行苦節之士皆能之。何足以難顏子。顏子王佐才也。簞瓢陋巷中。却深藏一箇王佐。當是時。不特仲由子貢諸儕輩拉他不去。即其師孔子棲棲皇皇。何等急于救世。而顏子只是端居不動。而且有以身諷孔子之意。其後孔子倦于轍環。亦覺得陋巷的無此勞攘。厄于絕糧。亦覺得簞瓢的無此困頓。又其後。居夷浮海。畢竟無聊。原歸宿到蔬水曲肱地位。而後知顏子之早年道眼清微耳。所以有感而三歎其賢也。古人云。智與師齊。減師半德。智過于師。乃堪傳授。其顏氏之謂耶。故終日不違。不見他如愚。惟于簞瓢陋巷時味之。絕不露王佐伎倆。亦絕不露三十歲少年圭角。至此方見得顏子如愚氣象。

### 顏子餘氣所生

或曰。仁者壽。而顏子夭。何與。余答曰。顏子太老成。當三十之年。正當發散。而件件務在收斂。春行冬令。所

以早凋。又問曰：以顏子之賢，進無功業，退無著述，何與？余曰：張儀有云：蘇君之時，儀何敢言？况孔子在乎？誰然？春秋有孔子，是天地無限秀靈之氣，生他出來。山東一隅地，有幾許大，却又出一顏子，此應是餘氣所生也。餘氣豈能做得功業文章，總能做得，亦不過剩水殘山而已。故有堯舜之父，而遂有不肖之丹朱商均；有孔子之父，而遂有先卒之伯魚。大要坐在氣簿耳。惟文王父子最爲濟美，然管蔡之流言，武王之太白，周公之東征，皆無復淳氣之守。蓋大地既生文王，則餘子亦不免駁雜矣。况其他哉！大塊之上，必無嘉苗，松柏之下，必無茂草。顏孔同時，幸亦在此，不幸亦在此。

### 陪玉皇

東坡云上可以陪玉皇大帝，下可以陪卑田院乞兒，自以爲至矣。然尙不如至人之入鳥不亂行，入獸不亂羣者。入鳥不亂行，入獸不亂羣，此亦自以爲至矣。然又不如菩薩向異類中行，化度設法者。故鷄羣之雀，豈同大海之鵬，大海之鵬，豈望九霄之鳳。

### 謀臣如訟師

狡兔死，走狗烹，敵國破，謀臣亡，自古鮮有脫此局者。蓋亦有故。大抵謀臣中，王佐最少，雜伯者最多。陽施陰翕之謀，躡足附耳之態，一時雖若効忠，其君未有不貌屈而心醜之者。豈惟醜之，抑且懼之矣。富室之構訟也，誰恐訟師之不力也，及其勝也，惟恐訟師之不去也。重身返國子，犯曰：臣負羈綬，從君巡天下，臣之罪甚多矣。臣猶知之，而况君乎？請由此亡。范蠡之辭勾踐也，亦曰：主辱臣死，請從會稽之誅。二公之決于一去者，非獨

爲其君之慘刻。亦覺平日有自納敗闕處也。武侯處先後主。鄴侯處肅代。每事正而不譎。固由其天資粹美。心事純白。然早已算到此矣。故善謀國者。寧使人以正見。憚無使人以譎見猜。

管仲知鮑尤深

管仲嘗曰。吾始困時。與鮑叔買。分財利自多與。鮑叔不以我爲貪。知我貧也。吾嘗與鮑叔謀事而更窮困。鮑叔不以我爲愚。知時有利有不利也。吾嘗三仕三見逐。鮑叔不以我爲不肖。知我不遭時也。吾嘗三戰三走。鮑叔不以我爲怯。知我有老母也。公子糾敗。召忽死之。吾嘗幽囚受辱。鮑叔不以爲無恥。知我不著小節。而恥功名不顯于天下也。生我者父母。知我者鮑子也。管仲相。凡內修政事。外連諸侯。桓公必質之鮑叔。鮑叔曰。公必行夷吾之言。公乃行之。夫鮑叔之于管仲。不惟知之。又從而薦之。不惟薦之。又從而左右之。交游中感恩知己。孰有過于仲者。及仲寢疾。桓公往問之。曰。仲父不幸而不起此疾。彼政我將安移之。仲未對。公且問鮑叔。爲人對曰。鮑叔君子也。千乘之國。不以其道。予之不受也。雖然。其爲人好善而惡惡已甚。見一惡終身不忘。不可以爲政。鮑叔之待管仲如此。管仲之以待鮑叔如彼。正所以護鮑叔而短之。保鮑叔名令而也。世人但解鮑叔之知管仲。而不解管仲之尤知鮑叔。是兩人者。真相知也。曹參徵時。與蕭何善。及爲宰相。有隙。至何且死。推賢惟參。參聞之。亦告人趣治行。吾且入相。使者果召參。參去。屬其後相。悉遵何約束。無所變更。此二人。事雖與管仲相反。而其相知實相類。

管仲能不失國柄



張江陵以猛爲政。其後繼之者。劑猛而爲寬。數年以來。相權旁落。幾不復振。鮑叔一齊大夫。識見却甚高。其薦管仲也。曰。臣之所不如夷吾者。治國不夫其柄。只此一句。使得相天下的肯綮。門生問余曰。如何能不失國柄。余曰。劉先主托孤孔明曰。若其不才。君自取之。此言極可爲猜險之本。孫盛云。賴諸葛威略。足以檢衛異端。故使異同之心。無由自起耳。此不失國柄之一事也。他可類見。

### 公子糾非君

荊石王公云。往過松江見陸平翁。偶談及春秋。因問春秋道名分。而孔子不黜管仲。卽論語亦然。此是何意。平翁云。節義特學問中一件事。故孔門不甚及之。此語尙未了。然余曰。管仲之于子糾。不當以君臣名分律之。子糾小白。皆齊襄之公子耳。若以公子糾爲君。則當時置周襄王于何地。故管仲旣歸小白之後。劈頭主意。便欲尊周室。要見周天子尙在。則公子糾不得爲君。公子糾不得爲君。則管仲亦不得爲忘君而事仇也。其尊周之思想如此。若挾天子以令諸侯。猶是管仲第二念。

### 獨樂樂戲下註脚

如何是獨樂樂。曰。無事此靜坐。一日是兩日。如何是與人樂樂。曰。與君一夕話。勝讀十年書。如何是與衆樂樂。曰。此中空洞原無物。何止容卿數百人。

### 齊服楚之巧

巧矣哉。管仲之服楚也。曰。召康公命我先君太公曰。五侯九伯。汝實征之。以夾輔周室。賜我先君履。東五

於海。西至於河。南至于穆陵。北至於無棣。爾貢苞茅不入。王祭不共。無以縮酒。寡人是徵。昭王南征而不復。寡人是問。蓋昭王之事大。大則難當。苞茅之事小。小則易受。所以楚子遂曰。貢之不入。寡人之罪也。敢不共給。蓋不知不覺。賺入管仲術中。管仲但須得此一句。便裝成服楚極大題目。楚服而諸侯響應矣。俗儒遂以舉爲尊。周攘夷。仲而有靈。寧不夫笑。

伍子胥申包胥心事

伍子胥曰。我必覆楚。申包胥亦不復阻遏他。任他自覆去。申包胥曰。我必復楚。伍子胥亦不復隄防他。任他自復去。大丈夫心事光明磊落。無不可以對人言者。此二公是也。余讀史至此。真如食哀家梨。爽口之甚。然爲子胥難。爲包胥易。子胥鞭平王之尸。辱楚王之宮。志行仇雪。其漫天塞地之氣。至此一滴無餘矣。此不必包胥借兵。人人可以破吳。包胥特乘其強弩之末。以張振蒙之勢耳。包胥之奇。奇在秦庭痛哭。又奇在復楚逃賞。如子胥報仇之後。但欠一死。若即時自刎。以從父兄于地下。則古今尙有哀而憐之者。雖然。子胥恩仇分明人。也。既借吳以報楚。獨不留一死以報吳哉。

神仙讀書

昔道士侯道華喜讀書。或問其愛。答曰。天上無凡俗神仙。後果騰舉而去。呂洞賓陳搏。賀元施肩吾。皆本書生。宋謙定。雍孝聞。尹天民。亦皆以儒士得道。定百二十餘歲。故在青城山中。採藥人有見之者。讀易尙不輟也。黃山谷嘗云。子弟諸病皆可醫。惟俗不可醫。余謂神仙不讀書。亦是一箇俗漢。所謂頑仙不如才鬼耳。

### 曹操如獅子

曹公爲人，佻易無威重，好音樂，倡優在側，嘗以日達夕，被服輕綃，身自佩小鞶囊，以盛手巾細物。時或冠帽，以見賓客，每與談論，戲弄言詞，盡無所隱，及懽悅大笑，至以頭沒杯案中，看瞻皆沾汗巾，幘吾鄉何玄朗嘗與趙大周閒論，偶及之，大周曰：獅子是我西方之獸，終日跳躑，無一刻暫休，蓋其猛烈之氣，不得舒身，故與之毬，以消耗其氣，遂終日弄毬，忘其跳躑。曹公之舉動輕躁，亦是其胸中猛烈之氣，不得舒也。其亦可謂善論古人者矣。

### 折節李左車

問安成君果用李左車，韓信成擒乎？抑信別有處也？余曰：不然。左車設策，而韓信使人間視，知其不用，此便是大滲漏處。則信破之必矣。韓信折節李左車，却是從跨下得力來。

### 韓信打開漢王出路

嘗問小兒輩：韓信如何是人傑？曰：看他登壇數語，又問如何是登壇妙處，不能答。夫沛公之爲漢王也，項羽以巴蜀道險，秦遷人皆居之，乃曰：巴蜀亦關中也，以示不負三分關中之約。其實封閉他在一處，使章邯以四十萬兵扎住漢口，不容漢王有出頭地。當時蕭何無策，曰：屈一人之下者，伸于萬人之上，但能勸漢王入，亦不能使漢王出。張子房亦無策，惟燒斷棧道而已，但能防項王入，亦不能使漢王出。韓信走來，却自不同，曰：項王詐坑秦降卒四十餘萬，唯邯欣翳獨免，秦怨此三人，痛入骨髓，夫信料漢中可出，乃在章邯輩看來，料章邯

輩可破。乃在三人獨免。秦父兄怨入骨髓。處看來。自是漢王遂部署諸將。留蕭何收巴蜀租稅。給軍糧食。八月從故道出。章邯迎戰。敗走。王遂至咸陽。此一條出路。却是韓信走來打開的。蕭何子房皆思量不到。安得不竝稱三傑。至于囊沙背水。木罌渡軍之類。特是兵法中巧事。還是眼力識見不可及。

### 一軍皆驚

信之亡也。蕭何之追也。或兩人商量合做的。漢王嫂罵呼大將如小兒。信不逃。何不追。不能激得他築壇。此理似亦有之。然韓信蕭何與語便大奇之。蕭何之鼻孔繩索。已在韓信手中。信走不怕蕭何不追他。何必弄此詭譎。以丞相而追韓信。築壇所拜。非信而誰。一軍皆驚。畢竟是太史公裝點形容之語也。但不知蕭何與語大奇者。是何等說話。決不就是登壇敷語。惜太史公失載可恨。

### 孔子不夢周公非衰

孔子夢周公。尙是耳中鳴磬。眼中金屑也。直到不夢見周公。便是一齊放下。所謂去年貧。未是貧。今年貧。始是貧耳。文中子有疾。召薛收謂曰。吾夢顏回稱孔子歸休之命。乃寢而終。吾朝吳與弼。亦云夢見孔子。議者謂其墮落魔境。乃知孔子云吾衰。非是真衰。正到大休歇處矣。至人無夢。愚人亦無夢。以愚人而造至人。甚難。以至人而還造愚人。亦甚不易也。

### 解孔明亦有失

或問于余曰。孔明亦有失處。東結孫權。西攻曹操。此定局也。雲長守荊州時。權遣使爲子求婚。雲長罵辱

其使不許婚。權大怒。遂有白衣搖櫓之禍。孔明此處少調停。此一失也。治蜀時。不置史官。文獻闕略。此二失也。嘗薦姜維于蔣琬曰。姜伯約忠勤時事。思慮精密。又曰。伯約甚敏于軍事。既有膽義。深解兵意。此人存心漢室。而無人教軍事。嘗遣詣宮。覬見主上。後姜維以此自恃。每欲與舉大事。卒至漢亡。此三失也。後主愛宦人黃皓。皓便嬖慧侯。孔明不能屏之使去。此四失也。余應曰。此係君讀史不熟耳。雲長在荊州時。孔明方鎮守成都。相去幾千里。孫權倉卒求婚。孔明豈能照點得及。孔明嘗與法正劉巴李嚴伊籍共造蜀。料當必念及史官一事。况平日所至營壘井竈圍溷藩籬障塞。皆應繩墨。如此瑣碎。尙且周到。史官安得獨闕。想蜀亡之後。收圖籍者無人。遂至廢失。據孔明文集有二十四篇。計十萬四千一百一十二字。今一字不見。則蜀史可知矣。姜維之才。自琬偉之後。實鮮其比。維本羈旅托國。每見黃皓恣擅。啓後主殺之。後主曰。皓奔走小臣耳。何足介意。維見皓枝附葉連。懼于失言。遜詞而出。而皓亦欲廢維。維以此亦危懼。累年出征。不復還成都。一伸之討賊以義。一以避黃皓之讒。孔明六出祁山。亦是此意。然而不復剪去黃皓者。又有妙處。蓋孔明當先主托孤時。其不才自取之語。孔明已負不安。若黃皓一宦官耳。却又與之惱噪。必除之而後已。後主不懼則疑。故出師之後。但以駕馭事付之董允。允常數責于皓。皓畏允不敢爲非。終允之世。皓位不過黃門。然後主尙不能忘于允。曰。嘗見董允切齒黃皓。我嘗恨之。則其情事可知矣。孔明所以放他一路。不惟得相臣大體。卽吳魏之反間。黃皓之傾危。不得而入也。看來孔明何嘗有失。君請熟讀史自見耳。

### 董賈長文章作俑

文章自三代而後。秦漢最稱簡古。惟治安策。天人策。疊疊凡數百萬言。漢人長文章。自賈誼董仲舒作備始。漢武帝東帛加璧安車。馮馬迎申公。既至。問治亂之事。申公但曰。爲治不在多言。願力行何如耳。太史公序云。上方好文辭。見申公對默然。申公此時八十餘。識見老成。此言不獨救武帝好文辭。且欲救董賈文章之多也。康王命畢公曰。辭尙體要。上之論俗且然。而况人臣之章奏乎。章奏至數百萬言。卽儒生讀之。口燥舌沸而不能止。天子一日萬幾。其難又可知矣。武宗時。韓公文欲攻劉瑾。而屬李夢暘具奏。艸曰。毋文。文覽弗省也。毋多。多覽弗竟也。此言極得告君之體。故觀申公老人一言。覺董賈文章。尙有少年氣習。

陳平不斬樊噲

燕人有惡樊噲。黨于呂氏。曰。宮車晏駕。將盡滅趙王如意之屬。漢高大怒。詔平勃斬樊噲。平勃計曰。噲帝之故人也。功多有親且貴。今以忿怒欲斬之。恐後悔。令囚而致。上乃召噲接。檻車傳詣長安。平之不斬樊噲。非爲漢高。實怕呂氏。大事記曰。春族淮陰。夏誅彭越。皆呂氏計。漢高病。呂后專欲以事誅異姓王。及大功臣。遂稱病不行。語頗洩。盧縮之反也。樊噲以相國將兵討之。其命雖出于高帝。實以呂后椒房之戚也。噲以呂氏女弟呂嬃爲婦。生子伉。比諸將尤最親。噲旣黨于呂氏。若噲死。呂后能忘報于平乎。平嘗對高帝云。項王不能信人。其所任愛非諸項。卽妻之昆弟。帝用樊噲。却犯陳平此語。平以是不敢斬噲。然項王用諸項。亦是六國風氣。如齊之田忌。田嬰。田文。韓之公仲公叔。趙之奉陽平原君。魏之無忌。皆公族也。項王沿習此風。故悉用諸項。執料項伯之有外心乎。諸項中惟項中最著。而餘皆不載姓名。史但云諸項氏。枝屬皆不誅。封項伯等四人爲列

侯。賜以國姓而已。漢王侯甚微。僅一憂羹侯兄而不用。用樊噲未幾。又欲斬之。得無有感于陳平所謂項王任愛妻昆弟之一言乎。故以斬噲示公。不然。何不命他人而獨命平也。此平之所以愈不斬也。

### 項羽乾之四爻

余嘗看項羽規模格局。也不是端冕凝旒南面的人。又不是垂紳正笏北面的人。所謂一將存餘。而萬乘不足。其亦易之乾卦。上不在天。下不在田者乎。究竟只好成一霸王耳。

### 陳仲微二語

杜子美依劍南嚴武。嚴武辟爲參謀。杜子美有遺悶詩呈武云。束縛酬知己。蹉跎效小忠。桓公謂孟嘉云。人不可以無勢。我乃能駕馭卿。若杜子美與孟嘉。是皆有所不得已也。余獨不然。最喜誦南宋陳仲微二語。祿餌可以釣天下之中才。而不可啖嘗天下之豪傑。名航可以載天下之猥士。而不可陸沉天下之英豪。

### 漢王未嘗顛倒豪傑

漢王待九江王布。踞洗召之。已又供帳如王者。蘇老泉謂漢王能顛倒豪傑。劉元城云。碁中有一事。昔有低碁曰。梁武帝方侯景以窮來歸。遽裂地而封之。其後景凡有所需。輒痛剉抑之。故景反而梁亡。此後着爲先着也。又有高碁曰。漢高帝方黥布以窮來歸。故洗足不起。以挫其銳。布欲自殺。後見帳御從官如漢王。則又大喜過望。此識先後着也。二公立論甚妙。而實不然。昔隨何說布。請奉命陰許叛楚與漢。未敢泄也。楚使者在。方急責英布發兵。隨何直入坐楚使者上。曰。九江王已歸漢。楚何以得發兵。布愕然。楚使者起。何因說布曰。事已

搆可遂殺楚使者無使歸。而疾走漢并力。布曰如使者教。于是殺使者。因起兵攻楚。楚使龍且擊破布軍。布欲引兵走漢。恐楚王殺之。遂間行。與何俱歸漢。夫既殺楚使。又與楚戰。又避楚間道來歸。此時情勢。布必無還楚之理。故帝踞洗時。遂以踞洗見布。布雖大怒。怕他走到那裏去。非漢王故意傲布。實算得布不得不就漢也。其後帳御飲食從官之盛。此招徠遠人之常事。何足爲顛倒豪傑。况踞洗亦是漢高謾罵故態。亦是豁達大度之一節。何暇思及先後着來。

### 于忠肅與漢高同

項羽欲烹漢太公。漢高帝曰。我翁卽若翁。若欲烹而翁。願分我一杯羹。太公以此歸漢。吾朝正統土木之變。英宗陷虜。虜人挾之以邀我如徽欽故事。于忠肅曰。社稷爲重。君爲輕。失一君復立一君矣。英宗以此歸國。今人既知念于忠肅之功。則不得極口詆漢高之忍。

### 好事不知無

余讀書橋李南湖園中。每飯必施鳥食。而童子遂于施食處。張羅樹間以待之。余笑謂門生曰。燧人氏教民火食。爲秦始皇遂以之烹儒焚書。闔立本吳道子。畫地獄變相圖于寺壁之上。蓋將化導愚頑。而酷吏做其刑具。以恣羅織銀鍊之助。自古好事嘗被惡人弄壞。卽鳥食一件。所施未幾。而童子之殺心動矣。善乎古人之言曰。好事不如無。



天地間有一大帳簿。古史舊帳簿也。今史新帳簿也。人家儘有聰明俊慧子弟。父師失教。專以時文課之。竟不知通鑑綱目二十一史爲何物。所以往往有攢眉齷齪之苦。若教之讀史。以聰明俊慧之資。遇可喜可愕之事。則心力自然發越。貫串治亂得失。人才邪正是非之源流。與財賦兵刑禮樂制度沿革之本末。則眼力自然高明。以古人卽證今人。以古方參治今病。則膽力自然穩實。曉暢大局面。大機括。大議論。大文章。則筆力自然宏達。今子弟史學一切廢闕。其有質者。反教之讀子書佛書。卽粗粗問他作子書佛書者之姓名出處。已茫然不曉。况能得子佛之精髓乎。余嘗語子弟。無論綱目二十一史。卽一部通鑑。乃萬卷書之關津。若未曾過得此關。則他書必無別路可入。或讀之而不能解。解之而不能竟。竟之而不能徹。首徹尾者。皆史不熟也。此舊帳簿不可無也。內外有司。各有職守。而史官獨若無所事事。宜遵祖宗法。勅令修撰編修簡討。番直史館。編紀時政。各管一類。據事直書。不須立論褒貶。仍于紙尾書某官某人記之。藏之篋櫃。以待纂述。庶因紀錄之間。亦得練習政事。他日任用。不致杜撰鹵莽。是于修職之中。寓養才之章。若謂館局儲養異才。不煩以語言文字。則未免以光陰志氣。擲于交際詩酒之間。卽有意講求典故者。恐同儕猜異。只得隨行逐隊。而不敢周咨天下之務。及至團局修史。亦不過掇拾完書。無暇聚頭磕膝。仔細討論。宰相須用讀書人。竟成虛語。此新帳簿不可無也。又有講學老先生。專意六經。而以讀史爲玩物喪志。亦恐非得中之論。昔伊川先生。几案間無他帙。惟印行唐鑑一部。朱晦菴先者云。病中信手亂抽。得通鑑一兩卷看。正直難處置處。不覺骨寒毛聳。心膽墮地。向來只作文字看過。全不自覺。真是枉讀了他古人書。前輩何嘗不留心史學。今史官不編史。子弟不讀史。新帳簿舊帳

簿。皆置之高閣。豈不可歎。夫未出任。是算帳簿的人。既出仕。是管帳簿的人。史官是寫帳簿的人。寫得明白。算得明白。管得明白。而天下國家事。瞭若指掌矣。故曰史者。天地間一大帳簿也。

史

古今之史有二。曰公史。曰私史。如司馬父子之史記。班氏父子之史兩漢。范曄袁宏之史東漢。陳壽之史三國。房玄齡之史晉。沈約之史宋。蕭子顯之史南齊。姚思廉之史梁陳。魏收之史魏。令狐德芬之史周。魏徵之史隋。歐陽修之史唐五代。歐陽玄之史宋。遼金。則以人主之命。出金匱玉室之儲。而佐之筆札者。也是公史也。伏無忌。劉伶。蔡邕。之以東觀記。史謝承。之以書史。華嶠。之以典史。張勃。之以錄殿。何法盛。之以謚史。崔鴻。之以十六國春秋史。何承天。鄧彥海。李伯樂。之以伐北齊說。則以家傳師說。參之以白虎石渠。採樵負竿之論議。而創爲一家言者。也是私史也。合而論之。詩書春秋史之祖也。左國則庶子也。漢以后。則螺贏身。晉宋則稗家耳。梁陳齊諧耳。唐叢說耳。至於宋而瀾倒不振極矣。夫史之可治者。莫如我明。蓋二曜開天。三代遺直之世也。兩祖鼎新。列聖纘承。其間革除靖難。土木之紛擾。忠臣孝子。貞魂義魄之鬱而未甦。可史也。而不史。北地信陽之奇古。餘姚晉江毘陵之理學。關中厓下之縱橫。能史也。而不史。廬陵博野。泌陽之儔輩。予之史也。而不史。此何以解也。則以史之備不備。才之史不史也。今數百年。令典之紀載。星官之職掌。六曹諸寺。郡國之志。歷歷具存。不可謂無文。雕龍繡虎之彥。比肩草野。金馬碧鷄之客。接武蘭臺。不可謂無獻。二者既具。則請禮聘遺賢。搜募逸籍。贍以大官。寬以歲月。務成一代之書。而折衷于經書者。二帝三王之史也。詩者。商周列國之史也。春秋者。

東遷以降。列侯王伯之史也。經以爲經。史以爲緯。綦組以相生。事法以相成。班馬諸君。且將北面簪筆而侍之矣。奚論私史公史也。

### 圖書

昔者包犧氏之王天下也。天應以鳥獸文章。地應以龜書。而伯禹之遇河伯也。曰。臣河精也。授君河圖。于是後世言星者。昉于圖。言土者。昉于書。而紀曆井地之法興矣。河洛之未有定說也。左于漢者。班固揚雄鄭玄。孔安國劉向之父子也。左于宋者。堯夫端明元定晦菴明道之兄弟也。數先生互相異同。不爭于象之方員。則爭于數之多寡。不搜考于織書古文。則徵據于通儒隱者。夫圖書亦何異同之有哉。圖書而有異同。是理之有異同也。象之爲中。爲左右。爲戴爲履。爲肩爲足也。非天地之象。埋之象也。數之自一而九。與自一而十也。非天地之數。理之數也。理得而圖書爲過客。象數爲逆旅耳。不聞殊方之卜乎。或責應于草木。或取數于金石。或以雜占。或以兔卦。卒之吉凶之兆。不異著龜。蓋著者尋數之主。數得而著廢焉。龜者啓兆之質。兆著而龜忘焉。圖書者聖賢之借。理出而圖書休焉。是故表裏可以符契。方圓可以券合。時代流行。可以經緯相襲。先天後天。可以子母相生。縱之橫之。而無害其爲同。奇之耦之。而莫病其爲異。不必泥其九爲圖。十爲書也。不必追其河圖之篇有九。而洛書之篇有六也。不必推其卽太乙下行九宮法也。不必據其乾吐天苞。坤吐地符也。不必究其出乎青城隱君也。不必遯其受之希夷種放穆修以上之諸人也。不必實其與太極之理碎而爲陰陽。陰陽之理碎而爲四象八卦。衍之爲大衍。範之爲洪範。以至頽仰聚散。河洛未嘗不寓焉。三光五岳。披我以圖。八索九

丘聚我以書。魚躍鳶飛。呈我以靈龜龍馬。夢寐尙友。接我以大禹宓戲。卷之而促。爻象于一瞬之間。放之而轉。乾坤于六合之內。大之而聖賢就于爐冶。細之而瓦礫歸于文章。此非三代以還不傳之圖書哉。故曰刪後無詩。畫前有易。儒者不知而曉曉焉。終日爭之。彼執書以合圖。執河以配洛。家是其見。代是其書。譬之水月然。一人以爲月繫于天。一人以爲月繫于水。兩人東西行。月亦隨之。此兩人者。人以爲各私是月。而不知月之無分于東西也。是諸儒之論圖書者也。

十三經註疏

經之不明也。其故有三。經生之與諸子角。一不敵也。轉而與二氏角。二不敵也。宋儒漢儒之自相爲角。三不敵也。何者。經生之喙一。而諸子之喙百。吾以莊語而彼以譚笑。衆寡勞逸之不相半也。一不敵也。人情好生。而黃冠以不死劫之。人情畏死。而縑衣以無生劫之。卽儒者能跳于死生。而又不能終跳于嗜欲。乃二氏又欲以清虛寡欲勝之。二不敵也。漢儒網羅百家。收拾遺文以爲宋儒地。而宋之諸君。往往操戈而裹甲焉。功不明。論不定。三不敵也。嗚呼。儒者操三不敵以抗于世。日戰日北。日傳日負。而經幾于亡矣。夫經之初有六。迄于今而附于公穀三禮。又附以語孟孝經爾雅。蓋十有三焉。經多矣。何以亡也。不亡于雄之擬易。通之擬論語也。不亡于叔孫通之禮樂。曹氏父子之詩也。不亡於秦謨之不熟爾雅。玉莽之僭周書。安石之腐春秋也。然則經何以亡。蓋始于尊聖人之經。而終於自尊。不知經者聖人之跡。跡存而人與骨。蓋已朽矣。其不可得而朽者理也。是故得瑟而忘絃。得月而忘指。剛性情不在聲。典謨不在壁。筆削不在麟。爻象不在龍馬。苟其一饋十起於蟲。

書蠹簡之中一辨。十難于牛毛繭絲之際。則無風而波。舍兵而爭。家樹幟。人樹舌。卽金溪新安之間。日紛紛矣。夫必關洛洙泗之爲是。而諸子之爲非。則拘執太堅。立門戶。聚生徒。則張皇太過。執均則人疑。張皇則人懼。此經之所以口亡。而終不能與諸氏角也。竊嘗私論之。諸子之汪洋自姿。近于狂。二氏之恬淡無爲。近于狷。世無仲尼。故至此耳。仲尼而在。可以鎔鑛而爲金。採腋而爲裘。集諸瑣屑而爲竹頭木屑之用。而况漢儒爲哉。大抵諸氏二子。警之黥布信越。來則爲帝用。而去則爲帝敵。故其法主降。漢儒則陳勝胡廣矣。斬木揭竿。以備濂洛之數君子。數君子不以爲經之功臣。而至詆爲經之叛臣。漢儒之所以死不服也。

### 英雄倉卒自達

婁敬之才。不如三傑。當三傑戰勝攻取之時。藏匿一處。不敢與之並爭功名。卽使與之並爭功名。婁敬亦無下手地。直待誅秦滅項。事事結局。冷眼觀着。只有建都一事未定。從容談笑。便以都關中說高帝。蓋高帝昔年見咸陽宮室。嘆曰。大丈夫當如此矣。天下已定。帝之意無日不在關中。敬窺見高帝此意。故一說而入。卽日西行。拜敬郎中。號奉春君。夫三傑取功名於干戈擾攘之中。也只封得一箇侯。婁敬取功名於干戈平定之時。片語立談。也封一箇侯。若敬者。不傷氣。不煩手。其亦得審局之巧者與。至于謁見漢高一節。亦是使人不得不應之着。初敬脫輓輅。衣毛裘。見齊人虞將軍。願見上。言使事。虞將軍欲與之鮮衣。婁敬曰。衣布衣帛見衣褐衣。褐見終不聽易衣。於是虞將軍入言上。上召見。賜對。大抵倉卒不能自達。是用世人一大病。敬欲自達于倉卒之頃。故衣褐方表突兀。不如是。虞將軍亦不言帝。帝亦不復召矣。三國時。彭萊欲納說先主。乃往見龐統。統與

兼非故人。又適有賓客。兼徑上統床臥。謂統曰。須客罷當與卿善談。統客既罷。住就兼坐。兼又先責統食。然後共語。因留信宿。至于經日。統大善之。遂致之先主。兼之登床。卽敬之衣褐也。兼之因龐統而見先主。卽敬之因虞將軍而見漢高也。後季元忠飲酒割炙。從車上彈琵琶。以見齊神武。亦用此法。大抵皆是英雄倉卒自達處。所謂使人不得不應之着也。

佛書補秦灰

余于丁酉樂臺小崑山之陰。是歲山寺俄有二祥。稿木蒸芝。插竹布葉。緇素見聞。嘆未曾有。無何董玄宰氏和合北藏至山。則瑞芝靈竹之兆。報於斯焉。余自是入草堂。童子不復負攜故笈。每當清晨良夜。老雨苦風。拂函展籤。作而歎曰。西方之書其容已乎。宗教易之髓也。譯受書之法也。偈讚詩之叶也。戒律禮之衛也。果報春秋之賞罰也。甚矣佛氏之能輔經而行也。其輔經者。以輔世也。西方之書其容已乎。然則佛藏之必後六經而興者何。嘻。祖龍生文字燼。古今之聖言寥寥矣。是故重漢明而竺乾之傳遂出。今其多至六千餘卷。不列藏者。尤不可勝計。比之儒林之經史子集。殆將倍蓰過之。何言之昌也。天其或者以此補秦劫之遺灰與。乃命繕寫經目以示子孫。剪俗儲之故聞。裁神聖之種智。倘有毀大乘。訾正法者。姑語之曰。一切諸佛。其若古先輩視也。一切諸經。其若古異書視也。則亦庶乎可以存而論。論而議矣。

淵明不欲諸子仕宋

陶淵明命子篇。則曰。夙興夜寐。願爾之才。爾之不能。亦已焉哉。其責子篇曰。雖有五男兒。總不好紙筆。天

運苟如此。且進杯中物。蓋先生即諸子皆不欲其仕宋。故作詩自汗以晦其才。才則必以陶氏門地拔矣。此苦心也。善乎莊生曰。以不才終其天年。

### 父母養子真養志

往顧涇陽涇凡兩兄弟。與余同舟至携李。因論事親若曾子可也何義。余曰。此句真精神。在大學如保赤子。心誠求之上。又問曰。此又是何義。余曰。大約父母之於赤子。無有一件不養志的。人子報父母。却只養口體。此心何安。即如曾子之養曾皙。比之三家村老嫗養兒。十分中尙不及一。所以僅稱得箇可字。今人不必遠法曾參。但去取法三家村老嫗養兒。自然事父母不敢在口體上塞責矣。

### 祿養

嗟乎。古人事親。惟恐不成聖賢。今人事親。惟恐不成科第。是可謂養志乎。父以此教之。子以此成之。如何不是養志。但既得科第之後。親老不能隨子。十年五年。常不相見。即錦衣歸省。內有妻孥。外有賓客。出入匆匆。其捧觴上壽。開口而笑者。又能有幾日。甚則新莊故宅。父子各居。雖供養不缺。而飲食寒溫。滋味鹹酸之類。誰復爲之點檢。此無論養志。亦何曾叫得養口體。市井負販。父兄子弟團圍一處。其饜飧無日不相共。其痛癢無刻不相關。即口體之養未全。而養志却無愧者。且寸薪粒米。皆從剜心瀝血中來。如此養父母。味雖苦而情則甘。富貴家名曰祿養。而未能必躬必親。如此養父母。味雖甘而情則苦。嗚呼。爲人子者。不惟不能養志。抑且不能養口體。非其忍心如是。所謂終身由之而不知耳。雖然。亦却科第二字。累他一半。蓋父母教之。而父母還

以自累也。所以古來聖賢自曾子養志後，獨推尹和靖母子爲不可及。

唐肅宗靈武非篡

唐玄宗奔蜀，太子卽位靈武。其始爲馬嵬驛父老所留，其旣爲建寧王倓所勸，又其後爲杜鴻漸魏少游崔漪盧薛季涵五十箋所迫，而太子實無利天下之心也。當時君父播遷，宮人亂出，乘輿至金城驛中無燈，貴賤腕籍而寢，賊入長安，殺妃主皇孫數十人，刳心以祭安慶宗，搜捕百官宮女送洛陽，王侯將相屬從車駕留長安者，誅及嬰兒。太子夜馳三百里至平涼，雖正位號，文武官不滿三十人。太子何豔於此，而攘之於艸萊荆棘之日耶？其後顏真卿區處河北軍事，以蠟書達表于靈武，遂以真卿爲工部尙書，并致赦書，亦以蠟丸達之。真卿頌下諸郡，又遣人頌于河南江淮，由是諸道始知上卽位於靈武，狗國之心益堅，民相聞傳太子北收兵來取長安，日夜望之，或時相驚曰：太子大軍至矣，則皆走，市里爲空，賊望北方塵起，輒驚欲走，京畿豪傑往往殺賊官吏，遙應官軍，誅而復起，不能制，乃知靈武此舉，眞可收屬人心，非乘危而利天下也。其後章見素等至自成都，奉上寶冊，太子不肯受，曰：比以中原未靖，權總百官，豈敢乘危，遽爲傳襲，羣臣固請堅不許，實於別殿朝夕事之，如定省之理，其情亦可憐矣。而范祖禹乃以爲叛君背父，寃矣哉，所可恨者，其罪全在楊國忠耳。或曰：馬嵬之變，國忠已斬，而于靈武何與？余曰：唐玄宗議親征時，謂宰相曰：朕在位垂五十載，去秋已欲傳位太子，值水旱相仍，不欲以餘災遺子孫，不意逆胡橫發，朕當親征，且使之監國，事平之日，朕將高枕無爲矣。楊國忠大懼，退謂三夫人曰：太子素惡吾家，若一旦得天下，吾與姊妹命俱在旦暮矣，使說貴妃衛士請命於上，事



遂寢。若使國忠從與一言，便無靈武之事，竟以恬寵懼禍之故，至使他日父不得正其終，子不得正其始。既亂人家國，又亂人綱常，若國忠馬鬼死晚矣。

### 殺之三宥之三出處

東坡刑賞忠厚之至論云：殺之三，宥之三，歐陽公問其出處。東坡曰：想當然耳。余觀曲禮有云：公族無宮刑，獄成，有司讞于公。公曰宥之，有司又曰在辟，公又曰宥之，有司又曰在辟，及三宥不對，走出致刑于甸人。乃知東坡之論，原有本耳。想主司偶忘之，而東坡又不敢輒拈出處以對，故漫應如此。不惟待前輩之道宜然，亦可省露才揚已之一病也。

### 許由讓天下非難

堯禪天下於許由，許由不受。天下後世皆高之，余獨以爲不難。堯之時，盡大地是洪水，盡大地是獸蹄鳥跡，禹荒度八年，水乘舟，陸乘車，泥乘輻，山乘楛，方得水，上漸平，教民稼穡。此時百姓甚苦，換鮮衣，艱食，粒食，三番境界，略有生理，蓋洪荒天地，只好儘力生出幾箇聖人，不及鋪張裝點，粗粗具得一片乾坤草稿而已。何曾有受用處？茅茨不剪，樸角不斲，素題不枿，大輅不畫，越席不緣，太羹不和，劔籩之食，聊以充虛，鹿裘之衣，聊以禦寒，不唯無享天下之樂，而且有叢天下之憂。堯鰲舜黑，固其宜耳。許由亦何所艷羨而受之也哉？嗟乎！今之天下，濃濃則誨盜，古之天下，淡淡則拱手以與人，而人不納。老氏云：不見可欲，使心不亂。許由之謂也。按傳堯佐帝摯，始受封於陶，又二載改國于唐，乃號陶唐氏，又三載而受禪。又曰：帝摯立九載，政既微弱，而堯德日盛。

諸侯歸之。帝服其義。率羣臣以致禪。堯乃卽位。都于平陽之安邑。由此觀之。禪天下亦非堯始。

智愚相去

柳下惠見飴曰。可以養老。盜跖悵飴曰。可以粘牝。見物同而用之異。余嘗謂子弟云。李廣之射石虎。智者驚喜是石。而愚者悵悵非虎。然則智愚相去。豈特三十里。是亦柳下惠盜跖之飴也。

左傳史記杜書三枉

左丘明身爲國史。躬覽載籍。凡子產管仲及諸國卿佐家傳。并夢卜縱橫家書。總爲三十卷篇括囊二百四十二年之事。旣爲春秋內傳。又分纂周魯齊晉鄭楚吳越八國事。起周穆王。終魯悼公。作國語。爲春秋外傳。合爲二十一篇。大約如夏馭春秋。晉春秋紀。晏子呂不韋虞卿陸賈之春秋而已。非有意于發明孔子也。說者謂其先經以始事。後經以終義。依經以辨理。錯經以合義。則枉却左傳也。漢武時置太史公掌天下計書。以司馬談爲之。談欲錯綜古今。勒成一史。未就而卒。子遷乃述父遺志。採左傳國語。刪世本戰國策。據楚漢列事。上自黃帝。下迄麟趾。作十二本紀。十表八書。三十世家。七十列傳。凡百三十篇。都謂之史記。至宣帝時。遷外孫楊惲祖述其書。遂宣布焉。而十篇未成。然亦自宮刑之後。抑鬱無聊。不得已而托之著書。于刺客游俠貨殖三致意焉。藏副名山。自成一家言。蓋司馬之私史。非漢之國史也。班固乃強而入之正史之中。詆其疎略。又詆其是非頗謬于聖人。則枉却史記也。杜甫貧不自振。客吳越齊趙間。祿山亂。天子入蜀。甫避走二川。蕭宗立。自鄜州羸服。欲奔行在。爲賊所得。至德二年。亡走行在。入謁。拜右拾遺。關輔饑。輒棄官去。客秦川。流落劍南。結廬成都。

西依嚴武。武卒甫往來梓夔間。大曆中出瞿塘下江陵。泝沅湘以登衡山。其詩無所不有。而未嘗專指某詩爲某事。某句爲某人。若如此。則一部杜少陵。如學究訓詁相似。則枉却杜詩也。

### 留中者內批之漸

國家之患。莫大于內批二字。無論他朝。卽如韓侂胄日夜謀去趙汝愚。問計劉劭。劭曰。惟有用臺諫耳。侂胄問若何而可。劭曰。御筆批出是也。侂胄然之。遂以內批拜給事中。謝深甫爲中丞。又內批以其黨劉德秀。屬深甫爲御史。由是劉三傑李沐等牽連以進言路。排黜正士。閏月內批罷朱熹矣。十二月又內批罷彭龜年矣。一日史彌遠入對。請誅侂胄。皇后楊氏素怨侂胄。因史彌遠懷中出御筆批云。韓侂胄久握國柄。輕啓兵端。使南北生靈。枉罹凶害。可罷平章軍國事。遂殲殺於玉津園。王楠以韓侂胄與蘇師旦首至金。金主璟御應天門。備黃麾立仗受之。百官上表稱賀。懸二首并畫像于通衢。令百姓縱觀。然後漆其首藏于軍器。夫侂胄以內批斥逐人。而終以內批自殺。天道好還。豈不奇哉。吾朝凡宮府大小之事。發閣臣票擬呈內批。發部院參覆。然後奉旨行。此祖宗立法之最妙者。雖然。却憂一事。留中者。內批之漸也。姑記于此。以告之憂國者。

### 舜有爲

自古帝王多矣。夫子獨曰。無爲而治者。其舜也歟。然則舜果一無所爲者乎。曰。非也。舜之工夫全在未受堯禪時。父頑母嚚。却要在父母上做工夫。象傲却要在兄弟上做工夫。家人睽。起于婦人。却要在二女上做工夫。以至耕稼陶漁。迅雷風雨。無非是做工夫處。做得如此有爲法。才好到無爲而治的境界。詩不云乎。刑于寡

妻。至于兄弟。以御于家邦。御之一字。正列子御風之御。着不得一毫人力。此極可狀無爲之旨也。不然。藉口無爲。深居高拱。如秦二世以天下托之趙高。李斯。唐玄宗以天下托之楊國忠。李林甫。治乎。亂乎。孟子曰。人有不爲也。而後可以有爲。余曰。人有有爲也。而後可以無爲。

修辭立其誠

〔今人作銘狀表傳。皆是花臉文字。戲子上場。凡花臉淨丑說話。多是虛而不實。今銘狀表傳。得無類此耶。〕  
吾人通于鬼神之間者。但有言行兩端。若信筆胡亂道去。如何服得鬼神。易曰。修辭立其誠。此語甚有味。

墓銘求增益

韓柳作志傳。皆不輕與人。卽歐陽永叔。撰尹師魯墓志銘。及敘辨所以作墓志之意。其書載集中。鑿鑿不少假借。蓋皆有古人之風。至于今。以多爲貴。甚則文字短簡。子孫有祈請增益者。尤爲可笑。漢司徒霸遣西曹屬侯子道。奉書嚴子陵。子陵曰。我手不能書。乃口授之。以牀頭杖與子道削書之。子陵曰。逾數語乎。子道曰。書何太少。可更足。子陵曰。買菜乎。求益也。〕

睽卦

易之睽卦曰。睽。小事吉。夫既睽矣。何吉之有。蓋別嫌明微。皆主于睽。微者。從小事始也。故吉。

渙卦

卦上巽下坎曰渙。坎險也。六三。渙其躬。無悔。象曰。渙其躬。志在外也。所謂外其身而身存也。二氏之放身。

失命。儒者之見危授命。易之所謂。渙其躬乎。

### 麥舟非文正所難

范文正父子以麥舟助喪。乃石曼卿耳。公父子盛德。此非其所難。石曼卿天下士也。狀貌岸偉。慕古人奇節。以文采氣誼豪一世。所交如歐文忠。公皆奇之。特落落當其意者無幾人。故常爲大理丞。而貧不能葬母。文正父子見之。自然傾舟相助。此何足以爲范公重。如曼卿之貧。乃可重也。郭元振家送資錢四十萬。會如縷服叩門者。自言五世未葬。盡數與之。况范公父子耶。况曼卿又爲公東吳故舊耶。歐陽爲文正作墓志銘。爲石曼卿作墓表。皆不載麥舟一事。蓋公盛德不專在此。正如雲長公秉燭達旦。未嘗見正史。即使有之。乃舉爲一生大節。此非知雲長者。

### 孝經春秋甚靈

孝經閨門一章。由周秦而下。傳漢至唐。列爲二十二章。開元間。博士司馬貞爲國家諱。始黜之。而唐遂有馬嵬之禍。則孝經閨門之教廢也。王荊公謂春秋爛朝報不列學官。使先聖筆削之書。人主不得聞講說。學士不得相傳習。而宋遂有夷狄北轅之禍。則春秋內外之防。與復讎之教服也。孔子曰。我志在春秋。行在孝經。二書抹去。禍及家國。宣尼之書。可謂靈矣。故曰。畏聖人之言。

### 高帝光武文章

帝王做事。如書生習舉業。先要做得出爲主。漢高帝爲義帝發喪。袒髮而哭者三日。時勢該哭。便做出許。

多哭的模樣。此高帝文章也。光武之兄演爲更始所殺。恐其見疑。飲食言笑無異平時。時勢該不哭。便做出許多不哭的模樣。此光武文章也。今人喜怒哀樂不特不中節。且皆草草放過去。成得恁的英雄。

高皇帝勝漢高

漢高不殺秦子嬰。史稱其寬仁大度。然畢竟有敗露處。項氏已沒。項伯以下賜姓劉。又令諸故項籍臣名籍。鄭君嘗爲項籍將。屬漢不奉詔。詔盡拜名籍者爲大夫。而遂鄭君。却是露出本色也。我太祖方元主。徂問至。羣臣皆賀。謂侍御史劉炳曰。爾本元臣。今日之捷。爾不當賀。因命禮部榜示。凡北方捷至。嘗仕元者。不許稱賀。太祖嘗躬祭歷代帝王廟。至漢高像前曰。我與公皆以布衣起得天下。公是好漢子。命再加一爵。議者謂漢高與太祖略相類。余請無論他事。卽以前二事並觀之。漢高豈能及得我太祖來。

劉璋父子原是漢室罪人

孔明取劉璋。子瞻非之。不知璋之父子。蓋漢賊也。璋父爲劉焉。劉焉內求交阯牧。欲避世難。議未卽行。董扶私謂劉焉曰。京師將亂。益州分野有天子氣。劉焉聞扶言。意更在益州。黃巾殺綿竹令。徙治綿竹。撫納離叛。務行寬惠。陰圖異計。張魯毋始以鬼道。又有少容。常往來劉焉家。故劉焉遣魯爲督義司馬。住漢中。斷絕谷閣。殺害漢使。劉焉上書言米賊斷道。不得復通。又托他事。殺州中豪強王咸李權等十餘人。及天下諸侯共誅董卓。保州自守。略不出兵。劉焉意漸盛。造作乘輿車具千乘。荊州牧劉表表上劉焉。有似子夏在西河疑聖人之論。時劉焉劉璋以車獻帝。爲奉車都尉在京師。劉焉託疾召劉璋。劉璋自表省劉焉。焉遂留璋不還。未幾劉焉

被天火燒城。車具蕩盡。則天之厭劉焉久矣。劉璋立。收三輔流人數萬家爲東川兵。聞曹操征荊州。已定漢中。遣陰溥致敬於曹操。操加劉璋振威將軍。又遣張肅送叟兵三百人。及雜御物於曹操。其父子未嘗有一毫乃心于漢室也。宗室之中。自懷異圖。先主欲伸大義於天下。舍劉焉父子將誰往哉。况先主不取。則益州必爲曹操所得。曹得之。必不能如先主盡歸其財物于劉璋也。孔明在草廬時。看得劉焉。原是漢室罪人。而劉璋方歸誠于操。如虎加翼。剪除劉璋。亦是斷曹操狡兔一窟。若使關中與巴蜀相連。老瞞驍雄。如何可制。

### 惡乎成名

富貴不處。貧賤不去。此是君子路上人。然只恐胸中着一好名之心。如許由陳仲子相似。許由洗耳。巢父引牛去之。仲子咽李。孟氏以蜩譏之。故曰君子去仁。惡乎成名。抽去名根。則富貴貧賤境界上。方才得力。成名則去仁矣。是君子之所惡也。夫。

### 亢卦有兩聖人

易曰。知進而不知退。知存而不知亡。其惟聖人乎。此不見一法之聖人也。知進退存亡而不失其正者。其惟聖人乎。此識法省懼之聖人也。前聖人是李廣飲羽石虎之箭也。後聖人是養由基百步穿楊之箭也。其實有兩箇聖人也。

### 事君事親不同

夜間與客飲茶。客問曰。事君事親同乎。余曰不同。陸績懷橘奉母。便謂之孝子。丁晉公獻大龍團茶。蔡君

謨獻小龍團茶。歐陽公驚曰：君謨士人也。何至作此事。錢惟演獻洛下牡丹。東坡詩云：洛陽相公忠孝家。可憐亦進姚黃花。推此則事君事親必有分矣。客曰：此論殆爲近來獻納與鑛稅發也。余不答。

我朝勝前代十事

謝鐸云：我太祖皇帝遠過於宋者有五事。一攘克夷狄。以收復諸夏。二肇基南朋。而統一天下。三威加勝國。而鋒刃不交。四躬自芻蕘。而臨御最久。五申明祖訓。而家法最嚴。陸文宣又云：本朝政體。度越前代者。其大者數事。如前公主寡。再爲擇壻。今無之。前代中官被寵。於朝臣並任。有以功封公者。今中官有寵者。賜袍帶。有軍功者。增祿食而已。前代府刺史皆有生殺之權。今雖王公不敢擅殺人。前代重臣得自辟任。下寮。今大臣有專權選官之律。前代文廟聖賢。皆用塑像。本朝初建國學。革去塑像。皆用木主。前代岳鎮海瀆。皆有崇名美號。今止以山水本名稱其神。郡縣城隍。及歷代忠臣烈士。後世溢美之稱。俱令革去。前代文武官皆得用官妓。今挾宿娼有禁。甚至罷職不叙。予思之。更有十事。前朝太學生皆上書。吾朝獨生員不許陳民間利弊。一也。九鎮以制府文臣爲將。天子自爲居守。二也。閣臣部寺之長。與邊腹大帥。外廷會推。內廷不得專擅。三也。母后不稱制。四也。勳戚不干政。五也。皇子講官。卽宮坊寮采。不立博望苑。不開天策府。六也。無殉葬。七也。不用鯨刺。別劇。鬪割之刑。臣下敢有奏用此刑者。文武羣臣。卽時劾奏。將犯人凌遲。全家處死。八也。京師有熱審。省直有減刑。非大吉典。不輕赦。九也。宋制臺省六品。諸司五品。一郊而任一人。兩制以上一歲而任一人。子又任其孫。孫又任其子。任姪任甥。亦有之。今三品以上。纔得蔭子入監。執綉子弟。不濫朝籍。十也。然則定鼎卜歷。尙可量哉。



## 古禮不可行

古禮有不可行者。如父母死。登屋極挑鼠穴而求其人。此後世所謂招魂也。哀痛倉卒。何暇升屋而號。又如三日殮。六月腐尸。何忍坐視。又如不祔葬。爲不忍先死者之復見也。夫婦同穴。子孫昭穆。地氣若吉。何得更求別壤。天子墳高三仞。樹以松。諸侯半之。樹以柏。大夫八尺。樹以橙。士四尺。樹以槐。庶人無墳。樹以楊柳。今墳無貴賤。皆松柏矣。何能獨栽楊柳。又如婦三月而後廟見。先儒云。未三月尙在可出之條。則三月後縱有大過。不可出乎。又如婦未見廟而死。則以妾禮葬之。夫生爲婦。死爲妾。禮乎。又如年一巡狩。後宮六軍。扈蹕而從。供應騷然。狡逆竊發。卽以舜之德。不能返蒼梧之駕。秦之威。不能還沙丘之尸。則後世又可知也。又如夏月不暴布。恐暑氣入布。人吸其氣以致疾。然今民間多有暴布者。何嘗中暑。又如周禮季春之月。會男女。奔者不禁。是教民淫也。冬月農有不收藏積聚者。取之無禁。是教民盜也。又如寡婦不夜哭。哀至則哭。何晝夜之有大抵古禮有難行者。皆此類。變而通之。則在有識之儒而已。

## 刻畫古人

唐文皇以蘭亭賜歐虞褚薛摹之。四公無一筆似蘭亭者。而結法自合。蓋縱肖亦是右軍以後第二人耳。李于麟摹古樂府。至更其句法。以爲不被古人所因。然讀其易水垓下二歌。其果與荊卿項王情境合否。余嘗謂刻畫古人。是後生第一病。武陵桃花。惟許漁郎問津一次。再跡之。便成村巷矣。禪家公案亦然。不獨詩文也。

## 微細流注

古之得道者。火焚其軀。目睛牙齒。熾然不壞。煙氣所肅。都成舍利。余今蛀齒蒜髮。衰相已現。張天覺云。皆于本分事上。十二時中。不曾照顧。微細流注。生大我慢。此是業主鬼來借宅。東坡云。無罪而得謗。未老而先病。此之謂也。言念及此。不覺涕汗俱下。

聞性不動

凡聲何以近則聞。遠則不聞乎。蓋聲塵遠近於聞性中。聞性無遠近也。譬之像影遠近於鏡光中。鏡光無遠近也。吾身聚散於吾性中。吾性無聚散也。此之謂定。非求定也。本不動故。

瞿谷來巢

魯昭二十五年甲申。夏有瞿谷來巢。註謂此鳥穴居。以來巢爲異。而此鳥本不穴居也。瞿谷卽今牛豕鵲。以夏月孕子。奪其鷗巢。乃羣小凌高大。此季孫不臣。昭公去國之兆。故自夏月書來。卽于當年九月。書公遜於齊。明年公居於鄆。又明年公至自齊。復歸於鄆。又明年公次於乾侯。自是不歸。逾三十有二年。竟死其地。此爲昭公之兆明矣。魯地舊無此鳥。故以來巢爲異。非謂其去穴也。列子云。瞿谷不逾濟。狐逾汶則死。地氣然也。如洛陽本無杜鵑。宋時始至。河水本無龜。石勒時始有。佛圖澄以爲桓溫入河之兆。卽此類也。予聞之于蜀僧湛然云。

史記漢書之別

詩文只要單刀直入。最忌綿密周緻。密則神氣拘迫。疎則天真爛熳。史記之佳處在疏。漢書之不如史記。

在密元畫疎。宋畫密氣韻生死皆判於此。

### 白樂天善處元裴之間

唐穆宗卽位。朱克融王廷湊亂河朔。加裴度鎮州行營招討使。時元楨結宦官魏弘簡求執政。恐裴度復當國。因經置軍事。數持梗不使有功。裴度上書。暴元楨過惡。以爲陛下欲掃蕩幽鎮。先宜肅清朝廷。河朔患小。禁闡患大。臣自兵興以來。所陳章疏。事皆切要。所本書詔。多有參差。蒙陛下委付之意不輕。遭姦臣抑損之事不少。進退皆受羈牽。意見悉遭蔽塞。但欲令臣失所。使臣無成。則天下理亂。山東勝負。悉不顧矣。表三上。上雖不悅。以裴度大臣。不得已罷魏弘簡。元楨近職。俄擢元楨與裴度俱宰相。爾時白樂天交元裴間。相與倡和詩。皆載集中。若使過高之論。樂天宜親晉公而疏微之。然樂天與微之始終無間言。生則觴咏不絕。死則爲微之作墓志。贊嘆不絕。略不露與晉公交惡之狀。親者無失其爲親。故者無失其爲故。道固爾也。若在今日。不以爲趨炎附熱於生前。則以爲匿瑕含垢於死後。將樂天猜作何等人矣。古今人不相及如此夫。春日讀元白長慶二集。感而記之。

### 井田兵法之祖

井田者。古今老師宿儒習稱之。而少年迂而諱言之。諱者固未知姬公所以致太平之遺意。其傳會之而習稱之者。亦非深知井田者也。井田兵法之祖也。蓋其事與田獵相表裏。從論井田。而不兼論田獵。則井田之精神不備。而公經緯姬氏八百年之苦心。亦不明。夫姬之鼎。爨爨乎垂東遷。而後絕者。則井田之兵農合也。其

兵農合者。則田獵之法。聯絡乎其中。以黜夫富強之名。而陰收夫富強之實也。聖人之治天下。其慮長。其謀遠。其法度似疎闊。而實精嚴。其事出乎此。而意實寓乎彼。蓋不特近可以籠匹夫匹婦一時之耳目。即後之老於周官者。日以井田爲聚訟。而終不能名公指所由寓。卽儒者猥云寓兵云爾。然亦終不能舍子輿氏之故聞。而暢公所以寓兵之旨。王者鎮國家。撫百姓。欲以長子孫。而杜姦宄。則不得不用兵。兵不祥之器。而授之血氣好勝之民。則勁悍難使。勢必至于毒民而後已。聖人以爲以兵毒天下。不若以兵教天下。以兵教天下。又不若以兵藏天下。故井田表裏田獵。乃聖人之善藏其兵法于不窺。所謂合之則雙美。而離之則兩傷者也。夫有兵。則有營。有陣。有食。其屯聚有地。其校閱有時。其春夏秋冬晝戰夜戰有法。其興師振旅有禮。凡此者皆兵之大紀也。公使民由之。而不欲使民知之。故後世莫得而詳。然其井田之神巧變化。則散見于車攻七月諸篇。而微隱于周官田獵之制。夫方里而井。井九百畝。自箕子之九疇始也。八家皆私百畝。自宓義之八卦始也。公田居中。爲大將握奇居中央。私田居外。爲正兵以居四正。爲奇兵以居四隅。對敵則正兵迭出。犄角則奇兵互張。止則大營包小營。行則大陣包小陣。斷之而爲三。則吳璘之三疊。出之而爲六。則李衛公之六花。全演之而爲八。則武侯之天地風雲龍虎鳥蛇。而法止矣。雖然。此猶兵家之營陣圖耳。有如授之以圖。而不教之以法。與無兵同。其民日引月長。干爭鬪殺戮之事。而不潛耗其雄心。移易其耳目。與教盜賊同。聖人于是因祭以用獸。因獸以待敵。悉匿其坐作進退之名。而更創其說曰。田獵。吁。公之心亦良苦矣。使公之井田。止於截溝塗而剖封植。則其制誠迂。惟其以田獵輔之而行。則所爲導民于富且強者。甚巧而不露。而千古兵家不傳之祕法。悉藏焉。公

何迂闊之有哉。故春蒐夏苗，秋獮冬獵，以明四時不失職也。質明仆旗，後至者誅，以嚴信誓也。假蘭艾之草，以爲席，置通帛之旃，以爲門，以懼傷馬也。車之入門，礙以車軸，以試其能御也。車軌塵，馬候蹄，以試其能馳也。旌旗金鼓，以畫戰也。選車徒，讀書契，辨名號，以夜戰也。過禽不逐，以示不逐奔也。面傷踐毛不獻，以示不殺迎降也。不成不獻，以示不戮幼穉也。出則少者在前，以示趨敵也。入則少者在後，以示殿師也。有聞無聲，以示師克而和也。酌醴獻賓，以示告廟飲至也。夫公之神巧變化，善藏其兵法於不測如此。當是時，車輿行，三司馬缺而不補，雖蠻夷猾夏，盜賊奸宄，則竟付之士師。若曰：兵者，此不過刑法之屬，不以教我民也。而周之民，亦且泄泄焉。第相謂曰：公所稼穡飽我，又故而角之原野，酪禽之血，搏獸之革，以假我，甚則感嘆而歌咏之曰：雨我公田，遂及我私。又曰：言私其縱，獻豸于公。至于公田，則思君，獻豸則思君，而百姓之願爲公死可知也。常人之情，或反唇于室，而不容不披髮于鬪隣，或構仇于酒杯，而不能不卒然匍匐於拯水火之際，何者？其所居之習然耳。令一井之內，婚娶喪葬，老死不出于其鄉，歲時則相藉，子孫則更抱，人諳其名姓里居，而世共其生死緩急，以此思戰，戰甯有不勝者乎？况溝洫川滄，相錯如織，則不必設地綱以制戎焉。比屋皆土著，則不必立保甲以稽姦僞。民二十而受田，六十而歸田，則不心汰老弱以覈軍籍。田中有廬，疆場有宮，則不必裂地以處師徒。我耘我耔，我黍我稷，我倉我庾，則不必飛千里之芻，輓萬鍾之粟，以給廩餼，轉饋餉。夫今日之國家，其漸趨于貧弱者，爲其以東南之民，驅而養西北之兵也。卒之首與尾兩窮，而富與強俱困。公惟借民以足食，旋借民之食以足兵，無召募揀選而技良，無營堡斥堠而備設，無更番屯戍而居處甯，無牽制觀望而肝膽壹，規疆理爲營陣。

暢鋤挺爲干戈。轉用其所以斃獸者。以爲斃敵之法。上不言。下不覺。百姓日馴。夫狼戾不肖之心。而國家坐享夫數百年全勁之利。老氏曰。非以明民。將以愚之。易曰。寓天下至險于至順。嗚呼。公之意。豈亦本諸此歟。蓋嘗譬之井田。弈局也。田獵之闔闢縱橫。屈伸進退。其變迄于不可勝記。皆所以按其局而布之爲勢也。後世若柳宗元之封建。林勳之本政。其井田純用局者也。狩於郎。兵於崇丘。講武於平樂。觀陣兵於鷗山之下。其田獵純用勢者也。時異世殊。必舉三代之法。以困人主。是又執死勢而覆故局者也。改阡陌。恣游畋。是局殘勢敗者也。新莽以井田飾亂。漢諸帝長楊上林。以田獵飾治。局非局。勢非勢。其不知弈局也。嗚呼。竊獨漢唐以後諸君子。哉。子輿氏之論井田辨矣。公猶得以農事之說籠而掩之。况其下者乎。微獨子輿氏。卽當時但稱師尙父爲善將。而不稱姬公爲善兵。嗚呼。聖人之深于藏法。一至此哉。夫善易者不言易。善兵者不言兵。而後知兵之所以莫測也。故曰井田者。古今兵法之祖也。

顯者隱者

馮瀛王詩云。但知行好事。莫要問前程。邵康節訓子則云。汝固當爲善。亦須量力以爲之。若不量力。雖善亦不當爲也。馮言是顯者事。邵言是隱者事。

客

庚開府詩云。對君俗人眼。眞與理當無。呂文靖詩云。賀家湖上天花寺。一一軒窗向水開。不用閉門防俗客。愛閑能有幾人來。予山中閉門時。嘗以庚之詩謝客。客來時。嘗以呂之詩自慰。

## 賈生不知易理

賈誼負王佐之才。而漢文不用。論者惜之。但賈生不知易耳。當漢文帝時。黎民新出湯火。只宜一味清淨。清淨惟老成人知之。少年不悅也。易革卦後。受之以鼎。鼎卦後。受之以震。震動也。物不可以終動。故震卦後。又受之以艮。漢秦之交。革故鼎新。而天下大震矣。文帝要休息。艮卦也。賈生要制作。震卦也。曹參師事蓋公。但云治道貴清淨。而民自定。參守之。治齊濟治。代蕭何入相。治漢漢治。卽景武時。竇太后一婦人身。喜老子言。不悅儒術。病免申公。又怒轅固。使之入圜擊豕。彼其君臣母子之間。灼見天下已定。儒者之多事。不如黃老之清淨。賈生少年。上書如建明堂。如改服色。如削諸侯。如伐匈奴等類。却當艮止之時。而欲紛紛爲鼎新震動之舉。此豈文帝所樂聞者。文帝憐其才名。但更端與之談說鬼神。以書生畜誼而已。其後嚴安。徐樂。主父偃。皆祖其餘說。以取富貴。此又艮卦之後。而遇漸卦。蓋至此方漸漸可行矣。然武帝行之。漢之元氣幾耗大半。况賈生時哉。賈生之言。非不切中國事。但下手太早。神仙家專重火候。早則過嫩爲文。遲則過老爲武。文武得宜。乃鼎鉉調元手也。賈生雖俊傑。而實不識時務。謂之大秀才。則可。謂之王佐才。則未也。朱晦翁云。賈誼固有才。文章亦雄偉。只是言語急迫。失進言之序。都一齊說了。且如一間破屋。教自家修。須有先後緩急。若一齊拆下。雜然並修。豈有此理。看他會做事底人。如韓信。鄧禹。諸葛孔明輩。先有一定規模。漸漸做將去。皆卓然有成。賈誼胸次。終是鬧著。有些子在必中。盡要迸出來。只管跳躑爆越不已。如乘生駒相似。制御他未下。所以言語無序。而不能有所爲也。易曰。艮其輔。言有序。悔亡。聖人之意可見矣。此極中賈誼之病。余笑曰。如賈生者。非特勸人拆屋。且

又勸人拆了新屋。另行改造一番。主人如何聽他。文帝之不用賈生。正與蕭何用曹參相反。賈生治安策。正與文帝答尉陀書相反。

微子

武王遷頑民於洛邑。封箕子于朝鮮。朝鮮遼海外徼。去關洛東西數千餘里。名雖不臣。實有屏諸四夷。不與同中國之意。武王封兄弟之國十五人。姬姓之國四十人。周之子孫不狂惑者。皆爲諸侯。獨箕子却忍置之海外。其隄防疑慮可知也。武王虛已問殷所以亡。曰。吾殺紂。是歟。非歟。箕子不忍言紂惡。而王亦醜之。乃問以天道。作洪範。夫君父之頭。懸之太白。箕子又爲宗室懿親。問則泣謝而已。洪範之陳。是亦不可以已乎。或曰。夫子稱殷有三仁。何也。余曰。箕子既已徃狂受辱。則洪範豈徃狂之人所能撰乎。蓋此仁字非朱紫陽至誠惻怛之解。論語如此仁字凡三見。并有仁焉。又觀過斯知仁矣。又其爲仁之本歟。仁當作人看。夫子曰。殷有三仁。蓋言殷有三人如此。其是非非。具眼者自能辨之。嗟乎。余於此蓋有三恨。箕子嘗欲立微子。帝乙不從而立紂。一恨也。武王既殺紂。何不立微子以存商。二恨也。微子不可。則武庚未聞失德也。不立武庚。而自爲之。三恨也。微子武庚且然。其肯封箕子于中國。以爲頑民倡耶。先輩云。洪範疑從河洛翻弄出來。卽五行五事之類。啓後世卜筮支離穿鑿之門戶。且洪範與丹書並稱。今箕子洪範獨著。而太公之丹書不列于尙書。是皆可疑也。宋陸務觀云。傅子駿爲學者言洪範。自無偏無黨。至歸其有極三十二字。皆古所傳。三十二字外。吾不知其他矣。此言大駭人。適與門人講三仁章。姑志于此。又思奴者。臣僕之謂也。箕子忘商而臣周。夫子蓋不滿焉。朝鮮之



封。武周思患甚遠。本朝洪武五年。安置歸德侯陳理。歸義侯昇於高麗。亦是此意。理陳友諒子。昇明玉珍之子也。初二侯賜第都下。居常鬱鬱不樂。頗出怨言。上聞之曰。此童孺輩。言語小過不足聞。但恐爲小人鼓惑。不能保始終。宜處之遠方。則隳隙無自生矣。於是徙之高麗。仍賜高麗國王紗羅文綺四十八疋。俾善待之。高麗者。卽箕子所封朝鮮也。

### 周公善風水

風水聖人所不論。要之伯禽封魯。周公畢竟有意思在。唐一行云。天下盡于南北兩戒。北戒負終南地絡之陰。爲黃河之源。所以限戎狄也。南戒負終南地絡之陽。爲長江之源。所以限蠻夷也。北有黃河。南有長江。夾出中間大地。是曰中條。中條之西曰豐鎬。卽古雍州也。其地山川最險。王氣最盛。故文王都豐。武王都鎬。旣先占第一形勢以爲根本。由豐鎬至洛邑。中天下而立。風雨時。陰陽會。道里均。周公又奉成王定鼎于洛邑。祀清廟。而朝諸侯。蓋豐鎬上應太薇垣。爲天下之至險。洛邑上應紫微垣。爲天下之至中。姬氏父兄皆據而有之。其中條。黃河長江夾至盡處。忽到青徐。泰山插天。逆水西向。把住水口。何等力量。何等精采。自元人塞北河。泰山今在河北。其初泰山之左。有河濟入海之道。泰山之右。有江淮入海之道。故道未塞。齊魯原在黃河長江夾流中。算做中條盡處。周公之子伯禽。却又分封于此。看來天下大勢。惟有南戒北戒。南戒北戒。惟有黃河長江。黃河長江。惟夾得中條。中條以豐鎬爲首。洛邑爲腹。青齊爲尾。而周公曉暢天下地脈。一時收拾將來。其後七百餘年。東魯地脈不衰。又生出大聖人如孔子者。以發明文武周公之道。千萬世而下。至今隱隱躍躍如在目前。

周公可謂不死矣。齊與魯並封。齊先滅。魯後亡。固見地脈悠遠。然既生孔子。又生顏曾諸人。一片王侯大地。變作賢聖道場。非果是中條盡龍。何以有此。漢書云。闕里當奎分。又占東壁。奎與東壁。乃天上圖書府也。異哉。乃知周公相地眼力亦復不淺。直將山河大地。攪做一團。分枝孽脈。如解牛破竹相似。嘻。真至人也。故曰。周公之才之美。或曰。太王之遷岐也。詩云。周原膺膺。萑荼如飴。爰始爰謀。爰契我龜。又云。既溥既長。既景乃岡。相其陰陽。觀其流泉。太王相地如此。武王之都鎬也。詩云。考卜維玉。宅是鎬京。維龜正之。武王成之。武王相地又如此。周公風水自是家傳。言及不覺噴飯一笑。

大養濟院

佛氏一教。歐陰永叔有正本論。胡康侯有崇正辨。此佛氏之攻輸也。李純甫有鳴道集。張天覺有護法論。此佛氏之守墨也。馬鈞陽欲駁之以充戶口。此以佛氏富國者也。丘瓊山欲藉之以實軍伍。此以佛氏強兵者也。王文康著大同論。此又爲佛氏調停者也。余獨曰。佛氏者。朝廷之大養濟院也。我明設養濟院。以養無告也。然州縣不過一二百疲癯殘疾止矣。其外少壯而貧。終身不能溫飽。婚娶者不知幾千萬人。幸佛教一門。收拾此輩耳。夫今之僧。非眞忍于離父母。去妻子。叛名教。而思以易天下也。大都貧賤無聊。計無復之。眞所謂天下之窮民而無告者。窮漢而欲人人婚配能乎。賴彼教設爲出家以清淨之。人人授廩能乎。賴彼教設爲寺院以散處之。人人鮮衣肉食能乎。賴彼教設爲緇托鉢以淡泊之。人人誦詩讀書能乎。賴彼教設爲諷經說法以曉暢之。人人裹糴以游能乎。賴彼教設爲十方接衆以津致之。又恐羣處易蠹。則清規以肅之。狂心易熾。則苦

行以練之。血氣易爭。則慈悲忍辱以下之。憎俗易溷。則髡髮刈髻以別之。既代王者養此窮漢。又代王者教此窮漢。若使此等窮漢而無佛門收拾。天下還要增却許多乞丐。許多盜賊。國家還要增却許多賑濟。許多隄防。蓋佛教得力處。正朝廷省力處也。天地所重。重在活人。活人之門。無過佛教。此若有天意主持其間。不惟學士大夫闢他不去。卽自古帝王亦剷除此教不得。往往生出神僧散聖。激揚宗旨。簸弄神通。化愚成信。轉怪爲捨。無非善巧方便。主于活此窮漢而已。况此窮漢中。其最上者。原能打徹心性。直與聖賢齊肩。其次雲行鳥飛。火耕刀種。信因果。護戒律。又其次則白頭黃項。衣食老死于其中。蠢且弱者。無殍餓溝壑之憂。強且黠者。無嘯聚潢池之禍。人相忘于僧。魚相忘于水。藏僧于僧。乃所爲藏天下于天下也。嗚呼。三代以上。聖人多。百姓少。卽王者懸法不用。而又何藉于佛法。三代以後。井田學校廢。而民輕去其鄉。宗法廢。而族無以相統。黨正族師之職廢。而比伍閭族無所聯。吉凶緩急無所賴。則不得不投佛教以求生路。而其徒遂至于日盛一日。非其徒之日盛一日。以百姓日多一日也。聖人少。百姓多。雖天地且不能人爲之區處。而家爲之經畫。故以衣冠文物之子弟。使儒家任之。以鰥寡孤獨之子弟。使佛家任之。道家又以長生延年之設。歌動乎其間。以收佛氏之剩餘。而窮漢依託以就活者不少。佛家分儒家之勞。道家又分佛家之勞。蓋天地之苦心。而聖人之神道設教。無以加矣。是故窮士木飾金玉以佞佛。非也。毀坊寺。誅沙彌。以滅佛。亦非也。以儒闢禪。非也。以禪論儒。亦非也。但曰佛門者。朝廷之養濟院也。而一味歸于天地生人之心爲主。則不惟不敢爲我敵。而反爲我用。豈非渙小羣而爲大羣者哉。至其大差別處。則東華西竺之教。判然各爲一家。如文字不相知。西方文字橫行。從左至右。東方文

字直行。從上至下是也。如音聲不相通。西方以宮商角徵羽。平分五音。東方以平上去入。直通四聲是也。如語言不相入。西方從合。一音中有一合二合至六合者。東方從離。一聲唯有一字是也。如刑法不相攝。西方以呪誓爲刑。東方以笞殺爲刑是也。如天文不相習。西方日道從緯。以南北爲度。東方日道從經。以東西爲度是也。由此觀之。佛自佛。儒自儒。彼而爲我亦不能。我而爲彼亦不易。其所同者。不過借西方眼前之粗跡。以博區區之窮活計耳。而說者謂佛教入中國。其勢必至于率天下之人。盡化而爲夷狄禽獸。則亦視之太深而憂之太過也。夫無父無君。誠無容于盛世。然世衰民窮。不得已而俗遂求活于佛氏。是亦君父之所憐而許之者也。

眞四皓

昔留侯招四皓從帝酒間。調護太子。帝與戚夫人爲楚舞。嘯噓流涕。醉歌鴻鵠數闕而罷。俗儒謂此四皓者。良教之。僞託以劫帝者也。予謂四人者非神仙。亦人間人也。是真四皓也。當秦坑焚時。魯兩生嘗負禮器。輕千里逃之海。尉繚亦曰。秦王蜂隼鷲膺。豺聲狼心。得志則輕食人。不可與交游。乃亡去。垂五百年。至晉而猶有桃源避秦諸人。乃知秦之迫天下之士。而老于深山斷崖者。非獨四皓也。四皓即魯兩生尉繚之徒耳。良少年志在報讎。家僮三百。弟死不葬。悉散黃金收海內客。客有奇。伏在草莽如四皓者。良必歡然投結。結爲死友。友天下士。而不知商山老人何以稱子房哉。博浪一稚。祖龍褻魄。掉舌入沛。卒爲帝師。四皓胸中亦有子房久矣。水濕火燥。鐵子磁母。大丈夫意氣相感。千里神交。片言調合。四皓不爲漢屈。獨不爲子房屈乎。汜上黃石一遇。橋下傳書三卷。赤松居崑崙。上下風雨。乃欲從之。辟穀爲采眞游。學禮淮陽。東見滄海君。竟得力士授以椎法。

此三人者神仙也。而子房從容委蛇如交人間人。了不爲異。况四皓采芝行歌。近在商山之間者哉。俗儒齷齪。仰視四皓以爲鴻飛鳳嘯。不可網羅。卽寵準沛公。馴習蕭曹韓彭之骨。如降犬羊而飼鷹兔。獨難狎一鬚眉皓白。無所事事之老叟。今子房一布衣耳。招置四皓。譬若操舟。隨左而左。隨右而右。此無他。蓋良之報讎。天下豪傑。無不諒其忠義感憤之心。而憐其間關匍匐之苦。黃石赤松。滄海神人。且相與呵護而擁衛之。則四皓可知矣。西逐秦鹿。南烹楚猴。良皆爲韓而不爲漢。皆用帝而不爲帝用。至于一且志行讎雪。功遂身退。良之意終未安也。既借漢以報韓讎。則必欲借四皓以報漢德。四皓不出。則儲不定。儲不定。則漢之天下存亡不可知。不可知。則良之辭漢不決。四皓而念及子房始終之心事。及子房之固以請也。亦何忍入山深。入林密哉。伍員之報楚也。蘆中丈人。浣紗女子。至覆舟沉瀨。以示無恐。要離專諸。燔妻斷臂。死而不顧。子胥讎在父。歎君子慷慨俠烈。不難殺身以左右之。子房讎在君。讎獲伸而德未報。四老人安得徘徊上車。不爲子房一出也。陳留風俗傳言。圜公爲秦博士。避地南山。漢祖聘之不就。惠太子卽位。以圜公爲司徒。宋時商山翁。鑿地得漢石數種。有隸書。圜公角里先生姓字。圜公者。蓋東園公云。則四皓之非僞托斷斷可知矣。大抵高祖以亭長起家。漢事多得諸父老力。若董公及戾太子。壺關三老是也。三老遮說時。子房去漢久矣。此又誰爲之。吾故曰四皓者是眞四皓也。

### 錢塘潮

余嘗同一名衲雪公。同登杭州六和塔。觀錢塘潮。雪公云。文章之氣。得如此潮足矣。余曰。文章固貴養氣。

然須有首尾。而氣不衰。乃是全文。卽如錢武肅王始築捍海塘。潮水晝夜衝激。因命強弩數百以射潮頭。潮水避錢塘。東擊西陵。遂成涯岸。秦始皇氣壓一世。鞭石流血。由雲夢九疑。浮江過丹陽。至錢塘。錢塘水波惡。不敢渡。乃轉西北二十里。從峽中上會稽。後竟崩于沙丘。同一錢塘也。錢武肅以偏霸之主。射潮潮退。秦始皇以併吞六國之威。躊躇四顧。而不敢渡者。何也。蓋錢武肅初霸。一日興。一日生。氣也。秦始皇垂崩。一日衰。一日死。氣也。文章有首無尾者。皆此類。卽以此看人貴賤壽夭。恐亦不錯。

### 五帝祀

魏崔山云。自五帝之說興。而上帝之尊稱不明。妄人小子。輒撰名號。以襲天。自秦創四時。有白帝之說。浸淫爲四。而漢高又增黑帝爲五帝。文帝武帝。又有新垣平之五帝。又有謬忌之五帝。又有玉帶汶上明堂之五帝。此五帝之所由起也。大約謂天無二日。民無二王。昊天上帝而外。復有五帝。豈有此理。詩書不言五帝。而周禮獨言五帝。此出于劉歆鄭康成之附會。陳祥道又從而強爲之說。魏崔山之見良是。余則謂上帝者。天也。郊之所祭也。五帝者。五行也。時之所祭也。天無言而以五行爲用。如春爲青帝。夏爲赤帝。秋爲白帝。冬爲黑帝。中央爲黃帝是也。漢言時而不言郊。則五帝何會與昊天上帝並哉。或云五帝卽不得與上帝並。金木水火土。此代天爲政者也。何得以帝尊之。余曰。莊子不云乎。是時爲帝者也。易不云乎。帝出乎震。齊乎巽。相見乎離。致役乎坤。說言乎兌。戰乎乾。勞乎坎。成言乎艮。震兌坎離。而以帝字冠之。則五行未嘗非帝也。以五行爲五帝。而以天爲上帝。此或出于周禮之義。而惜乎崔山未之考也。

### 客星非子陵

客星者一曰周伯。一曰老子。一曰王蓬絮。一曰國皇。一曰溫星。凡五星皆客星也。行諸列舍。十二國分野。各在其所臨之邦。所守之宿以占吉凶。周伯大而色黃。煌煌然。見則其國兵起。若有喪。天下饑。衆庶流亡。去其鄉。老子明大色白。焯焯然。所出之國爲饑。爲凶。爲善爲惡。爲喜爲怒。見則兵火起。人主有憂。王蓬絮狀如粉絮。拂拂然。見則其國兵起。若有喪。白衣之會。其邦饑亡。國皇星出而大。其色黃白。望之有芒角。見則兵起。國多變。若有水饑。人主惡之。衆庶多疾。溫星色白而大。狀如風動搖。常出四隅。出東南。天下有兵。將軍出于野。出東北。當有千里暴兵。出西北亦如之。出西南。其國兵喪並起。大水人饑。凡客星見其分。若留止。卽以其色占吉凶。星大事大。星小事小。光武時太史奏客星犯帝坐。蓋不祥之言也。光武解劍羣疑。笑以子陵同臥當之。其巧如此。而讀史者。遂以子陵上千象緯。其亦未考天官書耳。然光武下賢一節。儘可反咎爲祥。雖指客星爲德星。可也。

### 重陽縹緲樓

王元美先生以重陽母忌不登高。往乙酉閏九月。招余飲弇園縹緲樓。酒間座客有以東坡推先生者。先生曰。吾嘗敍東坡外紀。謂公之文雖不能爲我用。而時爲我用。意嘗不肯下之。余時微醉矣。笑曰。先生有不及東坡者。一事先生曰。何事。余曰。東坡生平不喜作墓誌銘。而先生所撰志不下四百篇。較似輸老蘇一着。先生大笑。已而偶論及光武高帝。先生云。還是高帝闊大。余曰。高帝亦有不及光武一事。高帝得天下後。枕宦者臥。光武得天下後。却與故人子陵嚴先生同臥。較似輸光武一着。公更大笑。進三四觥。扶掖下樓。憶光此時景。

頗覺清狂如此前輩了不可得。

天書傲遼俗

宋澶淵既盟封禪事作祥瑞沓臻。天書屢降。一國君臣如病狂然。吁可怪也。他日修遼史。見契丹故俗。而復推求宋史之微意。宋自太祖幽州之敗。惡言兵矣。契丹其主稱天。其后稱地。一歲祭天。不知其幾獵。而手接飛雁。雁自投地。皆稱爲天賜祭告而誇耀之意者。宋之諸臣。因知契丹之習。又見其君有厭兵之意。遂進神道設教之言。欲假是以動敵人之聽聞。庶幾足以潛消其窺伺之志。與然不修本以制敵。又效尤焉。計亦末矣。其後徽宗嘗諷道籙院言。朕乃上帝元子。在天爲神霄玉清宮長生大帝君。憫中華被金狄之教。懇請於上帝。下降人世爲人主。令天下歸于正道。於是羣臣與道籙院上章。冊帝爲教主道君。未幾女真起自夷狄。建號大金。蕩覆中華。斯言若爲之先兆也。唐僖宗紀年爲廣明。是時黃巢初起。曰。唐去君而存黃以爲廣。此黃巢當代唐之徵。後之論者。謂天託昏主。以告亡于世。徽宗之言。豈不類此。蓋徽宗之崇尚道教。得之真宗也。真宗之崇尚天書。得之契丹也。故曰。知風之自可懼哉。

清獄

余二十年前闔蓬頭愛余。謂可學道。令讀許真君太陽元精論。自是卽大暑。輒能坐臥赤日中。年來嬾習此法。頗以炎蒸爲苦。卽做堂匡池。高梧修竹。陰暎翳然。往往移榻卷簾。遷徙不常。如絕無養者。內甚愧之。因思此時田野耕耘。道塗推挽。老病呻吟。衣食奔走。其匍匐昏仆狀。殆不可言。又思獄中人。無寬閒澡浴之樂。而但



增穢雜疫痢之苦。轉視此等。又如天上人耳。京師輦轂之下。每年奉旨熱審。其餘兩直十三省。未有請而行之者。若得仁人君子。上疏奏請。定爲永例。或不然。輔臣與廷尉司寇議之。部寺牒撫按。撫按牒郡縣。擇其未減之罪。清理一番。其重囚在繫者。務遣的當幕官。嚴督獄卒。洒掃囹圄。洗滌枷杻。以廣聖天子好生之仁。暑月中聽民務農。無得濫受狀詞。無得輕率羈候。不時吊取監簿。查考囚數多寡。以爲治狀高下。務使眼前火坑。化作清涼世界。此只在當路者念頭動。舌頭動。筆頭動。一霎時身。若輔臣不可必。廷尉司寇得爲之。廷尉司寇不可必。撫按得爲之。撫按不可必。郡縣得爲之。但早一日。則一日之甘露也。行一方。則一方之甘露也。推而至乎兩直各省。在在皆然。則普天之甘露也。至于十月刑決以後。一陽初生。陰氣尙肅。饑寒交割。尤爲可憐。更得仁人君子。憐而并請之。或當路者。先期牒下。如熱審之例。則一冬一夏。兩沾聖恩。功德何可量哉。余嘗嘆天地間。殺人最多者。有三件。曰死于刑。死于兵。死于歲。曾與包羽明集古來爲吏不酷者數卷。爲將不殘者數卷。救荒不倦者數卷。總題曰種德錄。以藏于家。

### 韓岳得先手

吾友盛伯靈問余曰。國朝成平。添增一二萬兵。兵戶二部。皆有難色。南宋偏安一隅。且當金人括盡金幣之後。倉庫貧窶。里巷蕭條。史傳嘗言。某將兵幾十萬。某處兵又幾十萬。不知何從得許多兵。兵既多。又不知何從得許多餉。此皆不可曉。余曰。凡下碁。只要先手。韓岳諸公之先手。在收復諸盜賊耳。南渡之後。紀綱既弛。巨寇讜起。呼集惡少。以爲兵。剽奪城邑。以爲餉。其中實有草澤英雄在焉。若得籠而用之。盜之兵。卽我兵也。盜之

餉卽我餉也。故猿狙可使馴，虎象可使戰，烏菟野葛，可使起沉痾而代良藥。况凡有血氣者乎？吾常查宗澤傳。宗澤平湖東賊王善，得衆七十萬，車萬乘，平浚角牛賊楊進，得兵三十萬。平王再興、李貴、王太郎等，又得兵三萬。而河東京西淮南河北之侵掠息矣。共算宗公得賊兵一百三萬。查韓世忠傳，世忠平緇青、李復賊黨，得兵萬餘。平廣西賊曹成，得兵幾萬。平白而山賊劉忠，又得兵萬餘。而緇青、閩、廣、河南之賊，侵掠息矣。共算韓公得兵十萬。查岳飛傳，岳飛平武陵賊孔彥丹、襄漢賊張用、江淮賊李成、筠州賊馬進，得兵幾萬。降嶺賊曹成，得兵十餘萬。平吉賊得兵數千。又平湖賊楊么，得十萬餘。而江淮嶺表襄陽之侵掠息矣。共算岳公得兵二十萬。其他如二張、劉琦等皆類是。不暇悉數。大約乘輿播遷，京都不守，詔天下小則團練，大則勤王。團練勤王之名既起，則奸雄借名生奸，而盜賊縱橫矣。此輩善招諭之，則爲我用，不善招諭之，則爲敵用。又有不在我，不在敵，中立觀望者，往往抄劫村墟，梗絕道路。故宗、韓、岳請公，未及與金人挑戰，先收山砦、江海間盜賊，盜賊既服，則百萬之兵餉，皆不煩經營措置矣。然後鼓動其豪傑之壯心，撥轉其忠義之正氣，摧鋒陷陣，所向無前。此韓、岳諸公苦心之極也。漢董卓黃巾之變，二袁、孫、曹皆以勤王起兵。唐黃巢之變，朱李皆以勤王起兵。宋南渡之後，廣之東西、湖之南北、福建、江淮，越數千里，無不勤王。而賊之借名者亦不少。非韓、岳諸公招諭誅討，安知無溫燥復生其間？今人但知韓、岳諸公之善戰，而不知其得百戰百勝之根本，則以先手平服諸盜故也。是故無大寇，不可輕許團練，無大危，不可輕詔勤王。團練聚而難散，勤王來而難去。邪正之間，間不容髮。古人草廬中正，着眼觀察，此輩耳。

### 李鄴侯保韓滉

唐人中余極愛鄴侯李泌。每讀泌傳。其子繁以冤死。爲之痛恨。李繁爲隋州亳州刺史。州劇賊爲患。繁有機略。捕殺之。舒元與繁素隙。反坐以濫殺不辜。詔賜死。繁下獄。恐先人功業泯滅。從吏求廢紙。握筆著家傳十篇。嗟乎。痛乎。泌之勳勞。載在史書。不具論。論其不甚著者。如力保韓滉一事。關繫中興事業甚大。當朱泚圍奉天經月。城中資糧俱盡。德宗嘗遣健步出城覘賊。其人懇以苦寒爲辭。跪奏乞一襦袴。上爲之尋求不獲。意闕然而遣之。時供御纔有糲米二斛。每伺賊之休息。夜縋人于城外。採蕪菁根而進之。當時只有糧餉極難極苦。韓滉嘗從間道轉漕。又獻練十萬疋。請以鎮兵二萬討賊。李希烈陷汴州。韓滉又遣將發勦卒萬人。破走竊陵賊。漕路賴以無梗。李晟屯河北。韓滉又運米餽之。船置千弩以相警。賊不得剽。後以修繕石頭城。德宗疑其異志。李泌力辯之曰。滉公忠清儉。自車駕在外。滉貢獻不絕。且鎮撫十五州。盜賊不起。滉之力也。所以修石頭城者。滉見中原版蕩。謂陛下將爲永嘉之行。爲迎扈之備耳。此乃人臣忠篤之慮。奈何更以爲罪乎。德宗云外。議洵洵。章奏如麻。卿勿聞乎。對曰。臣固聞之。其子臯爲考功員外郎。今不敢歸省其親。正以謗語沸騰故也。德宗曰。其子猶懼如此。卿奈何保之。對曰。滉之用心。臣知之至熟。願上章明其無它。乞宣示中書。使朝衆皆知之。德宗曰。朕方欲用卿。亦何易可保。慎勿違衆。恐並爲卿累耳。泌退。遂上章。請以百口保滉。德宗謂泌曰。卿上章已留中。雖知卿曰滉親舊。豈得不自愛其身乎。對曰。臣之上章爲朝廷。非爲身也。今天下旱蝗。關中米斗千錢。倉廩耗竭。而江東豐稔。願陛下早下臣章。以解朝衆之惑。而諭韓臯歸覲。以解其自疑之心。使滉速運糧儲。以

救朝廷。德宗云。善。朕深諭之矣。卽下泌章。令韓臯謁告歸覲。面賜緋衣。諭以卿父比有謗言。朕今不復信矣。臯至潤州。愧感悅流涕。卽日自臨水濱。發米百萬斛。聽臯留五日。卽還朝。臯別其母。啼聲聞于外。滉怒。召出撻之。送至江上。冒風濤而遣之。旣而陳少游聞滉貢米。亦貢二十萬斛。上謂李泌曰。韓滉乃能化陳少游亦貢米矣。對曰。豈惟少游。諸道將爭入貢矣。此是乙丑閏月事也。其後二年春正月。關中倉廩竭。禁軍脫巾呼道。德宗憂之甚。會韓滉運米三萬斛至陝。李泌卽奏之。上喜。遽至東宮。謂太子曰。米已至陝。吾父子得生矣。時禁中不釀。命于坊市取酒爲樂。又遣中使諭神策六軍。軍士皆呼萬歲。卽此時。德宗若無韓滉。便無江東糧餉。無糧餉。便無關陝。不惟安頓六軍。且又保全德宗父子。泌之功無以加矣。無論李泌。如韓臯歸省。韓滉五日遣還。母子啼別。破浪渡江。此一段光景。眞使人可悲可涕。糧船臨江。韓滉顧謂衆曰。天子蒙塵。臣下之恥也。乃自舉一囊。將佐爭負之。此一段光景。眞使人可悲可涕。泌百口保滉。反覆千言。不疑不懼。此一段光景。眞使人可悲可涕。李繁獄中作家傳。此一段光景。眞使人可悲可涕。嗟乎。泌歷事三朝。再造唐室。骨肉未寒。一子賜死。命下之日。無一老臣宿將。門生故吏。爲鄴侯請留其血胤者。此皆余所不解。比時周會一部將耳。以死李希烈之難。詔雖三世有罪。當降一等。曾無後。以五十戶封其兄之子。以五十戶封其女。憲宗時。李錡反。伏誅。又欲誅其兄弟。廷議曰。錡兄弟故都統國貞之子也。國貞死王事。豈可使之不祀。詔許之。以鄴侯之勛勞。又在李國貞周會之上。雖其子大無道。尙當十世宥之。况捕劇盜而遂以濫殺死賜死乎。上不得比周會。下不得比李周反賊。繁之死也。吾不恨舒元興。恨曩時鄴侯故人安在。

## 童貫書畫

宣和畫譜中載童貫喜畫。其略云。貫父湜雅好藏畫。一時名手如易元吉。郭熙。崔白。崔鷖輩。往往資給于家。貫侍父獨得其妙處。或見筆墨在傍。則弄翰游戲。瀟洒自然。若宿習而非求合也。自古之用兵者。如諸葛孔明。亦能畫。故八陣圖之形勢。見于分布。粲然可觀。如馬援聚米爲山川。亦有畫意。豈非方寸明于規畫。不期乎能耶。貫于此亦然。貫策功遼鄴西鄙間。拔城馘醜。不見運動之迹。而能寬惠慈厚。人率歸心。號爲著脚赦書。蓋言其所至推恕。有恩厚以及物也。今貫歷官任太傅。山南東道節度使。領樞密院事。陝西河東等路宣撫使。封涇國公。御府所藏畫凡四。據畫譜所載如此。度爾時貫未伏誅也。其後靖康戊寅。金人叛盟。都城洶洶。日中有赤氣隨日出。梟童貫首于都市。然則武侯伏波安在哉。書畫一小事。握筆者如此形容詔諛。則宋之文章士習可知矣。是日既誅童貫。即賜尹焯爲和靖處士。尤可謂不急之務。宋之亡不亦宜乎。

## 唐制科八十餘目

考唐制舉科。載正史者凡八十有餘。世以唐爲詞賦取士。可笑也。有志烈秋霜科。幽素科。詞彙文律科。岳牧舉詞標文苑科。著文藻之思科。抱儒素之業科。臨難不顧。狗節寧邦科。長才廣度。沉迹下僚科。文藝優長科。絕倫科。拔萃科。疾惡科。龔黃科。才膺管樂科。才高位下科。才堪經邦科。賢良方正科。抱器懷能科。茂才異等科。文以經國科。藏名負俗科。文經邦國科。藻思清華科。寄以宣風。則能興化變俗科。道伴伊呂科。手筆俊拔。超越流輩科。直言極諫科。哲人奇士。逸倫屠釣科。良材異等科。文史兼優科。文儒異等科。博學通議科。文詞雅麗科。

將帥科。武足邊科。臯澤自舉科。才高未達。沉迹下僚科。博學宏詞科。多才科。王霸科。知謀將帥科。文詞秀逸科。風雅古調科。詞藻宏麗科。樂道安貧科。諷諫主文科。賢良方正。能直言極諫科。文詞清麗科。經學優深科。高蹈丘園科。軍謀越衆科。博通文典。達于教心科。諳洞韜略。堪任將帥科。清廉守節。正直可稱。堪任縣令科。孝悌力田。聞于鄉閭科。博通墳典。達于禮教科。詳明正直。可以理人科。才識廉茂。明于體用科。達于吏理。可以從政科。軍謀宏遠。堪任將相科。博通墳典。達于教化科。詳明吏禮。達于教化科。軍謀宏遠。材任邊將科。軍謀宏遠。堪任將帥科。楊升庵云。胡子厚與深論詩曰。人有恆言曰。唐以詩取士。故詩盛。今代以經義選舉。故詩衰。此論非也。詩之盛衰。係於才與學。不因上之所取也。漢以射策取士。而蘇李之詩。班馬之賦。出焉。此豈係于上乎。屈原之騷。爭光日月。楚豈以騷取人耶。况唐人所取五言八韻之律。今所傳省題詩。多不工。今傳世者。非省題詩也。升庵之言。其亦未考乎。唐之科額乎。葉石林云。五代梁唐晉漢。四世人才無一可道者。蓋唐之進士。不過明經進士兩漢士也。石林亦如此論。皆未考之故。

于忠肅會讀書

英宗土木之變。于忠肅公曰。吾國失一君。復立一君矣。此一見左傳。楚人仗兵車。執宋公以伐宋。宋公謂公子目夷曰。子歸守國矣。國子之國也。吾不從子之言。以至乎此。公子目夷復曰。君雖不言。國固臣之國也。于是歸設守械而守國。楚人謂宋人曰。子不與我國。吾將殺子君矣。宋人應之曰。吾賴社稷之神靈。吾國已有君矣。楚人知雖殺宋公。猶不得宋國。于是什宋公。宋公什執走衛。公子目夷復曰。國爲君守之。君曷爲不入。然後

逆襄公歸。又再見藺相如。廉頗傳。傳云。秦王使使者告趙王。欲與王爲好會于西河外滹池。趙王畏秦。欲母行。廉頗藺相如計曰。王不行。示趙弱且怯也。趙王遂行。相如從。廉頗送至境。與王訣曰。王行。度道理會遇之禮畢。還不過三十日。三十日不還。則請立太子爲王。以絕秦望。王許之。又再見王。且傳云。契丹犯邊。從幸澶州。雍王元份留守東京。遇暴疾。帝命且馳還。權留守事。且曰。願宣寇準。臣有所陳。準至。且曰。十日之內。未有捷報。當如何。帝默然。良久曰。立皇太子。這三事。于忠肅從此變化出來。宋時徽欽之禍。一味報讎。而虜亦得挾二帝以爲重。增金割地。稱姪稱臣。而究竟無補于亡。只是不會讀得此書耳。且英宗南還。使郟王能如目夷公子之遜國。便成一篇好文字。而士大夫無有一言及此者。惜哉。

眉公先生晚香堂小品卷之二十四終